

ივანე ჯორჯიანი

საქართველო  
საზოგადოებრივი  
მეცნიერებათა  
აკადემია

თარგმანი  
და  
შეფასება  
მ. ჯორჯიანი

მ. ჯორჯიანი

ივენი გოგუთელი

სიქული

თეფულიანი

ტოპი II

ქულიანი

ლიტონურიანი

დექულიანი

# ახალი გზა

(„ქამუშაძის გაკირვება“ დ. კლდიაშვილისა)

## I

ქართველი მწერლის ხვედრი სწორედ რომ გასაოცარია და მასთან სამწუხაროც: გარდა იმისა, რომ ის ძვირად არის იმდენად ნაყოფიერი, როგორც ევროპის მწერლები, მის ნიქს ზრდა სრულებით არ ეტყობა: გამოვა თუ არა სამწერლო ასპარეზზე, ის მალე იქცევეს საზოგადოების ყურადღებას, პირველ წლებშივე შექმნის თავისი კალმის საუკეთესო ნაწარმოებს, შემდეგ და შემდეგ კი უარესს თუ დასწერს, თორემ უკეთესს ძვირად. ნიქის იმ თანდათანობით განვითარებას, რომელიც ევროპის მწერლობაში ჩვეულებრივი მოვლენაა, ჩვენში ძვირად შეამჩნევთ. იშვიათ მწერალს შეხვდება ჩვენში იმ იმედების გამართლება, რომლებსაც მისი მოღვაწეობის დასაწყისი გამოიწვევს ხოლმე საზოგადოებაში. სიამოვნებით უნდა აღვნიშნოთ, რომ დავით კლდიაშვილი ამ იშვიათთა რიცხვს ეკუთვნის. გამოვიდა თუ არა სამწერლო ასპარეზზე, მან მაშინვე დაიმსახურა საზოგადოების ყურადღება, და მას აქეთ მისი ყოველი ნაწარმოები უშუქს ჰყენს ჩვენს ცხოვრებას, მკითხველს ყოველთვის რასმე ახალს აწვდის ამ ცხოვრებიდან. ჩვენს ცხოვრებას ის სრულიად ობიექტურად უყურებს, ხატავს მას მიუდგომლად, ისე, როგორიც თვით ცხოვრებაა; ის შავი და მწარე ფიქრები, რომლებსაც მასში ამ ცხოვრების ზოგიერთი მხარე იწვევს, სრულებით არ ამახინჯებენ მის სინამდვილეს, არამედ სარჩულად ედებიან იმ ნაზ და სევდიან იუმორს, რომელიც ასე ამშვენებს მის ყოველ ნაწარმოებს; შეუმცდარად შეგვიძლია ვთქვათ, რომ დღეს ჩვენს მწერლობაში არც ერთი ბელეტრისტი არ აძლევს საზოგადოებას ისეთ უტყუარსა და დამახასიათებელ სურათს ჩვენი ცხოვრებისას, როგორსაც დავით კლდიაშვილი.

ცხოვრების ნამდვილ სახეს, იმის დამახასიათებელ სურათებს,

ნაზ და სევდიან იუმორს ავტორის უკანასკნელ მოთხრობაში, „ქამუშაძის გაჭირვებაშიც“, ისევე შეხვდებით, როგორც იმის სხვა მოთხრობებში. ხოლო ეს უკანასკნელი მოთხრობა არ წარმოადგენს ავტორის ძველი თემების განმეორებას, როგორც „კვალის“ ბიბლიოგრაფი შიშობდა, არამედ ის აღნიშნავს ისეთ ახალ მოვლენას ჩვენს ცხოვრებაში, რომელიც ჯერ ჩვენს ბელეტრისტიკას ვერ შეუმჩნევია. ამ მოთხრობის ერთადერთი ნაკლულევანება ის არის, რომ მომქმედი პირები ავტორს ერთობ მკრთალად ჰყავს დახასიათებულნი; მკითხველი ნათლად და გარკვევით ხედავს მხოლოდ ეკვირინგს სურათს, დანარჩენები კი ბურუსში არიან გახვეულები, თითქოს მოთხრობაში შემთხვევით შემოპარულან და ავტორსაც ამიტომ ყურადღება არ მიუქცევიაო. ავტორის ასეთი ნაკლი ზოგიერთ წინანდელ მოთხრობასაც ემჩნევა, სათავე კი ყველგან ერთი და იგივეა: დავით კლდიაშვილი გატაცებულია მოთხრობის დედააზრით, ის მშვენივრად ასაბუთებს და ხატავს ამ დედააზრს. სხვა ყოველივე, რაც დედააზრს არ შეეხება, უყურადღებოდ რჩება; მაგრამ შთაბეჭდილების სისრულისა და სიცხველისათვის მოთხრობაში ყოველგვარ წვრილმანს აქვს მნიშვნელობა და, რამდენადაც უფრო სრულად არის და მკაფიოდ ყოველი ფაქტი, ყოველი მომქმედი პირი, — რა გინდ უმნიშვნელონიც იყვნენ ისინი, — მოთხრობის სახელოვნო ღირსება და მნიშვნელობაც მით მეტია. უკანასკნელ მოთხრობაში ავტორის მიზანი იყო არა მომქმედი პირების დახასიათება და ახალი ტიპების დახატვა, არამედ ცხოვრების სინამდვილისა და მისი ტენდენციის გადმოშლა. მთელი მოთხრობა მკითხველზე მეტად მძიმე და მწვავე შთაბეჭდილებას ახდენს. ძალიან გულცივი და გრძობაჩლუნგი უნდა იყოს ადამიანი, რომ „ქამუშაძის გაჭირვებამ“ გული არ დაულონოს და მის სულიერ განწყობილებას სევდა და მწუხარება არ მოჰფინოს. უნებური ოხვრა ამოგხდებათ, როდესაც მოთხრობას ბოლომდე ჩაიკითხავთ. ამ მოთხრობაში ერთობ ბევრი სურათია ერთად თავმოყრილი, რომლებსაც პირველი შეხედვით საერთო ერთმანეთში თითქმის არაფერი აქვთ. ავტორის ასეთ თვისებას მის სხვა მოთხრობებშიაც შეხვდებით; მაგრამ ამდენი სხვადასხვა სურათი ერთად, როგორც უკანასკნელ მოთხრობაშია, ავტორს არც ერთ წინანდელ მოთხრობაში არ მოუცია. ზოგიერთი მკითხველი კიდევ იტყვოდა: ამდენი სურათი რა საჭირო იყო, ავტორი ზომიერებას მოკლებული ყოფილაო და სხვ., მაგრამ ასეთი საყვედური საფუძვლიანობას მოკლებულია. აიღეთ, მაგ., ან. ერისთავის „მოლიპულ გზაზედ“. ამ დიდ და საყურადღებო რომანში, რომლის რეალურ ტანს რომანტიული კულდი აუწნოებს, შეხვდებით ერთ-ორ ეპიზოდს,

რომლებსაც რომანის დედააზრთან არავითარი კავშირი არა აქვს, და ავტორს თამამად შეეძლო გამოეტოვებინა ან ცალკე მოთხრობად შეენახა. „ქამულშაძის გაჭირვების“ სურათების შესახებ კი ესევე არ ითქმის. ყველა სურათს საერთო სარჩული აქვს, მათ ერთმანეთში აკავშირებს ეს სარჩული; ყოველი სურათი ნათელს ჰფენს მოთხრობის დედააზრს. ამოშალეთ რომელიმე მათგანი და დედააზრიც უფრო მკრთალი გამოვა. ავტორის ნიჭი სინთეტურია, მისი მოთხრობის დედააზრი ამ სურათებზე არის დამყარებული, ამ სურათების დასკვნა არის. ავტორი თანდათანობით გვიშლის თვალწინ სოფლის ცხოვრებას და გვიჩვენებს იმ გონებრივსა და ქონებრივ გალატაკებას, რომელშიაც ჩვენი აზნაურობა ჩავარდნილა. ამ ცხოვრების გადმოსაშლელად ავტორი ერთობ მოხერხებულ საშუალებას ხმარობს: სოფლის აზნაურს, ქამულშაძეს. ის რთავს ქალაქელ ქალს, რომელიც სოფლის ცხოვრებას სრულებით არ იცნობს და, როდესაც გაიცნობს, გულშეწუხებული გაურბის სოფელს და ქალაქში იტაცებს ქმარ-შვილს, რადგანაც ხედავს, რომ სოფელი დღევანდელ აზნაურობას დაღუპვის მეტს არას უმზადებს მომავალში. სოფლის ყოველი აზნაურის სულიერ არსებაში მთელი დრამა სწარმოებს და ავტორმა კარგად დაგვანახა ეს დრამა, ნათლად გადმოგვიშალა ის მწარე ფიქრები, ის სულიერი ტანჯვა, რომელიც უსაშველო მდგომარეობას აღძრავს ჩვენი აზნაურების არსებაში. ზოგი მათგანი გრძნობს, რომ ცხოვრება შეიცვალა, შეცვლილმა ცხოვრებამ მხოლოდ გაჭირვება მოუტანა, მაგრამ ის იმედს არ ჰკარგავს, რომ მომავალი მაინც მისია, და მიწის ხენის გარდა სხვა საშუალების გამოჩენის ფიქრი სრულებით არ მოსდის თავში. ასეთია ეკვირინე, ასეთია ოტია დაქორწინების პირველ ხანებში, ასეთია მანანა და მისი სიძე, მარუშიძე. ეკვირინე ძველებური ქალია, სოფელთან და მიწასთან თანშეზრდილი და შესისხლხორცებული. ახალმა ცხოვრებამ ის გაჭირვებასა და სილატაკეში ჩააგდო, მაგრამ გულს მაინც არ იტენს, ძველებურად მხიარულია, მომავალზე ამყარებს თავის იმედს. ყოველ წამს ამით ინუგეშებს თავს: „ღმერთი მოგცემს. ზოგს ჩვენოდენიც არა აქვთ-რა“, ამყობს თავისი აზნაურობით და თავისი ოჯახის ხსნას მხოლოდ მიწაში ეძებს. ოტიას სურათი ავტორს ძალიან მკრთალად აქვს დახატული. ის არის პატიოსანი გულისა და ზნეობის ადამიანი, მაგრამ გაჭირვებას მეტისმეტად დაუბეჩავებია. ახალგვარდაწერილ ოტიას რცხენია თავისი ცოლისა, ის ხედავს, რომ მისი ცოლი მოტყუებულია, ეს ოტიას ტანჯავს, ცოლის წინაშე დამნაშავესავით დარცხვნილია, ამიტომ შრომას აორკეცებს, თავს აკლავს მიწას და ამით ცდილობს თავისი ზნეობრივი გრძნობის დაკ-

წყობილებას, ცოლის გულის მოგებას და ოჯახის ბედის გამოტრიალებას. საყურადღებოა ოტიასა და მისი ცოლის ლაპარაკი. როდესაც ეკვირინე ღმერთზე ამყარებს იმედს და ოტია მიწაში ეძებს ხსნას, სონია დარწმუნებულია, რომ სოფელში ცხოვრება და ძველი გზით სიარული მათთვის დამლუბველია, და მოთმინებადაკარგული ქმარს ეკითხება:

„— ჰო, რას აპირობ, რას?.. რას უპირებ ამას, აგერ რომ შემოგვემატება?..“

— რას უნდა ვუპირებდე, შე ქალო! — მიუგო მან წყნარად.

— შენ თავად ვერ ატყობ, რომ ის, რაზედაც ახლა ვდგევართ, ჩვენთვის ვერაა სამყოფი? ვერ ატყობ?

— ვატყობ... რავა არ ვატყობ! — წაილაპარაკა დამნაშავესავით ოტიამ.

— ჰოდა ვინც ჩვენ მოგვეყვება, იმათ რა ცეცხლში უპირებ ჩადებას? მე შენ გკითხავ და, ოტია, პასუხი უნდა მომცე ამაზე!..

— არ ვმუშაობ თუ? რომ ვხედავ ყორისფელს, ამიტომ თავს არ ვზოგავ... თავს აღარ ვიბრალებ. ასე არაა, შენ თავად არ ხედავ ამას, სონია?!...“

— კიდევ უფრო მეტს ვიმუშავებ, თავს შევაკლავ! — განიმეორა ოტიამ იმავე კილოთი. — უფრო ვეცდები კიდევ!

— რას ეცდები, ოტია? რას შეაკლავ თავს? მაგით რომ არაფერი გამოდის!

— აბა სხვა რა ვქნა, შენ გენაცვალე, შენ მითხარი, მირჩიე... მიმახვედრე და ისე გავიჩვენებ, ისე მოვიქცევი! მირჩიე!“

ღიახ, ოტიამ არ იცის ცხოვრების სხვა გზა; ის დაუზოგავად ჩიჩქნის მიწას, თავს აკლავს მას, მაგრამ თანდათან რწმუნდება, რომ რამდენიც უნდა იმუშაოს, მარტო მიწა მის ოჯახს ვეღარ იხსნის. საჭიროა სხვა გზის გამონახვა, მაგრამ ოტიამ არ იცის ეს გზა და ამაში მდგომარეობს მისი სულიერი ტანჯვაც. სხვების მდგომარეობა უარესიც არის, ვიდრე ოტიასი. ზოგი კიდევ ებრძვის ცხოვრებას, მაგრამ მისი ბედიც გადაწყვეტილია: დაღუპვის მეტი არაფერი მოეწივს. ასეთია სარდიონ ქველიძე. სხვებს უბრძოლიათ, სანამ ძალღონე ჰქონიათ, მაგრამ ცხოვრებას მაინც საბოლოოდ დაუმარცხებია ისინი. ასეთია უმეტესობა და მათში ლევან ქამუშაძე. ერთ დროს ეს კაცი ჩვეულებრივი აზნაური იყო, საშუალო შეძლების პატრონი, მაგრამ ახალი ცხოვრებისაგან წარმოშობილ მოთხოვნილებათა დაკმაყოფილება ძველ გზაზე სიარულით ვეღარ შესძლო, გაღარიბდა, დაბეჩავდა. დღეს მის შეძლებას ერთადერთი ქოხი შეადგენს, რო-

მელიც სადგომიც არის, სასიმიინდეც, ბელელიც, ბოსელიც, და ძველი დაკერებული ჩოხა. ლევანი და მისი მეუღლე ნახევარჯერ მშვირები არიან. ნელ სიმიინდს ახმობენ და ასე იკვებებიან, ისიც თუ ვინმემ სამადლოდ დაუფქვა. ლევანი ჯავრობს, დარდობს, რატომ მოვესწარი ამ დღესაო; ფიქრობს რაღაცას, თავის თავს რაღაცას ელაპარაკება. ცხოვრებამ დაამარცხა ლევანი, ჯავრისა და ფიქრის მეტი აღარა დარჩენია რა. ამ ჯავრსა და ფიქრს ისე გაღუტანია, რომ თითქმის სრულ გონებაზედაც აღარ არის. მიუმატეთ ყოველსავე ამას გონებრივი სიბნელე და ცრუმორწმუნეობა, რომელსაც სოფლის აზნაურობა მოუტავს და რომლის ერთ მაგალითს წარმოადგენს ომანისა და ეფროსინეს ჩხუბი, და ნათლად წარმოგიდგებათ ის საშინელი სურათი, რომელსაც ჩვენი სოფლის აზნაურობის ცხოვრება წარმოადგენს.

სონია უკვირდება ასეთ ცხოვრებას და მალე რწმუნდება, რომ სოფლის შეჩერება და თავისი იმედებისა და კეთილდღეობის მარტო თოხსა და სახნისზე დამყარება მხოლოდ ოჯახის დაღუპვაა. ის ქალაქისაკენ გაიყურება და მტკიცედ სწამს, მხოლოდ იქ შეიძლება ცხოვრებისათვის დროის შესაფერი სახსრის გამონახვა, დაღუპვისაგან თავის დაღწევა. ოტიაც არა ნაკლებ უკვირდება ცხოვრებას. ჯვარის წერის პირველ ხანებში ის თუ თავის თავსა და ცოლს აიძვებდა: კიდევ მეტს ვიმუშავებ, თავს არ დავიზოგავ და ოჯახს გამოვაბრუნებო, მალე რწმუნდება, რომ თავიც რომ შეაკლას მიწას, მის ოჯახს მიწა ვეღარ იხსნის.

„მისთვის ეხლა თვალსაჩინო იყო, რომ ძველს გზაზე დარჩენა მეტს ხანს არ შეიძლებოდა აწი, რომ მარტო მიწა ვერ დააკმაყოფილებდა მისი ოჯახის მთელ საჭიროებას; რომ საჭირო იყო განსხვავებული გარჯა, განსხვავებული შრომა და მას კი არ ეხერხებოდა, არ ემარჯვებოდა, და აღარ იცოდა, რა ექნა. სინათლეზე უფრო ნათელი შეიქნა მისთვის, რომ მარტო მიწა. ის მიწა, რომელზედაც იგი იდგა. ვერას გზით მას ვერ დააკმაყოფილებდა, რომ მისი შეჩერება მხოლოდ სამუდამოდ დაღუპავდა მასაც, მის ცოლ-შვილსაც და მომავალსაც!..“

ამგვარად, ოტიასათვის ეხადია, რომ საჭირო არის ახალი გზა. ძველი გზა დღევანდელ ცხოვრებას უარუყვია. მაგრამ სად მონახოს ეს ახალი გზა, ოტიამ არ იცის და კიდევ რომ იცოდეს, არც ეხერხება.

გასაჭირო მდგომარეობიდან ოტია ისევ ცოლს გამოჰყავს, ის კატეგორიულად უცხადებს:

— ოტია! ჩვენი აქ დარჩენა სიკვდილია, ოტია... სიკვდილი,

ოტია! ამდენი ხანია გიცდი, გითხრა ეგ... ჩვენ კიდევ უარესი თუ მოგვიღის აქ, თორემ უკეთესი არაფერი. ჩვენ უნდა წავიდეთ, უნდა გავეშორდეთ აქაურობას, ოტია... უთუოდ, უთუოდ, ოტია!“

წინათ რომ გაეგონა ვისგანმე ოტიას ასეთი სიტყვები, საშინლად გაოცდებოდა, რადგანაც სოფლის, საკუთარი სახლ-კარისა და მიწა-წყლის მიტოვება მისთვის წარმოუდგენელი იყო, მაგრამ დღეს ის თვითონ არის ამ აზრისა, საკუთარი გამოცდილებით დარწმუნდა, რომ სხვა გზა საჭირო ცხოვრებისათვის. როდესაც ცოლი უცხადებს: ქალაქში უნდა გადავსახლდეთო, ის ყოყმანობს, მაგრამ იმიტომ კი არა, რომ სოფლის დატოვების საჭიროებაში დარწმუნებული არ იყოს, არამედ ეშინია: გამოუცდელი ადამიანი ვარ და ვაი თუ იქაც დაჰმარცხოს ცხოვრებამო. რაკი ერთხელვე შეეპარა ოტიას ის აზრი, რომ სოფელში დარჩენა მისთვის შეუძლებელი იყო, ეს აზრი უნებურადაც განვითარდებოდა, რადგანაც მას ავითარებდა ის ცხოვრება, რომელიც გარშემო ერტყა, ის საშინელი სიღარიბე და მისგან მომზადებული უნუგეშო მომავალი, რაც მისი მსგავსი აზნაურების ხვედრი იყო. რაკი განვითარდებოდა ოტიას არსებაში ასეთი აზრი, უეჭველია, მოსვენებას დუკარგავდა და ის ან ისევ თავის მიწას დააკვდებოდა ჯავრსა და შრომაში, ან სხვა გზას გამოიჩინებდა. ოტია ენერგიული კაცი არ არის, არ არის დაუდგომელი, მოძრავი ბუნების და შეიძლება ესეც დაემართებოდა, რომ ის არ გაეტაცებია ძველი გზიდან მის ცოლს, სონიას, და მისი ბიძის, ლევანის, სიკვდილს. „ოტია მწარე ცრემლით დასტიროდა ბიძას, ამ მიცვალებულში იგი რაღაც თავის მომავალს ხედავდა“. ეს ასეც უნდა ყოფილიყო: ლევანი ყმაწვილობისას ოტიას თუ ჯობდა მოქმედებითა და ვარჯილობით, თორემ ნაკლები არ იყო: ადგილ-მამულიც იმის ოდენა ჰქონდა; მაგრამ სიბერეში სიღარიბის გამო აღძრულმა ჯავრმა და მწუხარებამ გონება გამოუღაყა, შიმშილმა კი სული ამოაძრო. ოტიას ცხოვრებაში არაფერი იყო ისეთი, რომ იზედისა და ნუგეშის მკირეოდენი შუქი მოეფინა მისი მომავლისათვის და გაემხნევებინა: გულს ნუ გაიტეხ, ოტია, ლევანის ხვედრი შენ არ გეწევიაო. პირიქით, ოტიას ყველაფერი ეუბნებოდა, რომ უკიდურეს სიღარიბესა და შიმშილში სულამომხდარი ლევანი მისი მომავალი იყო. „არა... მეტი საშველი არაა! — ეუბნებოდა თავის თავს ლევანისაგან დაბრუნებული ოტია: — მეც უნდა ავიბარგო, მეც უნდა შევეხიზნო იქ, აადაც ყოველი კაცი საშველს პოულობს... სადაც იმოდენა საშოვარია და საშუალება!... გზა აღარ არის!...“. მკითხველისათვის, რასაკვირველია, ცხადია, რომ ოტიას ასეთი გადაწყვეტილება მართლ ლევანის სიკვდილით არ ყოფილა გამოწვეული, ასეთ გადაწყვეტი-



ლებას დიდი ხნიდან ამზადებდა ოტიას გონებაში თვით ცხოვრება, ცოლის სიტყვები და ცხოვრების მიერ აღძრული ფიქრები. მაგრამ ლევანის სიკვდილი ის უკანასკნელი ნაპერწკალი იყო, რომელმაც ოტიას ყოყმანს ბოლო მოუღო და მისი გადაწყვეტილება განამტკიცა. ბიძის სიკვდილმა ოტიას ცხადად დაანახვა, რომ მან ან ბიძასა-ებრ მშვიერმა, მწყურვალმა, ასეთ საცოდაობაში უნდა დალიოს თავისი „გაჯახირებული სული“, ან სხვა საშუალება უნდა გამონახოს ამ საშინელი მომავლის გადასაცდენად, — „მეტი გზა აღარ არის!“. რამდენიმე თვის შემდეგ ჩვენ ვხედავთ ოტიას თავისი ოჯახობით ქალაქ №-ის მცხოვრებად გადაქცეულს, მის სამოსახლოზე და ადგილ-მამულში კი სხვა მოსახლეს, აბლად გამოყოფილ გლეხს. ოტიასავით მისივე სოფლიდან სხვებსაც მიუტოვებიათ სოფელი და გარეთ ირჩინენ თავს. სოფლის ცხოვრებამ გარიყა ისინი, როგორც მეტი წევრნი, სხვას გაუგზავნა: მე ველარ ვარჩენ და შენ არჩინეო.

## II

ჩვენ განვიხილეთ, როგორ განვითარდა ოტიას არსებაში ის რწმენა, რომ საჭირო იყო ცხოვრებისათვის ახალი გზის გამონახვა და ძველის უკუგდება; შევეხეთ იმ მიზეზებსაც, რომლებმაც განუვითარეს ოტიას ასეთი რწმენა, მაგრამ მოთხრობაში ამაზე მეტი რომ არაფერი იყოს, სხვას რომ არაფერს აძლევდეს მკითხველის გონებას, ამდენი ლაპარაკითაც არ შევაწუხებდით. როგორც უკვე მოვიხსენიეთ, მოთხრობაში ნოქმედი პირები ძალიან მკრთალად არიან დახასიათებულნი, ის არ გვაძლევს არც ერთ ისეთ ახალ ტიპს, რომელიც ჩვენს სახელოვნო ლიტერატურაში არ მოიპოვებოდეს: ზოგიერთი მკვლევარისათვის ეს ისეთი დიდი ნაკლია, რომ მოთხრობას ფრიად სუსტ ნაწარმოებად ჩასთვლიდა ხელოვნების მხრით და ყურადღებასაც არ მიაქცევდა. სადაც არ არის ტიპი, იქ არც ხელოვნებაა. მაშასადამე, არც ნიჭიო, — აი, ბევრი მკვლევარის აზრი. ჩვენ სრულიადაც არ უარყოფთ იმ აზრს, რომ მხოლოდ ნიქს შეუძლია ტიპის შექმნა. პოეტურ ნაწარმოებში ტიპი დიდ ღირსებას შეადგენს, მაგრამ გვგონია, რომ შეიძლება რომელსამე პოეტურ ნაწარმოებში არც ერთი ტიპი არ მოიპოვებოდეს, არც ერთი მოქმედი პირი არ იყოს სრულად და ნათლად დახასიათებული, მაგრამ. მიუხედავად ამისა, ნაწარმოებს დიდი მნიშვნელობა ჰქონდეს. ჩვენ მიჩვეულნი ვართ იმ აზრს, რომ ტიპი მხოლოდ აღამიანი უნდა იყოს და აღამიანის გარეშე ტიპიურს აღარაფერს ვეძებთ მოთხრობაში, მაგრამ ასეთი აზრი სრულებით შემცდარია. რატომ არ შეიძლება ტიპიური იყოს ის მომენტები, რომლებსაც ავტორი იღებს ცხოვრებიდან? რასაკვირ-

ველია, შეიძლება, და ხშირად ასეც არის ხოლმე. ასეთ მოთხრობას, ერთი ტიპიური ადამიანიც რომ არ იყოს შიგ, მაინც დიდი მნიშვნელობა აქვს, — მნიშვნელობა სოციალური. „ქამუშაძის გაჭირვება-საც“ სწორედ სოციალური მნიშვნელობა აქვს და ჩვენც ამაზე გვინდა მივიხილოთ მკითხველს. თუ ძველად პერაკლიტე ქადაგებდა: ყოველივე მიმდინარეობაშია, ყველაფერი იცვლებაო, დღევანდელმა მეცნიერებამ პერაკლიტეს ასეთ ქადაგებაში კემშარიტი აზრი დაინახა. ეს აზრი დღეს გაიზარდა, გაფართოვდა და გადაიქცა ევოლუციის თეორიად, რომელიც მეცნიერების ერთ დიდ ღვაწლს შეადგენს დღეს. მეცნიერებამ დაგვიმტკიცა, რომ ერთხელვე სამუდამოდ დადგენილი ფორმა არაფერს არა აქვს; იცვლება ორგანიული არსება, იცვლება თვით საზოგადოებრივი ცხოვრებაც. ერთ ეპოქას ყოველგან და ყოველთვის მეორე ეპოქა მოსდევს, მეორეს — მესამე, მაგრამ სანამ ცხოვრება ერთი ეპოქიდან მეორეში წადგებოდეს, ის რამდენსამე ხანს გამოურკვეველ, მოსამზადებელ მდგომარეობას განიცდის ხოლმე; ამ დროს მასში ძველი ეპოქის ელემენტებიც არიან, ახლისაც ჩნდებიან; ცხოვრების სახე წაშლილია და ძნელია იმისი გამოცნობა, როგორ სახეს მიიღებს იგი მომავალში, ე. ი. როგორი იქნება შემდეგი ეპოქა. ასეთ გამოურკვეველ მდგომარეობას უწოდებენ გარდამავალ ხანას, და სწორედ ასეთი გარდამავალი ხანის შვილნი ვართ ჩვენც, დღევანდელი ქართველები. იქ, სადაც ცხოვრებას გარკვეული ფორმა მიუღია, სოციალური მნიშვნელობის რომანი მაინცა და მაინც დიდ საჭიროებას აღარ შეადგენს; ამ მხრით მისი რჩევა და ჩხრეკა სრულიად მეტია, რადგანაც უმრავლესობისათვის ისეც ცხადია, თუ როგორია ცხოვრება. ჩვენში კი ასეთი მიმართულების სახელოვნო ნაწარმოებს ძალიან დიდი მნიშვნელობა აქვს. როდესაც თითქმის ყოველ ქართველს თავისებურად ესმის ჩვენი დღევანდელი ცხოვრება და მისი ტენდენცია, ჩვენი აზრით, ყოველი მწერალი მოვალეა უმთავრესი ყურადღება ცხოვრებას მიაქციოს; ყოველი მკვლევარი ვალდებულია ლიტერატურულ ნაწარმოებში, პოეზია იქნება ის თუ პროზა, ცხოვრების სახე უყურადღებოდ არ დასტოვოს და მასზე მკითხველს მიუთითოს.

კაპიტალისტური წყობილების, ბურჟუაზიული ცხოვრების ნიშნებმა ჩვენში კარგა ხანია თავი იჩინეს, მაგრამ ამ ცვლილებას არა თუ საზოგადოება ვერ ხედავდა, ვერ ხედავდა დღემდე ჩვენი ჟურნალ-გაზეთობაც, რომელიც ვალდებულია ცხოვრებას დაკვირვებით ადევნოს თვალყური. კაპიტალისტური წყობილება ნატურალური წყობილების მტერია. ის ამარცხებს და სპობს უკანასკნელს და, რადგანაც წოდებრივი დაყოფა ნატურალური წყობილების სრული კუ-

თვნილებათ, მასვე ატანს თან. ქართლსა და კახეთში, სადაც ბურჟუაზიული ცხოვრების ნიშნებს ჯერ შესამჩნევად ვერ მოუხედენია საზოგადოებრივ განწყობილებაში. წოდებრივი კედლები ჯერ ისევ მტკიცედ არიან; თუმცა თავადაზნაურობა „მოლიბულ გზაზედ“ დაექანა, მაგრამ გლეხობა ჯერ ისევ უძრავად არის აქ ძველ საზღვრებში. აქ თავად-აზნაურს და გლეხს ერთიმეორეში ტანისამოსითაც გაარჩევთ ისევ. იმერეთში კი, განსაკუთრებით მის დასავლეთ ნაწილში, სადაც კაპიტალისტური წყობილების ნიშნები შესამჩნევად განვითარებულა, ცხოვრება სულ სხვა სურათს წარმოადგენს.

ქონებრივად რომ გვარიანად დაქვეითდა და თანდათან ღარიბდება როგორც ქართლ-კახეთის, ისე იმერეთის თავადაზნაურობა, ეს აღარავისათვის აღარ უნდა იყოს დაფარული. მაგრამ მაშინ, როდესაც ქართლ-კახეთის თავად-აზნაურთა ქონების დიდი ნაწილი უცხო ტომთა წარმომადგენლების ხელში გადადის, იმერეთის თავადაზნაურობის ადგილ-მამული უმთავრესად გლეხებში ნაწილდება. ბატონყმობის გაუქმების შემდეგ იმერეთში იმ გლეხობის უმეტესი ნაწილი, რომლებიც აზნაურების ყმებს შეადგენდნენ, უმიწაწყლოდ დარჩა, რადგანაც მცირეყმიანმა აზნაურებმა ყმებს მამული ჩამოართვეს, იმერეთის აზნაურობა კი უმეტესად მცირეყმიანი იყო. მიუხედავად ამისა, დღეს იმერეთში ისეთ მიწის მომუშავე გლეხს ვეღარ ნახავთ, რომ უძრავი, კერძო საკუთრება არა ჰქონდეს. ახალმა ცხოვრებამ ჩვენს თავადაზნაურობას ძალიან ბევრი მოთხოვნილება შემატა. თავადაზნაურობის ერთადერთ სიმდიდრეს მიწა შეადგენდა, ფული მას არ გააჩნდა და ამიტომ გასაჭირ მდგომარეობაში ჩავარდა. მაგრამ ამ მდგომარეობიდან გამოსასვლელად ცხოვრებამ მას ერთი კარი დაუტოვა: როგორც ყველაფერი, ისე მიწაც გასაყიდ ნივთად აქცია. თავადაზნაურობაც გაექანა ამ კარისაკენ, მიწა ბაზარზე გამოიტანა და დღესაც გამოაქვს გასასყიდად. იმერელმა გლეხმა ისარგებლა ამ მდგომარეობით და დღეს საცა კი გასასყიდი მიწა გამოჩნდება, — ტყე იქნება, სახნავი თუ ვენახი, — ის ხელიდან აღარ უშვებს. დავით კლდიაშვილი თავის ახალ მოთხრობაში იმერეთის აზნაურობის მდგომარეობას გვიხატავს. ის ფაქტი, რომელსაც ჩვენ ზევით მივაქციეთ მკითხველის ყურადღება, ავტორმაც აღნიშნა: ოტიასა და მისი ბიძის, ლევანის, ადგილ-მამულს გლეხები ინარჩუნებენ. იმერეთის აზნაურობა ადგილ-მამულით არც წინათ იყო მდიდარი, მაგრამ ხალხი ცოტა იყო, მოთხოვნილებაც მცირე, ამიტომ ყველას საკმარისად ჰქონდა ყველაფერი. დღეს ხალხი გამრავლდა, ახალმა ცხოვრებამ ყველას ისე გაუღვიძა კერძო საკუთრების შიშა, რომ შვილი მამასთან აღარ დგება, ცალკე მოსახლეობას ეტანება, ამი-

ტომ იმერეთის აზნაურობის ერთადერთ ქონებას — მიწას — მართო ეს გარემოებაც დააქუცმაცებდა. მაგრამ ამას ზედ დაერთო მრავალი ახალი მოთხოვნილება, რომელთა დასაკმაყოფილებლად საჭირო შეიქნა ფული. აზნაურობა მთელი თავისი მოთხოვნილებით მიწას დააწვა: მიწაც ყველაფერს ვეღარ გასწვდა, აზნაურობას ხელიდან გამოეცალა და ცარიელზე დასტოვა. იმერეთში დღეს ხშირად შეხვდებით ისეთ აზნაურებს, რომლებიც არც ადგილ-მამულით, არც მოსახლეობით, არც ჩაცმა-დახურვით საშუალო გლეხისაგან აღარ განირჩევიან; სამაგიეროდ, ნახვთ ისეთ გლეხსაც, რომელიც შეძლებით, სახლ-კარით და გარეგნობით აზნაური ან თავადი გეგონებათ. თუ წინათ ყოველ თავადს, აზნაურს და გლეხს ტანისამოსითაც კი იცნობდით, დღეს ასეთი დრო გაფრინდა სამუდამოდ. ამის მოწამეა თამარნაშენის ცხოვრება „ქამუშაძის გაჭირებაში“.

ერთი მითხარით, რითი განირჩევა აზნაური ლევან ქამუშაძე საშუალო კი არა, ღარიბი გლეხისაგან? არაფრით. ტანზე აცვია დაგლეჯილი ჩოხა; მის სახლ-კარს შეადგენს ერთადერთი ქონი, რომელიც სადგომიც არის, სასიმინდეც, ბელელიც და ბოსელიც. ადგილ-მამული კი იმდენიც აღარ დარჩენია, რომ ორ შოხუცებულ ადამიანს მჭადი აჭამოს, და ეფროსინე იძულებულია ნედლი სიმინდი ტეხოს ყანაში, მზეზე ახმოს და მითი ირჩინოს თავი. რითი სჯობია მანანა და მისი სიძე, სეფე მარუშიძე, ღარიბ გლეხს? ვერაფრით. თვითონ სეფე ფეხშიშველი დადის, შვილები ტიტველი დაუდიან და ნახევარჯერ ის და მისი ოჯახი კუჭკაუშაძლარნი არიან. ერთი სიტყვით, ახალმა ცხოვრებამ აზნაურობას გლახა დროს უსწრო: აზნაურობა მოუშნადებელი დაუხვდა და, თუმცა ახლა ებრძვის ცხოვრებას თავგამეტებული. ცდილობს მას შეეგუოს, მაგრამ ცხოვრება ძალიან ბევრს ამარცხებს და ანადგურებს.

დავით კლდიაშვილი გვიხატავს ამ ბრძოლის ველს, რომელზედაც ზოგი უკვე დამარცხებულია, ზოგი უკანასკნელი ძალ-ღონითღა იბრძვის და დღეს თუ ხვალ დამარცხდება; სხვები ახლა იწყებენ ბრძოლას და წინამებრძოლთა ხვედრით შეშინებულეზს, წინდაწინვე აქვთ გული გატეხილი, ვაი თუ ჩვენც დაგვამარცხოს ცხოვრებათაო. როგორც დავით კლდიაშვილი გვიჩვენებს თავის ახალ მოთხრობაში, ახალ ცხოვრებასთან შეგუებისათვის ბრძოლაში აზნაურობა ორ ნაწილად იყოფა: ერთ ნაწილს შეადგენს ძველი თაობა, მეორეს ახალი. მაშინ, როდესაც ძველი თაობიდან უმეტესი ნაწილი მარცხდება, ახალი თაობიდან ძალიან ბევრი ეგუება შეცვლილ ცხოვრებას. საზოგადო ცხოვრების ცვლილება, ახალ სოციალურ პირობებთან შეგუება აუცილებლად ითხოვს იმ საშუალებათა შეცვლასაც, რომელთა

შემწეობითაც ადამიანი თავს ირჩენს. თუ ეს უკანასკნელი პირობა არ არის დაცული, რამდენიც უნდა იშრომოს ადამიანმა, ნაყოფი მაინც მცირე იქნება. ძველი თაობის დამარცხების მიზეზიც სწორედ ამაში მდგომარეობს. ის გრძნობს, რომ ცხოვრება შეიცვალა, სხვა დრო დადგა. მაგრამ აზრადაც არ მოსდის, რომ სხვა გზას მიმართოს, სხვა საშუალება გამოიხილოს ცხოვრებისათვის; ის მხოლოდ მიწაში ეძებს ხსნას და შრომას აორკეცებს; სხვა ღონე რომ გამოიხილოს, არც აგონდება, არც ეხერხება. ახალ ცხოვრებას ახალი გზა უნდა, ძველი თაობა კი ძველი გზით ცდილობს ახალი ცხოვრების დამორჩილებას და ამიტომაც მისი დამარცხება აუცილებელია. აიღეთ, მაგ., ეკვირინე. მაშინ როდესაც დაღონებული ოტია ეუბნება: „რა მოვაგვარო, რას მოვეკიდო, არ ვიცი! აწი ხომ უფრო მეტი დაგვეჭირდება ყველაფერი“-ო, აი ეკვირინე როგორ ანუგეშებს მას:

„ღმერთი მოგვეცემს, შვილო! ღმერთი მოგვეცემს! თავის გაჩენილს თავის ლუქმას გაუჩენს კიდევ. რაზედ სწუხარ, შენი ჰირიმე! გულგახსნილად იყავი! ღმერთი მოგვეცემს ყოველიფერს! ყოველისფერი გვექნება. ბევრიც გვექნება... ბარე ათი დედალი გვყავს დამჯდარი, ისე რავე გაოხრდებიან, რომ ერთი ასი ფრთა მაინც არ გაზარდონ. ბატიც ოთხი ზის, ათ-ათი კვერცხი უდევთ. ინდოურია სამი... გულ-მაგრად იყავი!... ღვთის წყალობით არასფერში არ შევწუხდებით და უკლებლათ ვიქნებით. კი, შვილო, კი!“.

ეს გულშებრყვილო ადამიანი სწორედ რომ საცოდავია თავისი ბავშვური იმედებით. ეკვირინე სრულებით არ არის ოტიაზე ნაკლები ჰკუთის პატრონი, მან კარგად იცის, რომ დღეს მის ოჯახს მეტი საჭიროება აქვს, მაგრამ სხვა, ახალი გზის გამოიხილვა ფიქრადაც არ მოსდის. როდესაც მისმა რძალმა და შვილმა გამოიხილეს სხვა საშუალება ცხოვრებისათვის, ის თვალცრემლიანი შესტირის ორსავე: ოჯახს ნუ დაანგრევთ, შვილებს გზაში ნუ გამიყრითო. ის ყოველგვარ გაჭირვებას აიტანს, შიმშილით მოკვდება, ოღონდ თავის ორ კვალ მიწას ნუ მოაცილებთ. სულ სხვანაირად ფიქრობს ახალი თაობის უმეტესი ხაწილი. ის დარწმუნებულია, რომ „ძველ გზაზე დარჩენა მეტ ხანს არ შეიძლება აწი“; რომ მარტო მიწა ვერ დააკმაყოფილებს მისი ოჯახის მთელ საჭიროებას; რომ „საჭიროა განსხვავებული გარჯა, განსხვავებული შრომა“. ამიტომაც ის თავს ანებებს მიწას და ჰკიდებს ხელს ამ „განსხვავებულ შრომას“. ამგვარად, ცხოვრება აიძულებს ჩვენს ერს მოქალაქეობრივ გზაზე შედგომას, სოფლის დატოვებას და ქალაქში გაშურებას. იმას ნურავინ დაგვწამებს, ვითომ, ჩვენი აზრით, საჭირო იყოს, რომ ყველამ თავი დაანებოს სოფელს და ქალაქში გადასახლდეს. ჩვენი აზრით, ცხოვრება

ითხოვს, რომ სოფელმა თავისი ზედმეტი ელემენტი ქალაქს გაუგზავნოს. უკვე იჩინა თავი ჩვენს ხალხში სოფლიდან ქალაქში მოძრაობამ. ასეთ გზაზე უმალ გლახობა შედგა; ძას ახლა უკან მისდევს გაღარიბებული თავადობაც. იმერეთში უკვე გაჩნდა გაღარიბებული, პროლეტარად ქცეული აზნაურის ტიპი, რომელიც სოფელში ყველაფერს ჰყიდის, თუ რამ დარჩენია, სოფელთან სრულებით სწყვეტს კავშირს და ქალაქისაკენ მიეშურება. ასეთი ტიპი არა თუ ქვემო იმერეთში, ზემო იმერეთშიაც კარგა ხანია არსებობს, თუმცა ზემო იმერეთი ეკონომიურად ცალი ფეხით ქართლში სდგას. დ. კლდიაშვილის ერთ დიდ ღირსებას ის შეადგენს, რომ მან მკითხველს მიუთითა ამ ახალ მოვლენაზე, რომელმაც თავი იჩინა ჩვენს ცხოვრებაში და რომლისთვისაც დღემდე ჩვენს მწერლობას ყურადღება არ მიუქცევია. აზნაურები და თავადები, მართალია, წინათაც მიდიოდნენ სოფლიდან ქალაქ ადგილას, მაგრამ ასეთ გადასახლებას წინათ კერძო ხასიათი ჰქონდა, კერძო მიზეზებით იყო გამოწვეული; დღეს კი ამ მოძრაობას სოფლიდან ქალაქისაკენ საზოგადო ხასიათი აქვს, სოციალური მიზეზებით არის გამოწვეული და ამ მოთხრობის მნიშვნელობაც სწორედ ასეთ სოციალურ მიზეზებში მდგომარეობს. მოქალაქეობრივ გზაზე შედგომა თვით ცხოვრებამ მოითხოვა; ჩვენი ხალხიც უსათუოდ უნდა დაადგეს ამ ახალ გზას, თუ უნდა ცხოვრებას არ გაანადგურებინოს თავი. ჩვენთვის ფრიალ გასახარებელია, რომ ქართველობა უკვე შედგა ამ გზაზე, თორემ „ივერიის“ რეცეპტებს რომ ჩვენს ცხოვრებაზე გავლენა ჰქონდეს<sup>1</sup>, თქვენი მტერი: ჩვენი ხალხის დაღუპვა აუცილებელი იქნებოდა.

### III

წოდებრივი დაყოფის მომხრეთაგან არა ერთხელ გვსმენია: ხელოვნურმა შერჩევამ და მემკვიდრეობამ თავადაზნაურობა ქართველი ერის საუკეთესო ელემენტად აქცია, მას წარსულში დიდი ღვაწლი მიუძღვის მამულის წინაშე, მისი მოსპობა, როგორც კერძო წოდების, ე. ი. მთელს ერში არევა, ქართველებისათვის საზარალო იქნებაო. თავადაზნაურობა რომ ქართველი ერის საუკეთესო ელემენტი იყოს, ეს არავის დაუმტკიცებია და ვერც დაამტკიცებს, რადგანაც ცხოვრება გვეუბნება, რომ დღევანდელი თავადი გინდ აზნაური გლახს ვერც ზნეობით და ვერც გონებრივად ვერ სჯობია;

<sup>1</sup> ჩვენი ინტელიგენციის ნაწილმა 90-იან წლებში თეორიაში უარპყრო კაპიტალიზმის გზა, რადგან ვერ ხედავდა კაპიტალიზმის განვითარების შესაძლებლობას ჩვენში. ვ. წ.

პირიქით, ჩვენ იმისი გვეშინია, ვაი თუ ნაკლებიც იყოს. ხოლო თავდაზნაურობას რომ დვაწლი მიუძღვის მამულის წინაშე, ამას ჩვენ არ უარყვით; მაგრამ იგივე დვაწლი გლახობასაც მიუძღვის. ზემოთ მოყვანილი საბუთები აშკარად გვიჩვენებენ, თუ როგორი ყალბი შეხედულების არის ზოგიერთი ქართველი ადამიანი ცხოვრების მსვლელობის შესახებ. ჩვენ იმას კი არ ვიკვლევთ, რა არის სასურველი, არამედ იმას, რა არის აუცილებელი. განა ცოტა რამ არის სასურველი, მაგრამ შეუძლებელი?!.. ჯერ სასურველიც რომ იყოს წოდებათა შერჩენა, მაშინაც ამ სასურველს გასავალი არ ექნება, რადგანაც დღევანდელმა ცხოვრებამ აუცილებლად გახადა მათი გადასხვაფერება.

ცხოვრების აუცილებელ პროცესს ვერავითარი სურვილი ვერ შეაჩერებს. წოდებრივმა დაყოფამ შეასრულა თავისი დანიშნულება; დღევანდელი დრო მას აღარ საჭიროებს და ამიტომ კიდევაც სპობს და მის მაგიერ შობს სოციალურ კლასებად დაყოფას. გარდა ამისა, წოდებების შერჩენა ჩვენი ეროვნათვის დღეს მხოლოდ საზარალოა; რაც მალე წაიშლება წოდებრივი საზღვრები, ქართველი ერის კეთილდღეობისათვის მით უმჯობესია და აი რატომ: თუ ცხოვრება შეიცვალა, შეცვლილ ცხოვრებას შეგუება უნდა, როგორც კერძო ადამიანის, ისე მთელი ერის მხრით; ვინც ვერ შეეგუება ცხოვრების შეცვლილ პირობებს, მისი დაღუპვა აუცილებელია. ამ კანონს ვხედავთ როგორც საზოგადოებრივ ცხოვრებაში, ისე მთელ ორგანიზულ ცხოვრებაშიაც. ქართველი ერის დღევანდელ ცხოვრებასთან შეგუება კი იმაში მდგომარეობს, რომ წოდებრივი საზღვრები უკუაგდოს და ახალს მოქალაქეობრივ გზაზე გამოვიდეს ყოველი ქართველი, თავადი იქნება ის, აზნაური თუ გლეხი. ასეთ გზაზე ჩვენი ერი უკვე გამოვიდა. მაგრამ თუ ბევრი ვერ ამჩნევს წოდებრივი საზღვრების დარღვევას, ერთი იმიტომ, რომ არ სურს შეამჩნიოს, მეორე იმიტომ, რომ თავდაზნაურობა ჩვენში ჯერ კიდევ წარმოადგენს ეკონომიურ ძალას თავისი ადგილ-მამულით და გულუბრყვილო პირებს კი ეს ეკონომიური ძალა გვარიშვილობის ნაყოფი ჰგონიათ. ისინი, ვისაც ეს ეკონომიური ძალა ხელიდან გამოსცლია, მშვენივრად გრძნობენ, რომ ცარიელი გვარიშვილობა დღეს ჩირადაც აღარ ფასობს, მაგრამ გულს არ იტეხენ და საქვეყნოდ ჯერ მაინც არ აცხადებენ ამას. ჩვენში უკვე ჩნდებიან ისეთი აზნაურები, რომლებიც გლეხებისაგან აღარაფრით განირჩევიან: ლევან ქამუშაძე, ომან ქამუშაძე, სეფე მარუშიძე და სხვა. დღეს თუ ხვალ ასეთი პირნი თავადებშიაც გაჩნდებიან. სამაგიეროდ გლეხებშიც გაჩენილან ისეთი პირნი, რომლებსაც ქონებრივი ძალა მოუხვეჭიათ და აზნაურისა და თავადისაგან

აღარ განიჩქვებიან. ასეთია გლეხი სამადაძე. ის ეკვირინეც კი, რომელიც ამპარტავენობს თავისი გახუნებული აზნაურობით, აი, რას ამბობს სამადაძის შესახებ:

„ყაზახი ქვია, თქვენ გენაცვალეთ, თვარა რომელი აზნაური გაუტოლდება, ჩემო ბატონო! მდიდარი, თქვენი ჭირი შემეყაროს, ზრდილობიანი... ისეთი შეხედულება აქვს... თავადიშვილი გეგონებათ... უბრალო კი არა, ჩემო ბატონო!“

მიეცით ასეთ გლეხს განათლება და, რასაკვირველია, მაშინ ის თავაღწედაც და აზნაურზედაც წინ იქნება ცხოვრებაში. ჩვენ იმას კი არ ვამბობთ, ვითომც ცხოვრება ითხოვდეს მთელი თავადაზნაურობის გადატაკებას, ლევან ქამუშაძეებად გადაქცევას და მთელი გლეხობის გამდიდრებას და სამადაძეებად გახდომას. ჩვენ მხოლოდ იმას ვამბობთ, რომ ცხოვრება უარპყოფს წოდებრივ დაყოფას, ის ითხოვს ძველი გზის დატოვებას და ახალ გზაზე შედგომას. ვინც შეიგნებს ახალი დროის მოთხოვნილებას და ახალ გზაზე ფეხს მოიმაგრებს, გლეხი იქნება თუ თავადი — სულ ერთია — გაიმარჯვებს. ვინც ახალ ცხოვრებაში ძველი გზით მოინდომებს თავის გატანას, გინდა თავადი იყოს, გინდა გლეხი, დაღუპვას ვერ ასცდება. ჩვენი აწმყო ბელეტრისტიკა თუ უფრო ხალისიანად ხატავს დამარცხებულ თავადაზნაურობას და გამარჯვებულ გლეხობას, ვიდრე გამარჯვებულ თავადაზნაურობასა და დამარცხებულ გლეხობას, თუმცა ცხოვრებაში პირველიც არის და მეორეც, — ეს იმიტომ, რომ დამარცხებული თავადი და გამარჯვებული გლეხი სრულებით ახალი მოვლენაა, ძველმა ცხოვრებამ არაფერი ამგვარი არ იცოდა და ამიტომაც, როგორც ახალი მოვლენა, უფრო იქცევს მწერლის ყურადღებას.

სამადაძის ტიპის დახატვაში ჩვენი ბელეტრისტიკები, თითქო პირობა მიუციათო, ყველა ერთნაირად იმეორებს შემდეგ გარემოებას: დამარცხებული თავადაზნაურობა გამარჯვებულ გლეხობას ერთობ მტრულად უყურებს. როდესაც პირველი მეორეს შეხვდება, აშკარად ხედავს, რომ ჩამომავლობამ დღეს ყოველგვარი მნიშვნელობა დაჰკარგა, რომ ცხოვრება გლეხსა და აზნაურს არა თუ ათანასწორებს, ხშირად გლეხს თავადსა და აზნაურზე მაღლაც აყენებს; ის კარგად გრძნობს, რომ მომავალი ასეთი გამარჯვებული გლეხისა არის; რომ გუშინდელი მისი ყმა ხვალ იმაზე წინ უნდა იდგეს ცხოვრებაში. დამარცხებული თავადი და აზნაური ამ გარემოებას ვერ შერიგებია და შეხვდება თუ არა გამარჯვებულ გლეხს, თავის სიძულვილს ვედარ მაღავს. ამის მაგალითს ვხედავთ „ფირალ დავლადეში“. ასეთსავე მაგალითს გვიჩვენებს „ქამუშაძის გაჭირება“. ცხოვრებისაგან დაჩაგრული და გარიყული აზნაურნი, ქამუშაძეები,



გრძნობენ, რომ სამადაძე მათ სჯობია, მაგრამ წოდებრივ თავმოყვარეობას იმ გრძნობით იკმაყოფილებენ, რომ ისინი აზნაურნი არიან, სამადაძე კი გლეხი და „რაც რომ იყვეს, უზრდელ ყაზახს მაინც ჯობიან“. ისინი ცდილობენ, სამადაძეს გული დაუკოდონ მით, რომ ის ყაზახია, შეაგნებთონ მას, რომ ყაზახი აზნაურს ვერასოდეს წაეტოლება, მაგრამ მათი მეცადინეობა სრულიად ამოა, რადგანაც სამადაძემ მშვენივრად იცის, რომ დღევანდელმა ცხოვრებამ ის „შემოდგომის“ აზნაურზე მალა დააყენა. აზნაურობის ძველი თაობა ამ გარემოებას ან ვერ ამჩნევს, ან, თუ ამჩნევს, არ უნდა დაიჯეროს; ის მაინც ირწმუნებს თავს, რომ ცხოვრება აზნაურს და გლეხს არ გაასწორებს. ახალი თაობა კი ნათლად ხედავს და დარწმუნებულიც არის, რომ ძველ გზაზე დარჩენა მხოლოდ დამღუპველია, რომ საქიროა ახალი გზა და კიდევ გამოდიან ამ ახალ გზაზე. მაგრამ ვინ არის იმისი თავდები, რომ ეს ახალი გზა ოტიასა და მის მსგავსებს დაღუპვისაგან იხსნის? ამის თავდებია თვით ცხოვრება, რომელსაც ერთ მხარეზე დაუყენებია ლევანი და ომან ქამუშაძეები, სეფე მარუშიძე და სხვები, მეორე მხარეზე — სამადაძე, პორფირი ბიაშვილი, ბეგლარ ქინჭარაძე და სხვ. მოთხრობაში ერთი საყურადღებო ადგილია: როდესაც ოტია და სონია ლევანისგან სახლში დაბრუნდებიან, იმ ლევანისგან, რომელიც „შიმშილმა მოჰკლა“, როგორც ეუბნებოდა თავის თავს გზაში მიმავალი სონია, და ორივე ცოლ-ქმარი უნუგეშო ფიქრებით არის მოცული ასეთი სურათის ნახვით, ამ დროს მათ სახლში დაუხვდებათ პორფირი ბიაშვილი. სიამოვნებით მოხიბნივთე პორფირის დანახვაზე სონიას ალბათ თვალწინ წარმოუდგება თავისი ძმაც და უცებ თავში გაურბენს: „ამათია ყორიფელი“. ამავე დროს გულდაღონებული ოტიაც თავის თავს ეუბნება:

„ამათ უნდა გავსდიოთ!.. ჩემისთანებმა მაინც, თუ ქვეყანაზედ სიცოცხლე გვინდა!..“

ამგვარად, პორფირის დანახვაზე, „რომლის პირითაც თითქო თავ-მომწონე უფრო ღონიერი ქალაქი დასცინოდა მისუსტებულ სოფელს, დასცინოდა, თავის გამარჯვებას აქადნიდა და ემუქრებოდა მეტს დაჩაგვრას მასთან ბრძოლაში“, ცოლ-ქმარს ერთსა და იმავე დროს ერთი და იგივე აზრი გაურბენს თავში. გავიგოთ, რას წარმოადგენენ პორფირი და ბეგლარი. ეს ორი ადამიანი მხოლოდ იმით განირჩევიან ერთიმეორისაგან, რომ ერთი მუდამ მხიარულია, მუდამ ხიბნივთებს, ყველაფერს სიცილით აკეთებს, ყველასთან თავმდაბალია; მეორე კი მუდამ სერიოზული სახის არის, ამპარტავანია, ბევრი ლაპარაკი, ზალხში ტრიალი არ უყვარს და დედაც კი მორიდებით არის მასთან. დანარჩენში კი ორივე ერთიმეორის ხატებაა, ორ-

აქვე ერთი მიზანი აქვს ცხოვრებაში, ორივე ერთნაირად უყურებს ადამიანის მოქმედებას. ორივე ერთი და იმაზე ზნეობისა და პატიოსნებისა არის. ბეგლარი თავით ფეხებამდე ეგოისტია, მხოლოდ პიროვნული ინტერესების მიმდევარი; ყველაფერი, საიდანაც თავისათვის სარგებლობას არ გამოელის, მის თვალში უმნიშვნელოა და სისულელე. მას არა თუ ვერ წარმოუდგენია, როგორ შეიძლება, რომ ადამიანმა სხვისი სარგებლობის გულისთვის იმოქმედოს ან დაიკლოს რაზე, — ასეთი მიმართულების პირებს კიდეც დასცინის.

თავის ყოველ მოქმედებაში ის მხოლოდ პირადი სარგებლობით ხელმძღვანელობს, მაგრამ ეს კიდეც არაფერი. ის არ დაერიდება არაფერს, — სისაძაგლეს, უსინდისობას ჩაიდენს თავისი სარგებლობის გულისათვის. რა მაქნისია მისთვის სინდისი, პატიოსნება, როდესაც ისინი მის ჯიბეს არას მატებენ? აიღეთ მისი სიყვარული წინოსადმი. მას წინდაწინვე განზრახული ჰქონდა ყოველი თავისი მოქმედება ამ სიყვარულის დროს; ის სცდილობდა სარდიონი ისე ჩაეთრია ხელში, რომ ველარსად წასვლოდა და ჩაითრია კიდეც. მაშინ განზე გადგა და სარდიონს შემოუთვალა: ბარგთან თუ რვაასს მანეთსაც მომცემ, მაშინ დავიწერ ჯვარსაო, და კიდეც შეასრულა თავისი სიტყვა, — საყვარელი ქალი რვაას მანეთში გასცვალა. ასეთივეა პორფირიცი; ხოლო ეს უკანასკნელი უფრო კულქიციანა და ლაქუტაა: ყველას ტკბილ სიტყვას აგონებს, ყველას თეთრ კბილს უჩვენებს, გულში კი საკუთარი სარგებლობის შეტი არა სწამს რა; მისი მიზანია სხვები გაფცქვნას, გაატყავოს, თავის თავს კი ასარგებლოს. პატიოსნება, სხვისი თანაგრძნობა, სხვისი სარგებლობით ხელმძღვანელობა მისთვის სრულიად უცნობი ხილია. აი, როგორ თაიგულს წარმოადგენენ ეს ორი „აიქსი“, და ნუთუ მართლა „მათია ყორიფელი“, როგორც სონიას ჰგონია?!. ნუთუ მართლა ამათ უნდა გასდიონ ოტიასთანებმა, თუ ქვეყანაზე სიცოცხლე უნდათ, როგორც ფიქრობს ოტია?!. აქ შეცდომა აშკარაა. ახალი დრო ითხოვს მხოლოდ ახალ გზაზე გამოსვლას და არა სინდისისა და პატიოსნების დაკარგვას. რა საძაგელიც უნდა იყოს ესა თუ ის ეპოქა, ყოველთვის შეიძლება ადამიანმა ადამიანის ღირსება დაიცვას და დორს არ დაემსგავსოს. საზიზღარი იყო მონობა, საზიზღარი იყო ბატონყმობა, მაგრამ განა ცოტა იყო ორსავე ეპოქაში ისეთი ბატონი, რომელიც ადამიანის სახელს არ არცხვენდა? შეცდომა იქნება, რომ ყველაფერი ცხოვრებას გადავადბრალთ და ადამიანის ბუნება სრულებით არ მივიღოთ მხედველობაში. სინდისისა და პატიოსნების სრულებით ამოშლა არც ერთ ეპოქას არ მოუთხოვია, არც მოითხოვს და, კიდეც რომ მოითხოვოს, ადამიანი მაინც უნდა შეებრძო-

ლოს ასეთ დამამცირებელ მოთხოვნილებას. დეე, მისი ბრძოლა სრულებით უნაყოფო იყოს, მისთვის საზარალოც: სინდისის შერჩენისა და ამაღლებისათვის უნაყოფო ბრძოლა და მსხვერპლიც გაცილებით უფრო პატიოსანია, ვიდრე სინდისის მოქნა და ყოველგვარი სისაძაგლის წინაშე მორჩილად ქედის მოდრეკა.

დღევანდელი დრო სრულებითაც არ ითხოვს იმას, რომ ყოველი ადამიანი, ვისაც კი ცხოვრება უნდა, ბეგლარსა და პორფირის დაემსგავსოს. და ჩვენც, მკითხველო, ამ რწმენით გამოვემშვიდობებით ოტია ქამუშაძეს და მასთან ერთად მის ბედში მყოფთ: მათთვის საჭიროა, აუცილებელია მოქალაქეობრივ გზაზე დადგომა, მაგრამ ამ გზაზე შემდგარტ ზნეობის შერჩენა და ამაღლება არ უნდა ავიწყდებოდეთ, რადგანაც სინდისი, პატიოსნება, ერთმანეთის თანაგრძობა, ერთიმეორის ინტერესთა დაცვა ადამიანის ბუნების საუკეთესო სამკაულია და უამისოდ ადამიანი ხომ ორფეხა მხეცი იქნება მხოლოდ.

1900

## ორმოცდაათი წელი ქართული თეატრისა

### I

ამ წლის ორ იანვარს ორმოცდაათი წელი შესრულდა მას აქეთ, რაც პირველად იხილა ქართველმა საზოგადოებამ ქართული პიესა, ქართველი მსახიობნი, ქართული წარმოდგენა. ნახევარმა საუკუნემ გაირბინა აგერ მას აქეთ, რაც ქართველმა საზოგადოებამ პირველად შედგა ფეხი გონებრივი და ზნეობრივი წინმსვლელობის სასწავლებელში — თეატრში.

რა გაჭირვება გამოიარა ამ დროის განმავლობაში ჩვენმა თეატრმა, რა გააკეთა მან, რა შესძინა ჩვენს ცხოვრებას, რამდენად შეუწყო ხელი ჩვენი ეროვნული თვითცნობიერების შეგნებას და განვითარებას, — ყველა ამგვარი კითხვები, მგონია, საყურადღებოა ყოველი ქართველისათვის, რომელსაც თავისი ერის მომავლი აინტერესებს. ამიტომ, რომ გადავავლოთ თვალი ჩვენი თეატრის ბედობას ამ ორმოცდაათი წლის განმავლობაში, შეიძლება ვპოვოთ შიგ მცირე რამ საგულისხმეო და მომავლისათვის სახელმძღვანელო ან ყურადსაღები.

ადამიანის ორგანიზაცია ისე არის მოწყობილი, რომ ინსტინქტურად მიისწრაფვის სიამოვნებისაკენ. სიამოვნება მის აუცილებელ მოთხოვნილებას შეადგენს. სიამოვნება ორგვარია: ერთია ზორციელი ანუ ფიზიოლოგიური, მეორე — სულიერი.

მაშინ, როდესაც ფიზიოლოგიური სიამოვნების მოთხოვნილება ყოველგვარ ცხოველსა აქვს, განვითარების რა საფეხურზეც უნდა იდგეს, სულიერი სიამოვნება მხოლოდ ადამიანის საჭიროებად ჯამხდარა და ისიც ყველა ადამიანისათვის არა. ადამიანი გონებრივად და ზნეობრივად კარგად განვითარებული უნდა იყოს, რომ სულიერი სიამოვნებას საჭიროებდეს. როდესაც ცხოვრება რთული და განვითარებულია, ერი გონებრივად დაწინაურებული, მაშინ სულიერი სიამოვნების მოთხოვნილება ერთი და ორი კი არა, მთელი სა-

ზოგადობის, მთელი ერის ნიშნობლივ თვისებას შეადგენს. ასეთი ერისათვის საჭირო ზღედა სხვადასხვა ჩაშუალება სულიერი წყურვილის დასაკმაყოფილებლად.

ერთ ამგვარ დაწესებულებას წარმოადგენს თეატრი, რომელიც განვითარებულმა საბერძნეთმა წარმოშვა, შემდეგ გადმოსცა რომს და რომიდან მიიღო საშუალო საუკუნეების და დღევანდელმა ევროპამ.

ამ დროის განმავლობაში თეატრი სახეს იცვლიდა, ისე როგორც იცვლებოდა თვით ცხოვრება. მაგრამ მაყურებელთა უმეტესი ნაწილი საბერძნეთშიც, რომშიც, დღევანდელ ევროპაშიც ერთი და იმავე მიზნით მიდიოდა და მიდის თეატრში: მას უნდოდა და უნდა სიამოვნება.

მართალია, სულიერი სიამოვნების საჭიროება ადამიანის გონებრივად და ზნეობრივად განვითარების უტყუარი ნიშანია, მაგრამ ნუთუ თეატრსაც ცალიერი სიამოვნების მოცემის მეტი არა შეუძლია რა? (თუ მხედველობაში არ მივიღებთ ბალაგანურ თეატრს, ძველ ბერძნებსაც და დღევანდელ ევროპელებსაც თეატრი წვრთნიდა, ახედებდა ცხოვრებაში და ადამიანის გულში, უღვიძებდა სხვადასხვა გასაკიცხი მოქმედების სიძულვილს, ჰბადებდა მათ გულში სიყვარულს და მისწრაფებას ყოველგვარი კეთილისადმი და ამგვარად აფაქიზებდა და ამოღებდა ადამიანის გონებას და ზნეობას).

თეატრი ყოველ დროს ხელს უწყობდა ცხოვრებისა და ადამიანის გაუმჯობესებას: ვოლტერმა თეატრი პოლიტიკური იდეების გასავრცელებელ ასპარეზად ამოიჩინა და თეატრის შემწეობით ხელი შეუწყო რევოლუციის მოახლოებას.

ამგვარად ჭეშმარიტი თეატრი სარგებლობს ხალხის სულიერი სიამოვნების საჭიროებით და სიამოვნების სახევეში აწვდის მას სხვადასხვა საგულანხმო აზრს და მაგალითს.

თეატრის ამგვარი მნიშვნელობა კარგად ჰქონდა შეგნებული თითო-ორი პირს, რომლებიც მეორმოცე წლებში გამოჩნდნენ ჩვენში.

ამ პირთა შორის იყო გიორგი ერისთავიც. ერისთავი როგორც განვითარებით, ისე ნიჭითა და მიმართულებით გაცილებით მაღლა იდგა დანარჩენ ქართველობაზე. ჩვენი საზოგადოება მეორმოცე წლებში საღათას ძილს მისცემოდა. გონებრივად და ზნეობრივად ის ძალიან დაქვეითებული იყო; მისი ცხოვრება იყო ფუქსავატი, უზნეო, უშინაარსო. ჩვენი არისტოკრატია ხანდახან წარსულისაკენ თუ გაიხედავდა ხვნეშით, თორემ მომავალი არც აგონდებოდა, არც

იზიდავდა: ამ მომავლისათვის ის სრულებით არ ფიქრობდა, არ ზრუნავდა. სულაერი მოთხოვნილება უმრავლესობას არავითარი არ ჰქონდა: ძალზე გაძლომა და ლოგინზე გაგორება, ლოთობა და ქორ-მეძებარი, — აი მთელი მაშინდელი ცხოვრების შინაარსი.

მხოლოდ მკირეოდენ პირთ, და მათთან ერთად გიორგი ერისთავსაც, მამულისათვის გული შეტკიოდათ, მიზნად დაესახათ საზოგადოების გამოფხიზლება, ეროვნული თვითცნობიერების გაღვივება და გაძლიერება, ცხოვრების გაუმჯობესება.

რა საშუალებით შეეძლოთ თავისი მიზნის მიღწევა? საშუალება იყო სამგვარი: სწავლა-განათლება, ლიტერატურა და თეატრი.

განათლებისათვის ზრუნვა მთავრობის სრულ უფლებას ექვემდებარებოდა, ამიტომ მამულის გულშემატკივართაც ორი უკანასკნელი საშუალება დარჩენოდათ და მათ მიმართეს გ. ერისთავის მეთაურობით. ქართული თეატრის დაარსება გიორგი ერისთავის უძლიერეს საწადელს შეადგენდა, მაგრამ ამ საწადელის ასრულებას ბევრი დაბრკოლება ელობებოდა წინ. ყველა ამ დაბრკოლების ძლევე თავისთავად, სხვის დაუხმარებლად, მარტო გ. ერისთავს არ შეეძლო.

დამხმარებელიც მალე აღმოუჩნდა ერისთავს — ეს იყო ვორონცოვი, რომელიც 1844 წელს კავკასიის მმართველად დაინიშნა.

რას აკეთებდა ამ დროს გ. ერისთავი? მას სულითა და გულით უნდოდა თეატრის შემწეობით სინათლე შეეტანა ჩვენს ბნელ ცხოვრებაში, მაგრამ მისი სურვილი სურვილადვე რჩებოდა ჭერჯერობით, მხოლოდ მისი პიესა „გაყრა“ ხელნაწერი ვრცელდებოდა საზოგადოებაში და ნელ-ნელა ნიადაგს უშვადებდა თეატრს.

როდესაც ვორონცოვმა გაიგო, ქართველებს საკუთარი დრამატურგიც ჰყოლიათ და კომედიაც ჰქონიათო, გადაწყვიტა ხელი შეეწყო ამ საქმისათვის და ამიტომ გ. ერისთავის გაცნობა მოიწადინა. ერისთავი ამ დროს ხიდისთავში ცხოვრობდა. შეიტყო თუ არა ვორონცოვის სურვილი, მყისვე გამოეცხადა მას თავისი ხელნაწერით. რადგანაც ვორონცოვი არც გიორგის იცნობდა, არც მის „გაყრას“, ამიტომ თხოვა მას: სცენისმოყვარე ქართველებს მოუყარეთ თავი და თბილისის გიმნაზიის სცენაზე<sup>1</sup> წარმოადგინეთ თქვენი კომედიაო. ვორონცოვს ამით უნდოდა, თავისი თვალით დარწმუნებულიყო, შეეძლო თუ არა გ. ერისთავს ქართულ თეატრს წინ გაძლოლოდა.

რაკი ვორონცოვში ჰპოვა საუკეთესო თანამგრძნობელი, გ. ერისთავი გულმოდგინედ შეუდგა თავისი საქმის განხორციელებას.

<sup>1</sup> ის შინაური სცენაც ვორონცოვმა გააწყო.

მისი დიდი ხნის „უზენაესი ნატვრა“, ოცნებად გადაქცეული, დღეს სრულდებოდა და განა ის საცდელსა დააკლებდა, რომ საქმე დაეგვირგვინებინა?!

გ. ერისთავმა შეადგინა სცენისმოყვარეთა გუნდი, შეასწავლა მათ „გაყრა“ და 2 იანვარს 1850 წ. გიმნაზიის პატარა ზალიდან დაანახვა ქართველ საზოგადოებას მისივე ავ-კარგი.

აი ის პირნი, რომლებიც პირველად გამოვიდნენ ქართულ სცენაზე: ილ. ორბელიანი, ოქ. ერისთავი, დ. ი. ყიფიანი, ბ. გ. ანდრეევსკისა, კნ. ა. ორბელიანისა, გ. ერისთავი, კნ. ქ. ორბელიანისა, გ. ო. შანშიევი, ნ. ერისთავი, გრ. ერისთავი, კნ. მ. ერისთავისა და მ. გ. ჭილაევი. მიკირტუმ გასპარიძის როლს კი გ. ერისთავი თამაშობდა. წარმოდგენას დიდძალი ხალხი მოაწყდა.

ვორონცოვი ერთობ კმაყოფილი დარჩა. პირველმა წარმოდგენამ ის დაარწმუნა, რომ გიორგი ერისთავს შეეძლო ქართული თეატრისათვის მეთაურობა და პატრონობა გაეწია, და ამიტომ ერისთავი ხილისთავიდან თავის ამაღლაში გადმოიყვანა, რომ თეატრს მუდამ გვერდში ჰყოლოდა.

მალე თამამშოვის ქარვასლაში დაასრულეს ახალი თეატრის აშენება და ამ თეატრში 3 მაისს 1850 წელს გაიმართა მეორე ქართული წარმოდგენა, ითამაშეს ერისთავის ახალი კომედია „დავა“. რომლის შინაარსიც თითქმის იგივეა, რაც პირველი პიესისა; შინაარსს გარდა ტიპებიც იგივეა, თუ შეიძლება ტიპები ვუწოდოთ იმ მკრთალად და გარეგნულად დახატულ პირებს, რომლებიც ამ კომედიებშია.

ამ წარმოდგენის შემდეგ ვორონცოვმა გადაწყვიტა ქართული თეატრი უფრო მტკიცე ნიადაგზე დაეყენებია, მაგრამ ამისათვის ფული იყო საჭირო. ვორონცოვი მოელაპარაკა გიორგი ერისთავს, მიანდო მას ქართული დასის შედგენა. ორასი თუმანი მაშინვე მისცა მსახიობთა დასასაჩუქრებლად და წასახალისებლად და ყოველწლივ ოთხასი თუმანი ჯამაგირი აღუთქვა.

ოთხასი თუმანი თუმცა დიდ ფულს არ შეადგენდა, მაგრამ ამ ფულით მაშინ შეიძლებოდა მსახიობების შოვნა.

1850 წ. გაზაფხულზე გიორგი ერისთავი გაემგზავრა სოფლისა-კენ, რომ იქ შეედგინა დასი. ჩვენ არ ვიცით, რად მიმართა ერისთავმა სოფელს; ალბათ ის ხედავდა, რომ სოფელში არ აღმოუჩნდებოდა მის საქმეს იმდენი მტერი, როგორც ქალაქში, ამას გარდა სოფელში უფრო იაფად იშოვნებდა მსახიობებს.

ერისთავმა რამდენსამე თვეში მოამზადა ქართული დასი და შემოდგომაზე ქალაქში ჩამოვიდა. ჩვენი პირველი მსახიობები იყვნენ:

ქ-ნნი სააკაძისა, ტატიშვილისა, ანტონოვისა და ბაფეროვისა; ბ-ნნი დვანაძე, ტატიშვილი, რჩეულიშვილი, კორძაია, კიკნაძე და ელიოზიშვილი.

თბილისში ერისთავი განაგრძობდა გამოუცდელი მსახიობების წვრთნას. ვორონცოვი დიდი სიყვარულით ეპყრობოდა მათ, ხშირად ღადიოდა რეპეტიციებზე, გულს უხალისებდა ყველას საჩუქრებით და, როცა გაიგო, რომ ოთხასი თუმანი არტისტებისათვის ძალიან ცოტა იყო, ამა თუმანი კიდევ მოუმატა ჯამაგირად. მთელი შემოდგომა ემზადებოდა დასი და 1851 წ. 1 იანვარს გამოვიდა იმავე „გაყრაში“. ამის შემდეგ ახალი დასი ვორონცოვმა გადასცა თბილისის თეატრის დირექციას.

დირექცია ქართველ მსახიობებს გულგრილად ეკიდებოდა, ხელს აუ უშლიდა, თორემ არ ეხმარებოდა, რუსული და იტალიური წარმოდგენები უფრო იზიდავდა ჩვენს საზოგადოებას, ერთი იმიტომ, რომ ჩინოვნიკობა და მხედრობა სულ იქ ღადიოდა, მეორე—რუსული და იტალიური თეატრი უფრო ამხიარულებდა მაყურებელს; ამას პიუმატეთ ჩვენი საზოგადოების მოუშზადებლობა, რეპერტუარის ადარბე და ადვილად წარმოიდგენთ, თუ როგორ მდგომარეობაში უნდა ყოფილიყო ჩვენი თეატრი.

1855 წელს ვორონცოვი საქართველოდან გადაიყვანეს. ამის შემდეგ დასს ჯამაგირი აღარ მისცეს. შემოსავალი მას ვერ ინახავდა, გ. ერისთავმა ველარა გააწყო რა და იძულებული იყო თავის საქმეს გამოსთხოვებოდა, დასი დაეთხოვა და თავის მამულში, ხიდისთავს, წასულიყო.

გიორგის შემდეგ სცენისმოყვარენი კიდევ ცდილობდნენ, რომ თეატრი როგორმე წამოეყენებინათ ზეზე. ამგვარ პირთა შორის ყველაზე მეტი შრომა და ხარჯი კერესელიძემ გასწია. მან ისესხა ორასი თუმანი, დაიჭირავა შარმაზანოვის დარბაზი, გააკეთა ლოჟე-ზი. პარტერი, მოაწყო სცენა, დაახატვინა დეკორაციები და დაიწყო წარმოდგენები.

კერესელიძეს იმედი ჰქონდა: შემოსავალი იმდენი მექნება, რომ ნახევრით ვალს ვისტუმრებ ნაწილ-ნაწილად, ნახევარიც არტისტებს დააკმაყოფილებსო. მაგრამ იმედი არ გაუმართლდა: მიუხედავად იმისა, რომ ნიჭიერი არტისტები ჰყავდა და როლებს კარგად სწავლობდნენ, შემოსავალი არტისტებსაც ვერ აკმაყოფილებდა; ძველი ეალი ვალადვე რჩებოდა და მას ახალი ემატებოდა.

ექვს თვეს აცოცხლა კერესელიძემ თეატრი, ექვსი თვის შემდეგ კი მოვალეებმა ყველაფერი ვალში გაუყიდეს და თეატრის არსებობას ბოლო მოუდეს. დასი დაიშალა, ვალი კერესელიძეს დაატყდა.



„ჩემი ჯამაგირი სამი წლის განმავლობაში სულ მოვალეებს მიჰქონდათ“, — წერს კერესელიძე.

ამგვარად ქართულმა თეატრმა ხუთი წლის არსებობის შემდეგ სული დალია.

ამის შემდეგ ოცდაოთხმა წელმა გაიარა, სანამ სამუდამო სცენის დაარსება შესაძლებელი გახდებოდა. ამ ოცდაოთხი წლის განმავლობაში ხალხი ნელ-ნელა იღვიძებდა და წინ მიდიოდა. ბატონყმობა მოიხსოვ, ევროპული ცხოვრების გზაზე მტკიცედ შედგა ფენი ჩვენმა ქვეყანამ. მაგრამ გამოფხიზლება იმდენად ძლიერი ჯერ არ ყოფილა, რომ საზოგადოების მოთხოვნილებას თეატრი დაეხმობა. მხოლოდ ხანდახან სცენისმოყვარენი გამართავდნენ ხოლმე წარმოდგენებს თუ კლუბებში, თუ კერძო ოჯახებში, და ამით თეატრის სიყვარულს ნელ-ნელა აღვივებდნენ საზოგადოებაში. ამ დროის განმავლობაში ყველაზე მეტი სამსახური ჩვენი თეატრისათვის ნ. ავალიშვილს, ან. ფურცელაძეს და ა. როინაშვილს მიუძღვით.

როდესაც საზოგადოებამ იმდენად გამოიღვიძა, რომ თეატრის საჭიროება თვით ცხოვრების განვითარებამ გამოიწვია, შეადგინეს ამხანაგობა: დიმიტრი ყიფიანიძე, გიორგი თუმანიშვილი, დავით ერისთავი, ნ. ავალიშვილი, იოს. ბაქრაძე, ალ. სარაჯიშვილი, ილ. ჭავჭავაძე და განიზრახეს სამუდამო სცენის დაარსება. მათ შეაგროვეს ფული, დააარსეს დრამატული კომიტეტი, გამოიკვლიეს ამხანაგობის წესდება და 1879 წ. 5 სექტემბერს ჩაჰყარეს საძირკველი სამუდამო სცენისა: ამ დღეს წარმოდგენილი იქნა კნ. ბარბარე ჯორჯაძის კომედია — „რას ვეძებდი და რა ვპოვე“.

იქიდან მოკიდებული დღემდე ოცი წლის განმავლობაში ჩვენი თეატრი არ დახურულა; ის თუმცა რყევით მიდიოდა წინ, თუმცა ხშირად განსაცდელში ყოფილა ხოლმე, მაგრამ მისი არსებობა უკვე მტკიცე ნიადაგზე არის აგებული; ეს მტკიცე ნიადაგი ჩვენი საზოგადოების სულიერი მოთხოვნილებაა, ჩვენი ცხოვრება წინ მიდის, საზოგადოების სულიერი მოთხოვნილება უფრო იზრდება და ძლიერდება; ამიტომ თეატრიც დღითი დღე უფრო საჭირო ხდება ჩვენთვის და მისი დღეგრძელობა ეჭვს გარეშეა.

სამუდამო სცენის მეორედ დაარსებაში ყველაზე გულმხურვალე მონაწილეობას იღებდნენ დ. ყიფიანი და გ. თუმანიშვილი. გიორგი თუმანიშვილი არაფერს ზოგავდა, რომ თეატრი მტკიცე ნიადაგზე დაეყენებია და დაეწინაურებია; ის ცდილობდა, რომ თეატრის სიყვარული სოფელშიაც აღეძრა და ამიტომ დასი სოფლებშიაც დაჰყავდა ხოლმე. ამგვარმა შრომამ ის დაასწავლა, ამას ზედ დაერთო უმადურობა და იგი იძულებული გახდა 1880 წლის გასულს თეატრი-

სათვის თავი დაენებებია; ამავე დროს დრამატიულმა კომიტეტმაც; ხელი აიღო თეატრზე და მეთაურობა ვ. აბაშიძემ და კ. მესხმა იკისრეს. ამ ორ პირს პირველ ხანს კარგად მიჰყავდათ საქმე, მაგრამ მალე თავი დაანებეს და თეატრის წინგაძღოლა იკისრა აკაკიმ.

აკაკის მეთაურობა მეტად ხანმოკლე იყო, მას შემდეგ მეთაურობას ხან ერთი პირი კისრულობდა, ხან მეორე; პატარა ხანს ისევ შედგა დრამატიული კომიტეტი, მაგრამ მალე დაიშალა.

დღევანდელ ჩვენს თეატრს ისევ დრამატიული კომიტეტი განაგებს.

ჩვენ ზოკლედ განვიხილეთ ჩვენი თეატრის ნახევარი საუკუნის ისტორია. შემდეგ წერილში ვეცდებით დავანახოთ მკითხველს, რას წარმოადგენდა ამ დროის განმავლობაში ქართული სცენა, რას აძლევდა ის ჩვენს საზოგადოებას და რამდენად უწყობდა ხელს ჩვენი ცხოვრების წინსვლელობას.

## II

ყოველგვარ დაწესებულებას მხოლოდ მაშინ შეუძლია შესაფერი სარგებლობის მოტანა, როცა ის პირდაპირი შედეგია საზოგადოებრივი წინსვლელობისა, როცა ის საზოგადოების სულიერი მოთხოვნილებებით არის გამოწვეული, როცა საზოგადოებას შეგნებული აქვს მისი მნიშვნელობა.

სამოცდაათიან წლებში ჩვენმა ცხოვრებამ შესამჩნევი ნაბიჯი წადგა წინ; განათლებული და განვითარებული გონების პატრონი ახალგაზრდები ბლომად გამოერივნ ცხოვრებაში; ჩვენი მწერლობა აყვავდა. ოცი წლის წინათ თუ ერთმა „ცისკარმაც“ ვერ იფორჭალა, სამოცდაათი წლის დასაწყისში ქართულ ენაზე გამოდიოდა: „დროება“, „სასოფლო გაზეთი“, „კრებული“ და „მნათობი“. შედგა სხვადასხვა ლიტერატურული წრე, დაიბადა სხვადასხვა მიმართულება, ამან გამოიწვია კრიტიკის აღორძინება და განვითარება.

საზოგადოების გამოფხიზლებას და ლიტერატურის განვითარებას ის შედეგი მოჰყვა, რომ გასართობმა თეატრმა ველარავინ დააკმაყოფილა და ხელი მიჰყვეს რუსეთისა და ევროპის დრამატურების თარგმნას. გაჩნდნენ ორიგინალური დრამატურებიც. გ. წერეთლის „ჯიბრი“ 1872 წ. დაიწერა.

როდესაც საზოგადოებამ შეიგნო ჰუმარიტი თეატრის ნამდვილი მნიშვნელობა, მაშინდელი საუკეთესო პირების შრომით კიდევ

დაარსდა სამუდამო სცენა, 5 სექტემბერს, 1879 წელს. ამგვარად, 1870 წლამდე ქართული თეატრი უმთავრესად გასართობი იყო; ის მხოლოდ სიყვარულს უღვიძებდა საზოგადოებას თეატრისადმი, ნიადაგს უმზადებდა ხალხის აღმზრდელ თეატრს, თვითონ კი აღმზრდელობითი მნიშვნელობა არა ჰქონდა.

შემდეგი ათი წლის განმავლობაში თეატრი ცდილობს გასართობ გზას თავი დაანებოს და საზოგადოების განვითარებას შეუწყოს ხელი, მაგრამ მუდმივი სცენა არ არსებობდა და წელიწადში ორი-სამი წარმოდგენა დიდ ნაყოფს ვერ მოიტანდა, თავის ქეშმარიტ კალაპოტში ჩვენი თეატრი მხოლოდ მეოთხმოცე წლებში ჩადგა და მას აქეთ შეუჩერებლად იღებს მონაწილეობას ჩვენი ერის გონებრივსა და ზნეობრივ წინმსვლელობაში.

ჩვენს სცენაზე დღეს ბევრი ისეთი ნიჭიერი მსახიობია, რომ მათ შეუძლიათ საუკეთესო ევროპული სცენაც დაამშვენონ. სამწუხაროდ, ამასვე ვერ ვიტყვით ჩვენი დრამატურგების შესახებ. ჩვენს დრამატულ მწერლობაში ორი ხანა არის აღსანიშნავი: პირველი ხანა დაიწყო გ. ერისთავის კომედიებით, მეორე ხანა მეოთხმოცე წლებში დავით ერისთავის დრამით „სამშობლო“.

ყველა კომედია, რომელიც ქართულ ენაზე დაიწერა, გიორგი ერისთავის კომედიების კოპიაა; ყველა გარეგნულად ხატავს ცხოვრებას, ყველა ცდილობს სიცილი გამოიწვიოს ოხუნჯობით, მიქცეულ-მოქცეული სიტყვებით და არა მოქმედების განვითარებით და ხასიათთა კონტრასტებით; ყოველი ეს კი არ შეადგენს კომედიის დამახასიათებელ თვისებებს, — ასე რომ ნამდვილი კომედია ქართულ დრამატულ ხელოვნებას ჯერ არ შეუქმნია.

ყველა დრამა, რომელიც მეოთხმოცე წლებს აქეთ დაწერილა, დ. ერისთავის „სამშობლოს“ ზეგავლენის ნაყოფია. თუ ასეთი დრამები საზოგადოებაზე შთაბეჭდილებას ახდენს, უფრო პატრიოტული გრძნობის ბრალია, ვიდრე დრამების ღირსების.

რადგანაც ორიგინალური პიესები ცოტა მოგვეპოვებოდა და რაც იყო, უმეტესი ნაწილი ძალიან სუსტი იყო, ამიტომ ჩვენი მწერლობა იძულებული იყო უცხო დრამატურგები ეთარგმნა, და ამ მხრით ჩვენმა სცენამ და ლიტერატურამ ძალიან ბევრი შეიძინა.

შეუძლებელია იმის გამოკერძობა, რაც მარტო თეატრმა გააკეთა ამ დროის განმავლობაში; ხოლო თუ რამემ შეუწყოს ხელი ჩვენი საზოგადოების გამოფხიზლებას, ცხოვრების წინმსვლელობას, ჩვენს თეატრსაც დიდი ღვაწლი მიუძღვის ამ მხრივ.

შემდეგში, როცა ცხოვრება უფრო გამოირკვევა და ის გასაზოგადებული კლასები, რომლებმაც ჩვენში თავი იჩინეს, დასრულე-

ბულ სახეს მიიღებენ, თეატრი უფრო მეტ სარგებლობას მოიტანს, რადგანაც ეცოდინება, ვინ ამხილოს და ვისი ინტერესები დაიცვას.

ამ ორმოცდაათი წლის განმავლობაში, როგორც აღმოჩნდა. დრამატიული საზოგადოების გამგეობის მოხსენებიდან, თბილისის სცენაზე წარმოუდგენიათ სულ 219 პიესა, რომელთაგან კომედიები და ვოდვეილებია 139, დრამა და ტრაგედიები 80. ამათში უმეტესი წილი თარგმანია, ორიგინალურია მხოლოდ 85 პიესა, 50 კომედიავოდვეილი და 35 დრამა.

ამგვარად ჩვენი ორიგინალური რეპერტუარი არ ყოფილა მაინც და მაინც ღარიბი, თუმცა არც სიმდიდრე ეთქმის. ჩვენს დრამატურგებს უფრო კომედია-ვოდვეილების თხზვაში გამოუჩენიათ ნიჭი. სამწუხაროდ კომედიებში აალიან ცოტა არის ისეთი, რომ ამართლებდეს თავის სახელს; უმეტესი წილი უფრო ვოდვეილსა ჰგავს, ვერ აჩვენებს მაყურებელს ჩვენი ცხოვრებისა და ბუნების გასაკიცხ თვისებებს. ვერ ჩააფიქრებს, ვერ დაუბადებს სურვილს ცხოვრებისა და თავისი თავის გაუმჯობესებისას.

დღეს არისტოკრატიამ და შისმა ქარაფშუტა ცხოვრებამ უპირატესობა დაკარგა ჩვენს ცხოვრებაში. დღეს მარტო არისტოკრატიის ინტერესები საზოგადო ყურადღებას აღარ იპყრობს; მათ ალაგს იჭერს მთელი ერის ინტერესები, მთელი ერის აწმყო და მომავალი და არა ერთი რომელიმე წოდების: ასე მოითხოვა ჩვენი ცხოვრების წინსვლელობამ.

თუ ცხოვრებამ იცვალა ფერი, თეატრმაც უსათუოდ უნდა იცვალოს. თუ ის ერთ დროს აკმაყოფილებდა ჩვენს საზოგადოებას უშინაარსო კომედიებითა და ხმალ-ხანჯლის ტრიალის ცქერით, ასეთი პიესებით დღეს ბევრს ვეღარ დააკმაყოფილებს. რასაკვირველია, ჩვენი საზოგადოებრივი განვითარება ადრე თუ გვიან მისცემს ჩვენს ცხოვრებას დროის შესაფერ დრამატურგს, მაგრამ, სანამ ნიჭიერი კაცი დაიბადებოდეს და სცენას გარდაქმნიდეს, თვითონ სცენა უნდა ცდილობდეს დროის შესაფერი სახე მიიღოს. ჩვენი დღევანდელი სცენის შესახებ კი ამას ვერ ვიტყვი. როდესაც დღევანდელმა საპარბოროტო სოციალურმა კითხვებმა დიდი ხანიც თავი იჩინეს ჩვენს ლიტერატურაში, როდესაც სოციალური კლასების აღორძინება ჩვენს ცხოვრებაში ყველასათვის ცხადია და ლიტერატურაც ვეღარ მაღავს ამ მოვლენას, ჩვენი სცენა ჯერჯერობით ყურსაც არ იბერტყავს: ის ისევ ძველი არისტოკრატიის შექცევას ცდილობს. თუ კი ჩვენი დრამატურგები არ იღებენ ან ვერ იღებენ დღევანდელი ცხოვრებიდან პიესისათვის თემას, სცენამ რა მოაგვაროსო, იტყვის ზოგიერთი მკითხველი; აი რა უნდა მოაგვაროს: სხვა ერსაც გაუვლია ისე-

თი ხანა, როგორც დღეს ჩვენშია, სხვა ერსაც ჰყოლია ასეთი ხანის შესაფერი ნიჰიერი დრამატურგები. მარტო ნაციონალური დრამატურგებით არც ერთი სცენა არ იკვებება და ჩვენ სად დაგვებადება იმდენი დრამატურგი, რომ მარტო მათ დააკმაყოფილონ ჩვენი სცენა? აი ამ უცხო მწერლებს უნდა მიაქციოს ჩვენმა სცენამ ყურადღება და თარგმნოს ისეთი პიესები, რომლებიც უფრო შეეფერებიან დღევანდელ ჩვენს ცხოვრებას, რომლებიც უფრო მეტ მასალას მისცემენ დღევანდელი ქართველის გულსა და გონებას. ამ გზას უნდა დაადგეს ჩვენი სცენა, თუ უნდა საზოგადოებრივ წინმსვლელობაში თავისი წვლილი შეიტანოს და არ გადაიქცეს მარტო გასართობ დაწესებულებად. როგორც ის ამ ოცდახუთი წლის წინათ იყო.

1900

## დავ. კლდიაშვილის მოთხრობანი

სხვადასხვა აზრთა შორის საზოგადოებისა და მისი ზრდა-განვითარების შესახებ მკითხველი შეხვდება ორ აზრს, რომლებიც ერთიმეორის სრული წინააღმდეგია. პირველი ამბობს: საზოგადოებრივი ცხოვრება იგივე ბრძოლაა არსებობისათვისაო, მეორე კი ამტკიცებს: საზოგადოებრივი ცხოვრება შეზღუდვაა, ალამაა არსებობისათვის ბრძოლისაო. რა თვალითაც უნდა უყურებდეს მკითხველი საზოგადოებას, ერთი გარემოება ყველასათვის აშკარაა: საზოგადოებრივი ცხოვრება შეზღუდვაა ადამიანის პიროვნებისა. ადამიანის გრძნობებს, ადამიანის მიღრეკილებათ საზოგადოებაში არა აქვს ბუნებრივი თავისუფლება დათმობილი და სწორედ ამაში მდგომარეობს საზოგადოებრივი ცხოვრების ერთი კარგი თვისება: ადამიანში ეგოისტური, საპიროვნო ინსტინქტები ჯერ იმდენად ჭარბობენ ალტრუისტულ, სოციალურ ინსტინქტებს, რომ თუ საზოგადოება არ შეზღუდავს პირველი ინსტინქტების ბუნებრივ მსვლელობასა და განვითარებას, მაშინ აღარავითარი გონივრული აზრი აღარ ექნება თვით საზოგადოებრივ ცხოვრებასაც, რომლის ერთადერთი მიზანია უზრუნველჰყოს, დაიცვას ადამიანის სიცოცხლე, მისი პიროვნება და უფლებანი. თუმცა, ამგვარად, საზოგადოებრივი ცხოვრება შეზღუდვაა ადამიანის პიროვნებისა და ამით შეზღუდვაა თვით არსებობისათვის ბრძოლისა, მაგრამ ეს სრულიად იმას არ ნიშნავს, რომ საზოგადოებაში არსებობისათვის ბრძოლას ალამი აღარ ჰქონდეს; არსებობისათვის ბრძოლა საზოგადოების ერთ ნიშნობლივ მხარეს შეადგენს. როგორც ბუნებაში, ისე საზოგადოებაშიაც ბრძოლა ორგვარია: ბრძოლა საზოგადოებისა ბუნებასთან და ბრძოლა საზოგადოების სხვადასხვა ნაწილთა შორის. ხოლო ეს ბრძოლა ბუნებრივი ბრძოლისაგან მით განირჩევა, რომ მეორე მოკლებულია რთულ და მოსაზრებულ ორგანიზაციას, თვით საზოგადოებაში კი არსებობისათვის ბრძოლამ რთული ორგანიზაცია მიიღო. მაშინ, როდესაც ბუ-

ნებრივ პირობებთან ბრძოლით ერთიანად მთელი საზოგადოება იცავს თავის თავს, აუმჯობესებს თავისი ცხოვრების პირობებს, ბრძოლას საზოგადოების სხვადასხვა ნაწილს შუა სრულებით სხვა მიზანი აქვს. სხვადასხვა ნაწილი საზოგადოებისა რომ ყველა ერთნაირის უფლებით იყოს აღქმული, უპირატესობა არც ერთს არ ეკუთვნოდეს და მხოლოდ უმრავლესობა აწარმოებდეს ყველაფერს და არა უმცირესობა, მაშინ მეორეგვარ ბრძოლას საზოგადოებაში ალაგი არ ექნებოდა. მაგრამ ყოველგვარ საზოგადოებაში მთლიანობა დარღვეულია, უფლებითი ერთგვარობა უარყოფილია და ერთი ნაწილის ბედნიერება მეორე ნაწილს გახდომია საზიდავ ტვირთად. ამიტომ ყოველი ნაწილი საზოგადოებისა ან იმისათვის იბრძვის, რომ თავისი უპირატესობანი დაიცვას და ბატონობა შეინარჩუნოს — თუ ბატონია, — ან მისთვის იბრძვის, რომ უფლებანი მოიპოვოს — თუ მათ მოკლებულია, — და მონობის უღლიდან თავი განითავისუფლოს.

ბატონყმური წყობილება როგორც ყველგან, ისე ჩვენშიც წარმოადგენდა განსაზღვრულ ორგანიზაციას კლასთა შორის ბრძოლისა. ერთი მხრით ბატონი და მეორე მხრით ყმა ორ სხვადასხვა კლასს ეკუთვნოდნენ; ბატონი მთელი თავისი სიმძიმით ყმას აწვა კისერზე, ყმა ბატონის სრულს კუთვნილებას შეადგენდა, ბატონის ხელთ იყო მისი ბედ-იღბალი და, თუ მას ხშირად კარგ მეძებარში ან მიმინოში გასცვლიდა ბატონი და მოგლეჯდა ოჯახს, მაშინ ჩვენი წარსულის მოტრფიალენი მარტოდმარტო მამობრივ მზრუნველობას ხედავდნენ! ბატონი და ყმა იმდენად განირჩეოდნენ ერთიმეორისაგან უფლება-უპირატესობით, რამდენადაც სხვადასხვა ეკონომიურ პირობებში იყო მოქცეული თვითეული მათგანის ცხოვრება. ნატურალური წარმოების დროს ყველაზე მეტი მნიშვნელობა მიწას ჰქონდა. მიწა კი ერთიანად ბატონის ხელში იყო. ქონებრივად ბატონი ყმაზედ გაცილებით მაღლა იდგა და ქონებრივი უპირატესობით შეიძინა მან მეტი მნიშვნელობა, უფლებანი და ძალა საზოგადოებრივ ცხოვრებაში; ყმა კი ლატაკი იყო ქონებით და ამიტომ უფლებითაც სრულს არაარაობას წარმოადგენდა; საზოგადოებრივ ცხოვრებაში ის არ იყო განკერძოებული პიროვნება, არამედ ნივთი, ღირებულება; ყმა და მიწა წარმოადგენდნენ ორ მთავარ ბოძს, რომლებზედაც დამკვიდრებული იყო ბატონის ძლიერება. ბატონი მარტო იმით კი არ იყო ძლიერი, რომ ის მიწის პატრონი იყო, არამედ უმთავრესად იმით, რომ მას ჰყავდა ყმა. ცხოვრება მარტივი იყო, მოთხოვნილებანი ერთფეროვანი, ღვინო და პური ასრულებდა ფულის დანიშნულებას, ორსავე ამას კი ყმა აძლევდა ბატონს. წაართვით

ბატონს მიწა და ყმა, და ამით წაერთმევა მას განსაკუთრებული უპირატესობანი ცხოვრებაში. სწორედ ასეთი მტრობა გაუწია ბატონს კაპიტალისტურმა ხანამ: ბატონს ჩამოერთვა ყმა, მიწის ძალა და მნიშვნელობა ფულმა დაისაკუთრა და ძველი ბატონის ალაგას ფულის პატრონი გაბატონდა. ბატონი და ყმა წარმოიშენენ ნატურალური წარმოების ნიადაგზე, ნატურალური წარმოების გარეშე მათ არ შეეძლოთ თავისი სახე შეერჩინათ. კაპიტალისტურმა წარმოებამ კი მოითხოვა ახალი ურთიერთობა საზოგადოების წევრთა შორის; მისთვის საჭიროა თავისებური ფიზიკური ძალა და ამიტომ ის უარჯყოფს ყმას, მისთვის მნიშვნელობა აქვს მხოლოდ ფულს და არა მიწას; ამიტომ ის უარყოფს მიწის პატრონს და პირველობას აძლევს ფულის პატრონს.

ჩვენი ბელეტრისტიკა თავადაზნაურობის შესახებ გადაჭრილ პასუხს იძლევა. თანამედროვე ბელეტრისტთა შორის ერთი საუკეთესო ალაგი უჭირავს დ. კლდიაშვილს. სხვა ღირსებათა შორის მას აქვს ერთი დიდი ღირსებაც: მისი ნაწერები სახელოვნო ჭეშმარიტებაა. უტყუარი სარკეა ჩვენი ცხოვრებისა. თითქმის არც ერთ ჩვენს ახალგაზრდა ბელეტრისტს არ ეხერხება ჩვენი ცხოვრების სურათების დახატვა იმდენად უტენდენციოდ და მარტივად, როგორც დ. კლდიაშვილს. ჩვენი ცხოვრების დამახასიათებელ სურათებს წარმოადგენენ „სამანიშვილის დედინაცვალი“ და „სოლომონ მორბეულაძე“. დ. კლდიაშვილი გამოვიდა თუ არა სამწერლო ასპარეზზე, მაშინვე რეალურ გზას დაადგა. ჩვენ არ ვამბობთ, რეალური მიმართულება საუკეთესო გზა იყოს სიტყვაკაზმული მწერლობისათვის; საუკეთესო მიმართულება ყოველგვარ მოღვაწეობაში ის არის, რომელიც უკეთ ემსახურება თანამედროვე ცხოვრებას. ადვილი შესაძლებელია, ხელოვნებამ სულ მალე უარპყოს რეალიზმი, მაგრამ არის ისეთი ხანა, როდესაც ბელეტრისტი უმთავრესად პუბლიცისტი უნდა იყოს და სწორედ ასეთ ხანაშია რეალური მიმართულება უფრო დროის შესაფერი და ნაყოფიერი. ასეთ ხანაში გამოვიდა კლდიაშვილი მწერლობაში. ყველა გრძნობდა და ამჩნევდა, რომ ცხოვრებაში რაღაც ცვლილება ხდებოდა, ძველი განწყობილება ირღვეოდა, მაგრამ ეს ცვლილება ყველას თავისებურად ესმოდა: ვინც ძველით კმაყოფილი იყო, ის გაიძახოდა — ძველი საზოგადოებრივი განწყობილება უცვლელი დარჩებაო; ვინც ახლისაკენ უფრო მიისწრაფოდა, ის ამტკიცებდა — ყოველივე ძველი უნდა დაიბრუნდესო. მაშინ, როდესაც საუკეთესო არგუმენტად ცხოვრების დაკვირვება და მისი პირუთვნელად შესწავლა კი არ იყო აღსარებული, არამედ ლანძღვაგინება და პიროვნების დამცირება (სამწუხაროდ, ეს დღესაც ასეა



ჩვენში), დ. კლდიაშვილმა ცხოვრების შესწავლა აირჩია თავის მიზნად და წოდებათა ბედ-იღბლის გამოკვლევა თავისი ხელოვნების საგნად. უმთავრესი ყურადღება კლდიაშვილს თავადაზნაურობისაკენ აქვს მიქცეული. თავადაზნაურობის შესწავლა მან დაამთავრა „ქამუშაძის გაჭირვებით“, სადაც მან გამოსთქვა თავისი უკანასკნელი აზრი და დაკვირვება: თავადაზნაურობა გაპროლეტარების გზაზე არის შემდგარიო.

დიდი ნაწილი ჩვენი თავადაზნაურობისა გადატაკებულია და არა თუ გლახს ველარ სჯობია ქონებრივად, ზოგიერთ კუთხეში ის უფრო გაჭირვებულა: დასავლეთ საქართველოში ბევრგან შეხვდებით, რომ გლახს ოდა წამოუტყობავს და მის გვერდით იმის გუშინდელ ბატონს საჯალაბო სახლიც კი თავზე ენგრევა.

თუ შეძლებული ნაწილი ჩვენი არისტოკრატისა ჯერ კიდევ ოცნებობს უპირატესობა შეიძინოს ცხოვრებაში და თავისი საკუთარი ლხინი და მუცლის ტკივილი მთელი ერის ლხინად და ჰირად მიანინა, სამაგიეროდ გადატაკებულმა ნაწილმა თავი დაანება ამგვარ ოცნებას და მისი ფიქრი და აზროვნება მხოლოდ იმ ორიოდ კვალი მიწის გარშემო ტრიალებს, რომელიც მას დღემდე შერჩენია, — მისი უმთავრესი საზრუნავი ის არის, რომ როგორმე ეს მიწა შეირჩინოს და ეს მაინც არ გამოეცალოს ხელიდან. მან უკვე შეიგნო, რომ ახალი დრო დადგა, ის ახლა იმას ცდილობს, კუჭი მადლარი ჰქონდეს და დღეს თუ ლუკმა პურს სჭამს, არც ხვალ მოშივდეს. ამის საუკეთესო მაგალითს წარმოადგენს „სამანიშვილის დედინაცვალი“. მიწა ერთადერთი გასაღებია პლატონ სამანიშვილის ფსიქოლოგიისა, რაც ავტორს სინამდვილითა და სამაგალითოდ აქვს დახასიათებული. პლატონი გადარიბებული აზნაურია. სხვებთან შედარებით მას კიდევ აქვს რიგიანი ლუკმა, რადგანაც ცოტაოდენი ადგილ-მამული კიდევ შერჩენია; ის კარგად გრძნობს, რომ მისი და მისი ცოლ-შვილის ბედ-იღბალი დამოკიდებულია მიწაზე და ყოველგვარი მისი მოქმედების, მისი მხიარულების, მისი მწუხარების, მისი შიშის, ერთი სიტყვით, მისი გონებრივის ცხოვრების ერთადერთი სათავე მიწაა, რომელიც მას ძილშიაც კი არ ავიწყდება. მან კარგად იცის, რომ მიწა ერთადერთი წყაროა მთელი მისი ოჯახის ცხოვრებისა, მიწის შემეცირება და დამშვევა ერთი და იგივეა მისთვის და ამიტომ მთელი თავისი არსებით ჩაბლაუჭებია ამ მიწას და მთელ მის სულიერ კმაყოფილებას და მყუდროებას აქარწყლებს მართო ის მოფიქრება, ვაი თუ მიწის მოცილე გაუჩნდეს ვინმე. პლატონის ფიქრი და მოქმედება პირველი შიშიდან მოკიდებული დედინაცვლის ცემამდე მხოლოდ მიწით აიხსნება. მამამისი ბეკინა ცოლს ირ-

თავს. მერე რა ვუყოთ?! მეორე კი არა, ზოგს მესამე მოჰყავს და მეოთხეც, მაგრამ ცა კი არავის ექცევა თავზე! უწინდელი დრო რომ ყოფილიყო, როდესაც აზნაური პლატონი მიწას მტკაველობით კი არ ზომავდა, დედინაცვლის მოყვანას პლატონი არაფრად ჩააგდებდა; მაგრამ დღეს, როდესაც ის გაღარიბდა და სხვის ნაბიჯსაც იმ თვალთ ზომავს, თუ რა შეეძინება ან რა დააქლდება მის ქონებას, პლატონმა კარგად იცის, რომ დედინაცვალს ან შვილები მოჰყვება თან და მაშინ ოჯახს მეტი მჭამელი პირი შეემატება, ან ეყოლება შვილები და მაშინ პლატონის ლუკმა შემცირდება, და ამიტომ ის წინააღმდეგია დედინაცვლის. უწინდელი დრო რომ ყოფილიყო, დედის სიკვდილს უმალ მისი გული იგრძნობდა და მწუხარებას მიეცემოდა, როგორც შვილი; დღეს კი დედის სიკვდილს გულზე უმალ მისი კუჭი გრძნობს და ის იგლოვს დედას უფრო, როგორც მიწის მესაკუთრე, ვიდრე შვილი; მან იცის, დედის სიცოცხლე მას იფარავდა ახალგაზრდა დედინაცვლისაგან, დედის სიკვდილმა კი შეიძლება ოჯახში ისეთი დედინაცვალი შემოიყვანოს, რომელსაც შვილები მიეცემა. უწინდელი დრო რომ ყოფილიყო, პლატონს ეყვარებოდა ბეკინა, როგორც მამა, პატივს სცემდა მას, მუდამ წარბებში ცქერასა და პირფერობას არ დაუწყებდა; დღეს კი პლატონის სიყვარულსა და პატივისცემაში იმდენად მამაშვილური გრძნობა არ ურევია, რამდენადაც მიწა, — პლატონს მიწა უფრო უყვარს და, თუ მამას მოვლასა და პატივისცემას უორკეცებს, მხოლოდ იმიტომ, რომ ადგილი შეირჩინოს. პლატონი მშრომელი, უწყინარი, უბოროტო და პატიოსანი კაცია. ამ მხრივ ის სრული მსგავსებაა მამამისი ბეკინასი. მაგრამ მამასა და შვილს შორის ერთი განსხვავებაა: მიწის შემცირების შიშს სრულებით დაუმონებია და დაუმბრუნებია პლატონის გული და გონება; ბეკინას შესახებ კი ამას ვერაფერ იტყვის. რა არის ამგვარი განსხვავების მიზეზი? მხოლოდ სხვადასხვაობა იმ პირობებისა, რომლებშიაც აღიზარდნენ მამა და შვილი. ბეკინა დაიბადა და აღიზარდა მამინ, როდესაც თავადაზნაურობა ჯერ კიდევ სრული ბატონი იყო. მაშინ ცხოვრება არ იყო რთული, ფული დიდ საქიროებას ჩვენი თავადაზნაურობისათვის არ შეადგენდა; ბეკინას მიწა იმდენი ჰქონდა, რომ საკმაო პურსა და ღვინოს აძლევდა და ის სრული კმაყოფილი იყო თავისი ეკონომიური მდგომარეობის. ამგვარი შიში, ვაი თუ ხვალ მიწა შემომაკლდეს და მომშივდესო, ბეკინას არ უკარგავდა მოსვენებას. დღეს კი თუმცა სხვა დრო შეესწრო ბეკინას, მაგრამ მისი შეხედულება და გრძნობანი ძველებური დარჩნენ. მას უკეთესი გზა თავისი ცხოვრებისა უკვე განვლილი აქვს და ამიტომ მომავალიც აღარ აშინებს. სულ სხვაგვარია პლატონის მდგომა-

რეობა. ის ცხოვრობს ისეთ დროს, როდესაც თავადაზნაურობის ბატონობას რეალური საფუძველი გაპოვლილი აქვს. ბეკინას თუ ოჯახისათვის საკმაო პური და ღვინო მოუვიდოდა, ის შეძლებულ აზნაურად ითვლებოდა და გული საგულეს ჰქონდა. ღღეს კი მარტო ოჯახისათვის საკმარისი პური და ღვინო პლატონისათვის სანუგეშო-სა და გასამხნეებელს არაფერს წარმოადგენს. ცხოვრებამ მას თავს დაატეხა მრავალი საჭიროება, რომელსაც უფულოდ თავს ვერ გაართმევს, ფულის წყარო მას სხვა არაფერი გააჩნია, გარდა მიწისა, მიწა კი ველარ გასწვდა ოჯახის გამრავლებულ მოთხოვნილებათ და უმთავრესად ფულის საჭიროებას. წინათ ბეკინას მოჯამაგირე არ სჭირდებოდა, იმის ოჯახში მისი ყმები მუშაობდნენ მორიგეობით; ღღეს კი პლატონს მოჯამაგირე სჭირდება, რომელსაც ფული უნდა; წინათ ბეკინას ფული არ სჭირდებოდა, როცა ახლობელი ვინმე მოუყვებოდა, პურსა და ღვინოს მიიტანდა და მეტი არაფერი ეხარჯებოდა; ღღეს კი პლატონი ახლობელი ნათესავის სატირლად ვერ წავა, თუ ფული არა აქვს; წინათ ბეკინას ხუთი ან ათი თუმანი რომ მიეცა ქალისთვის მზითვად, მთელ კუთხეში ხმა გავარდებოდა, ბეკინამ ასეთი დიდი მზითვევი გაატანა ქალსაო; ღღეს კი პლატონს ხუთი და ათი თუმნით ხელს არავეინ მოუყიდებს ქალს; წინათ არც ბეკინას მამას უფიქრია შვილის განათლებაზე, არც ბეკინას უფიქრია, ღღეს კი პლატონი თუ განათლებას არ მისცემს შვილებს, იმდენი მაინც უნდა ასწავლოს, რომ სახელი და გვარი მოაწერონ ხოლმე, და ამასაც ფული უნდა... ერთი სიტყვით, უწინდელის ერთი საჭიროების მაგიერ ღღეს ათი და ოცი გაჩნდა და უწინ თუ ცოტა მოთხოვნილებების დასაკმაყოფილებლადაც პური და ღვინო სრულე-ბით საკმაო იყო, ღღეს ფული, ფული და ფულია უპირველესად საჭირო.

ერთადერთ წყაროს ფულის მოპოვებისას და თან ცხოვრებისას პლატონისათვის მიწა შეადგენს; უწინ, როცა ფული ასე არ იყო საჭირო, ბეკინა შეიძლება არც კი აფასებდა დიდად მიწას, მაგრამ ღღეს პლატონი საუცხოოდ ხედავს, რომ თავისი საკუთრების — მიწის გარეშე მას ხსნა და საშველი არა აქვს და ამიტომ არასოდეს მიუზიდნია ის მიწას ისე ძლიერად, როგორც ღღეს, არასოდეს უგრძენია მას იმდენად უძლურება და უსაშუალობა მიწის გარეშე, როგორც ღღეს. ამიტომ ადვილი გასაგებია პლატონის ფსიქოლოგიაც. თუ ასეთი მშვიდი, უწყინარი და უბოროტო ყმაწვილი კაცი იმდენად ეცემა ზნეობით, რომ მამას ურჩევს: შენ ცოლს მუცელი წაუხდინეო, ამგვარი უზნეობის სათავე მიწის შემეცირების შიშითა და ამგვარი შიშით შეპყრობილ პლატონს არ შეეძლო სხვაგვარი რჩევა

მიეცა მამისათვის, როდესაც მიწის მოცილეს უკვე თავისი თვალით ხედავდა. როდესაც პლატონი ელენეს წინლებქვეშ გაიგდებს, ეს სრულებით ბუნებრივი საქციელია: მიწის დაკარგვის შიშს შეუძლია უსაშინელეს ბოროტებამდე მიიყვანოს ისეთი პატიოსანი კაციც კი, როგორც პლატონია. პლატონის არსებაში მთელი დრამა სწარმოებს; ექვები, ტანჯვა, იმედები, სასოწარკვეთილება ერთიმეორეს შეუჩერებლად სცვლიან და თუ ჩვენ ამ დრამას მკაფიოდ, გარკვევით ვერ ვამჩნევთ, იმიტომ რომ თვითონ პლატონიც პატარა, შეუმჩნეველი კაცია, უმეტესი ნაწილი მკითხველისა არც კი მიაქცევს მას ყურადღებას. დრამის უკანასკნელ აქტში ჩვენ თვალწინ დგას აზნაური პლატონი, რომელიც სამზარეულო სახლში დაბინავებულა თავისი ცოლ-შვილით და ცხოვრებით გაგლენკაცებულა. იქნება პლატონი გამონაკლისია მხოლოდ? არა, პლატონი ერთი მრავალთაგანია. ჩვენი წოდების ცხოვრებაში ნელი, მაგრამ საზოგადო კატასტროფა წარმოებს. მსხვერპლი მარტო პლატონი კი არ არის, მისთანა ათასია; არისტო ქვაშავიძე, დათია ბრეგაძე და სხვანი მსგავსნი რითი განირჩევიან პლატონისაგან? არაფრით. ერთადერთი განსხვავება იმაშია, რომ არისტო და დათია ადრე გარიყა ცხოვრებამ, პლატონი უფრო გვიან. როგორც არისტო, ისე დათია ბრეგაძე ავტორს სამაგალითოდ პყავს დახასიათებული. არისტო წარმოადგენს ნამდვილ ტიპს მოხერხებული, გაქნილი, გაიძვერა იმერლისას, რომელსაც სახლიც კი აღარ უდგია, რომ შიგ თავი შეაფაროს და სხვის კარზე აღამებს და ათენებს, მუდამ სხვის სუფრაზე ძღება. მიუხიდავად თავისი უკიდურესი სიღარიბისა, აზნაურული ამაყობა და მედიდურობა კიდევ შერჩენია: ისე თავს არავის გააცნობს, რომ არ დაატანოს, აზნაური გახლავარო; ორჯერ რომ ვისმე სახლში დრო გაატაროს, მესამეჯერ თვითონ მიიპატიებებს უსათუოდ, მაგრამ რადგანაც სახლში ნაცარიც კი არ გააჩნია, ნათლიმამის პურღვინით გაუმასპინძლდება. სულ სხვაა დათია ბრეგაძე. არისტო თუ ყმაწვილი კაცია, თავისი თავის მეტი არავინ გააჩნია და სადაც უნდა, იქ ირჩენს თავს, დათია ბრეგაძე ხანში შესული კაცია, მას მთელი ოჯახი აწევს საარჩენად კისერზე; ერთადერთი სახსარი ცხოვრებისა მისთვის მიწაა; მთელი თავისი სიყმაწვილე მას მიწაში ჩაუკლავს. დილიდან საღამომდე მუშაობს, მაგრამ მიწა იმდენად უმადურად აკმაყოფილებს მის შრომას, რომ ოდესღაც სტუმრისმოყვარე და გულუხვ აზნაურს დღეს სტუმარიც კი შესძულებია.

მეტის შრომისა და სიღარიბისგან დათია მუდამ აღრენილია, გულჩათხრობილი და წინათ თუ სტუმრის დანახვა ამხიარულებდა,

დღეს მხოლოდ აბრაზებს, რადგანაც ერთი დოქი. ღვინოც კი აღარ აბადია სახლში, რომ სტუმარს დაალევინოს.

ჩვენს თავადაზნაურობაში ორგვარი ხასიათის პირებს შეხვდება მეთვალყურე: პირველი თუმცა გრძნობენ, რომ აღარც აწმყო, აღარც მომავალი მათ აღარ ეკუთვნით, მაგრამ მიუხედავად ამისა გულს არ იტეხენ და ცდილობენ არა თუ სხვები, თავისი თავიც დაარწმუნონ, რომ თავადაზნაურობა და გლეხობა ღვთისაგან არის დაწესებული და, მაშასადამე, არც დაირღვევა არასოდეს; მეორე კი მშვენივრად ატყობენ, რომ თავადაზნაურობა დაღუპვის გზას ადგას და ამას აღარც თავის თავს, აღარც სხვას აღარ უშალავენ. უკანასკნელთა რიცხვს ეკუთვნის სოლომან მორბელაძეც. ადგილ-მამული სოლომანს ვეღარ არჩენს, მან ან ავაზაკობა, ან ქურდობა უნდა დაიწყოს, რომ თავი ირჩინოს, ან სხვა რაიმე სახსარი გამონახოს ცხოვრებისათვის. ასეთ სახსრად სოლომანს აურჩევია მაჭანკლობა. მაშელობა სოლომანისათვის ერთადერთი წყაროა, ერთადერთი საშუალებაა ფულის შოვნისა. თავისი გოვალეობის ასრულების დროს ის ხშირად თავის ღირსებას და ნამუსსაც კი დალატობს, ათასგვარ ხერხს სმარობს, რომ ორივე მხარე მოატყუოს — ქალის პატრონიც და სასიძოც; მაგრამ არაფრის წინაშე არ იხევს უკან, ოღონდ კი ორიოდე თუმანი იშოვნოს. ბესარიონი სოლომანს ბევრში წააგავს, ხოლო მასავით გაიძვერა, გაქნილი და მოხერხებული არ არის, და თუ სოლომანი ებრძვის ცხოვრებას და ცდილობს თავი დააღწიოს დაღუპვას, ბესარიონი უბრძოლველად კვდება. უწინდელი დრო რომ იყოს, ვინ გაუბედავს მას და ეტყვის — გლენს ქალი მიეციო; გაუჭირვებლად და დაუხარჯავად საუკეთესო აზნაურს იშოვიდა სიძედ; დღეს კი მან გლენი კაცის შოვნაც კი საძნელო და სამუდარო საქმედ გახდომია: უნდა ვალში ჩაიფლოს, თავი დაიმციროს და სოლომანისთანა კაცს სახლში ეახლოს და თვალცრემლიანი ემუდაროს, გლენკაცს ნუ მიატოვებინებთ ჩემს ქალსაო. რა აიძულებს ბესარიონს გლენი შეიყვანოს სახლში სიძედ? იქნება ის წოდების უარმყოფელია, ან განათლებას მალა აყენებს გვარიშვილობაზე? არც ერთი და არც მეორე. ..ფულს და ქალს რავე მივცემ ქათამაძეს? კაი ფულით კაი გვარიშვილის კაცს ვიშოვი“, — აი, ბესარიონის სიტყვები. აქედან აშკარაა, რომ უფულობა, სიღარიბე აიძულებს ბესარიონს ქალი გლენს მიათხოვოს. მას რომ ფული ბლომად ჰქონდეს, მაშინ რიგიან აზნაურს გამონახავდა, ახლა კი იძულებულია თავისი შეხედულებისა და გემოვნების წინააღმდეგ გლენი ისიძოს, რადგანაც ეს უკანასკნელი უფრო ნაკლებ ფულს სჭერდება, მაგრამ ბესარიონის უბედურებაც იმაში მდგომარეობს, რომ ეს ნაკლებიც სავალეზლად გახდომია. ბე-

სარიონი მშვენივრად გრძნობს, რომ არა თუ მარტო მას, მთელ აზნაურობას გასაჭირი დღე ადგია, ლუქმა პურს ძლივს შოულობს; ფიქრობს, ფიქრობს ბესარიონი, მაგრამ ვერაფერი მოუგვარებია და ნელ-ნელა უკან-უკან მიდის. ერთი ქალიც კიდევ რომ გაათხოვოს, მაშინ იძულებული იქნება ისე იცხოვროს, როგორც ბრეგაძეები და პლატონ სამანიშვილიც ცხოვრობენ.

ორსავე მოთხრობაში მკითხველი ბევრს ნახავს ტიპიურ პირებსა და ტიპიურ სურათებს, ხოლო შეხვდება ერთს უმთავრეს ნაკლსაც, რომელიც ამჩნევია საზოგადოდ ყველა ნაწერებს დ. კლდიაშვილისას: მაშინ, როდესაც უმთავრესი პირნი მკაფიოდ და გარკვევით არიან დასურათებულნი, დანარჩენები ისე ბუნდოვნად მოსჩანან, თითქოს ჩრდილში მოქმედებენო. რასაკვირველია, რაც უფრო საყურადღებოა ცხოვრებაში, უფრო საყურადღებოა მკითხველისათვის და ყოველსავე საყურადღებოს ავტორიც მეტს ყურადღებას აქცევს, მაგრამ სახელოვნო ნაწარმოები მხოლოდ მაშინ არის სრული, როდესაც ყოველი უმნიშვნელო საგანი, უმნიშვნელო ფაქტიც კი ჯეროვანის ყურადღებით არის დახატული.

ერთადერთი დასკვნა, რომელსაც გამოიტანს მკითხველი აღნიშნული მოთხრობებიდან, ის არის, რომ დღევანდელ დროს წოდებრივი ურთიერთობანი იშლება, აზნაურობა ქონებრივად თანდათან ქვეითდება და გლეხობის დარბი ნაწილს უთანასწორდება. როგორის თვალითაც უნდა უყურებდეს მკითხველი ამ მოვლენას ჩვენს ცხოვრებაში, რა რწმენა-შეხედულებისაც უნდა იყოს ის, უნდა შეურიგდეს იმ აზრს, რომ წოდებრივი წყობილების დარღვევა დრომ მოიტანა და ამას ველარაფერი გააბრუნებს უკან. ექვს გარეშეა, რომ ყოველდღიურ ცხოვრებაში პიროვნებას კიდევ აქვს მნიშვნელობა, მაგრამ ისტორიულ პროცესში პიროვნების ნება და სურვილი სრულებით უძლურია: დროის მოთხოვნილება თავისას გაიტანს, რა ძლიერი დაბრკოლებაც უნდა ელობებოდეს წინ. ხოლო შესაძლებელიც რომ იყოს თავადაზნაურობის ნელი კატასტროფის თავიდან აცილება, სასურველი არ არის. რატომო, იკითხავს მკითხველი. აი რატომ: ყოველი წყობილება საზოგადოებრივი, სადაც ყოველგვარი ძალა, როგორც ქონებრივი, ისე პოლიტიკური და სხვა, უმციურესობის ხელშია, დასაგმობია და რაც აღრე დაირღვევა ასეთი წყობილება, მით უმჯობესია. წოდებრივი წყობილება სწორედ ამგვარი ხასიათისა იყო და არის. ქონებრივი და პოლიტიკური ძალის წარმომადგენელი ჩვენში თავადაზნაურობა იყო და ამიტომ რაც მალე წაერთმევა მას განსაკუთრებული ძალა და უპირატესობანი, რაც უფრო აღრე გაუთანასწორდება ის მთელ ერს, მით უმჯობესია. თუ ჩვენ

## მ ა ქ ს ი მ ბ ო რ კ ი

(კრიტიკულ-ბიოგრაფიული წერილი)

XIX საუკუნის რუსული სიტყვაკაზმული მწერლობა წარმოადგენს რამდენიმე მსგავს მომენტს: ასეთია ერთის მხრით ოცდაათიანი წლები და მესამოცდაათე, მეორე მხრით მეორმოცე წლები და მესამოცე. ოცდაათიანი წლების გულგატეხილობას და პესიმიზმს თან მოჰყვა მეორმოცე წლების აღფრთოვანება და გატაცება, რაც შეიცვალა ორმოცდაათიანი წლების უფერულობითა და უშინაარსობით. აღფრთოვანებამ ხელახლა თავი იჩინა მესამოცე წლებში. მაგრამ მას მალე შეეკვეცა ფრთები და მესამოცდაათე წლების უილაჯო პესიმიზმით შეიცვალა. მეოთხმოცე წლების უფერულობას და უიმედობას თან მოჰყვა ხელახლა აღფრთოვანება. რამაც სულ ბოლო დროს იჩინა რუსულ პოეზიასა და ბელეტრისტიკაში თავი. როდესაც გადავლებთ თვალს წარსული საუკუნის რუსულ სიტყვაკაზმულ მწერლობას, ცხადად იხატება შემდეგი ფაქტი: მთელი წარსული საუკუნის განმავლობაში რუსული ლიტერატურა ცხოვრების აზრისა და იდეალების ძებნაში იყო. იყო ისეთი მომენტები, როდესაც ლიტერატურას გამოკვლეული ჰქონდა ეს აზრი და იდეალები და უახლოვდებოდა მათ, იყო ისეთი მომენტებიც, როდესაც დაშორებული იყო ერთსაცა და მეორესაც და, რადგანაც ცხოვრება მუდამ წინ მიდის და მასთან ერთად იცვლება იდეალებიც, ამიტომ ერთ ხანაში გამორკვეული და დადგენილი აზრი და შეხედულება მეორე ხანაში უარსაყოფი ხდებოდა და სწორედ ეს იწვევდა რუსული ლიტერატურის მწყობრ ღელვასაც — აღფრთოვანებიდან უიმედობაზე გადასვლას. მსგავსების გარდა: აღნიშნულ მომენტებს შორის ძირითადი განსხვავებაა: ოცდაათიანი წლების პესიმიზმი იყო ერთის მხრით არისტოკრატიული, ბაირონიზმის ზეგავლენით გაცხოველებული, მეორე მხრით ეპიკურეული. ისეთი პირები. როგორც პუშკინის ონეგინი და ლერმონტოვის პეჩორინი, ჩაილდ-ჰაროლდის შე-

სამოსში იმითომ ეხვევიან, რომ ამგვარია საერთოდ მოდა მაშინდელ უმაღლეს წრეში და ესენი კი მოდის დიდი პატივისმცემელი არიან, ნამეტურ ონგენი, თავისი საზოგადოებრივი მდგომარეობის წყალობით. ეკონომიურად ისინი უზრუნველყოფილნი არიან, ამქვეყნიური ყოველგვარი სიამოვნება მათთვის ადვილად ხელმისაწვდომია, მათ მალე ამოცალეს ცხოვრების პირუტყვეული მხარე და, რასაკვირველია, მელანქოლიისა და გულგატეხილობის მეტი აღარაფერი დარჩენიათ. იმ ინტერესებმა და საჭირობოროტო კითხვებმა, რომლებიც ოცდაათიან წლებში რამდენიმე პირის კუთვნილებას შეადგენდნენ, მეორმოცე წლებში ცხოვრების ზედაპირზე ამოხეთქეს და მრავალი განათლებული პირის კუთვნილებად შეიქნენ. ცხოვრებაში გაჩნდა მისწრაფება საერთო იდეალური მიზნისაკენ. ამან გამოაფხიზლა საზოგადოება, ამან აღაფრთოვანა ლიტერატურაც. ეს იდეალური მისწრაფება იყო ბრძოლა ბატონყმობასთან... გადავარდა ბატონყმობა, მაგრამ საზოგადოების ანოძრავება და ლიტერატურის აღფრთოვანება მას არ გაუოლია უკან; ამის მიზეზი ცხადია: რუსეთის მოწინავე თაობამ და მასთან ერთად სიტყვაკაზმულმა ლიტერატურამაც მთელი თავისი ყურადღება მიაქცია განთავისუფლებულ გლეხს, იმის მომავალ ცხოვრებას და ბედ-იღბალს. თუ მანამდე გლეხი საერთო ბედნიერების გარეშე იდგა და მისთვის არავინ იმტკრევდა თავს, ახლა ის გახდა მოწინავე თაობის უმთავრესი საზრუნავი, მაგრამ ხშირად ცხოვრება ნიავს ატანს ზას, რასაც ადამიანის აზროვნება განკერძოებულ კაბინეტში გამოხატავს და ამ შემთხვევაშიაც ასე მოხდა: მოწინავე თაობას ბევრი იმედი ჰქონდა. ის ბევრს მოელოდა, მაგრამ სინამდვილემ არც იმედები, არც მოლოდინი არ გამართლა: ცხოვრების მსვლელობა თავისი გზით წავიდა. აქედან წარმოიშვა მესამოცდაათე წლების უიმედობა და პესიმიზმი — პესიმიზმი დემოკრატიული და სოციალური.

როდესაც ადამიანს იმედი უქარწყლდება და რწმენა ეკარგება, მთელ მის აზროვნებას უნუგეშობის პირბადე ეფარება, და თუ დიდხანს გასტანა ამგვარმა სულიერმა მდგომარეობამ. ადამიანი ურიგდება თავის ბედს და ხშირად სამულდამოდ ცილდება იდეალურ მისწრაფებათ და იდეალების ძებნას. ის, რაც ემართება ერთ ადამიანს. ემართება ხშირად მთელ წრეს, მთელ თაობას. ამის საუკეთესო დამამტკიცებელია ოთხმოციანი წლების ბელეტრისტიკა. აიღეთ ამ დროის ნიჟიერი წარმომადგენელი — ჩეხოვი. თუ გამოვაკლებთ მის ლიტერატურულ მოღვაწეობას პირველ წლებს, როცა ავტორი სასაცილო ამბების მეტს არასა წერდა, ჩვენ დაგვრჩება ნამდვილი ცხოვრებიდან ამოღებული და სამაგალითოდ დახატული ფაქტები და სუ-



რათები, რომლებიც უიმედობის, უნუგეშობის და ცხოვრების სისაძაგლეთა აუცილებლობის მეტს არას ეუბნებიან მკითხველს, სულსა და გულს უხუთავენ მას, სასოწარკვეთილებაში აგდებენ, მაგრამ გზას ქვემარტებისაკენ, გზას სინათლისა და ხსნისაკენ სრულებით არ უჩვენებენ.

როდესაც ცხოვრებაში ოდნავ მაინც არის განხორციელებული საერთო კეთილდღეობა და ბედნიერება, როდესაც ცხოვრებაში ადამიანის ელემენტარული უფლებანი საჯაროდ არიან მიღებული და აღიარებული და შთა მოსაპოვებლადაც ბრძოლა აღარ არის საჭირო, მაშინ მწერალს არაფერია მოსთხოვს იდეალების ხატვას, რადგანაც ცხოვრება თვითონ იძლევა იდეალებსაც და იმისკენ მიმავალ გზასაც. მაგრამ ასე არ იყო რუსეთში ოთხმოციან წლებში და არც დღეს არის. მოწინავე თაობას საზოგადოებრივი ცხოვრება ვერ აკმაყოფილებს და მამ სად უნდა ჰპოვოს შვევა აწმყოთი შეწუხებულმა სულმა, თუ არ მომავლის იმედში — და ამ მომავალს ხომ ყოველი ადამიანი თავისი იდეალების პრიზმით ჰკვრეტავს!

ოთხმოციანი წლების სიტყვაკაზმულ მწერლობაში ცხოვრება იხატება რაღაც მოჯადოებულ რკალად, რომელსაც გამოსავალი არსაიდან გააჩნია. ამ რკალს შიგნით ყოფნა აუტანელია, საძაგელია, უფერული, უნუგეშო, მაგრამ სხვა გზა არსით არის. საკმარისი იყო ასეთ დროს საზოგადოებას სმენოდა: ნუ გეშინია, გამხნევედი — აი გზაო, რომ ხელახალ გამოღვიძებას, გამოცოცხლებას, ამოძრავებასა და გატაცებას ეჩინა თავი. ასეთი ხმა მართლაც გაისმა. მისი გამოძევი არის მაქსიმ გორკი.

თუ ძნელია საზოგადოდ ახალი სიტყვის თქმა, მით უმეტეს ძნელია ახალი სიტყვა სთქვა ისე, რომ ყველა გაიტაცო, ყველა დააჯერო. ამისათვის საჭიროა ძლიერი ნიჭი, რასაც დღეს აღარაფერ უარყოფს გორკიში. სულ რამდენიმე წელიწადია, რაც ის სამწერლო ასპარეზზე გამოვიდა და არა თუ რუსეთში, საზღვარგარეთაც კი დაიწონა მკითხველის სული და გული. რასაკვირველია, ნიჭს გარდა გორკის გარემოებამაც ხელი შეუწყო: მან სწორედ იმ დროს თქვა ეს ახალი სიტყვა, როცა ის არა თუ საჭიროებად, წყურვილად იყო გადაქცეული, მაგრამ სანამ მას ავხსნიდეთ, საჭიროა მოკლედ თვალი გადავავლოთ მის ცხოვრებასაც. მაქსიმ გორკის სახელი და გვარი არის ალექსი პეშკოვი. ის დაიბადა ნიჟნი-ნოვგოროდში 14 მარტს, 1869 წელს. ბაბუამისი დედის მხრით შეძლებული ვაჭარი იყო, მამაკი ღარიბი, — შპალერების გაკვრა შეადგენდა მის ხელობას. პატარა ალექსის მამა ადრე მოუკვდა; დედა მეორედ გათხოვდა და მალე ისიც ქლექმა იმსხვერპლა. გორკი რამდენიმე წელიწადს ცხოვრობდა

ბაბუასთან, რომელმაც მას წერა-კითხვა ასწავლა და შემდეგ სკოლაში მიაბარა. სკოლაში გორკი ხუთი თვის მეტი არა ყოფილა. ცხრა წლისა არ იქნებოდა ის, როდესაც ბაბუამისი გაკოტრდა და ამიტომ გორკი იძულებული გახდა მოჯამაგირედ დამდგარიყო ფეხსაცმლის მალაზიაში. ამ დღიდან იწყება მისი უგზოუკვლოდ ხეტიალი. მალაზიაში მან მხოლოდ რამდენიმე თვე დაჰყო, რადგანაც ხელებზე ცხელი წვენი გადისხა, დაიწვა და ბაბუასთან დაბრუნდა. მორჩა თუ არა, მხატვარს მიებარა, მაგრამ არც აქ დარჩენილა დიდხანს, — რამდენიმე ბინა კიდევ გამოიცვალა და შემდეგ გემზე დადგა მზარეულის თანამემწეედ. მზარეულს კითხვა ძალიან უყვარდა და წიგნების გემო პირველად მასთან იგემა გორკიმ. გემზე ყოფნა რომ მოსწყინდა, გორკი მებაღესთან დადგა უბრალო მუშად, მაგრამ ესეც მალე მოსწყინდა და გადაწყვიტა სწავლსათვის მიეყო ხელი. ამ მიზნით გასწია ყაზანში, მაგრამ უუულობის გამო უნივერსიტეტში ლექციების მოსმენის მაგიერ კრენდელების მალაზიაში მოეწყო ცომის მზელავად. თვეში დაუნიშნეს 3 მანეთი. ყაზანში გორკი დაუახლოვდა სტუდენტებს, მათის ზეგავლენით მიჰყო თვითგანვითარებას ხელი და თავისუფალ დროს წიგნებს ანდომებდა, მაგრამ მისი საუკეთესო მასწავლებელი თვითონ ცხოვრება იყო. ცომის ზელა რომ მოსწყინდა, გორკიმ ვაშლების გაყიდვას მიჰყო ხელი; მალე ამასაც თავი დაანება და ცარიცინის რკინისგზის სადგურზე მეთვალყურედ დადგა. შემდეგ ის ყიდის ბურახს ნიჟნი-ნოვგოროდში და ბოლოს დგება მწერლად ლანინთან, რომელიც ვეჭილი იყო. ერთ ბინაზე გაჩერება გორკის არ შეეძლო, — ლანინსაც დაანება თავი და ჩვენ ვხედავთ მას ხან ერთ ქალაქში, ხან მეორეში.

ლიტერატურულ ასპარეზზე თავდაპირველად გორკი გამოვიდა თბილისში, სადაც ის რკინიგზის სახელოსნოებში მუშაობდა. აქ „Кавказ“-ში მან პირველად დაბეჭდა „მაკარ ჩუდრა“. თბილისიდან გორკიმ ისევ რუსეთში გასწია და ნიჟნი-ნოვგოროდში გაიცნო რუსეთის ნიჟიერი ბელეტრისტი კოროლენკო; ამ გაცნობამ გორკის დიდი სარგებლობა მოუტანა, კოროლენკო იყო და არის ერთი რედაქტორ-გამომცემელთაგანი ცნობილი ჟურნალის „რუსსკოე ბოგატსტვო“. ისეთს ქვეყანაში, საცა სახელმძოხვეჭილი მწერლები საკმაოდ არიან, უცნობი პირის ნაწარმოებს ძალიან ძვირად უთმობენ ხოლმე ალაგს ცნობილი ჟურნალები. კოროლენკოს შემწეობით კი გორკი გახდა მისი ჟურნალის თანამშრომელი. სატახტო ქალაქის მკითხველმა საზოგადოებამ ამნაირად გაიცნო ახალგაზრდა მწერალი და მისმა ნიჭმა სულ მალე მიიქცია ყველას ყურადღება და სიყვარული მოიხვეჭა.

ამის შემდეგ გორკიმ დაიწყო სხვადასხვა ჟურნალებსა და გაზეთებში თანამშრომლობა, ხოლო 1898 წლიდან გახდა მუდმივად თანამშრომელი ჟურნალ „ეინისა“, რომლის დახურვამდეც მხოლოდ აქ ბეჭდავდა თავის ნაწერებს. დღეს უკვე ხუთი ტომია გამოცემული მისი ნაწერებისა. ამგვარია მოკლე ბიოგრაფია მაქსიმ გორკისა.

სულ ექვსი-შვიდი წელიწადია, რაც ის სამწერლო ასპარეზზე გამოვიდა და უკვე საჭირო გახდა მისი ნაწერების მეოთხე გამოცემა. ამდენი გატაცებული მკითხველი, ამდენი თაყვანისმცემელი ასე მოკლე დროში არც ერთ რუს მწერალს არ მოუპოვებია; ამგვარი თანხმობა კრიტიკოსთა შორის ერთი და იმავე მწერლის ნიჭის შესახებ იშვიათია ლიტერატურის ისტორიაში: ყველა მიმართულების კრიტიკოსები და ჟურნალ-გაზეთები რუსეთში დღეს ერთხმად აღიარებენ, რომ გორკი ძლიერი ნიჭია.

რაში იმალება ყოველივე ამის მიზეზი? ერთის მხრით იმაში, რომ გორკი ფრიალდ შესაფერ დროს გამოვიდა სამწერლო ასპარეზზე, მეორე მხრით იმაში, რომ გორკიმ ძლიერის ნიჭით ისეთი კითხვები აღძრა, რომლებიც ყველაზე უფრო აღელვებენ დღევანდელ საზოგადოებას. ჩვენ ისეთ პირობებში ვცხოვრობთ, როდესაც სოციალური კითხვები დღევანდელი დღის საჭირობოტო კითხვებს შეადგენენ. ტექნიკურმა, სავაჭრო-სამრეწველო და სამეცნიერო განვითარებამ — ერთის სიტყვით ეკონომიურმა და გონებრივმა ზრდამ საკმაო სიმაღლეს მიაღწია, მაგრამ ამან ვერ გააუქმა საზოგადოებრივ ცხოვრებაში უსამართლობა, ძალმომრეობა, ექსპლოატაცია, უფროს-უმცროსობა, შენ-ჩემობა და ვერ დაამყარა თანასწორობა და საერთო ბედნიერება; ეკონომიურ კეთილდღეობასა და მეცნიერებაზე მხოლოდ უმცირესობას მიუწვდებოდა ხელი, უმეტესობა კი მთელი თავისი სიცოცხლით შიმშილს ებრძვის და, რაც უნდა ნიჭი ჰქონდეს და ძლიერი წყურვილი, მეცნიერების ტაძრის კარი მისთვის დახშულია. ადამიანი უძველესი დროიდან ებრძვის ამ საზოგადოებრივ უსამართლობასა და უთანასწორობას, ამ ბრძოლის დროს ხშირად შეუმჩნეველი მას გამარჯვების ცისარტყელა. ბევრჯერ ჩაშუქებია გულს სხივი საერთო ბედნიერებისა და თანასწორობისა, მაგრამ ბრძოლის შემდეგ ცისარტყელაც უცებ გადასულა, სხივიც მალე ჩამქრალა და მსხვერპლთა ძვლებზე ისევ ხელახალ ძალმომრეობასა და უსამართლობას აუგია თავისი სამკვიდრო. ყოველივე ამან დღევანდელ საზოგადოებას გული მოუხარშა, იძვდი დაუკავა. არსებულ სოციალურ პირობებში ადამიანს სული ეხუთება, მას სძაგს, ეზიზღება ეს პირობები, მას ხსნა უნდა, წინ მიისწ-

რაფვის, მაგრამ ნამდვილად კი ისევ ამ სოციალურ სისაძაგლესა და სიბინძურეში ტრიალებს და ხსნის იმედს არც წარსული, არც აწმყო არ აძლევს. ამგვარ სოციალურ და ფსიქოლოგიურ მდგომარეობაში აღამიანს არ შეუძლია აღტაცებით არ მიეგებოს იმ პირს, რომელიც კი ეტყვის: არის ხსნაო, რომელიც კი იმედს მისცემს არსებული სოციალური ჭაობიდან გამოსვლისა და განბანისას.

მე სწორედ ასეთ პირად მიმაჩნია მაქსიმ გორკი: ნიქს გარდა მან ღროზედ თქვა ის, რისი თქმაც ყველაზე უფრო საჭირო იყო, რაც უფრო აღელვებდა იმ დღევანდელ მკითხველს, რომელიც მომავლისკენ იყურება და არა წარსულისაკენ. ამას უფრო ნათლად დავინახავთ მისი ნაწერების მოკლე დახასიათებით.

როგორც მოკლე ბიოგრაფიიდან დაინახავს მკითხველი, გორკიმ ცხოვრებაში ბევრი გაჭირვება გამოიარა, დღევანდელი საზოგადოებრივი წყობილების ყოველგვარი ცუდი მხარე მან კარგად შეიგნო, რადგანაც ძალმომრეობა, უსამართლობა, უთანასწორობა, ექსპლოატაცია საკუთარ თავზე გამოსცადა. ამგვარ ცხოვრებაში უმეტესი ნაწილი იღუპება, მაგრამ გორკი არაჩვეულებრივი პირია. ცხოვრების წუმბედან ის განბანილი და მედგარი მებრძოლი გამოვიდა. ის მტერია არსებული სოციალური წყობილების, მტერია არსებული ზნეობრივი შეხედულებების, ის თავდადებული ვეჟილია პიროვნების, რომლის უფლებებსაც უშიშრად ჰღალატებდა. ამგვარი აზროვნებისა და მიმართულების კაცი ვის უნდა მიჰყვებოდოდა? — უზრუნველყოფილ კლასს? უზრუნველყოფილი კლასი როგორც ყოველგან და ყოველ დროს, ისე დღესაც მოტრფიალეთა წესრიგის მშვიდობიანობისა და მორჩილების, მას ყოველგვარი „გარდაქმნა“ ჭირივით ეჯავრება, — ის არსებული წყობილების სრული კმაყოფილია. ინტელიგენციას? აი როგორი აზრის არის ინტელიგენციის შესახებ გორკის ერთი გმირი (ეყოვი „თომა გორდეევი“): „მე შეეკრებდი ჩემი დაფლეთილი სულის ნაგლეჯებს და გულის სისხლთან ერთად ცხვირაპირში ვახლიდი ჩვენს ინტელიგენციას! მე მას ვეტყვოდი: ფუმფლებო! თქვენ საუკეთესო წვენი ხართ ჩემი ქვეყნისა. ფაქტი თქვენის არსებობისა მრავალ მოდგმათა სისხლითა და ცრემლით არის შესყიდული! ოჰ. წილებო! თქვენ ასე ძვირად უღირხართ თქვენს ქვეყანას და რას უკეთებთ მას? წარსულის ცრემლები გარდაქმენით თუ არა მარგალიტებად? რა შესძინეთ ცხოვრებას? რა გააკეთეთ, დაამარცხებით თავი? რას აკეთებთ? მასხარად ადგებივით თავს?..“. ეს აზრი იგივე გორკის აზრია ინტელიგენციის შესახებ. გორკი არ უარჰყოფს, რომ ინტელიგენციას ბევრი კარგი სურვილები აქვს, მაგრამ ღრმად დარწმუნებულია, რომ სურვილე-

ზის განხორციელება მას არ შეუძლია და ახალი ცხოვრების შენება-  
 ში ის არ არის და არც გამოდგება აქტიურ ელემენტად. ინტელიგენ-  
 ციას არ შეუძლია ბრძოლა უკეთესი მერმისისათვის და გორკი-მებრ-  
 ძოლი კი მებრძოლებს ეძებდა. ასეთი მებრძოლები მან ნახა იმ წრე-  
 ში, რომელიც თანამედროვე ცხოვრების მიერ გარიყულია.  
 უსამართლობას ყველაზე უკეთ ის გრძნობს და ის იცნობს.  
 ვინც ყოველდღე ახედავს მას საკუთარ კისერზე; უსამართლო-  
 ბა ყველაზე მეტად მას ეზიზღება, ვინც ყველაზე უფრო იტან-  
 ჭება იმის კლანჭებში და რადგანაც ყოველგვარი სოციალური  
 უსამართლობა საზოგადოების უმდაბლეს წრეს აწვევა მძიმე ტვირ-  
 თად, სწორედ ეს წრეა ყოველგვარი უსამართლობის დაუძინებელი  
 მტერიც, და ამიტომ აირჩია გორკიმ თავისი ხელოვნების საგნად  
 მხოლოდ ეს წრე და არა სხვა რომელიმე. როგორია უმთავრესი  
 თვისებანი ამ წრის? ყველა ის მათხვრეები და მაწანწალები ანუ  
 „ბოსიაკები“, რომლებსაც გორკი ხატავს თავის მოთხრობებში, თუმ-  
 ცა ძალიან წააგავან ერთმანეთს, მაგრამ ყოველი მათგანი თავისებუ-  
 რი ადამიანია და ეს თავისებურება თვითეთლის ნიშნობლივ მხა-  
 რეს შეადგენს. მათი არსება დაუშრეტელი სევდით და კმუნვით არის  
 გარემოცული; ამ სევდის სათავე ერთადერთია — არსებული წყო-  
 ბილება მათ ჭირივით ეჯავრებათ, ისინი გრძნობენ, რომ დღევანდელ  
 ცხოვრებაში მეტნი — უალაგონი არიან, მზად არიან დაამხონ არსე-  
 ბული წყობილება, იბრძოლონ მომავლისათვის, მაგრამ მომავალი  
 მათთვის წყველიადით არის მოცული, ეძებენ თავის ალაგს, მაგრამ  
 „თავისი წერტილი“ ვერ უპოვიათ და ეს ჰბადებს როგორც მათს  
 სევდას, ისე საშინელს ტრაგიზმს მათი მდგომარეობისას; დღევან-  
 დელი ცხოვრება მათ არ მოსწონთ, ეჯავრებათ საზოგადოებრივი ურ-  
 თიერთობა, საზოგადოებრივი მორალი, შეხედულებანი და სხვ.,  
 ეძებენ აზრს ცხოვრებისას, მაგრამ ვერ მიუგნიათ და სევდას ხშირად  
 საშინელს ლოთობაში ჰლევენ. არსებულ ცხოვრებასთან ერთად  
 მათ თან ებრალებათ, თან ეზიზღებათ ყველა ისინი, ვინც ამ ცხოვ-  
 რებას შერიგებიან, შეგუებიან და მით კმაყოფილნიც არიან: ვაჭარი  
 იქნება, ინტელიგენტი თუ უბრალო გაუნათლებელი გლეხი, ისინი  
 ყველას სიბრალულითა და სიძულვილით იხსენიებენ. თანამედრო-  
 ვე ცხოვრებას, მის ჩვეულებებს ისინი ყველგან გაუბრალებენ — რო-  
 გორც სოფელში, ისე ქალაქში. მათის შეხედულებით სოფელში,  
 „როგორც ორმოში — წყველიადია და სივიწროვე“, სამაგიეროდ  
 ქალაქშიაც „დამპალი და ვიწრო ცხოვრებაა. არც ჰაერია, არც თავი-  
 სუფლება, — არაფერი, რასაც ადამიანი საჭიროებს“. მათ ეზიზ-  
 ლებათ ყველაფერი, როგორც ერთი მათგანი ამბობს: „ქალაქები,

სოფლები, სხვადასხვა ზომის ხალხი...“ — სამაგიეროდ ყველა მათგანს „უნდა რაღაც სხვა, სხვა შეხედულება ცხოვრებაზე, სხვა გრძნობები, რაღაც სხვა ახალი“.

აწმყოსთან მათ არაფერი აკავშირებთ, მთელი დღევანდელი საზოგადოებრივი წყობილება ერთბაშად მიწამ რომ შთანთქას, ოღონაც არ ინაღვლიან, დღევანდელ საზოგადოებას ისინი არ საჭიროებენ, რადგანაც დღევანდელი საზოგადოებრივი წყობილება მათის აზრით ხარშავს ადამიანს, პატიოსან მისწრაფებათ ავიწყებინებს, ყოველის მხრით ჰბორაკავს; ყველა ამ ბოსიაკებს კი სრული დამოუკიდებლობა და თავისუფლება უყვართ; თავისუფლება და დამოუკიდებლობა ისეთი ატმოსფერაა, ურომლისოდაც მათ ცხოვრება არ შეუძლიათ. ყური დავეუგდოთ გორკის ერთ გმირს ლაკუტინს, რას ამბობს: „მიყვარს, ძმობილო, ეს ხეტიალი. გცივა, გშია, მაგრამ ძალიან თავისუფლადა ხარ. არვის არ ემორჩილები. შენ თვითონა ხარ შენი ცხოვრების ბატონი...“.

მიუხედავად დამოუკიდებლობისა და თავისუფლების ამგვარი სიყვარულისა, გორკის ბოსიაკები სრულებითაც არ არიან ინდივიდუალისტები, როგორც ეს ბევრსა ჰგონია; ისინი შენატრიან ისეთ საზოგადოებრივ წყობილებას, სადაც კაცთა შორის არ არის ექსპლუატაცია, უსამართლობა, უფროს-უმცროსობა, პრივილეგიები, საცა ყველა თანასწორია, თვითეული ადამიანი მთელს საზოგადოებას ემსახურება და არა ვინმე პიროვნებას ან რომელიმე კლასს. იქ, საცა არ არის კლასობრივი დაყოფა საზოგადოებისა, საცა არ არის საზოგადოებრივი უსამართლობა, საცა ყველა თანასწორია, საცა ერთი ბატონი არ არის და მეორე ყმა, არამედ ყველანი ერთიმეორეს ემსახურებიან, ერთნაირის უფლებით აღჭურვილნი, პიროვნებაც თავისუფალია და სწორედ ამგვარ თავისუფლებას ეტრფიან გორკის გმირები. აი რას ამბობს გორკის ერთი გმირი კონოვალოვი, რომელსაც თავისუფლების სიყვარული ძვალ-რბილში აქვს გამჭდარი: „ნუ თუ მართლა არ შეიძლება იმისთანა ჯანონის გამოგონება, რომ მთელი ხალხი ისე მოქმედებდეს, როგორც ერთი და ყველას ერთიმეორეს გაგება შეეძლოს?“ — აქედან თავისთავად ცხადია, თუ როგორ ესმის კონოვალოვს თავისუფლება. ეს თავისუფლება იგნვე სრული საზოგადოებრივი თანასწორობაა. სანატრელი წყობილების დასამყარებლად, ბოსიაკების აზრით, საჭიროა ბრძოლა და რადგანაც ბრძოლაში გამარჯვება ძალაზე და მოხერხებაზეა დამოკიდებული, ამიტომ ისინი დიდი თავყვანისმცემელი არიან ყოველვარი ძალღონის, რაშიაც არ უნდა იხატებოდეს ის. მათი რწმენა და შეხედულებანი სრულიად ეწინააღმდეგება ოფიციალურ რწმენა-შეხედუ-

ლებას; მათი შეხედულება საზოგადოებაზე, ოჯახზე, ცოლქმრობაზე, ადამიანის მოქმედებაზე და სხვ. სრული უარყოფაა დღევანდელი წყობილებისა, კანონმდებლობისა და მორალისა.

გასაოცარია, რომ მიუხედავად თავისი უცილდურესი სიღარიბისა, არც კერძო საკუთრება, არც ფული მათ არ იზიდავს. ისინი მზად არიან, ფულის პატრონი თავიდან ფეხებამდე გაფცქვნან, მაგრამ პირველ ლამესვე გაფლანგავენ, რაც უნდა იშოვონ, ან სხვას მისცემენ დაუნანებლად. გაიხსენეთ „ჩელკაში“. მან ავაზაკობით იმდენი ფული შეიძინა, რაც ამისთანა ღარიბი კაცისათვის მთელ სიმდიდრეს შეადგენდა, მაგრამ ერთი თუმნიანის გარდა მან სულ გავრილას მისცა. იმ გავრილას, რომელმაც რამდენიმე წამის წინათ ის სასიკვდილოდ არ დაზოგა ამ ფულების გულისათვის.

ჩვენ ჩამოვთვალეთ უმთავრესი დამახასიათებელი თვისებანი გორკის გმირებისა. მკითხველი თვით ავტორის მოთხრობათა წაკითხვით უკეთ დაინახავს, რომ ეს ბოსიაკები როგორც ცხოვრებით, ისე აზროვნებითა და ლტოლვილებით სრულებით განსხვავდებიან დანარჩენთაგან. მოთხრობებიდანვე შეიტყობს მკითხველი, რომ გორკის სიმპატია ამ „ბოსიაკთა“ საუკეთესო წარმომადგენლებისაკენ არის, მათი შეხედულებანი იგივე გორკის შეხედულებაა, მათი მისწრაფება — გორკის მისწრაფება, მათი წმიდათა წმიდა — ავტორის წმიდათა წმიდა. გორკიმ ცხოვრების ყველა ბნელი კუნჭული განვლო და გამოიტანა სრული უარყოფა თანამედროვე წყობილებისა, აზროვნებისა და მორალისა. ის გვიწვევს უარვყოთ ეს აწმყო და შევქმნათ ისეთი მომავალი, საცა სრული თანასწორობაა ადამიანთა შორის, საცა კეთილდღეობისა და ბედნიერებისაკენ ყველას ერთნაირად მიუწვდება ხელი, — ერთის სიტყვით გორკის ქადაგება არის ძლიერი ხმა მლადადებლისა საზოგადოების დაჩაგრული ნაწილის უფლებათა აღსადგენად. გვაძლევს მერე ავტორი რაიმე იმედს უკეთესი მომავლისას? დრო მოვა და ჩვენც შევქმნით სხვა ცხოვრებასო, — მტკიცედ ამბობს ერთი მძის გმირთაგანი და ამით გვიმტკიცებს, რომ კეთილი განზრახვით გატაცებულსა და ღრმა რწმენით აღჭურვილ ადამიანს წინ არაფერი დაუმაგრდება. რა გზით შეგვიძლია მივალწიოთ უკეთეს მომავალს? გორკის აზრით გზა შემდეგია: უპირველესად ჩვენ თვითონ უნდა უარვყოთ დღევანდელი ცხოვრება ისე, როგორც უარჰყვეს ის ბოსიაკებმა, შევიყვაროთ თავისუფლება და დამოუკიდებლობა ისე, როგორც ეს ბოსიაკებმა შეიყვარეს; ჩვენვე თვითონ განვდევნოთ უსამართლობა, ძალმომრეობა, უთანასწორობა და პრივილეგიები; შევისინხლხორცოთ ის უბრალო ჭეშმარიტება, რომ წუშპეში გორკვას სინათლისაკენ მიმავალ გზაზე სიკვდილი სჯო-

ბია, და მტყიცედ გავეჭანოთ ამ სინათლისაკენ. თუ ასე მოვიქცევით— უვარგისი ცხოვრების დამხობა და უკეთესის დამყარება აუცილებელი გახდება. „არავინ არის დამნაშავე, ჩვენ თვითონაა ვართ დამნაშავე ჩვენი თავისა და ცხოვრების წინაშე“, — ამბობს კონოვალოვი.

ცხოვრებაში კარგისა და ცუდის გარჩევა, მკითხველის გამოფხიზლება და მასში კეთილი სურვილებისა და მისწრაფების გაღვიძება— აი ერთადერთი საქმე, რასი გაკეთებაც ლიტერატურას შეუძლია. ამ საქმეს კი თანამედროვე ახალგაზრდა მწერალთა შორის ყველაზე უკეთ, ყველაზე გარკვევით, თავისებურად და დამოუკიდებლად გორკი ემსახურება. მართო კარგი აზრი საქმარისი არ არის, რომ ბელეტრისტის ნაწარმოებმა თავის მიზანს მიაღწიოს, — აზრს უნდა აცხოველებდეს და გზას უნათებდეს ის, რასაც ნიქს ეძახიან. მიმართულების გარდა ეს ნიქი უხვად აქვს ამ ბელეტრისტს მომადლებული. მისი სიტყვა მოჭრილია, ენა საუცხოო, ბუნების სურათები მშვენიერი და დახატული პირები ისე ცოცხლად არიან სინამდვილიდან ამოღებული, რომ თავისი ლაპარაკით, მოქმედებითა და მთელი თავისი არსებით სრულ ილუზიას ახდენენ მკითხველზე. მართალია, გორკის ბოსიაკები იდეალიზაციას არ არიან მოკლებული, მართალია, ავტორი არ მალავს არავითარს მათს ნაკლულევანებას, მაგრამ მიუხედავად ამისა ისინი გაცილებით უკეთესნი გამოვიდნენ, ვიდრე სინამდვილეში არიან, მაგრამ ვინც გორკის გმირებში ჰხედავს მხოლოდ ბოსიაკებს, ის გორკის ნიჰსაც ვერ დააფასებს. ბოსიაკებში გორკიმ ხორცშესხმულად დაგვანახვა მოძრავი, დაუდგრომელი და უკმაყოფილო სული ძლიერი პროტესტისა, სამართლიანობისა და თავისუფლებისა. აი მხოლოდ ამ მხრივ არიან საყურადღებონი გორკის ბოსიაკები.

მესამოცე წლებიდან მოყოლებული რუსეთში ბევრ მწერალს ჩაუხედღინებია მკითხველისათვის ბოსიაკების ცხოვრებაში. მაგრამ მათთვის მიუწვდომელი რჩებოდა ბოსიაკების სული და გული, მათი შინაგანი არსება. გორკიმ კი დაგვიხატა ისინი, როგორც საზოგადოებრივი განახლების მატარებელნი, ჩაგვანება მათს შინაგან არსებაში და დაგვანახვა შიგ საუცხოოდ გამოქანდაკებული ძლიერი სული პროტესტისა და მხილებისა, ძლიერი წყურვილი განახლებისა.

გორკის ნიჰსის ამ თვისებასა და ავტორის მეტისმეტ გულწრფელობასა და მიმართულებაში იმალება მიზეზი იმ ძლიერი შთაბეჭდილებისა, რომელსაც გორკი ახდენს ყოველ მკითხველზე.



## შილერის პოეზიის ძირითადი თვისებანი

სადაც მინახავს ერთი გერმანელი მხატვრის (სახელი არ მახსოვს) ნახატი, რომელიც, არ ვიცი რად, იმდენად მძლავრად ჩამეკედლა მეხსიერებაში, რომ დღესაც უცვლელი სიცხოველით წარმომიდგება ხოლმე თვალწინ მისი ყოველი ხაზი. ნახატი შემდეგია: ერთ მხარეზე დახატულია ინკვიზიტორები, და მათ ფერხთა წინაშე ურიცხვი მსხვერპლი — ზოგი თავმოქრილი, ზოგი ჩამოხრჩობილი. და სხვ.; მეორე მხარეზე კი მშვიდი და მასთან განუსაზღვრელი სევდის გამომხატველი სახით ქრისტე ამბობს: შეიყვარეთ ერთმანეთიო. რა დიადი, რა წარმტაცო და მანუგეშებელი სიტყვებია, მკითხველო!

ქრისტე უდიდესი მასწავლებელი იყო, ადამიანის ბედნიერებას მსხვერპლად მოუტანა თავისი თავი, და აჰა, განვლო მას შემდეგ ცხრამეტმა საუკუნემ. ცხრამეტი საუკუნე ისმენს ჰუმანურ ქადაგებას ძმობისას, ერთობისას, თანასწორობისა და კაცთმოყვარეობისას, ცხოვრება კი სრულებით სხვა გზით მიდის, სრულებით სხვა ურთიერთობას ამყარებს ადამიანთა შორის. ცხრამეტი საუკუნე თავისთავადაც საკმაოა იმის შესაგნებად, თუ რა უფრო მძლავრია ცხოვრებაში — ადამიანის სული თუ ხორცი, ე. ი. ადამიანის სულიერი თუ მატერიალური მისწრაფებანი. აიღეთ რა დროის საზოგადოებაც გნებავთ, მასში უმთავრესი საზრუნავი მატერიალური კეთილდღეობაა — არა საერთო ან თანასწორო, არამედ კერძოობითი, კლასობრივი; სულიერი მისწრაფებანი კი მშვენიერი სამკაულია, რომელიც ცხოვრებას ალამაზებს, ხოლო ურომლისოდაც საზოგადოება საუცხოოდ ძლებს. ეგოიზმი, საკუთარი ბედნიერებისათვის ზრუნვა ადამიანს იმდენად მძლავრად აქვს გამჭდარი ძვალ-რბილში, რომ ცხრამეტმა საუკუნემ საქმით სხვისთვის ზრუნვა, საქმით სხვისი სიყვარული ვერ გახადა ჩვენს მოთხოვნილებად. ძმობა, ერთობა, სიყვარული,

თანასწორობა ყოველ ჩვენგანს მხოლოდ ენაზე აქვს მიწვებებული — ისიც უაზროდ და ნაძალადევად: როდესაც ჯერი საქმეზე მიდგება, ყოველივე ამაჲ უარვეყოფთ და ჩვენს აზრსაც კი ვერ ვამხელთ საჯაროდ, აშკარად, იმდენად დაგვიმონა საკუთარ კუჭში ცქერამ! ყოველი მკითხველისათვის აშკარაა, რომ მატერიალური კმაყოფილება და იდეალური სულიერი მისწრაფებანი ერთად ვერ თავსდება, ერთიმეორეს არ ეკარებიან, ერთმანეთს გაუტრბიან. რა არის მიზეზი? ის, რომ მატერიალური კმაყოფილების საგანი პიროვნებაა, მაღალი სულიერი მისწრაფებანი კი პიროვნების აღაგას მთელს კაცობრიობას აყენებენ და ამისდა მიხედვით საერთოდ და სათანასწოროდ აღიარებენ ყოველივეს. ადამიანში ეგოიზმი მძლავრია, მას ყოველივე კერძო უფრო იზიდავს, ვიდრე საერთო და საზოგადო და ამიტომ ვიდრე თვით ცხოვრება არ გაამეფებს პრინციპს ერთობისა და თანასწორობისას, ადამიანი ამ პრინციპის გზას არ გაყვება. მეთვრამეტე საუკუნემ თავისი ჭაღარა წვერი ამ პრინციპისათვის ბრძოლაში დაღვრილი სისხლით შეღება; ბრძოლა იყო სასტიკი და მეღვარი, მაგრამ რას ვხედავთ დღევანდელ საზოგადოებაში? მხოლოდ შელახვას ამ პრინციპისას: ყველა ცხოვრობთ საკუთარი თავისთვის, ყველას მხოლოდ საკუთარი თავი გვახსოვს; გამძღარ კუჭზე ზოგი ვწერთ სტატიებს ერთობასა და სიყვარულზე, ზოგი პირზე ღიმილს ვკითხულობთ ამგვარ სტატიებს; ზოგი გახარებული ვამტკიცებთ სხვადასხვა ალაგას და სხვადასხვა შემთხვევის დროს, რომ ერთობასა და თანასწორობაშია კაცობრიობის მხსნელი ძალა, ნამდვილად ჩვენს კერძო ცხოვრებაში კი მტერი ვართ ყოველივე ამისი და ეს ნებით მოგვდის თუ უნებლიეთ, საქმისათვის სულ ერთია, — ფაქტი ფაქტად რჩება. ამისთანა დროს რა მნიშვნელობა აქვს მძღავრ ჭადაგებას კაცთმოყვარეობისა და თანასწორობისას? მხოლოდ ის, რომ საკუთარი ბედნიერებით გატაცებულ ადამიანს არ დაავიწყოს, რომ არსებობს უფრო მაღალი მიზანი, უკეთესი ცხოვრება, უკეთესი წყობილება; მხოლოდ ის, რომ ადამიანს მოაგონოს, რომ ის ადამიანია და ამიტომ ცხოვრებითა და მისწრაფებით პირუტყვზე მაღლა უნდა იდგეს. არავითარი ჭადაგება და არავითარი სიტყვა, ვისგანაც უნდა იყოს ის ნათქვამი, არაფერს აკეთებს იმის მეტს, რომ ადამიანს დაანახებებს უმაღლეს მიზანს და მოაგონებს მის მოვალეობას. ჭადაგება კაცთმოყვარეობისა და თანასწორობისა სწორედ ასეთი სიტყვაა. დეე ხშირად გაისმოდეს ის, დეე ხშირად აღელვებდეს და აფხიზლებდეს ადამიანის გონებას, დეე შეუწყვიტლად გვაგონებდეს ჩვენს ადამიანურ მოვალეობას ადამიანის მიმართ, — ერთხელაც არის, სული ხორცსა სძლევს, გადმოხეთქავს,

განბანს და გაწმენდს ცხოვრებას და შემოიტანს იქ კაცთმოყვარეობას, ერთობასა და თანასწორობას.

მკითხველმა იქნება იკითხოს კიდევ, რა აქვს საერთო ამგვარ შესავალს შილერთანო. აი რა: შილერი სწორედ ის უკვდავი პოეტია, რომლის ქადაგება კაცთმოყვარეობისა, ერთობისა და თანასწორობისა ყველაზე უფრო მძლავრად გაისმოდა წარსული საუკუნის განმავლობაში. შილერი არის მშვიდი, წყნარი, ჩვილი და მეტად ნაზი მოციქული კაცთმოყვარეობისა და თანასწორობისა. მართალია, საზოგადოებაში უკვე მოისპო ის ფორმა უროიერთობისა და უთანასწორობისა, რომელიც შილერის დროს მეფობდა, მაგრამ ეს პოეტი არ ებრძოდა განსაზღვრულ ფორმას საზოგადოებრივი უთანასწორობისას, — ის მტერი იყო ყოველგვარი უთანასწორობისა და სიძულვილისა. სანამ არ განხორციელდება ის სპეტაკი მისწრაფებანი, რომელსაც პოეტი ქადაგებდა, შილერიც ყოველთვის ჩვენთან მყოფი, ჩვენი თანამედროვე, ჩვენი თანამგრძნობი იქნება, მარად ახალგაზრდა და მარად გარდუევალი. და ამიტომ გათვალისწინება მისი აზრების, განახლება გულსა და გონებაში მისი გრძნობების, ფიქრისა და მისწრაფების ჭერ კიდევ დიდხანს მოუტანს სარგებლობას ჩვენისთანა მკითხველს.

სანამ ვადავიდოდეთ პირდაპირ საგანზე, გავიცნოთ შილერის ცხოვრება და მისი სიყმაწვილის წლები. ბიოგრაფიის მხრივ ევროპის მწერლები გაცილებით ბედნიერნი არიან ჩვენს მწერლებზე. შილერის ბიოგრაფიის შესახებაც ბევრი მასალა არსებობს. იოჰან-ქრისტოფინ-ფრიდრიხ შილერი დაიბადა 10 ნოემბერს, 1759 წელს. მამამისი, იოჰან კასპარ შილერი, იყო ფერშალი, შემდეგ სამხედრო სამსახურში შევიდა და, რადგან ჯამაგირი ცოტა ეძლეოდა, სხვა წყარო შემოსავლისა კი არავითარი არა ჰქონდა, ამიტომ ღარიბულად ცხოვრობდა. პატარა შილერის დედა მეტად გულკეთილი, პატიოსანი, ჰკვიანი და ღვთისმოსავი ქალი იყო; თავისი ხასიათის ყველა კარგი თვისება გადასცა შვილს და აღზრდით კიდევ უფრო განუმტკიცა. შილერი პატარაობიდანვე ნამეტანი გულკეთილი, გულჩვილი და საამხანაგო ბავშვი იყო. ხშირად წიგნებს თავისზე უფრო ღარიბ ამხანაგებს მისცემდა ხოლმე, ხანდახან ზედატანისამოსსაც თან გაატანდა და, თუმცა ამისათვის მადლობას არ ეუბნებოდა მამამისი. მაგრამ ყველა ახალი შემთხვევის დროს პატარა შილერის კაცთმოყვარეობა და პატიოსნება უცვლელად იჩენდა ხოლმე თავს. დედის შემდეგ შილერს ასწავლიდა ადგილობრივი ეკლესიის პასტორი მოზერი, რომელიც მთელი სამი წელიწადი იყო შილერის მასწავლებლად. 1772 წლამდე შილერი სწავლობდა ადგილობრივ ოთხ-

კლასიან სასწავლებელში ლუდვიგსბურგში. ლუდვიგსბურგში ცხოვრობდა ვიურტემბერგის მთავარი, კარლოს-ევგენი, რომელიც განთქმული იყო თავისი უზნეობითა და გარყვნილობით. ეს იყო ნამდვილი წარმომადგენელი თვითმპყრობელი მტარვალისა: თავის ქვეშევრდომებს სულს უზუთავდა სხვადასხვა გადასახადით, მის სასახლეში კი მილიონები იხარჯებოდა იმისი საყვარლების საჩუქრებზე. პატარა შილერი გულმოდგინედ უყვირდებოდა ყოველივეს. რასაც ხედავდა და რაც მის გარშემო ხდებოდა და მთავრის ცხოვრება, მისი ზნე-ხასიათი მალე გაიცნო დაწვრილებით. პოეტის ნიჭი შილერს ბავშვობაშივე ეტყობოდა. ათი წლისა არც კი იყო, როდესაც ლექსებსა და პიესებსაც კი წერდა. თორმეტი წლისამ ორი ტრაგედია დაწერა და ლექსების წერაში იმდენად დახელოვნებული იყო, რომ არათუ გერმანულ ენაზე, ლათინურადაც კი წერდა ხოლმე. როდესაც სკოლას ინახულებდა რომელიმე წარჩინებული პირი, მასწავლებელი საგანგებოდ შეუქცევთა პატარა შილერს მისალოც ლექსს და ისიც საუცხოოდ ასრულებდა მასწავლებლის დავალებას. როგორც თვითონ შილერს, მის მშობლებსაც მისი პასტორობა უნდოდათ, მაგრამ ერთმა გარემოებამ შეუშალა ხელი: 1770 წლიდან შილერის მამა დაინიშნა სასახლის ბაღების ზედამხედველად. მთავარმა პატარა შილერს ყურადღება მიაქცია და, როდესაც ის კურსს ათავებდა, მამამისს წინადადება მისცა: შენმა შვილმა პასტორობას თავი დაანებოს და იურიდიული მეცნიერება შეისწავლოს, რადგანაც ჩემს სამთავროს კარგი ჩინოვნიკები ესაჭიროებაო. მამამ, რასაკვირველია, უარი ვერ გაბედა და 1773 წელს შილერი მიაბარეს მთავრის სასწავლებელში. ეს სასწავლებელი, ანუ აკადემია, რომელიც მთავარმა დააარსა თავისი საკუთარი ხარჯით, იმყოფებოდა ერთ-ერთ მის სახლში. აკადემიაში მეტად სასტიკი წესრიგი არსებობდა. რექტორად თვითონ მთავარი ითვლებოდა და ყმაწვილების აღზრდასა და ყოფაქცევის თვალყურის გდებაში დიდ მონაწილეობას იღებდა. სასწავლებელში აზნაურები გაყოფილი იყვნენ არააზნაურთაგან; ისინი ტანისამოსაც კი სხვადასხვანაირს ატარებდნენ. იურიდიული საგნები შილერს დიდად არაფრად ეპიტნავენებოდა და უფრო მეტ ყურადღებას საექიმო საგნებს აქცევდა. მაგრამ ყველაზე უფრო ის პოეზიამ გაიტაცა. თუმცა სასწავლებელში ახალი პოეტების კითხვა და ლექსების წერა სასტიკად იყო აკრძალული, შილერი მაინც ახერხებდა ახალი წიგნების შეძენას, გაფაციცებით კითხულობდა შექსპირს, კლოპშტოკს. ლესინგს, გოეთეს და სხვ., და თვითონაც ბევრსა წერდა. აკადემიაში მოსწავლენი მოკლებულნი იყვნენ ყოველგვარ თავისუფლებას, მათ სასტიკ მხედრულ წესზე ზრდიდნენ.

ამგვარი შევიწროება ყველაზე უფრო ახალგაზრდა შილერს უხუთავდა სულს და ხშირად ისეთ სასოწარკვეთილებებში ავდებდა, რომ ახალგაზრდა პოეტს თავის მოკვლაც კი განუზრახავს ხოლმე. ერთი ამგვარი სასოწარკვეთილების დროს ის აკადემიიდან თავის დასწერდა: ვინიცობაა მე თავი მოვიკლა, ჩემი მშობლების მანუეგემბელი შენ უნდა იყო. პატარაობიდანვე შილერი თავისუფლებას და თანასწორობას ეტრფოდა, პატარაობიდანვე ვერ ეგუებოდა შევიწროებას, შეზღუდვას, უთანასწორობას; პატარაობიდანვე იხატებოდა პასეი ის თვისებანი და მიდრეკილებანი, რომლებიც შემდეგ საძირკვლად დაედგნენ იმის პოეზიას.

თავის ყმაწვილურ სულის ქენჯნას, სასოწარკვეთილებასა და უიმედობას შილერი პოეზიაში გამოთქვამდა ხოლმე, მაგრამ ლექსების წერა აკრძალული იყო და ნორჩი პოეტი იძულებული ხდებოდა დამით ეწერა; ბევრჯერ ლოგინში თან ჩაიტანდა ხოლმე ქალაღდს და საბანქვეშ წერდა ლექსებს. ამგვარად აქვს მას დაწერილი „ავაზაკები“ ზოგიერთი ალაგიც. 1767 წელს შილერმა გაათავა აკადემია და მიიღო ექიმის მოწმობა. ახალგაზრდა შილერი დანიშნეს სამხედრო ექიმად, დაუნიშნეს მცირე ჯამაგირი და ამგვარად მისი იმედი: აკადემიას გავათავებ და მშობლებს დავეხმარებო, მცდარი გამოდგა, — მცირე ჯამაგირი შილერს თვითონაც არ ყოფნიდა. მაგრამ შილერი არ იყო ექიმობისთვის დაბადებული; ამისათვის მას არც ნიჭი ჰქონდა, არც ხალისი. 1781 წელს მან გამოსცა „ავაზაკები“ და ამ წლიდან იწყება მისი საჯარო გამოსვლა ხელოვნების ასპარეზზე. აქედან მოკიდებული შილერი რამდენჯერმე იყო სხვადასხვა გაზეთისა და ჯამოცემის რედაქტორი, მაგრამ რედაქტორის ნიჭს და მოხერხებას მოკლებული იყო და მის ხელში ვერც ერთმა გაზეთმა ვერ იხერია.

რედაქტორობამ შილერს ვალების მეტი ვერაფერი შესძინა 1782 წელს მანჰეიმის საუკეთესო თეატრში პირველად წარმოადგინეს „ავაზაკები“. ახალგაზრდა პოეტი სამსახურიდან უფროსის ხედაურთველად გამოიპარა, რომ თავისი პიესის თამაშს დასწრებოდა. პიესამდამსწრე საზოგადოებაში მთელი არეულობა გამოიწვია: ახალგაზრდობის საუკეთესო ნაწილი დიდი აღტაცებით მიეგება კარლოს მოროს; ძველი თაობა კი გაგულისდა და პიესისა და მისი ავტორის წინააღმდეგ ამხედრდა. ეს ასეც უნდა მომხდარიყო: ახალი ახალს ეტრფის, ძველი კი ყოველთვის უკან იყურება და ახალს უარყოფს, რაგინდ კარგი იყოს ის. წარმოდგენის შემდეგ ახალგაზრდა პოეტი დაბრუნდა შტუტგარდში, სადაც მსახურობდა, — ახლა ის იყო უკვე განთქმული დრამატურგი, რომლის გაცნობას, დაახ-

ლოებას ყველა ნატრობდა; ამ დღიდან მოკიდებული შილერმა ხშირად იწყო სამსახურიდან გაპარვა, რაც მთავარს შეუმჩნეველი არ დაურჩა. ერთხელ მან ახალგაზრდა პოეტი ორი კვირით დააპატიმრა თვითნებობისთვის და შემდეგ გამოუცხადა: რასაც დაწერ, ყველაფერი უმალ მე უნდა მაჩვენო. შილერმა მტკიცე უარი განაცხადა ამგვარ წინადადებაზე. მაშინ გულმოსულმა მთავარმა აუკრძალა ყველაფრის წერა, გარდა საექიმო გამოკვლევებისა. ამგვარად შილერის სულიერ მოთხოვნილებას, მის მისწრაფებას მთავარი გადაედო. ეს დაბრკოლება იმდენად ძლიერი იყო, რომ შილერმა გადასწყვიტა ჩუმად გაპარულიყო მანჭეიმს და ამგვარად მოშორებოდა მთავარსაც და შტუტგარტსაც. მალე შილერმა თავისი განხრახვე აღსრულებაში მოიყვანა და ერთ მშვენიერ ღამეს მიატოვა შტუტგარტი. მანჭეიმს მისვლისთანავე შილერმა მიმართა თეატრის დირექციას და წარუდგინა თვისი „ფიესკო“, რომლის დადგმაზეც დირექციამ უარი განაცხადა. შილერს სხვა სახსარი ცხოვრებისა არ გააჩნდა: მისი ერთადერთი იმედი მისი პიესები იყო. ის მცირეოდენი ფული. რაც თან გამოჰყვა სამშობლოდან, მალე შემოეხარჯა და ამიტომ იძულებული გახდა მანჭეიმიდან გადასახლებულიყო მახლობელ სოფელ ბალერბახში. აქ ცხოვრებამ შილერს დიდი სარგებლობა მოუტანა. მარტოღმარტო მყოფი შილერი, გულგატეხილი და იმედდაკარგული, ხარბად დაეწაფა მეცნიერების ყოველ დარგს და თავისი თვითგანვითარება საკმაოდ გაათავოთოვა. ამავე დროს ის ხელოვნებასაც არა ტოვებდა და თან წერდა ახალ პიესებს, თან მასალას აგროვებდა სხვა პიესებისათვის. მალე მანჭეიმის თეატრის დირექციამ ისევ მიიწვია ის. მთელი წლის განმავლობაში შილერი დაუღალავად მუშაობდა თეატრისათვის, დაამზადა ამ დროის განმავლობაში სცენისთვის „ფიესკო“ და „ლუიზა მილერი“; მაგრამ შემდეგ წლიდან დირექციამ ის აღარ მიიწვია და შილერი ისევ ვაკირვებაში ჩავარდა. მან განიზრახა ეურნალის გამოცემა, მაგრამ ახალმა ეურნალმა იმდენი მტერი მოუპოვა, რომ იძულებული გახდა, მანჭეიმს გაცლოდა. შილერი გადასახლდა ლაიპციგში, სადაც მას ბევრი თავგანისმცემელი ჰყავდა. აქ ის დიდი აღტაცებით მიიღეს; მალე მან გაიცნო ლიტერატორები, არტისტები და გავლენიანი პირები და მისი ცხოვრების პირობებიც რიგიანად მოეწყო. აქედან შილერი გადასახლდა დრეზდენში, სადაც ორი წელიწადი დაჰყო. შილერის ერთ დამახასიათებელ თვისებას შეადგენდა მეტად მოსიყვარულე გული: უმეგობროდ, უამხანაგოდ ცხოვრება არ შეეძლო და სადაც კი გაჩნდებოდა, უსათუოდ უნდა მოეპოვებია გულითადი მეგობარი. დრეზდენშიაც მთელი ორი წელიწადი შილერმა ერთ თავის საუკე-

თესო მეგობართან გაატარა. 1787 წელს შილერი გადასახლდა ვაი-მარში. ვაიმარი ამ დროს ნამდვილი პოეტთა ქალაქი იყო: აქ იყვნენ ჰერდერი, ვილანდი, გოეთე და ვაიმარის მთავარი, — ლიბერალური მიმართულების კაცი და პოეზიის დიდი თავყვანამცემელი. ვაიმარში პირველ ხანებში შილერმა უმთავრესი ყურადღება მიაქცია ისტორიას და დაიწყო ისტორიული გამოკვლევების წერა, რითაც მალე მოიხვეჭა არა თუ ნიჭიერი ისტორიკოსის სახელი, არამედ იმდენი ფულიც, რომ თავისი დიდი ხნის ვალების უმეტესი ნაწილი გაისტუმრა. ამგვარ შრომას ისტორიის ასპარეზზე ის შედეგი მოჰყვა, რომ 1788 წელს ვაიმარის პერცოგმა ის დანიშნა იენის უნივერსიტეტში ისტორიის პროფესორად. სტუდენტობა დიდი ალტაცებით მიეგება ახალგაზრდა პოეტ-პროფესორს. მის ლექციებს მუდამ ბევრი მსმენელი ესწრებოდა, მაგრამ პროფესორობა არ შეესაბამებოდა შილერის ბუნებას, რომელსაც ყოველგვარი შევიწროვება და თავისუფლების შეზღუდვა ეჩაგრებოდა. თუ დათანხმდა პროფესორობაზე, უმთავრესად იმიტომ, რომ უბინაოდ სიარული მობეზრდა და საკუთარი ოჯახის მოპოვების სურვილი დღითი დღე უძლიერდებოდა. 1790 წელს შილერი დაქორწინდა ლოტა ლენგე ფელდზე-ქორწინებამ შესძინა შილერს ერთგული და მოყვარული ამხანაგი. მშვიდი და წყნარი ოჯახი. ასე კარგად, ასე მოსვენებულად შილერს არასოდეს უგრძნია თავი; მასში თითქოს შრომის სურვილმა და ძალმაც ერთიორად იმატა, მაგრამ ბედმა აქაც უღალატა პოეტს; მალე თავი იჩინა იმ სენმა, რომელმაც ბოლო მოუღო. 1799 წელს შილერმა თავი დაანება პროფესორობას იენში და გადასახლდა ვაიმარში. აქ მან ისევ ხელოვნებას მოჰკიდა ხელი და დაუღალავად მუშაობდა სცენისათვის გოეთესთან ერთად: შილერის სიცოცხლის უკანასკნელ წლებში ისა და გოეთე დიდი მეგობრები იყვნენ; შილერი ისე არაფერს დაბეჭდავდა, რომ უმალ გოეთესთვის არ წაეკითხვინებია, აგრეთვე გოეთეც ყოველ თავის ახალ ნაწარმოებს უმალ შილერს უკითხავდა და მის მსჯავრს ისმენდა. შილერი დაუღალავად შრომობდა და წერდა ახალ პიესებს. რამდენჯერმე ავადმყოფობა იმდენად გაუძლიერდა, რომ მის მორჩენას აღარ ელოდნენ, მაგრამ განგება იფარავდა პოეტს. მუდმივი შრომა მისმა სუსტმა აგებულე-ბამ ველარ აიტანა და 1805 წელს 9 მაისს გარდაიცვალა.

რას გვასწავლის პოეტის მოკლე ბიოგრაფია? პოეტი იყო ღარიბი ოფიცრის შვილი, დაიბადა ღარიბ ოჯახში, აღიზარდა ისეთ სასწავლებელში, სადაც სასტიკი დისციპლინა არსებობდა; კურსის გათავებისთანავე ის ისევ სამხედრო წესრიგის სისასტიკეს დაუმორჩილეს; მთელი თავისი სიცოცხლე გაჰირგების, სიღარიბისა და შევიწ-

როების მეტი არაფერი გამოუცდია; ბუნებამ მას არგუნა მეტად მოსიყვარულე გული, მშვიდი და წყნარი ხასიათი. აქედან თავისთავად ცხადია, თუ რა უნდა ყოფილიყო შილერის პოეზიის უმთავრესი თვისებანი. მიუხედავად მრავალი ვაჭირვებისა, პოეტმა უკანასკნელ ეამამდე შეინარჩუნა ღრმა რწმენა და სიყვარული ადამიანისა და ცხოვრებისა; მას უყვარდა ადამიანი ყველა მისი ნაკლულეფანებით, ის იყო გულმზურვალე მოსარჩლე და მფარველი ყველა ვაჭირვებულისა. პოეტი დაიბადა იმ დროს, როდესაც ევროპაში გვარიშვილობას, „სისხლს“ დიდი მნიშვნელობა ჰქონდა. იგი არ ეკუთვნოდა „სისხლიანთ“ ნაწილს თავის პოეზიაში მან აღიარა სრული თანასწორობა, დაგმო ტრადიციები და ჩამომავლობითა და გვარის მიხედვით კაცის დაფასება; პოეტი აღიზარდა ისეთ პირობებში, სადაც გამეფებული იყო ყოველგვარი შევიწროება და თავისუფლება სრულებით უარყოფილი; ანაღაზრდა პოეტი გამოვიდა თავისუფლების აღფრთოვანებულ მქადაგებლად და დამცველად. სიყვარული ადამიანისა, თანასწორობა და თავისუფლება, — აი უმთავრესი საგანი შილერის გულწრფელი და მასთან განუსაზღვრელი რწმენითა და იმედით აღჭურვილი პოეზიისა.

ყველა ფილოსოფიურ მოძღვრებაში პესიმიზმი ყველაზე უფრო მავნებელია, ხოლო ადამიანის ყოველგვარ გრძნობაში გულგატეხილობა, მელანქოლია — ყველაზე უფრო მაზარალებელია. თუ კი სიტყვას, თუ კი ამა თუ იმ მოძღვრებას ცხოვრებაში რისამე გაკეთება შეუძლია, ყოველი სიტყვის, ყოველი მოძღვრების მიზანი ის უნდა იყოს, რომ ადამიანს სიცოცხლე და ცხოვრება შეაყვაროს. ცხოვრების სიყვარული უმთავრესი პირობაა, ურომლისოდაც ადამიანის ბედნიერება შეუძლებელია. თუ ზოგჯერ მილიონერი თავისი ხელით ისპობს სიცოცხლეს, ფეხშიშველი გლეხი კი, რომელსაც რიგიანად გამოძღომაც კი ბევრჯერ არ შეხვედრია, ღრმა მოხუცებულობაშიაც ცას და ქვეყანას შეხარის, ამის მიზეზი ეს არის, თუ რა თვალთ უყურებს პირველი ან მეორე სიცოცხლესა და ცხოვრებას. სიყვარული — ეს დიადი გრძნობა, თუ რომ ის ადამიანმა ადამიანურად არ მოიხმარა, არ აკავშირებს პირველს ცხოვრებასთან. ამიტომ მას სიცოცხლეს მეტ ბარგად გადაქცევია, ბედნიერების წყარო სათავეშივე მოწამლული აქვს და ასეთ კაცს თავის მოკვლის მეტი, რასაკვირველია, აღარა დარჩენია რა; მეორეს კი ცხოვრება უყვარს, ეს სიყვარული შინაარსს აძლევს მოკერძო სიცოცხლესაც და ბევრჯერ მშიერიც რომ იყოს, გულის სიღრმეში ის მაინც ბედნიერად გრძნობს თავს. რა საძაგელიც უნდა იყოს ცხოვრება, რა სისულელესაც უნდა წარმოადგენდეს ადამიანის სიცოცხლე, ყველას შეუძლია,



ყველა ვალდებულია უკეთესი ცხოვრების დამყარებას ხელი შეუწყოს, ხოლო არავის არა აქვს უფლება, ადამიანის გულში თესოს თესლი სიცოცხლის სიძულვილისა. ვინც შრომობს ცხოვრების გაუმჯობესებისათვის, ის ემსახურება ადამიანის კეთილდღეობას, ადამიანის ბედნიერებას; ვინც მხოლოდ სიძულვილს თესავს, ის ემსახურება ადამიანის უბედურებას და ვისაც არ შეუძლია ადამიანის გაბედნიერება, მას რა უფლება აქვს ადამიანის უბედურებას ემსახუროს?! საშუალო ადამიანს სიცოცხლე უყვარს, მას ცხოვრება სწყყურია, ცხოვრება ადამიანური. გააღვივეთ მისი სიყვარული, დააკმაყოფილეთ მისი წყურვილი — აი პატიოსანი საქმე.

იმ მოღვაწეთა შორის, რომლებიც ამ პატიოსან საქმეს ემსახურებოდნენ, ერთი საუკეთესო ალაგი შილერს უჭირავს. შილერი ღარიბ ოჯახში დაიბადა, მთელი თავისი სიცოცხლე სიღარიბეში გაატარა; ბევრგვარი შევიწროება, ძალმომრეობა, უსამართლობა, დაჩაგრვა, დამცირება თავის საკუთარ თავზე გამოსცადა; ჯერ კიდევ ახალგაზრდას შეეპარა სენი, რომელიც მთელი თხუთმეტი წელიწადი ღრღნიდა მის ჯანმრთელობას. ღმერთო, როდის მოელება ამას ბოლოო, არა ერთხელ წარმოუთქვამს ამ დროის განმავლობაში, მაგრამ მიუხედავად ყოველივე ამისა, მას არც ერთხელ არ დაკარგვია რწმენა ცხოვრებისა და ადამიანის. სიცოცხლე ბედნიერებაა. ადამიანი ბუნებით კეთილი და პატიოსანი არსებაა — აი შილერის ღრმა რწმენა. მისი რწმენა სარჩულად უდევს მის პოეზიას. ბუნებამ შილერს არგუნა ნაზი, ფაქიზი და მეტად მგრძნობიარე ნერვები; დედის მოსიყვარულე გულმა კიდევ უფრო გაანაზა, მწარე ცხოვრებამ კიდევ უფრო გააგრძნობიერა ისინი. ამიტომ შილერის პოეზია არის პოეზია ნერვების, პოეზია გრძნობის და, რადგანაც გრძნობა ყოველთვის ინდივიდუალურია, სუბიექტური, შილერის პოეზიაც უმთავრესად სუბიექტურია. ნაზი და გრძნობით სავსე ნერვები ის აღვზნებული სიმებია, რომლებზედაც აწყობილია შილერის მთელი პოეზია — როგორც ლექსები, ისე დრამები. ლირიკა შილერის ნიჭის უმთავრესი ძარღვია, ლირიზმი შილერის ხელოვნების უმთავრესი თვისებაა. თუ შილერის თანამედროვე გოეთე თავისი ობიექტივიზმით, თავისი პოეზიის დედაზრით საყოველთაო მსოფლიო გენიოსია, შილერი თავისი გრძნობებით წვდება ყოველ ადამიანს. ქვეყნის ყოველ კუთხეს. შილერის ძლიერება მისი პოეზიის ლირიზმია და ამ ლირიზმს მოკლებული რომ იყოს მისი დრამები, რომლებიც დღესაც ამშვენებენ ევროპის თეატრის რეპერტუარს, მათ აღარ ექნებოდა ის მნიშვნელობა და გავლენა, რომელიც სამართლიანად აქვს მოხვეჭილი.

შილერის წერილი ლექსები და ბალადები წარმოადგენენ ერთ აღფრთოვანებულ ლირიკას. ძირითად თვისებას შილერის ლექსები-სას ის შეადგენს; რომ მათში თანამედროვე ცხოვრება სრულებით უარყოფილია. ლექსებში შილერი ის არ არის, რაც დრამებში; თუ თავის დრამებში ის სასტიკად კიცხავს ზოგიერთ მავნე ტრადიციას და თანამედროვე ცხოვრების სიმანხვჯეს, ლექსებში შილერის ძთელი გრძნობა, მისი სული და გული მხოლოდ ბუნებისაკენ არის მიქცეული. მაგრამ შილერი არ არის ბუნების უდარდელი, უმიზნო მოტრფიალე, მას უყვარს ბუნება იმიტომ, რომ ბუნებაში განხორციელებულია ის, რასაც ამაოდ დაეძებს ადამიანთა საზოგადოებაში, და ის გამუდმებით ითხოვს ადამიანთა შორის იმგვარ კავშირს, იმგვარ დამოკიდებულებას, როგორც ბუნებაში არსებობს. ცხოვრება შილერს არ აკმაყოფილებდა, მთელი თავისი სიცოცხლე ის უკეთესისაკენ მიისწრაფოდა, მაგრამ ცხოვრების განვითარება და გაუმჯობესება ადამიანის ნატურასავით სწრაფად არ მიცურავს და ამიტომაც შილერი ოცნებაში ჰპოვებდა ნუგეშს და იმედს, ოცნებით იახლოვებდა იმ სისრულეს, რასაც ცხოვრება მოკლებული იყო. თუ გინდა, რომ ღმერთს დაეძარო, უარჰყავ ქვეყნიური ვიწრო და სულისშემხუთავი ამაობანი და ოცნებით იდეალის შექმმოსავ სამყაროში აფრინდიო, — ამბობს პოეტი ერთ თავის ლექსში („იდეალი და ცხოვრება“, 1795 წ.). იდეალი ის წმინდა და ნათელი ლამპარი იყო, რომელიც გზას უნათებდა შილერის ნიჰს და სულს უდგამდა მის პოეზიას. რამდენადაც პოეტს არ აკმაყოფილებდა ცხოვრება, იმდენად უფრო იზიდავდა ბუნება და ხელოვნება. ბუნება და ხელოვნება — ის ორი ღმერთია, რომლებსაც შილერი თაყვანს სცემდა; ამის მიზეზი შემდეგია: შილერი მხოლოდ ბუნებაში ხედავდა იმ სიყვარულსა და მეგობრობას, ხელოვნებაში კი იმ მშვენიერებასა და თავისუფლებას, რომლებსაც მოკლებული იყო ცხოვრება.

შილერის პოეზია არის პოეზია საერთო, მსოფლიო სიყვარულისა. სიყვარულის ქადაგება შეადგენს შილერის ლექსების ერთ უმთავრეს თვისებას. შილერის სიყვარული ნაზი, წარმტაცი, მომხიბლავი გრძნობაა, ის რაღაც უხილავი ბადეა, რომელშიაც მოთაყვებულია მთელი სამყარო. ქვეყნიერება შილერის თვალში სიყვარულის საკურთხეველია; ამ უდიდეს გრძნობას ის არა თუ ადამიანთა შორის, უსულო საგნებშიც კი ხედავს. უკვდავი ნიუტონის კანონი შილერის პოეზიაში შეცვლილია სიყვარულითა და მეგობრობით: მხოლოდ სიყვარული და მეგობრობა აკავშირებს ერთმანეთთან მზესა და დედამიწას, იმავე სიყვარულსა და მეგობრობას ხედავს ის ვარსკვლავთა შორისაც. შილერი ღვიძლი შვილია ბუნების, მას არა თუ ადამიანი

უყვარს, მას ძლიერი გრძნობით უყვარს ბუნება, როგორც შვილს მშობელი დედა. აი რას წერს ის ერთ თავის ლექსში „მეგობრობა“, რომელიც დაწერილი აქვს 1781 წელს: ადამიანნი რომ უცებ მოისპონ დედამიწაზე, კლდეებს ჩავთვლიდი სულიერ ქმნილებად, მათ დაუწყებელი აღგზნებით კოცნას, შევიყვარებდი მთის მწვერვალებს, დაუშვებობრდებოდი ქალებს და ჩემს საიდუმლოს ქარს გავანდობდი; სიძულვილი ჩვენ მძოვრად გადაგვაქცევს ხოლმე, სიყვარული კი ღმერთადო, დასძენს შილერი. განვლო ამის შემდეგ თხუთმეტმა წელმა, ბევრი რამ განიცადა ამ დროის განმავლობაში შილერმა, მაგრამ მისი შეხედულება, ალტაცებული სიყვარული ბუნებისა უცვლელი დარჩა. 1775 წელს „იდეალებში“ პოეტი წერს: ბუნება ჩემს სიყვარულს იზიარებდა, უენომ ენა ამოიღვა, ამბორი უკან დამიბრუნა და ჩემი გულისძგერა შეიგნო. ტყე და მთები გაცოცხლდნენ და ვერცხლისფერი რუ მე მიგალობდაო. თუ ასეთი ღრმა იყო პოეტის სიყვარული უსულო საგნებისა, როგორი უნდა ყოფილიყო მისი სიყვარული თვით ადამიანისა?! მტრობა, სიძულვილი ის გრძნობაა, რომლებსაც შილერის ბუნება მოკლებული იყო. ამ გრძნობებს მოკლებულია შილერის პოეზიაც. შეიყვარეთ ერთმანეთი, განდევნეთ შური და მტრობა, მხოლოდ სიყვარული ამალღებს ადამიანთ! — აი რას ქადაგებდა შილერი მთელი თავისი სიცოცხლე. თვით სიცოცხლედ შილერს არარაობად მიაჩნია უსიყვარულოდ, „თვით ზეცაც კი რა არის უსიყვარულოდ“, — ამბობს შილერის იუნონა „სმელაში“. ყოვლად ძლიერი ზევსი კიდევ უფრო მალლა აყენებს სიყვარულს იმავე „სმელაში“: „რა არის ძლიერება, უკვდავება, მარადობა, ღმერთი უსიყვარულოდ!“. ზევსისა და იუნონას აზრი იგივე შილერის აზრია.

თავის წვრილ ლექსებში შილერს ბევრი აქვს სასიყვარულო ლექსიცი, თუმცა ზოგიერთ მათგანში პოეტის მუზა უკოცნელად ვერ ძლებს და ქალის ლოყებისკენაც იყურება, მაგრამ, საერთოდ, ამ ლექსებში სიყვარული ქალისა მეტად ნაზი, ამალღებული, იდეალური.

მეორე ძლიერი გრძნობა, რომელიც სარჩულად უდევს შილერის ლექსებს, არის მეგობრობა. სიყვარული და მეგობრობა შილერის პოეზიაში განუშორებელი და ერთნაირად ძლიერი გრძნობებია: ორივეს საზღვრები ერთად იწყება და ერთადვე თავდება: ამიტომ, შილერის აზრით, იქ, საცა სიყვარულია, მეგობრობაც არის, საცა მეგობრობაა, იქ სიყვარულია. ამგვარად, შილერის პოეზიაში სიყვარული და მეგობრობა ის განუწმენდილი იდეალური გრძნობებია, რომლებიც ადამიანის ბუნების საუკეთესო სამკაულს შეადგენენ.

თუ შილერი სიყვარულს მთელს სამყაროში ხედავდა და მიაჩნდა ის რაღაც მსოფლიო სულად, რომლითაც გაქვლებითი იყვნენ თვით უსულო საგნებიც კი, ამგვარადვე უყურებდა ის მეგობრობასაც; მეგობრობას ის ხედავდა ყველგან სამყაროში, ყოველგვარ უსულო საგნებს შორის, და ადამიანთა შორის ხომ მეგობრული კავშირი მას მიაჩნდა საუკეთესო კავშირად. არ ყოფილა არც ერთი წამი, როდესაც შილერს თავის გულისათვის ეღალატნოს, მას არ დაუწერია არც ერთი სტრიქონი, არც ერთი სიტყვა, სადაც ის თავის გრძნობას მტრობდეს: შილერი წერდა ყოველთვის მხოლოდ იმას, რასაც გრძნობდა და მისი მუზა და მისი გული მეგობრობის საკითხში სავსებით ეთანხმებოდნენ ერთმანეთს. შილერი ისეთი ადამიანი იყო, რომელსაც მარტოდ მარტო, უმეგობროდ გაძლება არ შეეძლო. სადაც კი მივიდოდა, უმალ მეგობარს მოძებნიდა ხოლმე მისი გული. თუ რამდენად ღრმა იყო მისი სიყვარული ყოველი მეგობრისადმი, იქიდანაცა ჩანს, რომ როდესაც მას სასწავლებელში გულთადი ამზანაგი ავად გაუხუდა და შილერი ატყობდა, რომ ის აღარ მორჩებოდა, მომავალი პოეტი გულწრფელად ევედრებოდა ღმერთს: მე მომკალი მის მაგიერო. ამგვარი პატიოსანი თვისება გულისა შილერმა ბოლომდე შეიჩინა. მეგობრისათვის არ იშურებდა სულსა და გულს, მასთან დაფარული არა ჰქონდა რა და ამიტომ საკვირველიც არ არის, თუ ასე მალეა აყენებს პოეტი ამ გრძნობას..

როგორც უკვე ვთქვით, მთელს ბუნებაში, ყოველგვარ უსულო საგანთა შორისაც, შილერი სიყვარულსა და მეგობრობას უმღერის. შილერის აზრით, ბედნიერება მხოლოდ იქ არის, სადაც სიყვარული და მეგობრობაა; მაგრამ ამათ გარდა ბედნიერების მთავარ პირობად მას მიაჩნია თანასწორობა და თავისუფლება. შილერის აზრით, ადამიანთა შორის ყველაფერი თანასწორად უნდა იყოს განაწილებული, თვით ბედნიერების განაწილებასაც კი თანასწორად ითხოვა პოეტი და ვერ ურიგდება იმგვარ უსამართლობას, რომ ერთსა და იმავე საზოგადოებაში ერთი ბედნიერი იყოს, მეორე კი უბედური. თავისუფლების საკითხზე შილერი გადაჭრილ პასუხს იძლევა თავის ლექსებში. როგორც შემდეგშიც დავინახავთ, ის მტერი იყო ყოველგვარი შევიწროების, შეზღუდვის, ძალმომრეობისა და ერთისაგან მეორის დაჩაგვრის. თავისუფლება, მისი რწმენით, ყოველი ადამიანის ორგანული თვისებაა. ამ თვისების წართვევა ყოველად შეუძლებელია. „ყველა ადამიანს დასაბამიდანვე მინიჭებული აქვს თავისუფლება, თუნდაც ბოკილებში დაბადებულიყოს“, — წერს ის ერთ თავის ლექსში 1797 წ. და ამით აშკარად ამტკიცებს, თუ როგორ ესმოდა თავისუფლება. თავისუფლების ყოველგვარი შევიწროება ში-

ლერს მიაჩნდა დიდ უსამართლობადა და მტარვალობად და ამგვარ მტარვალობასთან ბრძოლას შეაღია მთელი თავისი ნიჭი და ღონე შილერის ლირიკა — ეს თვით გულია შილერისა, მისი წერტილი ლექსები მისივე სულის სარკეა. თქვენ იხედებით ამ სარკეში და უნებურად. შეუმჩნევლად, ძლიერი წყურვილი გებადებათ — გრძობათ ყველა შეიყვართ, ყველას დაუმეგობრდეთ, შური და მტრობა დავიწყით, და თვით უსულო ბუნებასაც კი გაუამხანაგდეთ, გულში ჩაიკრათ. თუ შენ სული შეგიხუთა, მკითხველო, საზოგადოებრივი ცხოვრების ვიწრო და შმორიანმა ატმოსფერომ, მიმართე შილერს: ის გადავიშლის ბუნებას და დაგანახევებს, რომ ბუნება საუკეთესო საზოგადოებაა, სიმშვენიერით, სიყვარულითა და მეგობრობით აღსავსე; თუ შენს გულში მარტოობის სევდას დაუბუდნია, მკითხველო, შილერს მიმართე, — ის გეტყვის: მე მარტო არასოდეს ვყოფილვარ — ხე, ბალახი, კლდეები ყოველთვის ჩემთან იყვნენ და მათ შორის ჩემი თავი მარტო არ მიგრძენია, მათთან ერთად მეც ბუნების შეიჯი ვიყავი; თუ ადამიანის რწმენა დაგკარგვია, მკითხველო, მიმართე შილერს, — ის ჩაგახედებს ადამიანის გულში და დაგანახევებს სიყვარულს, ძმობას, მეგობრობას, დაგარწმუნებს, რომ ადამიანში არის პატიოსანება, რაც უნდა დაცემული იყოს ის; თუ ბოროტებას შენთვის სასოება წაურდმევია, მიმართე შილერს, — ის დაგანახევებს, რომ ქვეყნად კეთილი არსებობს; თუ ცხოვრებაზე გული გაგტეხია. მკითხველო, და სიცოცხლე მოგბეზრებია, დაუმეგობრდი შილერს და ის გასწავლის: გაათბე შენი გული სიყვარულისა და მეგობრობის წმინდა შუქით, შეუმჩნევლად იზრუნე შენი განკარგებისათვის, მაშინ შენს სიცოცხლესაც მიზანი ექნება და ცხოვრებაც შეგიყვარდება. შილერს მე არასოდეს დრ ვუწოდებ გენიოსს, ის არ არის გენიოსი. მაგრამ ის იმედია ყველა უიმედოსი, ნუგეშია ყველა უნუგეშოსი, შვებაა ყველა სულით ტანჯულისათვის და აი ამაშია მისი ძლიერება.

შილერი ღრმად დარწმუნებულია, რომ ადამიანი უზენაესი მიზნისათვის არის დაბადებული. რაში მდგომარეობს ეს უზენაესი მიზანი? ზნეობრივად და გონებრივად შეუჩერებელ განვითარებაში. შილერი ამგვარ განვითარებას, განკარგებას ითხოვს ყოველი ადამიანისაგან, ხოლო ამისათვის აუცილებელ პირობად მიაჩნია: სიყვარული ანუ ძმობა, მეგობრობა ანუ ერთობა, და თავისუფლება ანუ თანასწორობა. პირად განვითარებას შილერი მეტ ყურადღებას აქცევდა და მეტ მნიშვნელობასაც აძლევდა, ვიდრე საზოგადოებრივს. ამაში მარტო შილერის კი არა, — მთელი მეთვრამეტე საუკუნის ფილოსოფიური აზროვნების შეცდომაა. საშუალო საუკუნეებიდან მოყოლებული სარწმუნოებამ, ტრადიციებმა, საზოგადოებრივმა წყობილემ

ბამ პიროვნება ნელ-ნელა შებორკა, შეზღუდა და ბოლოს სრულე-  
 ბით მოუსპო ყოველგვარი თავისუფლება მარტო მოქმედებაში კი არა,  
 აზროვნებაშიც. მეთვრამეტე საუკუნის განმანათლებლებმა მოინდომეს  
 პიროვნების გათავისუფლება და რადგანაც ყოველ ახალ მოძრაობას,  
 ახალ მიმართულებას თან სდევს უკიდურესობა, გადაჭარბება, აქაც  
 ასე მოხდა. პიროვნების გამათავისუფლებელთა შორის ბევრმა სრულე-  
 ლებით დაივიწყა, რომ პიროვნების გარდა არსებობს საზოგადოებრი-  
 ვი ცხოვრება და რომ ორი ამ ელემენტის განვითარება, გაუმჯობე-  
 სება უერთმანეთოდ, ცალკე-ცალკე შეუძლებელია, და მთელი თავი-  
 სი ყურადღება პიროვნებას მიაქცია. შილერიც სწორედ ამგვარმა  
 უკიდურესობამ გაიტაცა. პიროვნების განვითარებას შილერი უმთავ-  
 რეს მნიშვნელობას აძლევს, მაშინ, როდესაც თვით პიროვნების გან-  
 ვითარება დამოკიდებულია საზოგადოებრივ განვითარებაზე; პიროვ-  
 ნების კეთილდღეობისათვის ზრუნვას ის ყოველი ადამიანისაგან ით-  
 ხოვს, მაშინ, როდესაც საზოგადოებრივ კეთილდღეობაზე ზრუნვა  
 მას სრულებით არ მიაჩნია სავალდებულოდ. „საპიროვნის დროს მე-  
 გობრულად ხელი გაუწოდე და დაეხმარე იმ კაცს, რომელსაც ცხოვ-  
 რების ღრე-კლდეებში შეზღუდები, მაგრამ ყველა შენი მოყვასის კე-  
 თილდღეობაზე ზრუნვა ცას მიანდე“, — წერს ის ერთ თავის ლექსში  
 („კაცობრიობის გამასწორებელს“. 1796 წ.). აქედან ცხადია, თუ რო-  
 გორ ესმოდა შილერს საზოგადოებრივი მოღვაწეობა: შენ პიროვნე-  
 ბის კეთილდღეობისათვის იზრუნე და მთელი საზოგადოებისათვის  
 ცა იზრუნებსო. შეიძლება იმ დროს ცა მართლაც ასე ზრუნავდა, ეს  
 სულიერ მამებს ჩემზე უკეთ ეცოდინებათ, ხოლო ის კი კარგად ვი-  
 ცი, რომ დღეს ასე აღარ არის. და ამიტომ შილერის აზრი ერთ დიდ  
 შეცდომას წარმოადგენს. ყოველი კერძო პიროვნება იმდენად არის  
 ჩასკვნილი საზოგადოებრივი ცხოვრების ბაღეში, რომ მას განძრევა  
 არ შეუძლია ისე, თუ უმაღლ ცხოვრება არ აიძრა, არ ამოძრავდა. ზნე-  
 ობრივად და გონებრივად პიროვნების ამაღლება, თუ უმაღლ საზოგა-  
 დოებრივი ცხოვრება არ ამაღლდა, სრული უტოპიაა. ადამიანის ყო-  
 ველგვარი მოთხოვნილება, როგორც სულიერი, ისე ხორციელი, მხო-  
 ლოდ ცხოვრებაში ჰპოვებს დაკმაყოფილებას და თუ თვით ცხოვრება  
 არ წარმოადგენს საკმაოდ მომზადებულ ნიადაგს ამა თუ იმ მოთ-  
 ხოვნილების დასათესად და გასაფურჩქნად, მარტო პიროვნების ზნე  
 და გონება ბევრს ვერაფერს გააწყობს. საქმე ის კი არ არის, რომ ერ-  
 თი და ორი პირი ზნეობითა და გონებით ვარსკვლავებსა წვდებო-  
 დეს, საქმე ისაა, რომ უმრავლესობა იყოს ბედნიერი, უმრავლესო-  
 ბას შეეძლოს დაუბრკოლებლად განვითარება ზნეობრივად და გონებ-  
 რივად, — ამისათვის კი აუცილებელ და უპირველეს პირობას საზო-

გადღობრივი ცხოვრების შესაფერად გაწესრიგება, მისი ამალღება შეადღენს. პიროვნება ვერ გააკეთებს, ვერ განახორცილებს იმას, რის პირობებსაც თვით ცხოვრება არ იძლევა. ამიტომ შიღერის თეზისი — თუ პიროვნება კარგია, საზოგადოებრივი ცხოვრებაც კარგია, თუ პიროვნება ზნეობრივია, საზოგადოებრივი ცხოვრებაც ზნეობრივია, თუ პიროვნება განვითარებულია, საზოგადოებრივი ცხოვრებაც განვითარებულია, — დღეს ამგვარად უნდა შეიცვალოს: თუ საზოგადოებრივი ცხოვრება კარგია, პიროვნებაც კარგია, თუ საზოგადოებრივი ცხოვრება განვითარებულია, პიროვნებაც განვითარებულია, თუ საზოგადოებრივი ცხოვრება ზნეობრივია, პიროვნებაც ზნეობრივია.

ამგვარია დედააზრი შიღერის ლექსებისა. თუ როგორია მისი დრამების დედააზრი — ამას ქვევით დავინახავთ.

ზევით, როდესაც შიღერის ლექსებს შევეხებით, ჩვენ ვამბობდით: შიღერის ლექსებში ცხოვრება სრულებით უარყოფილია-თქო. მართლაც, შიღერის ლექსებსა და ბალადებში ძვირად წააწყდება მკითხველი საზოგადოებრივ ლირიკას, საზოგადოებრივ მოტივს, — აქ პოეტის მთელი ყურადღება, მთელი მისი არსება ბუნებისა და ადამიანისაკენ არის მიქცეული. მიუხედავად იმისა, რომ შიღერს ბედმა კერძო ცხოვრებაში არ გაუღიმა, მიუხედავად იმისა, რომ პოეტმა ბევრი სიმწარე გამოცადა, მიუხედავად იმისა, რომ, პოეტისავე სიტყვით, ის არკადიაში დაიბადა, მაგრამ მისმა გაზაფხულმა მთლად ცრემლებში გაიარა, პოეტმა სიცოცხლის უკანასკნელ წამამდე შეინარჩუნა ოპტიმისტური შეხედულება ცხოვრებაზე, მარად ახალგაზრდა სული. მისი პოეზია ღრმა სიყვარულია ბუნებისა და ცხოვრებისა, ღრმა რწმენაა სიკეთისა და ადამიანისა. აი, ამ რწმენის ნაყოფია შიღერის დრამები. თუ ლექსებში შიღერის საგანი ბუნება იყო, დრამებში შიღერის უმთავრესი ყურადღება ცხოვრებისაკენ არის მიპყრობილი. სიკეთისა და ადამიანობის სახელით ის ებრძოდა ყოველგვარ საზოგადოებრივ უსამართლობას და, თუ ნაპოლეონი ამბობდა ბომარშეს „ფიგაროს“ შესახებ: ეს კომედია რევოლუციიაა სცენაზეო, ეს სიტყვები უფრო სამართლიანად ითქმის შიღერის დრამების შესახებ.

მისი „ავაზაკები“, „ფიესკო“ და „ლუიზა მიღერი“ ნამდვილი რევოლუციიაა, დამხობაა თანამედროვე საზოგადოებრივი ურთიერთობისა. შიღერი იგივეა გერმანიისათვის, რაც შექსპირი ინგლისისათვის. შიღერამდე და მის დროსაც გერმანიაში ბევრი იყო დრამატურგი, ხოლო შიღერი გერმანიის სცენის მთავარი ბოძია. შიღერის დრამატული ხელოვნების ასახსნელად საჭიროა იმის გახსენება, თუ რა შესძინა ლესინგმა გერმანიის ხელოვნებას; არათუ შიღერის, გო-

ეთეს დრამატიული მოღვაწეობაც ულესინგოდ გაუგებარია და ამიტომ ჩვენც ლესინგიდან დავიწყებთ.

VII—VIII ს.ს. პირველ ნახევარში გერმანიის პოეზია, განსაკუთრებით კი დრამატიული ხელოვნება, მეტად ღარიბი იყო ორიგინალური თხზულებებით. ყველაფერს, რაც კი გერმანიის სცენაზე იდგმებოდა, მონური მიბაძვის ან მაიმუნობის ბეჭედი ესვა. უმთავრესი წყარო, რომელსაც ამ დროს ეწაფებოდა გერმანიის თეატრი, ფრანგული პიესები იყო და, რადგანაც საფრანგეთის დრამატურგები დიდი პატივისმცემლნი იყვნენ არისტოტელეს ესთეტიკისა, ამიტომაც მაშინდელი სცენა — როგორც საფრანგეთში, ისე გერმანიაში — ცრუკლასიკურ გზას ადგა. ცრუკლასიკური ტრაგედიები ყველაფერში საბერძნეთსა და რომის კლასიკოსებს ბაძავდნენ, მაგრამ ის, რაც კლასიკურ ტრაგედიებში აუცილებელი იყო, ორგანიული, დროისა და ცხოვრების შესაფერი და ნაციონალური, ყოველივე ამან ცრუკლასიკურ პიესებში მიიღო რალაც ნაძალადევი, დროისა და ცხოვრების შეუფერებელი და გამოურკვეველი სახე. უმთავრეს თვისებას ამგვარი ტრაგედიებისას ის შეადგენდა, რომ ჩვეულებრივი დამოკიდებულებანი, ჩვეულებრივი შემთხვევები, ჩვეულებრივი სულისკვეთება და მისწრაფებანი მათთვის არ არსებობდა, — მათი გმირები უნდა ყოფილიყვნენ უსათუოდ მეფეები, ან წარჩინებული გვარისა და შთამომავლობის პირნი. ცრუკლასიკური დრამატურგები მათ აყენებდნენ ჩვეულებრივ, ცხოვრებიდან ამოღებულ პირობებში კი არა, არამედ ისეთ პირობებში, რომლებიც გახურებული ოცნების ნაყოფი იყო, და მთელი მიზანი ტრაგედიისა იმაში მდგომარეობდა, რომ ძლიერთა ამა ქვეყნისა არაჩვეულებრივი ტანჯვითა და უბედურებით მაყურებელში გაოცება გამოეწვიათ. ცრუკლასიკური ტრაგედიის წინააღმდეგ საფრანგეთში ამხედრდა რუსო, დალამბერი და დიდრო, მაგრამ პირველად მას ინგლისმა გამოუცხადა ბრძოლა. ინგლისში ორმა დრამატურგმა — ლილომ და ედუარდ მურმა XVIII საუკუნეში პირველად უარპყვეს ცრუკლასიკური მეთოდი და საძირკველი ჩაუყარეს სოციალურ ტრაგედიას ანუ ჩვეულებრივ დღევანდელ დრამას — პირველმა „ლონდონელი ვაჭრით“, მეორემ — „მოთამაშით“.

მაგრამ როგორც დიდროს პიესები, ისე „ლონდონელი ვაჭარი“ და „მოთამაშე“ მხოლოდ კერძო შეტაკება იყო, რომლის შემდეგაც ევროპის სცენა მაინც ცრუკლასიკური ტრაგედიების ხელში დარჩა. უმთავრესი ბრძოლა მოხდა და მასთან ცრუკლასიციზმიც დამარცხდა სცენაზე მხოლოდ მაშინ, როდესაც ლესინგმა გამოაქვეყნა თავისი „ჰამბურგის დრამატურგია“. ეს მოხდა 1767—1768 წლებში. ლესინგმა აქ ვრცლად გაარჩია 75 ტრაგედია და ნათლად დაამტკიცა ცრუ-



კლასიკური თეორიის არარაობა. საბერძნეთის ტრაგედია თავისი დროისა და ეპოქისათვის შესაფერისი იყო, ამიტომ დღევანდელი ტრაგედიაც თავის დროს უნდა შეეფერებოდეს, მოითხოვს ლესინგმა. ტრაგიკული კოლიზიების ანალიზით მან დაამტკიცა, რომ ტრაგედია მაყურებელში თანაგრძნობას უნდა აღძრავდეს, და არა განცვიფრებასა და გაოცებას, როგორც წარმოდგენილი ჰქონდათ ცრუკლასიკოსებს. თანამედროვე ტრაგედიის უმთავრეს პირობად ლესინგმა აღიარა თანამედროვე, ჩვეულებრივი ცხოვრების ხატვა და ეროვნული ხასიათი, და პირველად მანვე შექმნა გერმანულ ენაზე სოციალური დრამები. რადგანაც ლესინგი უმთავრესად თეორეტიკოსი და კრიტიკოსი იყო, ვიდრე პოეტი, ამიტომ მისი დრამებიც უფრო მშრალ მსჯელობას წარმოადგენენ, ვიდრე ცოცხალ ცხოვრებას. ლესინგის თეორიამ საუკეთესო განხორციელება ჰპოვა შილერის დრამებში. ჯერ კიდევ თავის ლექსებში აღიარა შილერმა, თუ როგორ უყურებდა ის დრამატულ ხელოვნებას და რას ითხოვდა თეატრისაგან. „ჩვენ ვეძებთ თეატრში ჩვენს თავსა და ნაცნობებს, ჩვენს მწუხარებასა და გაჭირვებას“, — ამბობს შილერი „შექსპირის აჩრდილში“, „ჩვენ არ გვინდა ცრუ ნიღბებით გმირები, ჩვენ გვინდა, რომ ჩვენი გმირი ადამიანი იყოს. სცენაზე ხან ცრემლებში, ხან ლმობიერებაში სინამდვილე უნდა გვეჩვენებოდეს“, — ამბობს შილერი ერთ თავის ლექსში. ყველა ეს აზრი შთაგონებულია „ჰამლეტის დრამატურგიით“.

სოციალური დრამების უმთავრეს თვისებან ის შეადგენს, რომ მათში, წინააღმდეგ ცრუკლასიკური ტრაგედიებისა, გამოყვანილია ჩვეულებრივი ცხოვრება ჩვეულებრივი ადამიანებისა, რომლებიც უმთავრესად მესამე წოდების — ბურჟუაზიის წრეს ეკუთვნიან; მათში მოქმედება ბუნებრივი შედეგია გმირების ხასიათისა და იმ პირობების, რომლებშიაც ისინი იმყოფებიან, და არა ავტორის სურვილისა, როგორც ეს ცრუკლასიკურ ტრაგედიებშია. ამიტომ, თუ ამ უკანასკნელებში ბევრი რამ არის გაუგებარი და აუხსნელი, სოციალურ დრამებში ყველაფერი გასაგებია მაყურებლისათვის. ნიშნობლივ თვისების ყველა ამ ახალი ანუ ბურჟუაზიული დრამებისას ის შეადგენს, რომ მათში მესამე წოდება გამოყვანილია საზოგადოებრივ რეფორმატორად, ის უკმაყოფილოა არსებული წყობილებით, არსებული კანონმდებლობით, ტრადიციებით, შეხედულებებით და ითხოვს სრულ განახლებას ყველა ამ სფეროში.

თავისთავად იბადება შემდეგი საკითხი: რატომ დაიბადა ბურჟუაზიული დრამის თეორია და თვით დრამაც მხოლოდ XVIII საუკუნის მეორე ნახევარში და არა ადრე? ყოველგვარი მწერლობა მხოლოდ აზრი და ემოციაა; საზოგადოებრივი ცხოვრება ყოველ კონკ-

რეტულ პირობებში შესაფერ აზრსა და ემოციას წარმოშობს ხოლმე. ამიტომ მწერლობის ევოლუცია ყოველთვის საზოგადოებრივი ცხოვრების ევოლუციას მოსდევს თან. მწერლობაში მხოლოდ იმგვარი რეფორმაცია ხდება, რისი თანაბარიც თვით ცხოვრებაში წარმოებს. XVIII საუკუნის მეორე ნახევარში მესამე წოდების თვითცნობიერება იმდენად განვითარდა, რომ ამ წოდებამ შეიგნო თავისი თავი, გამოაცხადა თავი სრულწლოვან კლასად და მოითხოვა თავისი უფლებანი როგორც ცხოვრებაში, ისე ლიტერატურაში. მხოლოდ ამ წოდების თვითშეგნების განვითარებამ წარმოშვა ლესინგი და შილერი, ბურჟუაზიული ღრამა და ბურჟუაზიული რომანი; ლესინგი ქადაგებს მესამე წოდების უფლებას მწერლობაში და განსაკუთრებით ღრამაში, შილერი კი იცავს მის პიროვნებას და ქადაგებს იმის უფლებებს სცენაზე. შილერი საუკეთესო წარმომადგენელია ბურჟუაზიული ღრამისა გერმანიაში. იმ დროს და იმ პირობებში, რომელშიაც შილერის ნიჭი გაიფურჩქნა, ბურჟუაზია, რომლის ძალ-ღონე ჯერ კიდევ განუმტკიცებელი იყო, მოწინავე იდეებს ნერგავდა. ცხოვრება, ჩვეულებანი, კანონმდებლობა, ზნეობრივი შეხედულებანი — ერთი სიტყვით, მთელი საზოგადოებრივი ატმოსფერო ამ ახალი კლასისათვის შეუფერებელი იყო, — ის ითხოვდა ახალ წყობილებას, ითხოვდა თავისი უფლებებისა და ზნეობრივი შეხედულებების გამეფებას. იმ დროს ეს კლასი სიმპათიური იყო, სიმპათიური იყო მისი საკაცობრიო მისწრაფება და ამ მისწრაფების საუკეთესო მქადაგებლად შილერი გამოვიდა. უპირველეს ყოვლისა, ახალგაზრდა პოეტმა მოითხოვა პიროვნების თავისუფლება. შილერი კარგად ხედავდა, რომ პიროვნება და საზოგადოება ორი ერთიმეორის მოწინააღმდეგე ელემენტებზე არიან. რომელს უნდა მიეცეს უპირატესობა? მეფერამეტე საუკუნის ერთი საუკეთესო შვილთაგანი ამ კითხვაზე იძლევა ისეთ პასუხს, როგორიც უფრო შეეფერებოდა თანამედროვე მოწინავე მისწრაფებას. საზოგადოებრივი ჩვეულებანი, ტრადიციები, თვით კანონმდებლობაც კი უნდა დაემხონ პიროვნების უფლებათა წინაშე, — აი, შილერის ღრმა რწმენა, აი შილერის უძლიერესი სურვილი. ამ მხრივ შილერზე დიდი გავლენა ჰქონდა უმთავრესად რუსოს, რომლის მოძღვრების კვალსაც შესამჩნევად დაინახავს მკითხველი პოეტის პირველ ღრამაში „ავაზაკები“.

შილერი ჯერ ჩვიდმეტის წლისა არც კი იყო, როდესაც „ავაზაკების“ დაწერა განიზრახა. ჯერ კიდევ აკადემიაში იყო პოეტი, როდესაც ამ პიესას წერდა და ოცდაერთი წლის პოეტმა კიდევ წარუდგინა საზოგადოებას თავისი პიესა. როდესაც ის 1782 წელს მანჰეიმის სცენაზე წარმოადგინეს, პიესის შთაბეჭდილება აუწერელი იყო, მაგრამ

ამ შთაბეჭდალებას ორგვარი ხასიათი ჰქონდა: ძველი წყობილების მოტრფიალენი, „სისხლის“ წარმომადგენლები საშინლად გაბრაზდნენ და აუმხედრდნენ ახალგაზრდა პოეტს, განახლების მოსურნენი — განსაკუთრებით ახალთაობა — ალტაცებით მიეგება ახალი სიტყვის მოქმელს. რა იყო ან რა არის საამისო „ავაზაკებს“? მაშინ, როდესაც შილერი „ავაზაკებს“ წერდა, ის იყო, ერთი მხრით, გამოუცდელი მწერალი, მეორე მხრით, ცხოვრებაში ჯერ გამოუსვლელი ახალგაზრდა, მესამე — მტერი ყოველგვარი შევიწროებისა და შეზღუდვისა. სამივე მხარემ თავისი კვალი დააჩნია „ავაზაკებს“. როგორც გამოუცდელი მწერლის ნაწარმოებში, მასში ბევრია ისეთი შეცდომა, რომლებიც პიესის სახელოვნო ღირსებას ძალიან აქვეითებენ. „ავაზაკები“ არ წარმოადგენს იმგვარ შემუშავებულ და დანელოვნებულ კალმის ნაყოფს, სადაც ყოველი ნაბიჯი მოქმედი პირებისა ლოგიკურად არის ერთიმეორეზე დაკავშირებული, სადაც მოქმედება ბუნებრივად იშლება და ფართოვდება. აქ ბევრ ალაგს ატყვია ავტორის ძალდატანება, ავტორის სურვილი. ყოველი აღამიანი უფრო მედგრად და უდრეკად მისდევს თავის რწმენას, უფრო რადიკალია მანამ, სანამ ცხოვრება ჩაითრევს; ჩაითრევს თუ არა ცხოვრება, მის აზრებს ძველებური. პირდაპირობა, უშიშროება და გატაცება აკლდება, იბადება სხვადასხვა კომპრომისი და სხვ. შილერზედაც იგივე ითქმის: „ავაზაკებს“ შილერი წერდა იმ დროს, როცა ჯერ კიდევ ცხოვრებაში ჩაბმული არ იყო და ამიტომაც აქ ყოველი მისი აზრი პირდაპირი, მედგარი, უშიშარი და ძლიერია. რადგანაც შილერი მოტრფიალე იყო სრული თავისუფლებისა და მტერი ყოველგვარი შევიწროებისა, მისი პირველი დრამაც ძლიერი ქადაგებაა თავისუფლებისა და პიროვნების დამოუკიდებლობისა.

შინაარსი „ავაზაკებისა“ მარტივია: მოხუცებულ გრაფს — მორს ჰყავს ორი შვილი: კარლოსი და ფრანცი. უფროსი — კარლოსი — შესანიშნავია როგორც ნიჭით, ისე გარეგნობით; ფრანცი კი გარეგნობით უშნოა, ულაზათო და მისი ერთადერთი მისწრაფებაა სხვის უბედურებაზე საკუთარი კეთილდღეობის აშენება. ფრანცი ცდილობს, როგორმე თავიდან მოიშოროს უფროსი ძმა, ისარგებლოს იმ დროით, როცა კარლოსი შინ არ არის, შეთხზავს ყალბ წერილს, რომელშიაც სხვადასხვა ავაზაკობას სწამებს ძმას და ურჩევს მამას: დროებით მაინც დასწყევლე შენი შვილი და შეაშინე, რომ გამოსწორდესო. მამის მაგიერ ის წერს ძმას წერილს: მამაშენი შენი მამობისაგან ხელს იღებს სამუდამოდო. ეს წერილი უკანასკნელი წვეთი იყო, რომელმაც აღავსო კარლოსის ზიზღი და სიძულვილი საზოგადოებრივი წყობილებისადმი; ის მყისვე შეაღგენს ავაზაკების ბრბოს

და ცდილობს სხვადასხვა მავნე პირთა მოკვლით საზოგადოებაში ბოროტების აღმოფხვრას. ამავე დროს ფრანცი თავის მოხუცებულ მამას აკლდამაში დაამწყვდევს, მას მკვდრად გამოაცხადებს და მის ალაგს თვითონ იჭერს. კარლოსი შემთხვევით გაიგებს ამას, გაათავისუფლებს მოხუც მამას და ამხანაგებს გზავნის ფრანცის შესაპყრობად და დასასჯელად, მაგრამ ფრანცი ცოცხალი არ ნებდება ავაზაკებს და თავს ჩამოიხრჩობს. კარლოსი კი სასოწარკვეთილებასა და სინანულს ეძლევა, თვითონვე გმობს მთელ თავის მოქმედებას და თავისი ნებით ჩაუვარდება პოლიციას ხელში. ამით თავდება პიესა.

მთელ დრამაში ყველაზე უფრო საყურადღებო პირი კარლოსი მოორია. ეს პირი საყურადღებოა იმით, რომ ის გამოხატავს შილერის აზრებსა და მისწრაფებას. შილერის პოეზიას დედააზრი მისი მსოფლიო შეხედულების დედააზრია, კარლოსი მოორი იმდენადვე ჰგავს თვით შილერს, რამდენადაც ვერტერი გოეთეს. კარლოსი მოორი მაღალი ნიჭის, მაღალი ზნეობისა და მაღალი გრძნობის კაცია. წინააღმდეგ ფრანცისა, რომელსაც სულელად მიაჩნია ყველა, ვინც კი მხოლოდ თავის საკუთარ სარგებლობაზე არ ზრუნავს, მისი ფიქრი და გრძნობა მხოლოდ მოძმის კეთილდღეობას, საზოგადოებრივ სარგებლობას შეუპყრია. მთელი მისი არსება ნაზი და მგრძნობიარე ნერვებისაგან შედგება. მას ებრალება ყველა გაჭირვებული, ის თანაუგრძნობს ყოველ დაჩაგრულს. ყოველგვარი სიბოროტე, სისაძაგლე და უსამართლობა სულსა და გულს უმღვრევს, მშვიდობასა და მოსვენებას უკარგავს. მრავალ ფიქრს, მრავალ გრძნობას, მრავალ მისწრაფებას მასში ერთად შეუყრია თავი, მას არ შეუძლია ერთ რომელიმე მათგანს მისდიოს, ერთ გზას დაადგეს, ერთი გადაწყვეტილება აირჩიოს უყოყმანოდ; გადადგამს თუ არა ნაბიჯს, მყისვე ეჭვი ებადება, სასოწარკვეთილებაში ვარდება და მზად არის უკან დაიხიოს. რისი მიზეზია ამგვარი შინაგანი დაყოფა, სულის ამგვარი გაბოროტება და შფოთვა? ამის მიზეზი ერთადერთია: მას უნდა ადამიანის ბედნიერებას ემსახუროს. ადამიანის კეთილდღეობას შესწიროს ძალ-ღონე, მაგრამ ხედავს, რომ არსებული საზოგადოებრივი წყობილება აკანონებს უსამართლობას, ძალმომრეობას, მეჭვრტამეობას, სინიღისით ვაჭრობას, ერთიმეორის ექსპლოატაციას და ამით ძირიანად ეწინააღმდეგება პიროვნების ბედნიერების პრინციპს. კარლოსი მოორის უწყმიდეს მიზანს ადამიანი შეადგენს, ადამიანთა შორის ერთადერთ კავშირად მას მხოლოდ სიყვარული, ერთობა და ძმობა მიაჩნია; ასეთ კავშირზე უნდა აღმოაცენოს სრული თანასწორობა და თავისუფლება. რად ეტრფის ის თავისუფლებას და თანასწორობას? იმიტომ, რომ, მისი ღრმა რწმენით, მხოლოდ თავისუფლება ბადებს სრულ

ადამიანს, მხოლოდ თავისუფლება და თანასწორობა უწყობს ხელს ადამიანის გონებრივად და ზნეობრივად ამაღლებას. არსებული საზოგადოებრივი წყობილება კი, მოორის აზრით, სრულიად საწინააღმდეგო გზას ადგია: აქ ადამიანში ყველა ხედავს მხოლოდ საშუალებას თავისი კეთილდღეობის მოწყობისას, ადამიანთა შორის მხოლოდ მტრობა და გაუტანლობაა, საზოგადოებაში თავისუფლებისა და თანასწორობის მაგიერ სრული მონობა და უთანასწორობა მეფობს. მოორი მტერია ჩვეულების, ტრადიციების, თანამედროვე საზოგადოებრივი წყობილებისა და კანონების, ის მიისწრაფვის სრული თავისუფლებისაკენ, მაგრამ როგორ შექმნას, როგორ დაამყაროს ეს თავისუფლება, როდესაც მთელ საზოგადოებას, თითქოს განგებ, მის წინაღობაში პირი შეუტრიავს? მოორი შეკრებს ისეთ პირებს, რომლებიც მასავით უკმაყოფილონი არიან არსებული საზოგადოებრივი წყობილებით და ფიზიკური ძალით, ე. ი. ბრძოლით ფიქრობს საზოგადოების განახლებას და პიროვნების გათავისუფლებას. მებრძოლი მოორის ლოგიკა ამგვარია: საზოგადოებაში მრავალგვარი ბოროტება, უსამართლობა და სისაძაგლე არსებობს, არიან ისეთი პირნი, რომლებიც ყოველივე ამას ჩადიან; მაშასადამე, საჭიროა ამ პირების მოსპობა და მხოლოდ მაშინ მოისპობა საზოგადოებაში ყოველგვარი ბოროტება, უსამართლობა და კეთილი გამეფდება. მოორი ასეც ირჩება; ის გამოდის ავაზაკად, მაგრამ ის არ არის ქურდი, მტაცებელი, — ის იცავს დაჩაგრულს მჩაგვრელისაგან, ის ართმევს მდიდარს და ღარიბს აძლევს, ის კლავს ვეჟილს, რომელიც ფულის გულისათვის ყოველგვარ სისაძაგლესა და ბოროტებას ესარჩლება; კლავს მინისტრს, რომელიც ფლიდობით ამაღლდა და პირფერობითა და ქვრივ-ობლების ცრემლებზე აშენებდა თავის ბედნიერებას; ის კლავს გავლენიან მოხელეს, რომელიც ადგილებს მათ ურიგებს, ვინც მეტ ქრთამს აძლევს; ის აღრჩობს მღვდელს, რომელიც თავისი მრევლის წინაშე ინკვიზიციის გადავარდნას გლოვობს. რამდენადაც უფრო წყურია მას, რომ საზოგადოებრივი წყობილება სამართლიანობაზე იყოს აგებული და ადამიანი ბედნიერი, იმდენად უფრო გახელებულია საზოგადოებრივ უწყესობასა და უსამართლობაზე, იმდენად უფრო მკაცრი და დაუზოგველია საზოგადოებრივი სამართლიანობის მტრებთან ბრძოლაში. რითი თავდება მოორის ბრძოლა? ნეკზე კბენითა და სინანულით! უკანასკნელი მოქმედების დასასრულს ის თვალცრემლიანი შემოგვტირის: მე შეურაცხვეყი კანონი, შევლახე წესრიგიანობა. მე ვოცნებობდი, ქვეყნის ბოროტებით გამესწორებია, კანონები უკანონობით დამეცვა. ახლა მესმის, რომ ორი ჩემისთანა ადამიანი მთლად დაამხობს ზნეობრიობის სამფლობე-

ლოს. მხოლოდ შენ შეგფერის, ღმერთო, შურისძიება, ადამიანის ხელა შენთვის საჭირო არ არისო.—ათავებს მორი, მთელ თავის ოცნებასა და მოქმედებას ბავშვურ თავქარიანობას უწოდებს და თვითონვე გარბის პოლიციასთან, რომ გამოისყიდოს დანაშაული კანონისა და საზოგადოებრივი წესრიგიანობის წინაშე. ძროხამ იწველა, იწველა, ბოლოს ჰკრა წიხლი და დააქციაო, — სწორედ ზედგამოჭრით შეეფერება ეს ანდაზა შილერის გმირს. ის გამოვიდა საზოგადოებრივ ასპარეზზე, არსებული საზოგადოებრივი წყობილება, ურთიერთობა, კანონმდებლობა და სხვ. პიროვნების განვითარების მტრად აღიარა, დაიწყო ბრძოლა ახალი წყობილების დასამყარებლად და დაამთავრა იმით, რომ თვითონვე ქედი მოიდრია არსებული წყობილებისა და იურიდიული ნორმის წინაშე: მაპატიეთ, ბავშვობა მომივიდა, სისულელე ჩავიდინე, რაც გასასწორებელია ცხოვრებაში, თვითონ ღმერთი გაასწორებს, ადამიანს რა ესაქმებაო! თუკი სიტყვას, თუკი ახალ აზრს რაიმე გავლენა აქვს საზოგადოებაზე, „ავაზაკების“ გავლენას და მნიშვნელობას ძალიან ასუსტებს კარლოს მორის უკანასკნელი და მოულოდნელი რევერანსი.

თავისი ღრამის ეპიგრაფად შილერმა აიღო ჰიპოკრატეს სიტყვები: რასაც წამალი ვერ კურნავს, რკინა კურნავს, რასაც რკინა ვერ კურნავს, ცეცხლი კურნავსო. ამგვარი ეპიგრაფი ცხადად ატყობინებს მკითხველს, თუ რისი თქმა უნდოდა თავისი ღრამით შილერს. საზოგადოება მას მიაჩნდა სნეულად, ამ სნეულს განსაკურნავად ყველაზე უფრო ძლიერი, ყველაზე უფრო რადიკალური წამალი იყო საჭირო; ასეთ წამლად მორი და მასთან ერთად ახალგაზრდა, გატაცებულმა და აღფრთოვანებულმა შილერმა აღიარეს ფიზიკური ძალა და მედგარი, შეუბრალებელი ბრძოლა. ამ ბრძოლამ ვერ დააკმაყოფილა ვერც მორი, ვერც შილერი; მორის სასოწარკვეთილება იმის მაჩვენებელია, რომ თვით შილერმა ვერ გადაჭრა საბოლოოდ ის საკითხი, თუ როგორ და რა გზით შეიძლება დასნეულებული საზოგადოების განკურნება. მიუხედავად იმისა, რომ მორი გაბრაზებული და გაშმაგებული ღვრის სისხლს იმ იმედით, საზოგადოება ბოროტთაგან განიწმინდებაო, სულის სიღრმეში ის გულჩვილი, უბოროტო, გრძნობაჭარბი და კაცთმოყვარე იდეალისტია. სისხლისღვრას შესამჩნევი შედეგიც რომ მოჰყოლოდა, ბოლოს ის მაინც სასოწარკვეთილებას მიეცემოდა, რადგან მას არც სწამს ის კეთილი, რომელიც სისხლით არის ნაყიდი. მაგრამ ჩვენ ვიცით, რომ მორის მიერ სისხლის ღვრას არც პიროვნება გაუნთავისუფლებია, არც საზოგადოება განუწმენდია ბოროტისაგან; ათი და თუნდა ათასი მავნე პირის მოკვლა განა სიკეთესა და სამართლიანობის სასუფეველს მოავლენს ქვეყნად? ამის იმე-

დი ჰქონდა მოორს, როცა ავაზაკთა წინამძღოლობას კისრულობდა და სწორედ აქ არის მისი დიდი შეცდომა. თუ საზოგადოებაში სხვადასხვა ბოროტება, უსამართლობა და ძალმომრეობა ხდებდა, ყოველივე ამას მხოლოდ ერთი სათავე აქვს; ვისაც უნდა ყველა ამ ბოროტების, უსამართლობის, ძალმომრეობისა და სხვ. მოსპობა, უმალ ამ სათავეს უნდა მიაშუროს, ეს სათავე უნდა გადაანგრიოს, მწარე ბალახს რაც უნდა ფოთლები აგლიჯოთ, ამით მას ვერ მოსპობთ: მოგლეჯილის ალაგას ახალი ფოთოლი ამოჰყოფს თავს; მიაჰყვით მას ძირი და ფოთლები თავისთავად გახმებიან. სწორედ ეს დაავიწყდა კარლოს მოორს. თუ XVIII საუკუნეში გერმანიის საზოგადოება დასნეულებული იყო, იქ სხვადასხვა უსამართლობასა და ბოროტებას დაედოთ ბინა, უსამართლო ვეჭილებს. მექრთამე მოხელეების და კულტივინა კარისკაცების მოკვლა არავის და არაფერს განკუთრავდა. კარლოს მოორს უნდა მიეტანა იერიში თვით გერმანიის მონარქიულ მთავრობაზე, რომელიც აკანონებდა მრავალგვარ საზოგადოებრივ უსამართლობასა და ძალმომრეობას, — მხოლოდ მაშინ მოიტანდა მოორის ბრძოლა ნაყოფს, მხოლოდ მაშინ დაემხობოდა არსებული წყობილება, მხოლოდ მაშინ გაიმარჯვებდა სამართალი. კიდევ რომ ჰქონოდა მოორს შეგნებული, თუ სად იყო უმალ იერიშის მიტანა საჭირო, ის მაინც ვერაფერს გახდებოდა; ვერ გახდებოდა იმიტომ, რომ მიუძღოდა ერთ მუჟა ავაზაკებს, რომლებსაც არც კი ჰქონდათ შეგნებული თავისი წინამძღოლის მიზანი და მისწრაფება; მას თვით ხალხი უნდა გამოეყვანა მეზრძოლად, უნდა აეხსნა მისთვის, რომ საზოგადოებრივი უსამართლობა, ძალმომრეობა და ბოროტება მხოლოდ მას აწვა მძიმე ტვირთად. მხოლოდ ამგვარ შემთხვევაში შექმნიდა ის უკეთეს საზოგადოებრივ წყობილებას და, თუ სასოწარკვეთილებას მიეცემოდა, გულს იმით მაინც ინუგეშებდა: მიზანს ხომ მივაღწიეო.

კარლოს მოორის იდეალურ მისწრაფებას შილერმა გვერდში დაუყენა ფრანც მოორის ეგოისტური, მატერიალური მისწრაფებანი, რომ ამით მკითხველს უკეთ დაენახა პირველის მიმზიდველი სიმშვენიერე და მეორის საზიზღარი სისაძაგლე. მიუხედავად იმისა, რომ ფრანცი ჩინებული ნიჭისა და ძლიერი ლოგიკის პატრონია, ის საზიზღარია მთელი თავისი არსებით, საზიზღარია თავისი სურვილებით. ფრანცში შილერმა დაგმო ყველა, ვინც კი მხოლოდ დედამიწას დასჩურება და ვარსკვლავებისაკენ არასოდეს იყურება, ვინც აწმყოთკმაყოფილია და უკეთეს მომავალს არ შეტრფის, ვისაც არავითარი წმინდათაწმინდა არ გააჩნია, თავისი კუჭის გარდა. თავისი პირველი დრამით შილერმა გამოუტახა საზოგადოებას: ის, ვინც საზოგადოე-

ზას არ ემსახურება, ის, ვისაც პირად ინტერესზე უფრო საზოგადო ინტერესი არ ახსოვს, ის, ვინც უკეთესი წყობილების მოახლოებასა და პიროვნების ამაღლებას არ ემსახურება, ადამიანი არ არისო.

„ავაზაკები“ საუცხოო დამამტკიცებელია იმისა, რომ შილერის ბუნება ორად იყო გაყოფილი: რამდენადაც ის რევოლუციონერი იყო აზრში, ცნებაში, იმდენადვე სრული კონსერვატორია პრაქტიკაში. მას უნდოდა საზოგადოების განკურნება, პიროვნების გათავისუფლება და ამაღლება და ამავე დროს სურდა, რომ კანონი და წესრიგინობა არ დარღვეულიყო. ამგვარად, თუ შილერი შეუდარებელია ოცნებაში, პრაქტიკულ ცხოვრებაში ის ბურჟუაზიულ მორალს ვერ ასცილდა. ამით აიხსნება მხოლოდ, თუ რად გმობდა ეს დიდებული პოეტი თავისი დროის დიდებულ მოვლენას — საფრანგეთის რევოლუციას.

ხელოვნების ასპარეზზე შილერი მებრძოლად გამოვიდა. თუ თავისი მოღვაწეობის უკანასკნელ დროს, როდესაც პოეტმა ვაიმარში დაისადგურა და გოეთესთან ერთად ხელოვნების წმინდა ფორმების კვლევასა და შემუშავებას შეუდგა, შილერმა დაკარგა ძველებური აღტაცება, ენთუზიაზმი, სულის ძლიერი, დაუწყნარებელი კვეთება, და დლიურმა ვარამმა, სოციალურმა კითხვებმა მის თვალში ძველებური ინტერესი დაკარგეს. — ამ დროსაც კი პოეტის ოცნებას ხანდახან ფრთას წამოკრავდა ხოლმე ყმაწვილობის ენთუზიაზმი და გააღვიძებდა საზოგადოებრივი საკითხების სიყვარულს. ახალგაზრდა შილერის მთელი აზროვნება კი, მთელი მოფიქრება საზოგადოებრივი ცხოვრების გარშემო ტრიალებდა. ხელოვნებაში ის არ ხედავდა დამოუკიდებელ მიზანს, მას არ სწამდა ხელოვნება ხელოვნებისათვის, — ხელოვნებაში ის ხედავდა მხოლოდ საშუალებას ცხოვრების გასაუმჯობესებლად და ამ საშუალებას მტკიცედ და ერთგულად ჩასჰიდა ხელი. არსებული წყობილება, როგორც საზოგადოებრივი, ისე პოლიტიკური, პოეტს სრულებით არ აკმაყოფილებდა; ყოველ წყობილებას ის ზომავდა პიროვნების ბედნიერების საზომით; რაც შეიძლება უმეტესი ბედნიერება უმრავლესობისათვის — აი რას ითხოვდა შილერი ცხოვრებისაგან. ის მედგრად მიისწრაფვოდა წინ, უკეთესი ცხოვრებისაკენ, რომელშიაც გამეფებული უნდა ყოფილიყო სრული თავისუფლება, დამოუკიდებლობა და თანასწორობა. ჩვენ დავინახეთ, რომ პირველ ხანებში ახალგაზრდა პოეტის მისწრაფება იმდენად შეგნებული, ხანგრძლივი მოფიქრებისა და აწონ-დაწონვის წაყოფი არ იყო, რამდენადაც სტიქიური: კარლოს მოორი იბრძვის, მას უნდა ცხოვრების გაუმჯობესება, ზნეობის ამაღლება, პიროვნების გათავისუფლება და გაბედნიერება, ნაგრამ მას არა აქვს გამორკვეუ-



ლი, ერთი მხრით, ამ სანატრელი ცხოვრების არსებითი თვისებანი, მეორე მხრით, ის გზა, ის საშუალება, რომელსაც ადამიანი მიჰყავს ამ უკეთესი ცხოვრებისაკენ. შემდეგში შილერი თანდათან გარკვეულ გზას დაადგა. იმის ორ პიესაში: „ფიესკო“ და „დონ-კარლოსი“ — ნათლად არის გარკვეული როგორც პოეტის პოლიტიკური იდეალი, ისე საზოგადოებრივიც.

„ფიესკო“ შინაარსი შემდეგია: გენუას მართავს მოხუცებული დორია, რომლის მემკვიდრედაც ითვლება მისი ძმისწული — ჯანეტიწო დორია. თუმცა მოხუცებულ დორიას უმრავლესობა პატივსაცემს, მაგრამ ჯანეტიწო არის გარყვნილი და უზნეო ახალგაზრდა; სხვისი დამცირება, სხვისი პიროვნების შელახვა მისი ერთადერთი ხელობაა; საკუთარი ბედნიერებისა და პირუტყვეული სიამოვნების მეტს ის ცხოვრებაში არაფერს ეძებს; ადამიანი მის თვალში მხოლოდ უბრალო საშუალებაა საკუთარი ბედნიერების განსახორციელებლად და საკუთარი მღაბალი ნეტარების მოსაპოვებლად; ის წარბშეუხრელად არღვევს ოჯახის სიწმინდეს, ქალწულის უმანკოებას, — მისთვის არ არსებობს არც პატიოსნება, არც ზნეობა, არც სინიღისი, არც სირცხვილი — არსებობს ერთადერთი საკუთარი ბედნიერება, რომელსაც ის მხოლოდ პირუტყვეულ სიამოვნებაში ხედავს; მთავრობას ის დიდი ნეტარებით შეჰხარის, იმიტომ კი არა, რომ მას ხალხისათვის შესტკიოდეს გული, მისთვის ზრუნვა, მისი ცხოვრების გაუმჯობესება წადდეს, არა — მისი სიხარულის სარჩული სულ სხვაა: როგორც მთავარს, მას ყველაზე მეტი უფლება ექნება სამთავროში, თითქმის თვითმპყრობელი გახდება და ამით უფრო გზა გაეხსნება ყოველგვარ სისაძაგლეს, რომელსაც კი მისი გარყვნილი ბუნება და გემოვნება მოითხოვს. ამიტომაც გენუის საზოგადოების საუკეთესო ნაწილს უნდა თავიდან მოიშოროს დორიები, მათი მმართველობა და ამხოს და გენუის დამოუკიდებლობა — რესპუბლიკური მთავრობა გამოაცხადოს. გენუის საზოგადოების ამ ნაწილის სული და გული არის ახალგაზრდა ფიესკო. ფიესკო ყველაფრით დაუჯილდოებია ბუნებას: ის არის მეტად ლამაზი, ნიჭიერი, გულადი, პირდაპირი, მდიდარი და გავლენიანი პირი გენუაში; მას ყველა პატივსაცემს, ყველა უჭერებს, ხალხს ის უყვარს. გენუის განმათავისუფლებლებს ყველაზე მეტი იმედი ფიესკოსი აქვთ; ფიესკოს უნდა გენუის გათავისუფლება, დარწმუნებულია, რომ მხოლოდ მას შეუძლია დორიების მმართველობის დამხობა. მაგრამ ფიესკო დაახლოებულია სასახლესთან, მას კარგად იცნობს როგორც მოხუცი დორია, ისე ჯანეტიწო, რის გამო ადვილად შეიძლება განზრახვა შეუტყონ. სხვების თვალის ასახვე-

ვად ფიესკო მიმართავს შემდეგ ხერხს: ის მიყოფს ხელს ქეიფს, ლო-  
თობას და არწიყობას, პოლიტიკას სხვების შესახედავად სრულებით  
ანებებს თავს, ქალების მეტი მას თითქო აღარაფერი აინტერესებს  
ქვეყნად; ფარულად კი ის აღელვებს ხალხს, ჰკრებს თავის მომხრე-  
ებს, იწვევს უცხო ქვეყნიებიდან ჯარს, ზომალდებს და სხვ. მტრებს —  
დორიების მომხრეებს — ფიესკოსი აღარ ეშინიათ, რესპუბლიკის მო-  
მხრეები კი ფიესკოს გლოვობენ. აჰა, უკვე დადგა ისეთი მომენტი,  
როდესაც ხალხის აღელვებამ უმწვერვალეს მიზანს მიაღწია; საკმაოა  
გაჩნდეს მარჯვე მეთაური, რომ ხალხი აჯანყდეს. ფიესკო უცებ მო-  
უყრის თავს მეგობრებს, შეატყობინებს მათ საქმის ნამდვილ გარე-  
შობას, წაუძღვება წინ მემამოხეებს და დაესხმის თავს დორიებს;  
ჯანეტინოს კლავენ, მოხუცი დორია კი ქალაქიდან იპარება და ამით  
გადაურჩება სიკვდილს. მაგრამ გენლის გამათავისუფლებელი ფიეს-  
კო თავისი საუკეთესო მეგობრის ხელით კვდება. რა არის ამის მიზე-  
ზი? ერთი მემამოხეთაგანი — ვერინა რწმუნდება, რომ ფიესკოს  
თვითონ უნდა გენუის მთავრობა; ის ხედავს, რომ ხალხი ფიესკოს  
მხარეზეა; მან კარგად იცის, რომ ფიესკო მეტისმეტად ამაყი და თავ-  
მოყვარეა; მთავრობა მას კიდევ უფრო გაამდიდურებს და ამგვარად  
ამბოხებასა და სისხლისღვრას გენუის გათავისუფლება და რესპუბ-  
ლიკა კი არ მოყვება შედეგად, არამედ მტარვალ დორიას ალაგზე  
უარესი მტარვალის ფიესკოს წამოსკუპება. ვერინა ამჯობინებს საყ-  
ვარელი მეგობრის მოკვლას, და გენუის გათავისუფლების შემდეგ  
ფიესკოს ზღვაში გადაუძახებს.

მთელ პიესაში ვერინა მეტად საყურადღებო პირს წარმოადგენს.  
მას წვერი უკვე გაჭაღარავებული აქვს: ბევრი ბრძოლა, ბევრი სის-  
ხლისღვრა გაუვლია და ბევრი მთავარი უნახავს, ბევრგვარ მმართ-  
ველობას მოსწრებია და სიბერის ეჟამს სამი მცნება გამოუტანია ცხო-  
ვრების დაკვირვებიდან: 1. თავისუფლება აუცილებელი პირობაა,  
ურომლისოდაც როგორც კერძო პიროვნების. ისე მთელი ერის ბედ-  
ნიერება ყოვლად შეუძლებელია; 2. ყოველი მთავარი, ყოველი მეფე,  
რაც უნდა მრავალი ღირსებით იყოს შემკული, ყოველგვარი მმარ-  
თველობა, რომელიც ერთი პირის ხელშია შეგროვილი, ხალხის თა-  
ვისუფლების მტერია და ამით მტერია ხალხის ბედნიერების; აქედან  
თავისთავად ცხადია ისიც, რომ თუ ხალხს უნდა ბედნიერი იყოს, მან  
თვითონ უნდა იკისროს თვისი თავის მეფობა. ვერინას აზრით, პი-  
როვნება, საზოგადოება და ერი უნდა იყვნენ სრულიად თავისუფალ-  
ნი. თუ რას ნიშნავს, რაში უნდა იხატებოდეს პიროვნების თავისუფ-  
ლება, ამის შესახებ ვერინა არაფერს გვეუბნება; ეს კითხვა ნათლად  
აქვს გარკვეული შილერის მეორე პირს, მარკიზ პოზას „ღონ-კარ-

ლოსში“. ერის თავისუფლება, ვერინას აზრით, უნდა იხატებოდეს რესპუბლიკაში, საზოგადოებრივი თავისუფლება კი იმგვარ პოლიტიკურ წყობილებაში, სადაც ყოველგვარი უფლება, მთელი მართვა-გამგეობა უმრავლესობის, და არა უმცირესობის ხელშია.

ვერინას აზრით, ერთ პირს მართვა-გამგეობა არასოდეს უნდა ანდოს საზოგადოებამ, რადვანაც ყოველ პირს, რა მდგარი დამცველიც უნდა იყოს ის საზოგადოებრივი ინტერესებისა, უფლებანი და უპირატესობანი რყენის. რა საბუთი აქვს ვერინას, რომ ასე ფიქრობს? საუცხოო საბუთი მისთვის ფიესკოს მთელი ფსიქოლოგიაა. როდესაც ფიესკო მამულის ო თავისუფლებისათვის ფიქრსა და ზრუნვას შეუდგა, თავისი თავი / რულებით არ ახსოვდა, მისი ოცნება — თავისუფალი გენუა იყო. „გენუა, შენ იყავ თავისუფალი და მე კი შენი საუკეთესო მოქალაქე ვიქნები“, — ამბობდა ფიესკო გულში. ფიესკო არაჩვეულებრივი ღირსებით იყო ბუნებისაგან დასაჩუქრებული, მაგრამ ამ იშვიათმა პირმაც ვერ შეიკავა თავი აღნიშნულ ზნობრივ სიმადლეზე: რაც უფრო აღსრულებაში მიდიოდა მისი ოცნება, მით უფრო იზრდებოდა ფიესკოს საკუთარი „მე“, მით უფრო მეტ ალაგს იჭერდა მის სულში საკუთარ ბედნიერებაზე ფიქრი და ზრუნვა, და როდესაც მამულის გათავისუფლებაში მას აღარავითარი ეჭვი არა ჰქონდა, მან თავისი თავი გენუის ჰერცოგად გამოაცხადა. ამგვარად, ფიესკომ დაიწყო მამულის გათავისუფლებით და დააბოლოვა მამულის დამონებით! განა ეს უნდოდა ფიესკოს, განა ამას ოცნებობდა, ამას შეტრფოდა? არა და არა! ფიესკო გულწრფელი იყო, როდესაც ამბობდა: გენუა, მხოლოდ შენ იყავ თავისუფალი და მე კი შენი საუკეთესო მოქალაქე ვიქნებიო; მას არ ახსოვდა თავისი თავი, მას გულწრფელად უნდოდა მამულის გათავისუფლება ყოველგვარი ბატონისაგან, მაგრამ ფიესკომ რა ქნას, თუ რომ

გული კრულია კაცისა,  
ხარბი და გაუძლომელი!

ფიესკო რა შუაშია, თუ რომ ეს ოხერი ბატონობა ყოველ ადამიანს თავისკენ იზიდავს!

ჩაუგდეთ ფიესკოს ხელში ბატონობა, დასვით ის გენუის მთავრად: რას იზამს ის ამგვარ შემთხვევაში? ამის პასუხს მისი უკანასკნელი ნაბიჯი გვაძლევს. როდესაც მას საშუალება მიეცა მთავრად გამხდარიყო, დიდი ბრძოლა არ დასჭირვებია საკუთარ თავთან: მყისვე უარყო სისხლით მოპოვებული თავისუფლება თავის სასარგებლოდ; როდესაც ის უკვე მთავარი იქნებოდა და სრული მბრძანებელი — თვითმპყრობელი, ეჭვს გარეშეა, თავისი ადგილის შესანარჩუნებლად და გასაძლიერებლად დევნას დაუწყებდა თავისუფლების ყოველგვარ

გამომქლავნებას, ყოველ ნიშანწყალს თავის სახელმწიფოში; ამის შესედევარე ვერინას არ შეუძლია არ თქვას, ყოველი მეფე, რა დიდი ღირსების პატრონიც უნდა იყოს ის, მტერია თავისუფლებისაო. მეფე და საზოგადოებრივი თავისუფლება, ვერინას თვალში, ერთად წარმოუდგენელია; იდეა მეფისა უარყოფაა თავისუფლების იდეისა და თავისუფლება მხოლოდ იქ არის, სადაც თვით ხალხია თავისი თავის მეფე. ამიტომ თუ ვერინა უყოყმანოდ კლავს თავის ძვირფას მეგობარს, მას ვერავინ გაამტყუნებს, რადგანაც მისი მოქმედება პატიოსანია: პოლიტიკური და საზოგადოებრივი თავისუფლება მას მიაჩნია უმთავრეს პირობად, რომლის გარეშეც არავითარი ბედნიერება არა სწამს; თავისუფლების მოპოვება და შერჩენა უცილოდ ითხოვს მეგობრის სიკვდილს; ან მეგობარი, ან თავისუფლება — სხვა გზა ვერინას არ ღარჩენია და თუ მთელი ერის ბედნიერებას ის მალლა აყენებს კერძო პირის ბედნიერებაზე, ეს მხოლოდ მისი ბუნების პატიოსნებას და მისი რწმენის სიღიადეს მოწმობს.

ამგვარსავე პოლიტიკურ სარჩულზე არის აგებული შილერის მეორე პიესა — „დონ-კარლოსი“. ესპანეთის მეფეს ფილიპე II-ს ჰყავს შვილი დონ-კარლოსი, რომელიც მემკვიდრეა სამეფო ტახტისა. ის სწავლობდა და იზრდებოდა მარკიზ პოზასთან ერთად; სწავლის დამთავრების შემდეგ მეგობრები ერთმანეთს დაშორდნენ; დონ-კარლოსი სასახლეში დაბრუნდა. პოზამ კი ევროპაში მოგზაურობა განიზრახა. პოზა იდეალებით ცხოვრობს, მისი მიზანია ადამიანთა ბედნიერება; მას უნდა შექმნას ისეთი სახელმწიფო, სადაც მისი იდეალები სრულ განხორციელებას ჰპოვებენ და ამ მიზნით ცდილობს ფლანდრიის გათავისუფლებას ესპანეთის ქვეშევრდომობისაგან. ფლანდრიის გათავისუფლება მას უნდა დონ-კარლოსის დახმარებით. ამგვარი დახმარება პოზასათვის ორმხრივ არის საჭირო: ფლანდრიის მცხოვრებთ დონ-კარლოსი განსაკუთრებით უყვარს; მხოლოდ დონ-კარლოსს შეუძლია ისინი აამხედროს მეფის წინააღმდეგ; გარდა ამისა, დონ-კარლოსი ესპანეთის ტახტის მემკვიდრეა და ამავე დროს პოზას მეგობარი, მისი იდეების თანამგრძობი; მაშასადამე, ფლანდრიაში დონ-კარლოსი იქნება მხოლოდ პოზას აზრების განმახორციელებელი. ფილიპეს სიკვდილის შემდეგ ის იქნება უდიდესი სახელმწიფოს მპყრობელი და მაშინ პოზას იდეალებს, მის რწმენას ფართო ასპარეზი დაეთმობა. როდესაც მოგზაურობის შემდეგ პოზა სასახლეში ბრუნდება, შემდეგ სურათს ხედავს: დონ-კარლოსს უყვარს თავისი ახალგაზრდა დედინაცვალი, კარისკაცებს ხელთა აქვთ ამის უტყუარი საბუთები, მეფეს უკვე ეჭვი აქვს აღებული. მეფე სასტიკია, კარისკაცებს კი დონ-კარლოსის დაღუპვა უნდათ, რადგან ის, მა-

თი სიტყვით „თავისუფლებას ეტრფის და ტანტისათვის არ ვარგა“. დღეს თუ ხვალ მეფე ყველაფერს შეიტყობს და, ამგვარად, დონ-კარლოსს დაღუპვის მეტი არაფერი მოელის. პოზამ როგორმე უნდა გადაარჩინოს თავისი ძვირფასი მეგობარი. სწვდასხვა მოხერხების წყალობით მან მეფეს ხელში ჩაუგდო საბუთები, ვითომ მას უყვარდა დედოფალი და არა დონ-კარლოსს, მაგრამ პოზა თვითონვე გაება თავის მიერ გაბმულ ქსელში; მეფემ ის თავისი ხელით მოჰკლა. ბოლო დროს პოზა თვითონვე კარგად ხედავდა, რაც მოელოდა, მაგრამ მეგობრის გადასარჩენად სხვა გზა აღარ იყო. მეგობრის სიკვდილით გამწარებული დონ-კარლოსი ატყობინებს მეფეს საქმის ნამდვილ გარემოებას; ფილიპე II დედოფალს კლავს და შვილს კი ინკვიზიციას გადასცემს. საწამებლად. ამით თავდება პიესა.

როგორც ერთ წერილში დავინახეთ, შილერი დიდი თავყვანის-მცემელი იყო მეგობრობისა და სიყვარულის. ორივე ამ დიად გრძნობას ის უსულო საგანთა შორისაც კი ხედავდა: მეგობრობა და სიყვარული მას ძირითად ელემენტებად მიაჩნდა. „დონ კარლოსში“ პოეტმა წარმოგვიდგინა საუცხოო მაგალითი მეგობრისათვის თავგანწირვისა. პოზა მსხვერპლად წირავს თავს დონ-კარლოსს. თუმცა მეგობრობას შილერი ფრიად მაღლა აყენებდა და მეგობრისათვის თავისდადებას ყოველი ადამიანისაგან ითხოვდა, მაგრამ სანქცევნო, საზოგადო ინტერესს მეგობრობაზე გაცილებით მაღლა აყენებდა. ჩვენი თავი მეგობარს უნდა შევწიროთ, ხოლო მეგობარი საზოგადოებას — აი შილერის ღრმა ჩწმენა; რესპუბლიკის მოტრფიალე ვერინა უყოყმანოდ შესწირავს თავის სიცოცხლეს მეგობარს, ხოლო უყოყმანოდვე მოუსპობს სიცოცხლეს იმ მეგობარს, რომლისაგანაც ერის თავისუფლებას და მასთან საზოგადოებრივ ბედნიერებას საფრთხე მოელის. პოზა ის ბრწყინვალე პირია, რომელშიაც შილერმა სრულად და გარკვევით ჩამოასხა თავისი პოლიტიკური მოძღვრება. დონ-კარლოსი და პოზა ერთიმეორის დამატებაა, ორივე ერთად იგივე შილერია: პირველი შილერის ნერვები, შილერის ტემპერამენტი, ხოლო მეორე — შილერის სული, შილერის აზროვნება. პოზას სიტყვით დონ-კარლოსის გულში მთელი სამყარო მოთავსდება; ის არის გატაცებული, მოძრავი, დაუდგრომელი ახალგაზრდა. მზად არის მთელი სამყარო ბრძოლაში გამოიწვიოს, მაგრამ მას კარგად არ აქვს გარკვეული და შეგნებული, თუ რას უნდა მოახმაროს თავისი ძალ-ღონე, ცხოვრებაში რა გზას უნდა დაადგეს. ის ითხოვს სრულ თავისუფლებას პიროვნებისათვის, მას კანონიერად მიაჩნია პიროვნების ყოველგვარი სურვილი, პიროვნების ბედნიერება მას ყველაზე უფრო სწამს და ამით ბევრში წააგავს კარლოსს მოროს: ისიც მა-

სავით ნაზი და აღზნებული ნერვების პატრონია, მასავით გულჩვილი და დაუდგრომელი, მასავით დაუდღუღებელი და, საბოლოოდ, მყარ რწმენას მოკლებული. სულ სხვაა პოზა. „ჩვენი დრო არ მომწიფებულა ჩემი იდეალებისათვის, მე მომავალ საუკუნეთა მოქალაქე ვარ“, — თამამად უცხადებს ის მეფეს, როგორია მისი იდეალები? მისი იდეალების შესაგნებლად საჭიროა იმის გათვალისწინება, თუ როგორ უყურებს პოზა პიროვნებას, საზოგადოებას და მეფეს. პოზა უარყოფს ყოველგვარ მოვალეობას პიროვნებისათვის; მის თვალში არავითარი მოვალეობა არ არსებობს, მოვალეობის მაგიერ მას სწამს მხოლოდ თავისუფალი შრომა. შრომა, პოზას აზრით, ადამიანის დანიშნულებაა, მხოლოდ შრომა აძლევს ადამიანს ცხოვრების შინაარსს, მაგრამ შრომა თავისუფალი, ნებაყოფლობითი; ძალდაუტანებელი შრომის თავისუფლებაში აუცილებლად იგულისხმება ადამიანის სრული თავისუფლება, და მართლაც, პოზას აზრით, ადამიანი თავისუფალი ქმნილებაა. მის გონებაში ორი მცნება — ადამიანი და თავისუფლება სინონიმები არიან, ერთი უმეოროდ ვერ წარმოუდგენია. სინიდიის, სიტყვის და აზრის თავისუფლება ყოველი ადამიანის ბუნებრივი უფლებაა; ამ უფლების შეზღუდვა დამახინჯებაა ბუნების; ბუნების დამახინჯება კი ყოვლად შეუძლებელია; პოზას აზრით, თუ ბუნების დამახინჯება შეუძლებელია, თავისუფლება კი ბუნებრივი უფლებაა ყოველი ადამიანის, მაშ ამ უფლების წართმევა, თავისუფლების მოსპობაც შეუძლებელი ყოფილა! პოზას საღ ოპტიმიზმსა და ღრმა რწმენას კაცობრიობის პროგრესისას სარჩულად ის უდევს, რომ თავისუფლების სამუდამოდ მოსპობა მას არათუ შეუძლებლად, — სრულ აბსურდად მიაჩნია. „როგორ, თქვენ გაბედავთ შეაჩეროთ ქვეყნიერების გადახალისება, შეაყენოთ საზოგადო განაფხული. რომელიც მთელ ქვეყნიერებას განაახლებს?.. თქვენ ვერაფერს მიაღწევთ!.. ტყუილად ებრძოდით ბუნებას“, — თამამად ეუბნება ის მეფეს. პოზას რწმენით, შეიძლება თავისუფლების შეზღუდვა, დროებით შეჩერება ისე, როგორც ფილიპე მეორემ შეაჩერა, მაგრამ მისი სამუდამოდ მოსპობა მოკვდავს არ შეუძლია: ერთხელაც იქნება ხალხი გამოიღვიძებს, მოითხოვს თავის უფლებებს და მაშინ ვერავითარი ფილიპე მეორე ვერ გაუმაგრდება მას, ვერავითარი მეფე ვერ წაართმევს ხალხს იმას, რაც თვით ბუნებამ მისცა. ყოველი ადამიანის მოქმედებისა და მისწრაფების მიზანი, მეფე იქნება ის თუ ჩვეულებრივი მოკვდავი. პოზას აზრით, ადამიანი უნდა იყოს. ყოველი ადამიანი უნდა ემსახურებოდეს ადამიანის ბედნიერებას და რადგანაც ბედნიერება გარეშე თავისუფლებისა არც პოზას სწამს ვერინასავით, ამიტომ ყოველი ადამიანი უნდა ეძებდეს და იცავდეს

უწინარეს ყოვლისა თავისუფლებას. ეროვნული საზღვრები პოზას-  
თვის არ წერია, მას მთელი ქვეყნიერება მიაჩნია თავის სამშობლოდ,  
მთელი კაცობრიობა თავის ერად. „მე კაცობრიობა მიყვარს“, —  
უცხადებს ის მეფეს.

რადგანაც პიროვნების სრული თავისუფლება შესაძლებელია  
მხოლოდ თავისუფალ საზოგადოებაში, ამიტომ პოზა საზოგადოები-  
სათვისაც ითხოვს იმას. რასაც ის პიროვნებისათვის ითხოვდა. სა-  
ზოგადოებრივ ცხოვრებას სარჩულად უნდა ედევას სრული თანა-  
სწორობა; პოზა უარყოფს ყოველგვარ პრივილეგიებს, ყოველგვარ  
უპირატესობას საზოგადოებაში, ის მტერია წოდებრივი ურთიერ-  
თობის, მტერია ყოველგვარი უფროს-უმცროსობის როგორც ოჯახ-  
ში, ისე საზოგადოებრივ ასპარეზზე. რაში უნდა იხატებოდეს, პო-  
ზას აზრით, საზოგადოების თავისუფლება? სრულ თანასწორობაში  
შრომის, სიტყვის, სინიღისისა და აზროვნების, და ყოველგვარი  
მთავრობის უარყოფაში. გარდა იმ მთავრობისა, რომელსაც მხოლოდ  
ხალხი — უმეტესობა ირჩევს თავისი ნებისა და სურვილისამებრ.  
რა არის საზოგადოების მიზანი? პიროვნების ბედნიერება, — გიპასუ-  
ხებთ პოზა, და, რადგანაც პიროვნება მხოლოდ თავისუფალ საზო-  
გადოებაშია ბედნიერი, ამიტომ პოზა კატეგორიულად უარყოფს  
მეფეს და მონარქიულ წყობილებას. აქ პოზა ბევრში წააგავს ვერი-  
ნას, მაგრამ იქ, საცა ვერინას მხოლოდ ბუნებრივი ინსტინქტი, სტა-  
ქიური ძალა ამოქმედებს, პოზა სრულებით შეგნებულად ფიქრობს  
და მოქმედებს. როგორც ფილოსოფოსი. მეფის ინტერესი და ხალ-  
ხის ინტერესი, პოზას აზრით, ერთიმეორის სრული წინააღმდეგობაა;  
ის, რაც მეფისათვის სასარგებლოა, ხალხისათვის ან პირდაპირ მა-  
ზარალებელია, ან სრულებით უსარგებლო. პოზას კი მხოლოდ  
ხალხის სარგებლობა სწამს და ამიტომ პირდაპირ უცხადებს ფილი-  
პე მეორეს: მე არ შემიძლია მეფის სახური ვიყო. ამით რა უნ-  
დოდა მას ეთქვა? ის იმას კი არ ეუბნება მეფეს: შენ — ფილიპე  
მეორეს ვერ გემსახურებო. არა — ფილიპე რომ ბუნებით კეთილი  
და პატიოსანია, პოზას ამაში ეჭვიც არა აქვს: ის აცხადებს: მე  
საზოგადოდ მეფის სამსახური არ მინდაო, და ამით აშკარად გვატ-  
ყობინებს, რომ მას ყოველი მეფე ეზიზღება, როგორც ხალხის  
ინტერესების მტერი. თუ ყოველი მეფე მხოლოდ ეგოისტია, მხო-  
ლოდ თავის თავზე ფიქრობს და იმ უფლებებს. რომლებიც მას აქვს  
მინიჭებული, მხოლოდ თავის სასარგებლოდ და ხალხის საზარა-  
ლოდ იყენებს, ადამიანი კი მხოლოდ საზოგადო ინტერესს უნდა  
იყვადოს, აქედან თავისთავად ცხადია ისიც, რომ ვისაც უნდა ხალხს  
ემსახუროს, მან მეფის სამსახურს თავი უნდა დაანებოს. რატომ?

აი რატომ: თავის მოხელეთაგან მეფე თავისუფალ მოქმედებას კი არ ითხოვს, არამედ მხოლოდ იმის აღსრულებას. რაც მას განუზრახავს, რაც მას ენებება; მეფეს კი მხოლოდ ის ნებავს, რაც მისთვის სასარგებლოა; თავისუფლება როგორც სიტყვის, ისე სინიდიისა და აზროვნების, მეფისათვის დამლუჯველია და ამიტომ ის სასტიკად დევნის მას; ყოველი მისი სურვილი იქითკენ არის მიმართული, რომ ხალხი რაც შეიძლება დააბეჩაოს, დაიმონოს, თავისუფლების წყურვილი, დამოუკიდებელი მოქმედების უნარი აღმოუფხვრას; ამიტომ ყოველი ადამიანი, რომელიც კი მეფეს ემსახურება, ხალხის მტერია; მეფესთან ერთად ის ხალხის პროგრესს, ხალხის თავისუფლებასა და ბედნიერებას ებრძვის. თუკი მეფის ინტერესი და ხალხის საარგებლობა ერთიმეორეს ეწინააღმდეგება, აქედან თავისთავად ცხადია, რომ ხალხისათვის მეფე არათუ საჭირო არ არის, მხოლოდ მავნებელია და ამიტომ როგორც ხალხი, ისე ხალხის მოკეთე იმას უნდა ცდილობდნენ, რომ მეფე მოიშორონ. პოზას სწამს მხოლოდ ისეთი პოლიტიკური წყობილება, სადაც არავითარი მეფე არ არის და ყოველგვარი უფლება თვით ხალხის ხელშია. თვით ხალხია თავისი თავის მეფე და პატრონი. მხოლოდ ამგვარ პოლიტიკურ წყობილებაშია ადამიანი ბედნიერი. ამგვარი პოლიტიკური წყობილების განხორციელებას ემსახურება პოზაც და თავის იდეალს სწირავს სიცოცხლეს. ძირს მეფე! გაუმარჯოს შრომია, სიტყვის, აზრისა და სინიდიის თავისუფლებას, გაუმარჯოს ხალხის მეფობას! — აი რა გვაუწყა შილერმა დიადი და ბრწყინვალე პოზას სახით.

არის ისეთი მომენტები, როდესაც პოზას სწამს: მოვა დრო, როდესაც ხალხის ბედნიერება და ტანტი ერთიმეორის წინააღმდეგაა აღარ იქნებიანო. მაგრამ აქ ულოგიკობა ან თავისი თავის წინააღმდეგობა კი არ არის — მომავლის მეფე, მომავალი დროის მთავრობა პოზას სრულიად სხვანაირად ესმის: ის დარწმუნებულია, რომ მომავალში მეფედ ერთი ადამიანი კი არ იქნება, თვით ხალხი იქნება თავისი თავის მმართველი და პატრონი; მაშინ, რასაკვირველია, ხალხის ბედნიერებას აღარავითარი მტერი აღარ ეყოლება მეფისა სახით.

აგერ ასი წელიწადი გადის მას შემდეგ, რაც შილერმა შექმნა პოზას უკვდავი სახე. მაგრამ პოზას აზრები დღესაც სრულ და მასთან დღესავით ცხად ჰეგელისადაა წარმოადგენენ. მართლაც და ვისთვის არ უნდა იყოს ცხადზედ უცხადესი. რომ ხალხი მხოლოდ მაშინ მოიპოვებს ქვეყნად შესაძლებელ ბედნიერებას, როდესაც ის მოიხვეჭს სრულ თავისუფლებას, უარყოფს ყოველგვარ მთავრობას



და თვითონ გახდება თავისი მეფეც და თავისი პატრონიც. შილერის აზრებში არც ისეთი რამ ურევია, რომ მთელ საუკუნეს არ შეძლებოდეს მისი განხორციელება, მაგრამ მიიხედე გარშემო. მკითხველო, და მერე შენს თავს დაეკითხე: სიცრუეა ყოველივე, რაც შილერმა გვაუწყა პოზას სახით. თუ სრული ჭეშმარიტება? თუ სიცრუეა, რად ხიბლავს ის ამდენად შებოროკილ ადამიანს, რად იზიდავს თავისკენ ადამიანის სულსა და გულს, რად ბრწყინავს ასე სპეტაკად?!. თუ ჭეშმარიტებაა, რად მიუცია ყველას ძილისათვის თავი, რატომ არ შეიგნებენ ამ ჭეშმარიტებას და სხვასაც არ შეაგნებინებენ? რატომ, რატომ?! ერთ ადამიანს თუ შეუძლია ხალხის დამონება, ნუთუ მთელ ხალხს არ ძალუძს ერთი მტარვალის ძლევა? დრო მოვა, ხალხი გამოიღვიძებს და მოითხოვს თავის წმინდა უფლებებს, ეუბნებოდა პოზა ფილიპე II-ს, ეუბნებოდა შილერი გერმანიის მთავრობას. დრო დიდი ხანია მოვიდა. მაშ რატომ არ ვიღვიძებთ, რატომ არ ვითხოვთ ჩვენს წმინდა, ადამიანურ უფლებებს? რატომ, რატომ?!

ბუნებრივი მდგომარეობა დაუსრულებელი ბრძოლა და სისხლისღვრაა, რადგანაც ადამიანი ადამიანისათვის მხოლოდ მგელიაო, — ქადაგებს პოზისი. არა, ბუნებრივი მდგომარეობა სიმშვიდისა და მყუდროების ხანაა, რადგანაც ადამიანი ბუნებით კეთილი ქმნილებაა — მას მხოლოდ საზოგადოებრივი ცხოვრება რყენისო, — ამტკიცებს რუსო. ეკვს გარეშეა, საზოგადოებრივი ცხოვრების პირობებს ხშირად წაუხდენია ადამიანი. მაგრამ ისიც ცხადია, რომ იმ ხანში, რომელსაც კი შეიძლება ბუნებრივი მდგომარეობა ვუწოდოთ, კაცთა შორის არ ყოფილა არც სიმშვიდე, არც მყუდროება, რადგანაც ადამიანი თუ ახლა: მოკლებული გულკეთილობას, მაშინ უფრო ღარიბი იყო ხასიათის ამგვარი თვისებით. მეცნიერებამ არ იცის ის მხეცი არსება, რომლისგანაც დღევანდელი ადამიანი თანდათანობით განვითარდა, ხოლო დღეს მხოლოდ ბრყვმა და უმეცარმა არ იცის, რომ ადამიანი უძველეს დროს მოკლებული იყო როგორც ენას, ისე დღევანდელ გარეგანს სახესა და სულიერ თვისებებს და როგორც თავისი ბუნებით, ისე ორგანიზაციით და ცხოვრებით სრულ მხეცს წარმოადგენდა. როგორი ურთიერთობა არსებობს ბუნებაში მხეცთა შორის? უმთავრესად ბრძოლა არსებობისათვის. ისინი ეცილებიან ერთმანეთს საზრდოს, ეცილებიან დედალს. ეცილებიან საცხოვრებელ ალაგს და სხვ. არსებობისათვის გამწვავებულმა ბრძოლამ განავითარა მხეცთა ბუნებაში შესაფერი ინსტინქტები, შესაფერი მისწრაფებანი, რომლებსაც ერთად ეწოდება თავისი თავის სიყვარული ანუ ეგოიზმი. როდესაც ადამიანს

მხეცი წინაპარი იმდენად დაწინაურდა. რომ პირველად დაეტყო ადამიანობის ნიშანწყალი. რას შემოიტანდა ის ცხოვრებაში? მხოლოდ განვითარებულ ეგოიზმს. განვლილი ხანა ადამიანის ცხოვრებისა ძალიან ნაკლებად უწყობდა ხელს ამ ეგოიზმის შესუსტებას; პირიქით, ის უფრო აძლიერებდა მას. საზოგადოებრივი ცხოვრება არათუ უწინ, დღესაც იგივე ბრძოლაა არსებობისათვის, ხოლო თუ ხშირად ეს ბრძოლა ბრძოლად არ გვეჩვენება, ამის მიზეზი ორგვარია: პირველი ის, რომ დღევანდელმა საზოგადოებამ დაიწყო მოყვასის სიყვარულის განხორციელება, ე. ი. ალტრუიზმის ქადაგება და მისი პრაქტიკულად გამოყენება; მეორე ის, რომ საზოგადოებრივ ცხოვრებაში ბრძოლა არსებობისათვის იმ სახით არ წარმოებს, როგორც ბუნებაში დანარჩენ ცხოველთა შორის; ბუნებაში არსებობისათვის ბრძოლა წესრიგს მოკლებულია, იქ ყველა იბრძვის ყველას წინააღმდეგ და ყველას. მხოლოდ თავისი თავი ახსოვს; საზოგადოებრივ ცხოვრებაში კი არსებობისათვის ბრძოლამ დიდი ხანია მიიღო ერთგვარი ორგანიზაცია: აქ ადამიანი ადამიანს კი არ ებრძვის, არამედ კლასი კლასს; მაშინ, როდესაც ორი სოციალური კლასი ხშირად ერთიმეორის მოსისხლე მტერია, თითოეული კლასის წევრთა შორის მყუდროება, სოლიდარობა და ერთიმეორის გატანა სუჟევს; თუ ხანდახან მათ შორის ჩამოვარდება ბრძოლა, ისინი მალე ახერხებენ მორიგებასა და შეთანხმებას.

რაც შეეხება ალტრუიზმს, ეს უმთავრესად იმავე ეგოიზმის ნაყოფია და ის მცირე ნაწილი ამ მოვლენისა, რომლის სათავეც წმინდა გულია და პატიოსანი მისწრაფება, ჭერჭერობით ფრიად სუსტ ძალას წარმოადგენს ადამიანის ეგოიზმის წინააღმდეგ. შეხედეთ მას, ამ ეგოიზმს, რამდენ საზიზღროებას ჩადის! რამდენი სისხლი, რამდენი ცრემლი იღვრება მისი წყალობით, რამდენი ადამიანი ხდება მისი მსხვერპლი! ერთ უსაშინელეს შედეგს ადამიანის ეგოიზმისას წარმოადგენს ომიანობა. რა მხრითაც უნდა შეხედოთ მას, რანაირადაც უნდა აწონოთ და გაზომოთ, ის მხოლოდ საზიზღარი იქნება და ვერავითარი საღი გონება მას ვერ გაამართლებს. ვერ ამართლებდა მას შილერიც მთელი თავისი ყმაწვილური სულას ძლიერებით. ის წინააღმდეგი იყო ომისა და სისხლისღვრის. სხვაგვარად ვერც მოიქცეოდა ის ადამიანი, რომლის მთელი ქადაგება ადამიანის სიყვარულზე იყო აგებული. „ვალენშტაინის“ ტრილოგიაში შილერმა დახატა ახალგაზრდა მხედარი მაქს პიკოლომინი. პიკოლომინი ღვიძლი ძმაა კარლოს მორისის, დონ-კარლოსის, პოზასი და თვით შილერის. ადამიანის სიყვარული, ადამიანის ბედნიერება მის წმიდათაწმიდას შეადგენს და მიუხედავად იმისა, რომ დრომ

და გარემოებამ მას ხელში ააღებინა ხმალი, ის მთელი თავისი არსებით მტერია ომიანობის, მას ეზიზღება, ეჭავრება. ადამიანისაგან ადამიანისავე სისხლისღვრა. გულამღვრეული შენატრის იმ დროს, როდესაც საზიზღარი ომი, ადამიანის დამამციკრებელი სისხლისღვრა სრულებით მოისპობა ადამიანთა საზოგადოებაში, და დარწმუნებულია. რომ ეს დრო ახლო მომავალს ეკუთვნის.

თავის იდეალებში, მისწრაფებასა და რწმენაში შილერი პირდაპირი. გადაჭრილი იყო, კომპრომისები მას არ უყვარდა, ხოლო ომსა და სისხლისღვრას ის ურიგდებოდა ერთადერთ შემთხვევაში — როდესაც ეროვნულ თავისუფლებას იცავდა ის ხალხი. რომელსაც ხმლის გარდა სხვა საშუალება არ დარჩენოდა თავისი არსებობისა და პიროვნების დასაცავად. ეროვნული თავისუფლების დაცვაზე აგებული შილერის ერთი საუკეთესო პიესა „ვილჰელმ ტელი“. ვილჰელმ ტელი იყო შვეიცარიის გმირი, რომელმაც მეთოთხმეტე საუკუნის დამდეგს შვეიცარია გაათავისუფლა და აღადგინა მისი დამოუკიდებლობა. დღეს ისტორიის მკვლევართა უმეტესობა იმ აზრისაა. რომ არავითარი ტელი არ არსებობდა და ის მხოლოდ ხალხის ფანტაზიის ღვიძლი შვილია, მაგრამ საქმე ეს კი არ არის, საქმე ისაა, თუ როგორ უყურებდა შილერი ტელის მოქმედებას. ვინ არის შილერის პიესაში უმთავრესი გმირი? ტელი? არა, მას მხოლოდ რამდენიმე ალაგას ხედავს მაყურებელი და გარდა გესლერის მოკვლისა, ის არაფერს ჩადის ისეთს მთელს პიესაში, რომ უმთავრეს მოქმედ პირად ჩაითვალოს. უმთავრესი გმირი, ცენტრი მთელი პიესისა არის შვეიცარიელების ეროვნული თავისუფლება. ყველას — დიდსა და პატარას, მონუქსა და ახალაზრდას — ენაზე აკერია თავისუფლება, ყველას წყურვილს ის შეადგენს. თავისუფალი ვართ, თავისუფალიო, — შეჭხარიან ერთმანეთს შვეიცარიელები გესლერის მოკვლის შემდეგ. თუ მთელი პიესა გაჟღერთილია თავისუფლების წყურვილით, თუ ის წარმოადგენს მძლავრ ქადაგებას ეროვნული თავისუფლებისას. ეს მხოლოდ იმას მოწმობს, რომ შილერი მთელი თავისი არსებით ეროვნული დამოუკიდებლობის მომხრე იყო. თავისუფლება სრული, თავისუფლება ყოველმხრივი, თავისუფლება განუსაზღვრელი — აი რას ითხოვდა პოეტი. ეროვნული თავისუფლება მხოლოდ ერთი ტოტია საერთო თავისუფლებისა და ის, ვინც საზოგადოდ თავისუფლებას იცავს. უნდა იცავდეს ეროვნულ თავისუფლებასაც; ეროვნული თავისუფლების წართმევა შიზლუდგაა, შეკვეცაა საზოგადოდ თავისუფლების და ის, ვინც მტერია თავისუფლების შეზღუდვის, მტერი უნდა იყოს ეროვნული თავისუფლების მოსპობისაც. მთელი თავისი სიცოცხლე შილერი სწორედ

განუსაზღვრელ თავისუფლებას ქადაგებდა და ამიტომაც ითხოვდა ეროვნულ თავისუფლებას. რა არის ხალხი, რას წარმოადგენს ერი? ამის შესახებ შილერი არაფერს გვეუბნება, მაგრამ მას სწამს, რომ სამშობლო ენა, ეროვნული კულტურა ადამიანის ბუნების ორგანული ნაწილია; ამ ნაწილის მოსპობა, ერთი მხრით, მაზარალებელია მთელი ერის კეთილდღეობისათვის, მეორე მხრით. დიდი უსამართლობაა და ამიტომ პოეტი ზნეობისა და კაცობრიობის კეთილდღეობის სახელით მედგრად იცავს ეროვნულ დამოუკიდებლობას, ეროვნულ თავისუფლებას. გაუმარჯოს თითოეული ერის თავისუფლებასო, — აი რას გვეუბნება „ვილჰელმ ტელის“ ყოველი სტრიქონი.

შილერი იყო საუკეთესო ადამიანი, საუკეთესო მამულიშვილი და საუკეთესო მოქალაქე; საუკეთესო ადამიანად და საუკეთესო მოქალაქედ დარჩება ის ყოველ დროს, ყოველი თაობისათვის. ის იყო განხორციელებული სიყვარული, განხორციელებული პატიოსნება და მასთან მოწინავე დემოკრატიულ-ლიბერალური აზრების გატაცებული მედროშე. ცხოვრება არათუ შილერის დროს, დღესაც ისეა მოწყობილი, რომ უმცირესობის კეთილდღეობა უმრავლესობის დაბეჩავებაზე, დამონავებასა და უძლურებაზე არის აგებული. ადამიანსა და ადამიანს შუა სიყვარულის. თანაგრძნობისა და გამტანობის ხიდი კი არ არის გადებული, არამედ მტრობის, ცივი გულის და შენ-ჩემობის უფსკრული. პოეტი ყველგან მეგობრობასა და სიყვარულს ეძებდა. ნაცვლად ყოველ ნაბიჯზე მხოლოდ მტრობისა და გაუტანლობის სურათებს ხედავდა; პოეტი შენატროდა თავისუფალ ადამიანს. სინამდვილეში კი მხოლოდ ყოველის მხრით შებორკილ და დამონავებულ ადამიანს ხედავდა; პოეტი ეძებდა საერთო ბედნიერებას, ცხოვრებაში კი მხოლოდ უმცირესობა ტყებოდა კეთილდღეობით, უმრავლესობა კი უმეცარი, ტიტველი, მშვიერი და მწყურვალი ატარებდა თავის ღლეებს; პოეტი შენატროდა საზოგადოებრივ თანასწორობას და პოლიტიკურ თავისუფლებას, ყველგან კი მხოლოდ უთანასწორობას და პოლიტიკურ მტარვალობას ხედავდა; პოეტი ეძებდა აზრის, სიტყვის, სინიდიის თავისუფლებას, სინამდვილეში კი არა თუ თავისუფალი სიტყვა. თავისუფლად აზროვნებაც სასტიკად იყო აკრძალული. საჭირო იყო ბრძოლა, ბრძოლა დაუცხრომელი სიყვარულის, სამართლიანობისა და თავისუფლების აღსადგენად საზოგადოებაში. პოეტი უშიშრად და შეუდრეკლად გამოვიდა ბრძოლის ასპარეზზე და თავის პირველსავე პიესას წააწერა: მტარვალების წინააღმდეგო. მან გაილაშქრა მტარვალების წინააღმდეგ და იარაღად იხმარა სცენა. ამგვარ არჩევანს სარჩულად დაედვა, ერთი მხრით, პოეტის ბუნებრივი ნიჭი და

თეატრის სიყვარული, მეორე მხრით, პოეტის შეხედულება თეატრის შესახებ. პოეტის აზრით. ხელოვნების არავითარ დარგს, არავითარ კულტურულ დაწესებულებას არ შეუძლია ხალხის ზნეობრივად და გონებრივად აღზრდა იმდენად, რამდენადაც თეატრს; ვერავითარი კანონმდებლობა ვერ მოსპობს საზოგადოებაში უსამართლობას და ბოროტებას იმდენად. რამდენადაც ეს თეატრს შეუძლია. პოეტის არჩევანს ხელს უწყობდა ის პირობებიც, რომლებშიაც მაშინ გერმანიის თეატრი იმყოფებოდა: პოეზიის არც ერთ დარგში სიტყვას არა ჰქონდა იმდენი თავისუფლება, რამდენიც სცენაზე; თავისუფლება კი ის პაერი იყო, ურომლისოდაც შილერს ცხოვრება და მოქმედება არ შეეძლო. პირველი ნაბიჯიდან მოკიდებული პოეტი იყო მამხილებელი პიროვნების, მამხილებელი საზოგადოების, მამხილებელი მთავრობის; პირველი ნაბიჯიდან მოყოლებული ის იყო მქადაგებელი საუკეთესო საკაცობრიო აზრების და მდგარი დამცველი დაჩაგრული ადამიანისა და უმრავლესობის ინტერესების; უფერულ, უნუგემო და სულისშემხუთველ სინამდვილეს ის ჩრდილავდა მომავალი ცხოვრების იმგვარი სურათით, როგორიც იმის იდეალებში იყო გამოხატული; თუ აწმყო არ აკმაყოფილებდა ადამიანს, სამაგიეროდ მისი დრამები თავისი დედააზრით სულსა და გულს უნათებდა სინათლის ყველა ნიყვარულს. შილერის ყოველ ნაწარმოებში ჩანს შილერი, თავისი სულისა და გულის, ზიზღისა და სიძულვილის, სიყვარულისა და თანაგრძნობის დამალვა პოეტს არ შეეძლო მაშინ, როდესაც მოქმედ გმირთა პიროვნებას ხატავდა; პოეტი თვითონ ცხოვრობდა მათთან ერთად, მათთან ერთად ოცნებობდა, მათთან ერთად ფიქრობდა და გრძნობდა, — ამიტომაც მისი პოეზიის ორი უმთავრესი თვისება — იდეალიზმი და სუბიექტივიზმი. პოეტის ყოველი სიტყვა წრფელი გულიდან იწყება, — გულწრფელობა შილერის პოეზიის დამახასიათებელი მხარეა; გულწრფელობით ხიბლავს ის იმ მკითხველსაც კი, რომელიც მის აზრებს არ თანაუგრძნობს. მიუხედავად იმისა, რომ კერძო ცხოვრება პოეტს არ უღიმოდა, საზოგადოებრივი ცხოვრების პირობები კი სრულებით არ ანუგეშებდა, პოეტს ვერაფერმა დააკარგვინა ღრმა რწმენა ადამიანისა და მომავლისა: ის დარწმუნებული იყო, რომ ახლო მომავალში უეჭველად განხორციელდებოდა ყოველივე. რასაც ის შეტრფოდა, რასაც ოცნებით წვდებოდა; ეს რწმენა უმხნევებდა პოეტს გულს, ეს რწმენა აყვარებდა ცხოვრებას; ეს რწმენა შეადგენს ძლიერ სულს შილერის პიესებისას. ამგვარად, სალი ოპტიმიზმი შილერის ხელოვნების ნიშნობლივი თვისებაა. „ის მტერია საზოგადოებრივი კეთილდღეობის, ვინც მხოლოდ თავის თავზე

ფიქრობს“, — ამბობს „ვილჰელმ ტელის“ ერთი გმირი; ამგვარადვე ესმოდა შილერს ყოველგვარი მოღვაწეობა, ამგვარადვე უყურებდა ის ხელოვნებასაც. გაუმჯობესება ცხოვრების, უმრავლესობის სარგებლობა, — აი ხელოვნების მიზანი შილერის აზრით. მართალია, ის არ ყოფილა უკიდურესი უტილიტარისტი, მართალია, საერთო სარგებლობისათვის ზრუნვაში ის მხოლოდ სულს უთმობდა ალაგს, კუქს კი არავეითარს, მართალია ისიც, რომ თავისი მოღვაწეობის ბოლო ხანებში შილერი მოსწყდა ცხოვრებას და თავისი არსებობის მიზანი წმინდა ხელოვნებაში დაინახა, მაგრამ თავისი მოღვაწეობის საუკეთესო ხანაში ის ზთელი თავისი არსებით საზოგადოებას ეკუთვნოდა, მისი უმთავრესი საზრუნავი ხალხის ბედნიერება იყო.

რა იყო საჭირო ხალხის ბედნიერებისათვის? პოეტს სწამდა, რომ ადამიანი მხოლოდ მაშინ შეიძლება ბედნიერი იყოს, თუ ის თავისუფალია. თუ მის სიტყვას. სინიღისა და აზრს სრული თავისუფლება აქვს მინიჭებული; პოეტი დარწმუნებული იყო, რომ საზოგადოება მხოლოდ მაშინ არის ბედნიერი, როდესაც მასში სრული თანასწორობაა, როდესაც მასში შრომის თავისუფლება არსებობს და მართვა-გამგეობა უმრავლესობის ნებასა და სურვილზეა დამოკიდებული. აი ამგვარი ბედნიერების მოახლოებას, პიროვნებისა და საზოგადოების გათავისუფლებას ქადაგებდა ის მთელი თავისი სიცოცხლე. ძირს მტრობა და სიძულვილი, ძირს ტრადიციები, ძირს არისტოკრატია, ძირს მეფე! გაუმარჯოს მეგობრობას და სიყვარულს, გაუმარჯოს თანასწორობას, გაუმარჯოს სიტყვის, აზრისა და სინიღის თავისუფლებას, გაუმარჯოს ხალხს და მის მეფობას, ვაშა ეროვნულ დამოუკიდებლობას! — აი რას ქადაგებდა შილერი ამ ასი წლის წინათ, აი, რას ქადაგებენ მისი პიესები დღეს. ასი წლის წინათ მოხუც თაობას გულს უმღვრევდა ახალგაზრდა პოეტის კრიტიკული აზრები; დღეს კაცობრიობის საუკეთესო ნაწილი თაყვანსა სცემს შილერს. ჩვენც თაყვანი ვცეთ, მკითხველო, ამ დიდებული პოეტის ხსენებას. რითო, იკითხავ შენ? ვემსახუროთ იმ აზრების განხორციელებას, რომლებსაც ის ქადაგებდა...

## ჩაგრულთა პოეტი

როდესაც საზოგადოება დაყოფილია სხედასხვა კლასებად, ყოველ შეხედულებას, ყოველ მისწრაფებას, ყოველ მოძღვრებას კლასობრივი ელფერი ადევს. კლასობრივი აზროვნების გამომხატველი განსაკუთრებით მწერლობა არის.

ლექსების წერა ჩვენს ცხოვრებაში სნეულებად არის გადაქცეული; ლექსებს მარტო ისინი კი არა სწერენ, ვისაც პოეტის ახლოსაც არ გაუვლია, არამედ ისინიც კი, ვისაც ლექსთა წყობის მარტივი კანონებიც კი არ აქვს რიგიანად გათვალისწინებული. ნამდვილი პოეტები კი ორი-სამი თუ გვყავს, — მეტი არა.

როგორ და რანაირადაც უნდა ჩნდებოდეს ესა თუ ის იდეა, ერთი რამ უტყუარია: იდეის გარეშე არ არის ბრძოლა, არ არის წინმსვლელობა. ვერაფერი ვერ აამხედრებს, ვერ აამოძრავებს ამა თუ იმ კლასს მანამდე, სანამ ის იდეაში არ ჩამოყალიბდება. ექვს გარეშეა, ესა თუ ის იდეა ციდან კი არა სცვივა, ის ცხოვრების გულში ისახება ეკონომიური პირობების ზეგავლენით, მაგრამ ცხოვრებასა და ადამიანის გულს შუა შუამავალი მხოლოდ იდეა არის. სანამ ცხოვრების მოთხოვნილებანი არ ჩამოყალიბდებიან ამა თუ იმ იდეაში, ხალხის გული უგრძნობელია, გონება დახშული; როცა ეს იდეა ჩასწვდება ხალხს გულში და გააცისკროვნებს გონებას, მხოლოდ მაშინ იწყება მუშაობა უკეთესი მომავლისათვის.

ცხოვრების წინმსვლელობაში იდეას განუზომელი მნიშვნელობა აქვს; ამიტომ დიდი მნიშვნელობა აქვს ყველაფერს, რაც იდეის გავრცელებასა და შესისხლხორცებას ხელს უწყობს. პოეზიის სარგებლობა და დანიშნულება სწორედ ამაში მდგომარეობს: იდეა პოეზიისა ყოველი ადამიანის გულსა და გონებას იმორჩილებს.

მუშა ხალხისათვის, რომელსაც საკუთარი მისწრაფება აქვს; საკუთარი მიზანი, საკუთარი პოეზია აუცილებელ საჭიროებას შეადგენს. მუშა ხალხს უნდა ჰყავდეს საკუთარი პოეტები, რომელთა

რიცხვიც ჩვენში სამწუხაროდ ფრიად მცირეა. ამთ შორის საპატიო ადგილს დაიკავენს ახალგაზრდა პოეტი ვარლამ რუხაძე.

ვარლამ რუხაძე დაიბადა 1874 წელს ს. ქვიტირაში (ქუთაისის მაზრა). ვარლამის მამა იყო მეღვინე და ქუთაისში სამიკიტნო ღუქანი ჰქონდა. ცხრა წლამდე ბავშვი სოფელში იზრდებოდა. რვა წლისა რომ გახდა, დედამ დაუწყო წერა-კითხვის სწავლება. სახელმძღვანელოს დაბეჭდილი წიგნი კი არ შეადგენდა, არამედ მონაწერი წერილები. პატარა ვარლამი მეტად ცელქი და დაუდგრომელი იყო, ანბანის გაზეპირებამ ის ვერ დაინტერესა და დედის მეცადინეობამ უნაყოფოდ ჩაიარა. როცა ზაფხულზე სოფლად ჩამოვიდა ბათლომე მოსეშვილი, რომელიც მაშინ სემინარიაში სწავლობდა, ვარლამი მას მიაბარეს, როგორც ნათესავს და ამგვარად წერა-კითხვა ისწავლა. როცა ვარლამმა დაინახა, თუ როგორ შენდებოდა ასოებიდან სიტყვა და სიტყვებიდან აზრი, ძალიან დაინტერესდა, კითხვა შეუწყვარდა. რადგანაც ხელმძღვანელი არა ჰყავდა, ის კითხულობდა ყველაფერს, რაც კი ხელში ჩაუვარდებოდა. ვარლამის მამა სწავლა-განათლებას მაინც და მაინც დიდ მნიშვნელობას არ ანიჭებდა. მე არაფერი მისწავლია, მაგრამ პურს ვჭამო, ამბობდა ხოლმე ის. მან გადასწყვიტა, შვილიც თავის ხელობაზე გაეზარდა, ამიტომ ცხრა წლის ვარლამი ქუთაისში წაიყვანა თავის სამიკიტნოში. ვარლამს აქ ხელში ჩაუვარდა აკაკის და ილიას ლექსები, ყარა-მანიანი, არსენას ლექსი და სხვ. კითხვამ ის კიდევ უფრო გაიტაცა, მაგრამ სამიკიტნოს პირობები და მოქვიფეთა ღრიალი პატარა ვარლამს ხელს უშლიდნენ და თვითგანვითარების ნებას არ აძლევდნენ. 1886 წელს ვარლამის მამამ სამიკიტნოს თავი დაანება, რადგანაც საქმე ცუდად წაუვიდა და სოფელში დაბრუნდა.

ვარლამი ორ წელიწადს დარჩა სოფლად და ამ ხნის განმავლობაში არაფერი არ წაუკითხავს, რადგანაც წიგნებს ვერა შოულობდა. შემდეგ ის განშორდა სოფელს და ცხრა წელს წახურობდა. სხვადასხვა ალაგს — ფოთში, სოხუმში, ბათუმში. ამ ხნის განმავლობაში ვარლამს დღისით თითქმის სრულებით არა ჰქონია მოცალეობა და იძულებული იყო სწავლის სურვილი ღამე დაეკმაყოფილებია ხოლმე: როცა საქმე გათავდებოდა და ყველა ძილს მიეცემოდა, ვარლამი მაშინ დაიწყებდა კითხვას და ხშირად მთელი ღამეები გაუტარებია კითხვაში. 1897 წელს ვარლამი დაბრუნდა ისევ ქუთაისს და ამხანაგთან ერთად გახსნა ღვინის საწყობი. აქ მას მეტი დრო ჰქონდა თვითგანვითარებისათვის. 1902 წელს ვარლამი ბათუმში გადასახლდა და დღესაც იქა სცხოვრობს.

ვარლამმა ლექსების წერა დაიწყო 1892 წელს. რადგანაც პირ-



ველ ხანებში ვარლამი ჩვენი ვიწრო პატრიოტული მწერლობის ზეგავლენის ქვეშ იმყოფებოდა, ამიტომ მისი ნაწერებიც ამგვარი მიმართულებისა იყო. ამ ხანას ეკუთვნის „ცხვრები და დათვი“, დანარჩენი ლექსები კი არ დაუბეჭდია. 1898 წლიდან ვარლამ რუხაძის პოეზიაში იწყება ახალი ხანა, რომელიც ახასიათებს მას, როგორც მუშა ხალხის მისწრაფებათა გამომხატველს.

როდესაც თქვენ იცნობთ ამა თუ იმ მწერლის ცხოვრებას, კიდეც რომ არ იცნობდეთ იმის ნაწერებს, შეგიძლიათ დაახლოებით გამოიცნოთ მათი საერთო ხასიათი და მიმართულება. ვარლამ რუხაძე დაიბადა ღარიბ ოჯახში, გარშემო სულ სიღარიბესა და გაჭირვებას ჰხედავდა, სცხოვრობდა ისეთ წრეში, რომელიც სხვადასხვა შევიწროებას და დაჩაგვრას იტანდა. რა შედეგი უნდა მოყოლოდა ყოველივე ამას?! ვარლამს უნდა შეეყვარებია დაჩაგრულნი და ღარიბნი, ზურგი ექცია იმ ცხოვრებისათვის, რომელშიაც უსამართლობის მეტი არაფერია, და მომავალზე დაემყარებია თავისი იმედები. და მართლაც ყოველივე ამას ჩვენ ვხედავთ ვარლამ რუხაძის პოეზიაში.

ვარლამი უმთავრესად ლირიკოსია,—ის გამოხატავს იმ გრძნობებს, იმ ფიქრს, რომლებსაც მასში იწვევს ცხოვრება. პოეტი უკვირდება თანამედროვე წყობილებას და შიგ ძალმომრეობის, მონობის, ჩაგვრის, გარყვნილებისა და სიღატაკის მეტს ვერაფერს ჰხედავს. ყოველივე ეს ხდება იმისათვის, რომ ერთი მუჟა მუქთახორები ფუფუნებაში ატარებენ თავის ცხოვრებას. მუქთახორების განცხრომას მსხვერპლად ეწირება უმრავლესობის კეთილდღეობა და სიცოცხლეც კი. გარშემო ტანჯულთა ოხვრა-კენესა ისმის და ხარხარი ბედნიერთა. ყოველივე ეს პოეტს გულს უმღერევს, მაგრამ სასოწარკვეთილებას კი ვერ აყენებს. პოეტს ღრმად სწამს, რომ ყველაფერი წარმავალია, მხოლოდ ქვეშარიტება საბოლოოდ იმარჯვებს და რჩება. ქვეშარიტება კი, პოეტის შეხედულებით, იმაში მდგომარეობს, რომ ყალბი ცხოვრება ტანჯვისა, სიღატაკისა და ძალმომრეობისა მოისპობა და მის ალაგას დამყარდება საერთო ბედნიერება, თანასწორობაზე და საერთო შრომაზე აგებული. რაკი პოეტს ღრმად სწამს ქვეშარიტების ძლევამოსილება, მის გულს სასოწარკვეთილება აღარ ეკარება. ის ჰხედავს სხვის ტანჯვას და თვითონაც იტანჯება; მას ესმის სხვისი ოხვრა-კენესა და თვალბზე ცრემლი ერევა, მაგრამ თავის რწმენაში ის იკრებს ძალას და ამხნევებს ყველა ტანჯულსა და დაჩაგრულს: მომავალი მხოლოდ ჩვენიაო.

მომავლის მოსახლოებლად საჭიროა მოქმედება, საჭიროა ბრძოლა, და პოეტი იწვევს ყველა ტანჯულს აქეთკენ.

ვარლამ რუხაძის პოეზიის ერთ დიდ ღირსებას ეს სალი ოპტიმიზმი შეადგენს. ცრემლები და ოხვრა მისი საქმე არ არის. ის ხედავს ცხოვრების მთელ სისაძაგლესა და ყველა უსამართლობას, მაგრამ ყოველივე ეს მას მხოლოდ უსამართლობასთან საბრძოლველად იწვევს და გულს კი ვერ უტეხს, რადგანაც პოეტმა იცის, რომ ტახტი უსამართლობისა ადრე თუ გვიან დაიმსხვრევა და მის ალაგას დამკვიდრდება ტახტი საერთო ბედნიერებისა.

ცხოვრების სისაძაგლეთა გადმოშლა, მძლავრი პროტესტი, სიმღერა ბრძოლისა და ღრმა რწმენა უკეთესი მომავლისა და ჭეშმარიტების ძლევამოსილებისა, — აი მოკლედ ვარლამ რუხაძის პოეზია.

ენა ვარლამ რუხაძის პოეზიისა მარტივია, ხალხური, გარეგანი ფორმა ლექსისა მეტად მუსიკალური.

თუ პოეტი თვითგანვითარებას დაეწაფება და ევროპის თანამედროვე ლიტერატურას გაითვალისწინებს, მაშინ ის უფრო ღრმად ჩასწვდება ცხოვრებას და მისი პოეზია უფრო ფართოდ და მძლავრად გაშლის ფრთებს.

## ქართული სცენა

რა უნუგეშო სურათსაც უნდა წარმოადგენდეს კაცობრიობის ისტორიის ცალკე ეპიზოდები, კაცობრიობა მაინც წინ მიდის: აწმყო წარსულსა სჯობია, მომავალი აწმყოს აჯობებს. ოდესმე ადამიანი დედამიწას სამოთხედ გადააქცევს და საზოგადოებრივ ცხოვრებას — საერთო ნეტარებად. ბედნიერი იქნებიან ისინი, ვინც ამ მომავალს მოესწრება. რომელ ქართველს არ უნდა, რომ მრავალტანჯული ქართველი ხალხიც მოესწროს ამ მომავალს! ალლო თავის დაცვისა თანდაყოლილი აქვს ყოველ ცოცხალ არსებას მატლიდან მოყოლებული ადამიანამდე. შეგნება თავის დაცვისა ძვალ-რბილში უნდა ჰქონდეს გამჭდარი ყოველ საზოგადოებას, საზოგადოების ყოველ ნაწილს. თუ საზოგადოება ამ შეგნებას მოკლებულია, მისი დღენიც დათვლილია. გადაავლეთ თვალი ჩვენს საზოგადოებას. ინტელიგენცია საერთოდ ამ შეგნებას მოკლებულია; მოკლებულია ამ შეგნებას თავადაზნაურობაც. მამულის სიყვარული და თავისი ერისათვის ზრუნვა ბრტყელ-ბრტყელი სიტყვებით კი არა მტკიცდება, არამედ საქმით. როდესაც სიტყვით მამულის ერთგულმა ჩვენმა წარჩინებულმა წოდებამ საქმით ეროვნული ადგილ-მამულის, ეროვნული ტერიტორიის დიდი ნაწილი უცხო ტომთ ჩაუყარა და ქართველ ხალხს კი დაუყარა. ეს ყოველ ბრტყელ სიტყვაზე უფრო ხმამაღლა ჰღაღადებს. ქართველმა ერმა თუ ტერიტორია დაკარგა, დედამიწის ზურგისგან აღიგვება. თავადაზნაურობა კი სწორედ ამ გზას ადგას კარგა ხანია.

მამ რაზედ უნდა დავამყაროთ ჩვენი იმედები? სად არის ხსნა? ჩვენი ხსნა ეგრეთ წოდებულ წვრილ ხალხშია. თუ ეს ხალხი ცოდნით აღიჭურვა, ქონებრივად მოლონიერდა და სულიერ-ზნეობრივად ამაღლდა, ქართველი ერის მომავალიც უზრუნველყოფილი იქნება.

აი ამ დიად საქმეში უნდა ჩაებას ქართული თეატრიც და ამ

მხრივ გაუწიოს ხალხს დახმარება და სამსახური. ამისათვის კი უწინარეს ყოვლისა საჭიროა თვით ხალხის ფსიქოლოგიის ცოდნა. სცენის მსახურებმა უნდა იცოდნენ მათი შეხედულება, მათი მოთხოვნილება, ვისაც ემსახურებიან.

გულს გული იცნობსო, ნათქვამია. ხალხის სულსა და გულს უფრო სწვდება ის, რაც იმის გარშემო ხდება, რასაც ის თვითონ ჰხედავს ცხოვრებაში. ხალხი უფრო ადვილად იგნებს ყოველივე მშობლიურს, ყოველივე ეროვნული მას უფრო აინტერესებს, უფრო აღელვებს, უფრო იზიდავს. სცენას, რომელიც სცდილობს ხალხს წინ წაუძღვეს, არ შეუძლია ხალხის ამგვარ სულიერ თვისებას გვერდი აუხვიოს და პასუხი არ გასცეს. წინააღმდეგ შემთხვევაში თვითონ ხალხი აუხვევს სცენას გვერდს და ზურგსაც შეაქცევს.

წარსული სეზონის განმავლობაში ქართულ წარმოდგენებს ხალხი ნაკლებად ესწრებოდა. როდესაც დადგეს „სამშობლო“, თეატრი ხალხით გაიტენა. რითი აიხსნება ეს გარემოება? მარტო ეფექტებით? სრულიადაც არა. ამ პიესაში ხალხი ჰხედავს ყოველივე თავის საკუთარს, ეროვნულს და ამიტომ უფროც ეტანება. რითი აიხსნება ის გარემოება, რომ სულ მოკლე ხანში ირეთელის პიესა „დამარცხებულნი“ რამდენჯერმე დაიდგა და ყოველთვის გატენილი იყო ხალხით, მიუხედავად იმისა, რომ პიესა ხელოვნების მხრით მეტად სუსტია? იმითი, რომ ის ხალხი რომელიც ამ პიესას ესწრება, მასში ჰხედავს თავის საკუთარ — ქართულ ცხოვრებას.

ამიტომ საჭიროა, რომ ქართულ სცენაზე ქართულ პიესებს უფრო მეტი ალაგი ჰქონდეთ დათმობილი, ვიდრე დღემდისა ჰქონდათ. თუ კი არ არის პიესები, საიდან დავდგათო, — შეიძლება იკითხოს ვინმემ. მართალია, ჩვენი მწერლობა ღარიბია, მაგრამ მეტ თანაგრძნობასა და სიყვარულს რომ ვიჩენდეთ ამ მწერლობისადმი, საქმეც უკეთეს მდგომარეობაში იქნებოდა. მე არ განვიხილავ აქ ყველა იმ დაბრკოლებას, რომელიც წინ ეღობება ქართველ მწერალს. რანაირად შეიძლება მწერლობა აყვავდეს იქ, საცა არავითარი სიყვარულა არა სჩანს ეროვნული საქმისა? აიღეთ ჩვენი მწერლის მდგომარეობა. თუ რამე დასწერა, იმის ნაწერს დაბეჭდვა არ ელირსება; კიდევ რომ დაიბეჭდოს, ბევრი არავინ წაიკითხავს; მისი პიესა სცენას ვერ იხილავს; მწერლობით ის გროშ-კაპეიკს ვერ აიღებს. ერთის მხრით შიმშილი, მეორეს მხრით გულგრილობა საზოგადოებისა, — ამგვარ პირობებში რა ააყვავებს მწერლობას? ჩვენი სცენისათვის უპირველეს საჭიროებას შეადგენს ეროვნული მწერლობა, ეროვნული პიესები. ამისათვის კი საჭიროა, რომ ჩვენი სცენა მეტის თანაგრძნობით ეკიდებოდეს ეროვნულ პიესებს. ბევრს ჩვენში შეუძლია წერა, მაგ-

რამ არა სწერს. ბევრს კიდევ თავისი ნაწერი ვერ გამოუქვეყნებია, რადგანაც ან დაშინებულია, ან ვერსად დაუბეჭდია. თუ ჩვენს სცენაზე ქართულ პიესებს მეტი ადგილი დაეთმობა, ვიდრე დღემდე ჰქონდა დათმობილი, დარწმუნებული უნდა ვიყოთ, რომ ეს წახალისებს ქართველ მწერლებს, ნამეტურ ახალგაზრდებს, და ქართული პიესების რიცხვიც იმატებს. რაც დავწერე, არსად დამიბეჭდეს, ერთი პიესაც არ წარმოადგინეს ჩემი და რისთვის უნდა ვწერო, — მეუბნებოდა ამას წინათ ერთი ახალგაზრდა მწერალი. უმთავრესი ალაგი მაინც ევროპიულ პიესებს უნდა ჰქონდეს ჯერჯერობით დათმობილი. ევროპის მწერლობაში დღეს სხვადასხვა მიმართულებაა. ქართულმა სცენამ უნდა გააცნოს თავის საზოგადოებას სხვადასხვა მიმართულების საუკეთესო ნიმუშები. იმ დროისათვის, რომელიც სახეში უნდა ჰქონდეს ჩვენს სცენას, ყოველივე რეალური უფრო ადვილად შესაგნებელია, მოსალოდნელია, ვიდრე სიმბოლისტურ-დეკადენტური. ამიტომ ევროპის რეპერტუარიდან ჩვენმა სცენამ უმთავრესად რეალური მიმართულების პიესები უნდა აირჩიოს. დროდადრო უსათუოდ ალაგი უნდა დაეთმოს ისეთ დრამატურებს, როგორიც არიან მეტერლინკი, ანდრეევი. უამისოდ ჩვენი სცენაც დაშორდება ევროპის ხელოვნებას და ხალხის სახელოვნო შეგნებისა და გემოვნების განვითარებაც შეუფერხდება.

1908

## ხალხური ანდაზები და გამოცანები

ვინ შექმნა ანდაზა, ვინ მოიგონა არაკი, ვინ გამოთქვა გამოცანა?

თვითონ ხალხმა.

რატომ გეხიბლავს ანდაზა? რაში მდგომარეობს ჯაღო მისი მიმზიდველობისა, მშვენიერებისა და საოცრებისა?

ანდაზის ყოველ სიტყვაში საუკუნეებია მოთავსებული. თვითული ანდაზა ჭანდაკებაა, რომელსაც მთელი ერი ქმნიდა საუკუნეთა განმავლობაში.

საუკუნეთა განმავლობაში უნდა დაგროვილიყო მთელი ერის დაკვირვება, გამოცდილება, რომ შემდეგ ზედ აღმოცენებულიყო მკვეთრი, მოსწრებული, მოსხლეტილი ანდაზა, რომელიც ერთ სიტყვაში მოათავსებდა მთელი ერის ნაფიქრალ-ნაგრძნობს.

რაში მდგომარეობს ანდაზის თვისება?

„გრძელი სიტყვა მოკლედ ითქმის“.

ის გზა, რომელიც ერს გაუვლია საუკუნეთა განმავლობაში, ანდაზამ უნდა დაიტოოს ერთ სტრიქონში.

ის, რაც ერს მოუფიქრებია საუკუნეთა განმავლობაში, ანდაზამ უნდა გამოჰხატოს რამდენიმე სიტყვაში სხარტულად.

ანდაზა არ არის ნაყოფი ოცნებასა, განყენებული მსჯელობისა, — ის თვით ცხოვრების ცეცხლშია გამოკვესილი და მასში თავმოყრილია მთელი ერის სიბრძნე, დაკვირვება, გამოცდილება, რწმენა, შეხედულება, გრძნობა და ჭირვარამი.

ანდაზა ისტორიაა მთელი ერისა და საუკეთესო გასაღები მისი სულის სალაროსი.

ერის გონებამახვილობა, მისი ზნე, მისი ბუნება, ხასიათი ანდაზაში მოსჩანს, როგორც სახე — სარკეში.

ამიტომ ანდაზა მარტო ხალასი მარგალიტი კი არ არის მთელი

ერის შემოქმედებისა, არამედ იშვიათი და უტყუარი სარკე ერის ბუნების ამოსაცნობად, მისი სულ-ის დასანახავად.

ყოველი ანდაზა უდიდესი და უმშვენიერესი ძეგლია, რომელიც დაუტოვებია მთელ ერს თავისი ისტორიის გზაზე.

და ეს ძეგლი ფოლადზე უმაგრესია, რადგანაც მას ვერაფერი ავნებს, ვერ მოსპობს და ვერ წაშლია.

ანდაზა უდიდესი საგანძურია ეროვნული შემოქმედებისა, რადგანაც ყოველ ანდაზაში მთელი ერი ლაპარაკობს, მთელი ერი აცხადებს თავის თავს.

ანდაზებს ისეთივე მნიშვნელობა აქვს, როგორც უდიდეს ეროვნულ ნაწარმოებს.

რუსთაველი ძვირფასია ჩვენთვის, როგორც უმაღლესი მწვერვალი ერისა.

ანდაზები ფასდაუდებელი ჩვენთვის; როგორც ერის სიმტკიცე და საფუძველი, ანდაზებში მთელი ერია მოთავსებული, მთელი მისი ისტორიული ცხოვრება, მისი ფიქრი და თავგადასავალი საუკუნეთა გზაზე.

რომ მოისპოს ყოველგვარი ნიშანი ერის არსებობისა და მარტო ანდაზები დარჩენ, ესენი საუცხოოდ გვეტყვიან, თუ როგორი იყო მათი შემქმნელი ერი და მისი სულიერი ავლადიდება.

ანდაზებში მთელი ერია აღდგენილი და წარმოდგენილი, ანდაზებში მთელი ერი სცოცხლობს.

ანდაზები საუკეთესო კავშირია ერის წარსულსა, აწმყოსა და მომავალს შორის.

ანდაზებში ჩვენ ვხედავთ ძველისძველ წინაპრებს და ვებასე-ბით მათ; ანდაზებში ჩვენა ვსჭვრეტთ მომავალ თაობათ და ვემუსაი-ფებით მათ.

ანდაზების სიღრმიდან შემოგვეყურებენ წარსული თაობანი და გვიზიარებენ თავის გამოცდილებას, თავის დაკვირვებას.

ანდაზების სიღრმიდან ჩვენ გავცქერით მომავალ თაობათ და ვუზიარებთ მათ ჩვენს ფიქრსა და დაკვირვებას.

ანდაზებში მთელი ერი სცოცხლობს და აზროვნებს; წარსული, აწმყო და მომავალი — ხელიხელ ჩაკიდებული არიან და ერთად კმოქმედებენ ანდაზებში, ამიტომაც ანდაზებსა აქვთ უდიდესი აღმზრდელობითი მნიშვნელობა.

ანდაზები საუკეთესო მაჩვენებელია ერის ცხოვრებისა და საუკეთესო საზომი ერის კულტურული სიმაღლისა. ამიტომაც ანდაზებს უდიდესი მნიშვნელობა აქვთ ცხოვრების შესწავლისა და და-

ფასებისათვის. თუ თქვენ იცნობთ ანდაზებს, თქვენ უკვე იცით, როგორია თვითონ ერი.

ჩვენი ანდაზები ჩვენი ეროვნული სიამაყეა. მათში ჩამოყალიბებულია ჩვენი ერის სიბრძნე და გამოცდილება.

ჩვენი ანდაზები უდიდესი ეროვნული საგანძურია, რომელიც ახასიათებს ქართველი ერის ნიჭს, დაკვირვებას, გონებამახვილობას და დიდ ისტორიულსა და კულტურულ წარსულს.

მხოლოდ კულტურის ბაღალ საფეხურზე მდგარ ერს შეუძლია ასეთი ანდაზების ჩამოსხმა და გამოკვეთა და ყოველი ადამიანი, რომელიც ასეთ მარგალიტებსა ჰკრებს, რომ ერთად მოუყაროს თავი, დიდ ეროვნულ საქმეს ემსახურება.

ჩვენს ერში, ჩვენი ქვეყნის სხვადასხვა კუთხეში გაბნეულია მრავალი ანდაზა, როგორც ზღვის ფსკერში მარგალიტი, და მათი პოვნა და შეგროვება მეტად საჭიროა.

სოსიკო მერკვილაძეს დიდი საქმე უკისრია და მრავალი ანდაზა ამოუკრებია ზეპირსიტყვაობის საუნჯიდან. მართალია, ჩვენი ანდაზები გაცილებით მეტია, მაგრამ ერთი ადამიანი ვერ შესძლებს მათ შეკრებას. სოსიკო მერკვილაძის მაგალითს სხვები წაჰბაძავენ და ამრიგად შეიკვრება მთელი ჩვენი ანდაზების საუცხოო თაიგულები.

გამოცანებში გამოკვეთილია ხალხის სიმკვირცხლე, გონებამახვილობა და დაკვირვება.

მოზარდი თაობის გონებრივი ვარჯიშობისათვის გამოცანები საუცხოო მასალას წარმოადგენენ და სოსიკო მერკვილაძეს ამ მხრივაც დიდი შრომა გაუწევია. იმის კრებულში მრავალია ისეთი გამოცანა, რომელსაც მკითხველი არსად შეხვდებოდა. სოსიკო მერკვილაძის შრომა შეადგენს ნაწილს იმ ძვირფასი საუნჯისას, რომელსაც ხალხური შემოქმედება ეწოდება და სასურველია, რომ ის გავრცელდეს მკითხველთა წრეებში.



## მზის მზოსანი

თანამედროვე კულტურული ცხოვრების ერთ დიდ ნაკადს ის მოვლენა შეადგენს, რომ ადამიანი ბუნებას დაშორდა, მოსწყდა.

ვიდრე ადამიანი შეერთებული იყო ბუნებასთან, როგორც მისი კანონიერი შვილი, ის მთლიანი პიროვნება იყო. მთლიანი პიროვნება კი თვით უბედურებაშიაც ბედნიერია, რადგანაც ის ქედს არავის და არაფრის წინაშე არ იხრის.

ვიდრე ადამიანი მკიდრო კავშირით იყო გადაბმული ბუნებასთან, მარტობას, ობლობას ვერა ჰგრძნობდა და ამიტომ სულით ძლიერი იყო. ყოყმანი, უიმედობა, სასოწარკვეთილება მისთვის არ არსებობდა.

როდესაც ადამიანი ბუნებას დაშორდა, მთლიანობა მისი არსებისა დაირღვა, ის დაუძლურდა და გადიქცა მონად საკუთარის გრძნობებისა ან სხვისი ბრძანებისა.

ბუნებისაგან განდგომილმა ადამიანმა პირველად იგრძნო მარტობა, ობლობა და მისი სული დაძაბუნდა, დაუძლურდა; მისს გულში სევდამ, იქვმა, ყოყმანმა დაისადგურა.

ბუნებასთან დაკავშირებული ადამიანი მტკიცეა, ვით კლდე. შეუპოვარი, გამბედავი, ბატონი თვისი სიტყვისა.

ბუნებას მოწყვეტილი ადამიანი კი უძლურია, გაუბედავი, სიტყვისა და ფიცის გამტეხი.

ჩვენს განათლებულ დროში ძლიერნი ამა ქვეყნისანი თავის სიტყვას ძვირად ასრულებენ.

უძველეს დროში კი, როცა ადამიანი ბუნებასთან მკიდროდ იყო დაკავშირებული, სიტყვის გატეხა უდიდესი სიარცხვილი იყო.

რასაც ძველად სიცრუეს უწოდებდნენ და ერიდებოდნენ, დღეს ის პოლიტიკად მონათლეს და თავი მოაქვთ.

უწინდელს დროში პირობის სიგელზე მხოლოდ ჯვარს დას-

ვამდნენ ან სხვა რაიმე ნიშანს, და არასოდეს უარს არ იტყოდნენ. დღევანდელი ადამიანი კი საკუთარ ხელმოწერასაც უარპყობს.

ბუნებას მოწყვეტილმა ადამიანმა მთლიანობა დაჰკარგა და გაირყვნა.

ბუნების ღვიძლი შვილის წარმომადგენელი ლიტერატურაში ორესტია.

ბუნებას დაშორებული და დაობლებული ადამიანის წარმომადგენელი კი ჰამლეტი.

შეადარეთ ორესტი და ჰამლეტი ერთმანეთს და დაინახავთ, რა დიდი მნიშვნელობა აქვს ადამიანისათვის ბუნებასთან მჭიდრო კავშირს.

ორესტისათვის სევდა, ჭმუნვა, იჰვი, ყოყმანი არ არსებობს. რატომ?

იმიტომ, რომ ის მთლიანი პიროვნებაა, სულით მტკიცეა. თუ კი რასმე გადასწყვეტს, თუ კი რასმე ამოიღებს გულიდან, კიდეც შეასრულებს მას.

ჰამლეტის გულს კი მუდამ სევდა და ჭმუნვა სწოვს, ამის ყოველ ნაბიჯს, ყოველ გარდაწყვეტილებას ყოყმანი, იჰვი, გაუბეღლობა ღრღნის.

ორესტი საქმის, მოქმედების ადამიანია, რადგანაც ის ბუნების შვილია და ბუნება კი, მუდამ მოძრავი, მუდამ მომქმედი, ყველას ამოძრავებს და ამოქმედებს.

ჰამლეტი კი, როგორც ბუნებას სრულებით დაშორებული, ფიქრის ადამიანია, — საქმე მას არ ეხერხება.

ბუნებასთან კავშირი ადამიანს სიმტკიცეს აძლევს, სულს უძლიერებს, აბედნიერებს და მომქმედ არსებად ჰქმნის.

ბუნებასთან კავშირი ზნეობრივად აფაქიზებს ადამიანს, რადგანაც ადამიანი ჰგრძნობს, რომ ის იმგვარივე შვილია ბუნებისა, როგორც ხე, მთის ჩანჩქერი და სხვ.

ბუნებასთან კავშირი სულიერად ამაღლებს ადამიანს, რადგანაც თვით ბუნება მდიდარი, დიადი, მრავალ საიდუმლოებათა მატარებელი და მიუწვდომელია.

ბუნებასთან კავშირში ადამიანი თვით უკვდავებას ეზიარება, რადგანაც ბუნება უკვდავია; და ამით ადამიანი ჰპოვებს უმწვერვალეს ნეტარებასა და ბედნიერებას.

ბუნებასთან კავშირი ამშვენიერებს ადამიანს, ზეკაცად ჰხდის მას, რადგანაც თვით ბუნება უმშვენიერესია.

ჩვენს სიტყვაკაზმულ მწერლობაში ბუნებას დიდი ალაგი უკავია. გასაკვირალი აქ არაფერია. საქართველოს საუცხოო, მომხიბლავი

და წარმტაცი ბუნება, ყველაზე უფრო პოეტს ჰხიბლავს და ათრობს.

მაგრამ ბუნების ნამდვილი მგოსანი აბაშელია.

ჩვენი მწერლები საქართველოს ბუნებას გვისურათებენ, მას შესტრფიან.

აბაშელმა კი ყოველგვარი საზღვარი გადალახა. მან მთელი სამყარო, მთელი კოსმოსი გაახვია თავის მომხიბლავ პოეზიაში, შეიყვარა ის მთელის თავისის არსებით, მოსწყდა დედამიწას, გადიქა ბუნების მიჯნურად, ცის სივრცეში დანავარდობს და მზის სხივებისაგან საოცნებო სამოსელს უქსოვს თავის შეუღარებელ სატრფოს.

მაშინ, როდესაც სხვები ბუნების სხვადასხვა სურათებს აგვიწერენ, აბაშელმა დაგვანახა ცოცხალი, მოძრავი, მომქმედი, უკვდავი, წარმტაცი ბუნება; მან გაგვაცნო მზის სიცილი, მზის სიზმარი, ცის ზღაპარი, მსოფლიოს მუსიკა.

აბაშელი, როგორც მგოსანი ბუნებისა, მეტად თავისებური პოეტიცაა. ის არავის არა ჰგავს, არავის არ გვაგონებს; ის არავის არა ჰბაძავს და ვერც ვერავინ წაბაძავს მას. მას წინამორბედი არა ჰყოლია. ის თვითონა ჰქმნის. მისმა პოეზიამ ერთბაშად ამოჰხეთქა ჩვენს მწერლობაში.

თავისთავად იბადება შემდეგი საკითხი: რად იზიდავს აბაშელს ცა, რად ეტრფის ის სამყაროს? „სულის ლტოლვა რად ესწრაფვის მაღლა ცისაკენ“?

მიწის შვილი ცისკენ ვლიდეს  
საიდუმლოს სახილველად, —

წერს აბაშელი ერთ ლექსში. მას ცის საიდუმლოს ხილვა უნდა, ცის საიდუმლოს ამოკითხვა სწყურია.

განა დედამიწაზე კი ცოტა საიდუმლოა, რომ ცაში არ დაეწყო ძებნა?

დედამიწასაც ბევრი აქვს საიდუმლო. მაგრამ აბაშელს ეს საიმისოდ არ აინტერესებს.

რატომ? რისთვის?

იმიტომ, რომ აბაშელი მარადისობას, უკვდავებას ეძებს და ეტრფის; ის არის პოეტი სამარადისოსი, უკვდავისა. დედამიწაზე კი ყოველივე ღროებითი და წარმავალია, ყოველივე მოკვდავია.

მარადისობის ვიგრძენ ძალა და უკვდავება, —

გვიცხადებს პოეტი ერთ ლექსში.

რადგანაც ყველაზე უფრო უკვდავი, ყველაზე უფრო სამარადისო,

უველაზე დიდებული და მშვენიერი ბუნებაში მზე არის, აბაშელის განსაკუთრებით სატრფიალოსაც მზე წარმოადგენს:

მზეს არ ახსოვს შობის წამი, მზეს სიკვდილი არა სჯერა,  
მან სიცოცხლე უკვდავების სიმთა ეღერით ააძგერა;  
დროს წაართვა ძღვევის კვერთხი და დათრგუნა მით სიკვდილი...

სწორედ დიდი ნიჭია საჭირო, რომ ასე საუცხოოდ გამოჰხატო მარადისობა მზისა, რომელიც დროს ართმევს ძღვევის კვერთხს.

აბაშელი მომხიბლავ ფორმაში გამოსახავს ხოლმე ისეთ მცნებას, რომელიც პირველის აწონ-დაწონვით პოეზიას სრულებით არ შეეფერება. აიღეთ თუნდაც ეს მაგალითი — მარადისობა მზისა. თითქოს საპოეზიო აქ არაფერია. მიუხედავად ამისა რა საუცხოო პოეზიაა:

მზეს არ ახსოვს შობის წამი, მზეს სიკვდილი არა სჯერა!

აბაშელი ისე შეჰხარის მზეს, როგორც შეყვარებული თავის სატრფოს.

აბაშელი შეყვარებულია, ნასი საყვარელი, მისი სატრფო თეთრად მოციწარე მზეა, რომელმაც „დროს წაართვა ძღვევის კვერთხი და დათრგუნა მით სიკვდილი“.

აბაშელი შესტრფის მზის სიცილს, მას ცის მკერდზე მუდამ მზის ხილვა უნდა. ის სულის ლტოლვით დაეძებს თავის მშობელ მზეს:

მზე, სხივმნათო, შენსკენ მოვეჩქარებო...

შენს სადიდებლად ვაქვბ დილას სულით შევბული..

აბაშელი წარმართია, რომელიც თავის გრძნობას მზისადმს ლოცვაში კი არ გამოხატავს, არამედ ნაზ, ტკბილ აღფრთოვანებულ ჰიმნში. მთელი პოეზია აბაშელისა გაპიროვნებაა ბუნებისა. იშვიათია პოეზიაში ბუნების მოვლენათა ისეთი აღწერა, როგორსაც აბაშელის პოეზიაში ჰნახავთ. ძნელი, შეუძლებელი ამ მხრივ მისთვის არ არსებობს.

გადაიკითხეთ მისი „დილა“, „მყუდროება“, „ღამე“, „თეთრი სხივი“, — გადიკითხეთ რამდენჯერმე და მაშინ დარწმუნდებით, თუ რა არის პოეზიით დატკობა.

სფერო აბაშელის პოეზიისა უსაზღვრო და დაუსრულებელი სიერცვა ცისა. უკვდავი, სამარადისო, დიადი, — აი რას ეტრფის, აი რას ელტვის აბაშელი. ის სოფლის დრტუინვას განშორებულა.

მაგრამ ის ადამიანია და ამიტომ „მიწის სევდა“ დროდადრო მა-

საც იზიდავს თავისაკენ. აბაშელი აღფრთოვანებული მგოსანია მთვარის ჭადოთი სავსე სხივისა და მზის აღმგზნები, თეთრი სიცილისა, მაგრამ კენესა ტანჯულთა მასაც უკარგავს მოსეპნებას და გულს სევდით უვსებს. მაშინ მისი პოეზია არის შურისძიებით, მხილებითა და გესლით აღსავსე. ის ცის სივრცეს ამ დროს თავს ანებებს და ისევ დედამიწას უბრუნდება:

მაგრამ ბოლოს ცის სივრცეში ვერ გავუძელ მარტოობას,  
სულს მოსწყინდა ცაში ფრენა, ისევ ავყვე მიწის გრძნობას,  
მომავონდა ცრემლის გუბე, მომავონდა მონის ხუნდი  
და ცხოვრებით გულნატკენი ისევ მიწას დაუბრუნდი.

პოეტს აღარ შეუძლია სიმღერა, რადგანაც ირგვლივ სჩქედს სისხლნარევი ცრემლთა ხაკადული. მას სურს შვეების ცრემლად დაეფრქვიოს მიძინებულ მაშვრალთ კერას.

მაგრამ იქაც, სადაც აბაშელი სოციალურ კითხვებს გაკვრით ეხება, ის მუდამ თავისებურია. სოციალური კითხვების გადაწყვეტა პოეტს იმდენად აინტერესებს, რამდენადაც ეს ხელს შეუწყობს ცისა და დედამიწის შერიგებას, რათა „მიწის შვილი ცისკენ ვლიდეს საიდუმლოს სახილველად“.

წყარო უკვდავებისა, წყარო მშვენიერებისა, წყარო ნეტარებისა და ბედნიერებისა ცა არის. მოაწყეთ ცხოვრება ისე, რომ ამ წყაროთი ყველა იკლავდეს წყურვილს, — აი აბაშელის სოციალური მოძღვრება.

საყურადღებოა აბაშელის სტილი, მისი ენა, რომელიც ნამდვილი მუსიკაა. აიღეთ, შავალითად, ლექსი „განთიადის მოლოდინში“:

ნისლის ნაკვით ნარნარ ნიავს  
ჩამქრალ ჩრდილად ჩაკვდომოდა.

ჩვენს ცხოვრებას ძლიერმა ქარიშხალმა გადაუარა თავს; მიუხედავად ამისა ჩვენი დღევანდელი პოეზია შაბლონს ვერ გასცილდა.

ზამთარი დაგვიდგა, ირგვლივ ტანჯულთა კენესა ისმის. გამხნევდით, გულს ნუ გავიტებთ, ზამთარს ისევ გაზაფხული მოჰყვებაო, — აი რა გაისმის სხვადასხვა კილოზე.

აბაშელის პოეზია სასიამოვნო და საიმედო გამონაკლისს შეადგენს.

პოეტმა მეტად მოხდენილად, მეტად კარგად და ლამაზად დაიწყო და თუ ამგვარადვე განაგრძო, ფრიად საპატიო ალავს დაიჭერს ჩვენს მწერლობაში.

## ალ. მირიანაშვილი

ოგავ-არაკნა

შეიძლება აღადიანი დიდი ხელოვანი იყოს, მაგრამ ბავშვებისათვის ხეირიანი ვერა დაწეროს-რა..

საბავშვო მწერალი კარგად უნდა იცნობდეს ბავშვის სულს, იმის მისწრაფებას, იმის გემოვნებას, რომ ერთის მხრივ, ისეთი რამ მიაწოდოს, რისი გაგებაც ბავშვს არ გაუძნელდება, მეორეს მხრივ ისეთი, რისი წაკითხვაც ბავშვს არ დაეზარება.

ხშირად ნახავთ კარგ საბავშვო მოთხრობას, კარგის შინაარსით-მისცემთ ბავშვს და რამოდენიმე სტრიქონის წაკითხვის შემდეგვე ატყობთ, რომ ბავშვი უგულოდ, უხალისოდ ჰკითხულობს.

ყოველივე, რაც ბავშვებისათვის არის დაწერილი, ისე უნდა იწერებოდეს, რომ ბავშვი წაახალისოს, კითხვა შეაყვაროს.

საბავშვო მწერალი უნდა იყოს ამავე დროს ჰკუთის მასწავლებელი და აღმზრდელი: მან გონება უნდა გაუხსნას ბავშვს, კარგისა და ავის გარჩევა შეასწავლოს, გაუძლიეროს მისწრაფება კარგისაკენ და ავი შეაძლოს, — ერთის სიტყვით, საბავშვო მწერალი გონებრივად და ზნეობრივად უნდა წრთვნიდეს ბავშვს, გონებას უნდა უფითარებდეს და ზნეობას უსპეტაკებდეს. პირველი ზეხედვით ეს არც იმდენად ძნელი საქმეა. ყოველმა ჩვენგანმა ბავშვზე მეტი იცის. მეტი გამოცდილება აქვს, მაშასადამე ყველას შეუძლია ბავშვის გონების განვითარება და რიგიანად დარიგება.

საბავშვო მწერლობისათვის კი სწორედ აქ არის ბეწვის ხიდი გადებული და მასზედ გადასვლა მეტად ძნელია.

მოთხრობა იქნება თუ ლექსი, არასოდეს არ უნდა წარმოადგენდეს დარიგებას. ზნეობრივი აზრი შიგ უნდა იყოს ჩაქსოვილი, ის ბუნებრივად, ძალდაუტანებლად უნდა გამომდინარეობდეს შინაარსიდან, — აი მხოლოდ მაშინა აქვს მას აღმზრდელობითი მნიშვნელობა.

საბავშვო მწერალმა უნდა განუვითაროს ბავშვს გრძნობა და შეგნება მშვენიერებისა, უნდა შეაყვაროს ბავშვს მშვენიერება ანუ, როგორც ამ შემთხვევაში ამბობენ, ესთეტიურად უნდა აღზარდოს ბავშვი. „გველსა ხერელით გამოიყვანს ენა ტკბილად მოუბარი“, — აი მთელი მნიშვნელობა ხელოვნებისა; ხელოვნება ანუ მშვენიერება ბავშვში ავითარებს ყოველგვარ კეთილშობილურ გრძნობას, ჰბადებს მალალ მისწრაფებას, აღმობიერებს, ათვინიერებს ბავშვს, ანუ ტაკებს იმის გულს და ავითარებს გონებას.

საბავშვო მწერალმა უნდა შეაყვაროს ბავშვს ბუნება. ბუნება დაუშრეტელი წყაროა მშვენიერებისა, ის თვით არის მშვენიერება და ამიტომ ბავშვისათვის მეტად დიდი აღმზრდელობითი მნიშვნელობა აქვს.

საბავშვო მწერალმა უნდა შეასწავლოს და შეაყვაროს ბავშვს სამშობლო ენა. ეს უქანასკნელი პირობა შესაძლებელია არსად არ იყოს იმდენად დიდმნიშვნელოვანი, რანდენადაც ჩვენში.

ჩვენი ბავშვებისათვის ქართული ენის შესასწავლად უმთავრესი წყარო საყმაწვილო ლიტერატურაა. საბავშვო წიგნების გამოცემას ჩვენში დღემდე არავინ აქცევს ჭეროვან ყურადღებას. ამგვარი წიგნები ძალიან ცოტა მოგვეპოვება. წიგნით დასაჩუქრება რომ გინდოდეთ ბავშვისა, ქართულს ენაზე რიგიანად გამოცემულ საბავშვო წიგნს ვერა ნახავთ, — მხოლოდ წიგნაკებია.

საბავშვო წიგნისათვის გარეგნობასაც ძალიან დიდი მნიშვნელობა აქვს. როგორ შეაყვარებს ბავშვს ხელოვნებას ან კითხვას ისეთი წიგნი, რომელიც ვერც ყდით მიიზიდავს ბავშვს, ვერც ქალადით, ვერც შრიფტით, ვერც სურათებით? წიგნი თვითონ, თავისთავად, შინაარსს გარდა, უნდა იყოს იმდენად კოხტა და ლამაზი, რომ მისი ხელში აღება ბავშვს ეხალისებოდეს. ბავშვი უმალ გარეგნობას აქცევს ყურადღებას და თუ გარეგნობამ ვერ დააკმაყოფილა, შინაარსსაც აღარ უკვირდება და უგულოდ ეკიდება.

რა ბავშვი გინდათ, — წიგნის გარეგნობას ყოველი ჩვენგანისთვისაც დიდი მნიშვნელობა აქვს. ხილზეც იტყვიან ხოლმე: იმისთანა ლამაზია, ძალათი შეგაკმევს თავსო. აი სწორედ იმისთანა ლამაზი უნდა იყოს საბავშვო წიგნი, რომ ბავშვს ძალათი წააკითხოს თავი.

აბა სად არის ჩვენში ამისთანა საბავშვო წიგნი?

დიდი მადლობის ღირსია „ნაკადულის“ რედაქციას, რომ აღ. შირიანაშვილის იგავ-არაკნი უძღვნა თავის პატარა მკითხველებს საჩუქრად. პატარა საყვედურის ღირსია, რომ ამისთანა მშვენიერი წიგნი მშვენიერსავე ყდაში არ არის.

წიგნის ზომა და შრიფტი კარგია, სურათები სამაგალითო, ხოლო საბავშვო წიგნი და ისიც საჩუქარი უსათუოდ ყდიანი უნდა იყოს.

როდესაც გადიკითხავთ იგავ-არაკებზე, გაგაოცებთ შინაარსის სიმდიდრე.

ფანტაზია ა. მირიანაშვილისა დაუშრეტელია. ავტორმა ერთხელ შემომჩივლა: სიზმრებს ხშირად ვხედავ და ძილში მგლები და დათვები მოსვენებას არ მაძლევენო. მაშინ არ ვიცოდი, თუ ის იყო ავტორი იგავ-არაკებისა. ახლა კი მესმის, რატომ არ აძლევენ გარეული ცხოველები მოსვენებას ალ-მირიანაშვილს: სამაგიეროს უხდიან, რადგანაც ფხიზლად თვითონ აღარ აძლევს მოსვენებას მათ და ყოველი მათგანი გამოუყენებია თავისი საუცხოო იგავ-არაკებისათვის.

შინაარსის მხრივ წიგნი ძალიან საყურადღებოა და არა თუ პატარა, დიდიც გულდასმით გადაიკითხავს მას. ზოგი იგავ-არაკის მიზანია ბავშვის გონებრივად განვითარება; სხვები აჩვენებენ ბავშვს ავისა და კარგის გარჩევას და მას ზნეობრივად წვრთნიან. არავითარი დარიგება ან ზნეობრივი ქადაგება იგავ-არაკებში არ არის. ზნეობრივი დასკვნა ბუნებრივად გამომდინარეობს შინაარსის აღწერილობიდან.

იგავ-არაკები არა თუ შინაარსით, აღწერილობითაც საუცხოოდ შეეფერება ბავშვის ბუნებასა და მოთხოვნილებას.

პირველის წაკითხვით ზოგიერთი მათგანი იმდენად უმნიშვნელო გეჩვენებათ, რომ იფიქრებთ, რა დასაბეჭდავი იყოო. მაგრამ როდესაც ჩაუკვირდებით, დარწმუნდებით, რომ პატარა დიდის სიამოვნებით წაკითხავს მას. ბავშვს, რომელიც ჭერ კითხვაში საკმაოდ არ გავარჯიშებულა, გრძელი არაკის წაკითხვა ეზარება, რადგანაც შინაარსს ვერ ითვისებს. მოკლეს კი იმ ხალისით კითხულობს, რადგან იმისი გონება და მეხსიერება მოკლე არაკის შინაარსს უფრო სძლევს.

იგავ-არაკები საუცხოო ქართულის ენით არის დაწერილი, რასაც დიდი მნიშვნელობა აქვს ყოველი საყმაწვილო წიგნისათვის.

მდიდარი შინაარსით, მდიდარი აზრით, მდიდარი ენით — აი ალ-მირიანაშვილის იგავ-არაკი.

ჩვენი ბავშვები მადლიერი იქნებიან დღეიდან მათთვის საყვარელი ავტორისა, რომელმაც ასეთი წიგნი უძღვნა მათ საჩუქრად.



## პატარა წერილი

მოქმედით მაღალი მთის მწვერვალის თავზე, დაივიწყეთ ადამიანთა ცხოვრება, შურით, მტრობით, გესლით სავსე; თვალი გადაავლეთ ქვეყანასა და ბუნებას.

თუ გრძნობა მშვენიერებისა სრულებით არ წაუშლია თქვენში ყოველდღიურ შხამს, პოეტთან ერთად წამოიძახებთ:

ამაზე ტურფა და კარგი  
მე სხვა აღარა მგონია!

ქვეყანა დიდია და ლამაზი, ბუნება მრავალფეროვანი და ტურფა, სამყარო დაუსრულებელი და დიადი.

ჩვენი ცხოვრება ხანმოკლეა, ვითა სიზმარი; მიუხედავად ამისა ის მშვენიერია; ჩვენი სიცოცხლე ელვაა, ელვასავით მალე ჰქრება; მაგრამ ის ელვასავით ლამაზია.

თანამედროვე ადამიანი დასნეულდა, მოიწამლა, სიცოცხლე საშინელ მაჯლაჯუნად გადაქცევია; სილამაზე ცხოვრებია სრულებით დაუმახინჩებია, დადის დაღვრემილი; კი არ სუნთქავს, ხვნეშის; აღარ იღიმება, — პირქუშია.

ბერძნებს, რომაელებს, ფრანგებს (რევოლუციის ხანაში) იმდენად უყვარდათ სიცოცხლე, რომ სიკვდილის დროსაც კი იღიმებოდნენ და ოხუნჯობდნენ.

ჩვენ კი სიცოცხლეშიც ვეღარ ვიღიმებით და ვეღარ ვოხუნჯობთ; ჩვენი სული და გული მოშხამულია და ყველგან შხამს ვავრცელებთ.

სიბრაზემ, სიძულვილმა და ბოროტებამ სრულებით განდევნა ჩვენი გულიდან სიყვარული; სხვისი შეურაცხყოფა, სხვისი დამცირება, გალანძღვა — აი ჩვენი ხელობა.

ცხოვრება ბრძოლაა. სპარტანელები ბრძოლის წინ გარეგნობას ილაშხებდნენ, თმას ივარცხნიდნენ კოხტად.

ჩვენ კი ლანძღვა და გინება ბრძოლად გამოვიტანეთ და ჩვენი სიგლაზე გმირობა გვგონია.

ასეთ პირობებში უდიდესი მნიშვნელობა აქვს ხელოვნებას — ის ჰვანტავს სევდის ბურუსს, ადამიანის დამწუხრებულს გულს მალამოდ ევლინება და სულს ახალისებს; უიმედობასა და სასოწარკვეთილებას სპობს და იმედს, აღფრთოვანებას, გატაცებას, სიყვარულს, რწმენას გზას უკაფავს.

ერთი მეორის ლანძღვა-გინების პუბლიცისტიკამ ჩვენში ხელოვნება შთანთქა, ხალხს კი ხელოვნება, მშვენიერება მოსწყურდა.

არა გჭერთ?

აბა გაითვალისწინეთ „სინათლის“ წარმოდგენები.

მოსდა ის, რაც არასოდეს მომხდარა ქართულ სცენაზე: ერთი და იგივე პიესა თოთხმეტჯერ დადგეს და კიდევ ამდენჯერ რომ დადგან, მაინც გატენილი იქნება ხალხით.

რითი აიხსნება ასეთი დაუჯერებელი ამბავი?

მარტო პიესის ღირსებით?

სრულიადაც არა.

ხალხს მოსწყურდა ეროვნულ ფორმებში ჩამოსხმული მშვენიერება და ხარბად დაეწათა „სინათლეს“. ამ წყურვილს დაკმაყოფილება უნდა. დღევანდელი ჩვენი ჟურნალ-გაზეთობა კი მას ვერ აკმაყოფილებს. საჭიროა ხელოვნებას თავისი საპატიო ალაგი ჰქონდეს დათმობილი, და ეს კი დღეს არ არის.

პუბლიცისტიკა საჭიროა, ფრიად საჭირო.

არა ნაკლებ საჭიროა ხელოვნებაც.

ამისათვის კი აუცილებელია ორგანო, რომელიც მარტო ხელოვნებას ემსახურებოდეს.

თუ „თეატრი და ცხოვრება“ ამ გზას დაადგება, მე პირველი ვუსურვებ მას გამარჯვებასა და დღეგრძელობას.

## ქართველი ქალის დანიშნულება

თანამედროვე წყობილებაში საზოგადოებას ოჯახი შეადგენს. თუ ოჯახი ზნეობრივ სახეს მოკლებულია, თვით საზოგადოება საშიშ მდგომარეობას განიცდის, რაში უნდა იხატებოდეს ოჯახის ზნეობრივი სახე?

ამისათვის საჭიროა უმაღლესი გავიგოთ, რას წარმოადგენს თვით დღევანდელი ოჯახი.

დღევანდელი ოჯახია კავშირი ორ სქესს შორის. ამ კავშირის მიზანია საერთო შვილების აღზრდა.

ოჯახი მხოლოდ მაშინ იქნება ზნეობრივ საფუძველზე დამყარებული, როცა ეს კავშირი ზნეობრივია და როცა ოჯახი თავის მოვალეობას პირნათლად ასრულებს.

საოჯახო კავშირი დღევანდელ ცხოვრებაში ქორწინების სახით სწარმოებს: ეს კავშირი რომ ზნეობრივი იყოს, საჭიროა, რომ ის აგებული იყოს სიყვარულზე. თუ ჩავუკვირდებით დღევანდელ ცხოვრებას, დავინახავთ, რომ ქორწინებას უმეტეს შემთხვევაში სიყვარული კი არ უდევს სარჩულად, არამედ ანგარიში.

დღეს კერძო საკუთრების ხანაა. უმთავრესი კერძო საკუთრება ფულია, მას ეძებს ყველა. დღეს ფულმა ყოველივე დაიპყრო და დაიმორჩილა: მწერლობა, ხელოვნება, მეცნიერება, სარწმუნოება. ქორწინებასაც ფული დაეპატრონა. დღეს ფულით თხოვდებიან, ფულისათვის ირთავენ ცოლს.

ამ გარემოებამ წარმოათქმევინა ჩვენს აკაკის შემდეგი სიტყვები:

ცოლს რომ ირთავთ, რას დაეძებთ:  
მეგობარს და შვილის მშობელს?  
თუ ფულსა და პრორქციას,  
სინიღისის დამამზობელს?

ღირსება ქალისა დღეს ფულით იზომება. ამგვარ პირობებში ქორწინება უზნეოა, რადგანაც ის აშენებულია ანგარებაზე.

არის მეორე მხარეც: ყოველი კავშირი მაშინ არის ზნეობრივი, როცა მოკავშირენი ერთნაირ პირობებში იპყობებიან, ერთნაირი უფლებით არიან აღჭურვილნი.

დღეს მამაკაცს ბევრგვარი უფლება აქვს. დედაკაცი კი ყველა ამას მოკლებულია. დედაკაცთან შედარებით მამაკაცს ფართო ასპარეზი აქვს ცხოვრებაში; დედაკაცის ასპარეზი ვიწროა, იმის ერთადერთ მთავარ სარბიელს ჯერ კიდევ ოჯახი შეადგენს; ოჯახს გარეშე დარჩენა მისთვის დიდი უბედურებაა. ამ პირობებში მყოფი ქალი ძალაუვნებურად ცდილობს გათხოვდეს და ამგვარი მდგომარეობა აიძულებს მას, უმეტეს შემთხვევაში სიყვარულით კი არ გათხოვდეს, არამედ ანგარიშით.

ჩვენ შეგვეძლო დიდხანს შევჩერებულიყავით ყველა ამ მხარეზე, რომლებიც დღევანდელს ქორწინებას ზნეობრივ სახეს უკარგავს, მაგრამ ნათქვამიდან ცხადია შემდეგი:

სანამ ქალი უფლებრივად არ გაუსწორდება მამაკაცს, სანამ საზოგადოებრივი ცხოვრება აგებული იქნება კერძო საკუთრების პრინციპზე, მანამდე შეუძლებელია ქორწინებამ სრული ზნეობრივი სახე მოიპოვოს.

მივმართოთ ახლა ოჯახის მოვალეობას. გრიბოედოვის ფამუსოვმაც კარგად იცოდა, რომ შვილების საყოლად დიდი ჭკუა არ არის საჭირო. თავი და თავი შვილების აღზრდაა.

შვილების აღზრდაში ერთნაირად მოვალენი არიან ქმარიც და ცოლიც, მაგრამ რადგანაც დღევანდელ პირობებში მამაკაცი უმთაგრესად ოჯახის გარეშე ტრიალებს ოჯახისავე შესანახად, დედაკაცი კი შიგ ოჯახშია, ამიტომ შვილების აღზრდის საქმესთან უფრო ქალია ახლოს, ვიდრე მამაკაცი. საზოგადო მოსაზრებებიდან გადავიდეთ ჩვენს ცხოვრებაზე და ჩავუკვირდეთ ქართულ ოჯახს, ქართველ დედას.

რომ მივმართოთ ჩვენს საუკეთესო პოეტებს, დავრწმუნდებით. რომ ძველ დედებს ყველა თაყვანისცემით და აღტაცება-მოწიწებით იხსენიებს:

ჟოი, დედანო, მარად ნეტარნო,  
კურთხევა თქვენდა, ტბილ სახსოვარნო!  
რა იქნებოდა, რომ ჩვენთა დედათ  
სულიცა თქვენი გამოჰყოლოდათ!

ვინლა ჰყავს გულის შემატკივარი  
მამულს ასული აწლა თქვენგვარი, —

კგოდებს ნიკო ბარათაშვილი.

ქართლის დედაო, ძუძუ ქართველისა  
უწინ მამულსა უზრდიდა შვილსა, —

უგალობს ილია და ამასვე გვეუბნება აკაკი:

ჰეი, ჰეი, ველარ ვხედავთ  
ღღეს ძველებურს ქართველ დედებს.  
მათ მაგიერ მომავალზე  
ალარავინ გვაიმედებს.

ძველი დედების ხსენებას აკაკი ქება-დიდებას უძღვნის:

დიდება იმათ დედობასი  
დიდება იმათ სახელსა!  
იმათ სხივებზე ღღეს ჩვენში  
ქალთ თვალს ველარ ახელსა!

როდესაც იგივე პოეტები უწინდელს დედას დღევანდელს ადარებენ, გული სევდით ევსებათ:

ჯანი გავარდეს აწ შვილსაც, მამულს,  
ოღონდ ვაამოთ ჩვენს საკუთარ გულს,  
რის ქართველობა, რა ქართველობა!  
ვითომ რას გვავენებს უცხო ტომობა? —

სევდით სავსე კილოთი მოსძახის ნიკო ბარათაშვილი.

მომწონს კალინა, მალინა,  
მძულს ვარდები და იაო.  
სამშობლო რასა მიქვია,  
მეწყერსაც წაუღიო, —

აი როგორ ახასიათებს დიდებული აკაკი თანამედროვე ქალს.

რაში გამოიხატება, ამ პოეტების აზრით, ქართველი დედის მოვალეობა? შვილების აღზრდაში ეროვნულ ნიადაგზე.

ჩვენ უნდა ჩვენი ვშვათ მყოობადი:  
ჩვენ უნდა მივსცეთ მომავალი ხალხს.  
აქ არის, დედავ, შენი მაღალი  
დანიშნულება და საღმრთო ვალი, —

ეუბნება ილია თანამედროვე დედას.

აკაკის ქართველი დედა ამბობს:

მამულისთვის მიშობია,  
შისი ჭირის სანაცვალთ.

ძველი ქართველი დედა ამ მოვალეობას პირნათლად ასრულებდა, თანამედროვე კი არა.

შესაძლებელია, ძველ ქართველ დედას ბევრი ნაკლი ახლდა, მაგრამ მას ჰქონდა ერთი უტყუარი და დიდი ღირსება: ესმოდა თავისი მოვალეობა მამულის წინაშე. ის ოჯახში იყო კარჩაკეტილი, კე-

რიასთან ატარებდა თავის სიცოცხლეს, ხოლო შვილს მამულისათვის ზრდიდა.

თანამედროვე ქართველმა ქალმა ბევრში უკან ჩამოიტოვა ძველი ქართველი დედა, მაგრამ ერთში კი ჩამორჩა: ის გადაგვარდა, მას აღარ ესმის თავიანი მოვალეობა სამშობლოს წინაშე. ყოველდღიურობამ, პირადმა ცხოვრებამ შთანთქა ის და დაუქარგა იდეალი. სიმები, რომლებითაც ძველი დედის გული შეერთებული იყო თავის ხალხთან, დღევანდელ დედას თითქმის სრულებით დაუწყდა და მშობელი ერის კვნესა და ვარამი იმის გულს აღარა სწვდება. გადაგვარების სენი განსაკუთრებით ინტელიგენციას და მაღალი წრის ქალებს მოედო.

რაში ეტყობა დღევანდელ ინტელიგენტ ქალს ქართველობა?

ერთი უმთავრესი პირობა ქართველობისა — ქართული ენაც კი აღარ შერჩენია.

აი როგორ ახასიათებს ამ წრის ქალებს ჩვენი აკაკი:

დღეს ერთი ქალი გამაცნეს  
სახელოვანი, ქებელი:  
დედ-მამა ყავდა ქართველი,  
ქართლშია დაბადებული,  
მაგრამ ისეა ნასწავლი  
და ისე განათლებული,  
რომ დედაენაც არ იცის,  
სძულს კიდეც დავიწყებული!

რამ გამოიწვია, ჩვენი პოეტების აზრით, თანამედროვე ქართველი ქალის ასეთი გადაგვარება?

კირთების ქვეშე დაჩაგრულ ბედმა  
სრულად მოგიკლა სიცოცხლის ძალა, —

ეუბნება ილია ქართველ დედას. ამგვარი ახსნა არ არის მთლად ქეშ-შარიტი. ტარიელსა და ნესტანს ჭირმა და დაჩაგრულმა ბედმა კი არ შეაძულა ერთმანეთი, არამედ უფრო გაუძლიერა სიყვარული. ქართველი ქალის გულში რომ იყოს ცეცხლი, სამშობლოს სიყვარულით ანთებული, დაჩაგრული ბედი ამ ცეცხლს უფრო გააძლიერებდა. განა პოლონეთის ქალს კი არ არგუნა ისტორიამ კირთების ქვეშე დაჩაგრული ბედი? მაშ რატომ იგივე არ დაემართა პოლონელ დედას, რაც ქართველს? რატომ არის მაშ, რომ პოლონელი დედა ყველგან პოლონელია და ქართველი დედა კი თავის პატარა სამშობლოშიც ქართველი აღარ არის?

იმიტომ, რომ კირთების ქვეშე დაჩაგრულ ბედს წინ დაუხვდა პოლონელი ქალის მამულის სიყვარულით აღზნებული გული და

შავმა ბედმა ეს გული ვერ გაანელა, ვერ შეანგრია მისი კედლები. კირთების ქვეშე დაჩაგრულ ბედს კი საქართველოში დაუხვდა ქართველი ქალის გაციებული გული, რომელშიაც მამულის სიყვარულით ერთ დროს დანთებული ცეცხლისაგან დღეს ფერფლი და ნაცარიც კი აღარ დარჩენილა.

აბა თვალი გადაავლეთ ჩვენს წარჩინებულ წოდებას. ჩვენი ხალხის სისბლით მორწყულ მიწას რაღაც გიჟურის გატაცებით დღეს მამები გადამთიელებს ურიგებენ, აქაოდა ორ გროშს მეტს გვაძლევნო.

ფუი ამისთანა გროშებსაც და ამისთანა ვაჭრობასაც!

მათი ცოლები და ქალიშვილები კი ქართულ ენას ყოველ დღე ასამარებენ ოჯახში და ოჯახს გარეთ.

და ეს არის ასრულება ზნეობრივი მოვალეობისა მამულის წინაშე?!

ასეთი გადაგვარებული ოჯახები იძლევიან გადაგვარებულ შვილებს და უზნეობას უზნეობა ემატება.

კმარა, ბატონებო, ასე ცხოვრება აღარ შეიძლება, სირცხვილია! მე თქვენ მოგმართავთ, ქართველო დედებო, პოეტის სიტყვებით:

ჩვენ უნდა ჩვენი ვშეთ მყოობადი,  
ჩვენ უნდა მივსცეთ მომაველი ხალხს.

ის თქვენ გეუბნებათ:

აქ არის, დედავ, შენი შალალო  
დანიშნულება და საღმრთო ვალი.

გადალახეთ ოცნებით მრავალი საუკუნენი და დაინახავთ, რომ თქვენი მშობელი ერი განსაცდელში იყო, წყვილიადასა და ბნელეთში იმყოფებოდა.

ამ დროს მოევლინა მას ნინო და გამოიყვანა ის ახალი ცხოვრების გზაზე.

თქვენი მშობელი ერი დღესაც განსაცდელშია. მისი არსებობა ყოფნა-არყოფნის სასწორზეა და, რომელი დასძლევს, არ ვიცით. ნუთუ აღარ მოევლინება მას ახალი ნინო, რომლის მამულის სიყვარულით აღზნებული გული გააღბობს ჩვენს გაყინულ გულს, ააგებს შიგ მამულისადმი ღრმად მომქმედი სიყვარულის წმინდა საკურთხეველს და გამოიყვანს ქართველ ერს აღორძინების გზაზე?

ახალი თანამედროვე ნინო უნდა გაჩნდეს თქვენს შორის. მე მწამს, რომ ის მოგვევლინება.

## კონსტანტინე დიმიტრის ქე ყიფიანი

შესავალი. ყიფიანების გვარი. გიორგი გოგიაძე და ბაგრატ მეფე. კოტეს პაბა — ქოჩო ყიფიანი, დიმიტრი ყიფიანი და მისი მეუღლე ნინო. კოტეს დაბადება. კოტეს ძმა ნიკო.

ქრისტიანულს მოძღვრებაში ყველაზე უფრო ღრმა, მომხიბლავი და წარმტაცია აზრი, იდეა ღვთის ტანჯვისა კაცობრიობის სახსნელად. განა ღმერთს არ შეეძლო მარტო თვისის ნებით ეხსნა კაცობრიობა, მაგრამ მან აირჩია თავისი თავისავე მსხვერპლად შეწირვა ბედნიერების საკურთხეველზე.

კაცობრიობისათვის ტანჯული ღმერთი — აი უდიდესი სურათი, რომელიც კი შეუქმნია ადამიანის სიბრძნესა და წარმოდგენას.

არც ერთი დიდი საქმე უმსხვერპლოდ არ კეთდება — აი რას გვეუბნება ეს სურათი.

ვისაც თვისი ხალხის ხსნა უნდა, მან მსხვერპლად უნდა შესწიროს თავი — აი რას გვიქადაგებს ეს სურათი.

ეს ღრმა აზრი იმდენად ნათელი არსად არის, როგორც ჩვენში: მშობელი ერის სამსახური, საზოგადო მოღვაწეობა ჩვენში დიდი მსხვერპლია.

სახელი და დიდება გარდუვალი და სამარადისო იმ პირებს, რომლებიც ამ მსხვერპლს არ ერიდებიან და ჩვენი სამშობლოს შავი ბედის უღელში შებმულნი, ერთგულად ეწევიან მას ბრწყინვალე მომავლისაკენ.

ასეთი პირების ცხოვრებისა და თავგადასავლის ცოდნა, გარდა იმისა, რომ მოვალეობაა ყოველი ქართველისა, დიდი გამამხნევებელია და თან ჭკუის მასწავლებელიც.

ერთ ამგვარ მოღვაწეთაგანს წარმოადგენს კოტე ყიფიანი.

ხარს ვგეგვარ ნაიალდარს,  
რქით მიწასა ვჩხვერ. ვბუბუნებ:



ეს სიტყვები პოეტისა ზედგამოჭრილია კოტე ყიფიანზე.

კოტე ყიფიანი როცა ცხოვრების აპარეზზე გამოვიდა, წინ ორი გზა დახვდა: ერთი საპირადო — ვარდებით, პატივით, დიდი ხარისხით, წარჩინებით და სრული მატერიალური კმაყოფილებით მოფენილი; მეორე კი საზოგადო — ეკლებით, აუტანელის შრომითა და ყოველგვარის შევიწროებით უხვად მორთული.

კოტე ყიფიანი ისეთ მდგომარეობაში იყო, მის პირად ბედნიერებას ისე უწყობდა ყოველივე ხელს — ნიჭი, განათლება, მეტად გავლენიანი მამა, — რომ სხვა იმის ალაგს უსათუოდ აირჩევდა პირველ გზას.

მაგრამ კოტეს ბუნება სხვა იყო. რას მიქვია პირადი ბედნიერება, როცა სამშობლოს აღდგენა ესაჭიროებაო, უთხრა მას კეთილშობილმა გულმა, და კოტეც დაადგა მეორე გზას, რომლისათვისაც აღარ გადუხვევია. ის ემსახურებოდა და ემსახურება ქართველ ერს ახლგაზრდობიდან მოყოლებული დღემდე, როგორც მსახიობი კი არა მარტო, არამედ როგორც მწერალიც. მისი მოღვაწეობა მწერლობის აპარეზზე ორგვარია: მხატვრული და სამეცნიერო.

უტყუარი ისტორიული საბუთები ყიფიანთა გვარის შესახებ არ მოგვეპოება. ამიტომ უნდა დავკმაყოფილდეთ გადმოცემით.

უძველეს დროს ყიფიანები ყოფილან სვანეთში. ბაგრატ მეფის დროს სვანეთის სოფელ წვირმისში სცხოვრობდა მორკინალი — მეომარი გიორგი გოგიაძე, რომელსაც ჰყავდა ათასი კაცი მორკინალი (რაინდი).

ბაგრატ მეფეს ხონთქარმა მეტისმეტად გაუჭირა საქმე. ოსმალეთის ჯარი გადმოსხა შავი ზღვის ნაპირს და დღედღეზე უნდა შემოსეოდა იმერეთს. ბაგრატ მეფემ მაშინვე აფრინა შიკრიკი გიორგი გოგიაძესთან სვანეთში: აბა, ჩემო გიორგი, როგორც იმედი მაქვს შენი, ახლავე შეიარაღდი შენის ათასის კაცით და ცხენისწყალს გადმოდმა მომეშველეო. გიორგიმ მოისმინა მეფის ბრძანება და შიკრიკი უკანვე გამოისტუმრა: მოახსენე იმერეთის მეფესა და ჩემს მბრძანებელს, რომ დაუყოვნებლივ გაიხლებიო.

გიორგი გაუდგა გზას თავისი მეომრებით და დაბინავდა სოფელს მურს ცხენისწყლის მარცხენა ნაპირას. აქედან გაუგზავნა ქუთაისში ბაგრატ მეფეს შიკრიკი და აცნობა: გაიხელი, მეფეო.

მეფემ მოუსმინა შიკრიკს და ბრძანა: რას ვაქნევ და რაში მინდა შენი ბატონის მურში დაბანაკება, მე ის აქ მჭირდებაო.

შიკრიკმა მოკრძალებით მოახსენა მეფეს: ის სტუმარია, მეფეო, შენ მასპინძელი. როგორც მასპინძელი, იქ უნდა შეეგებო სტუმარსო. კარგო, — ბრძანა მეფემ: — წადი და მოახსენე შენს ბატონს, მოვდივარ-თქო.

შიკრიკი გაბრუნდა.

მეფე თავისის ამალით გაემგზავრა ზურს გოგიაძის სანახავად მორიგეებმა მოახსენეს გიორგის: მეფე მობრძანდებო. გიორგი მაშინვე გამოვიდა თავისი ფანჩატურიდან და შეეგება მეფეს.

— თქ, ჩემო გიორგი გოგიაძე, რა ყიფიანი! რამა ხარ! — მიაძახა მეფემ და გადაეხვია გიორგის.

მას აქეთ დაერქვა გიორგი გოგიაძეს ყიფიანი: გოგიაძე — ყიფიანი. შემდეგ და შემდეგ გოგიაძე დაიკარგა და დარჩა ყიფიანი. გოგიაძის შთამომავლობა გამრავლდა და ზოგი ლეჩხუმს გადასახლდა, ზოგი რაქას, ზოგიც შორაპნის მაზრაში.

კოტეს პაპა — ქოჩო ყიფიანი და მისი ბიძაშვილი მამისთვალის გადმოსულან სევანეთიდან ქართლს და დამდგარან დიდ ივანე აბაშიძესთან მოურავად.

ქოჩო დასახლებულა ქვიშხეთს, მამისთვალის ბეკამს, რომელსაც დღესაც ყიფიანთ უბანს ეძახიან.

ქვიშხეთი იყო ნაწილი სააბაშიოსი. მთელი სააბაშიო იწყებოდა ხაშურის ქალიდან და გადადიოდა იმერეთს აბაშიძემდე.

ამოდენა ადგილ-მამული ეკუთვნოდა დიდ ივანე აბაშიძეს. პატარა ივანეს, ლევან აბაშიძეს და სხვ. — სულ იყოფოდა ექვს ნაწილად.

დიდმა ივანე აბაშიძემ რუსეთის მთავრობას უღალატა და გადაიხვეწა ოსმალეთს. ამის გამო მისი უძრავი მამული მთავრობამ წაართვა შემკვიდრეებს და სახაზინოდ ჩარიცხა. დღესაც ეს ნაწილი ხაზინას ეკუთვნის.

ქოჩო ყიფიანმა შეირთო ქართლში ფურცელაძის ქალი და ეყოლა ოთხი ქალი, ოთხიც ვაჟი: ქაიხოსრო, გიორგი, იოსები და დიმიტრი, რომელსაც ნაბოლავარს ეძახდნენ.

ქოჩო გარდაიცვალა სოფელ მერეთს და იქვეა დასაფლავებული ეკლესიის კარებთან.

კოტეს მამის — დიმიტრის სახელი ვის არ გაუგონია საქართველოში!

დიმიტრი ყიფიანი საქართველოს მშვენება, სიამაყე და სიწმინ-

დეა. მან თავისი თავი მსხვერპლად შესწირა თავის ერს. ქართველ-მა ერმა დიმიტრი ყიფიანში იცნო თავი, ხაამაღლა გამოაცხა-და თავისი მეობა და არასოდეს აღარ დაივიწყებს მას. დადგება ისე-თი დრო, როცა ქართველი ერი დიმიტრი ყიფიანს წმინდანად გამო-აცხადებს.

დიმიტრი ყიფიანი დაიბადა 14 აპრილს 1814 წ., ცოლი შეირთო 1845 წ. 22 იანვარს. კოტეს დედა ნინო, იაგორ ჭილაშვილის ასული. დაიბადა 1827 წ. 12 მაისს. იაგორ ანუ გიორგი ჭილაშვილი მსახუ-რებდა საქართველოს უმაღლეს წართველობაში (Верховное Гру-зинское Правление), შემდეგ სამუდამოდ დაბინავდა ღუშეთში, სადაც მას დიდი მამულები ჰქონდა. ნინო და მისი და ლიზა სწავ-ლობდნენ პეტერბურგში წმინდა ეკატერინეს სასწავლებელში, სა-დაც მათ სწავლა დაამთავრეს 1844 წელს.

კოტე ყიფიანი დაიბადა 1849 წ. მარტის სამს.

ვორონცოვის დროს თბილისში, სხვათა შორის, იტალიური ოპე-რაც იყო. ვორონცოვის სურვილი იყო, რომ მაღალი საზოგადოე-ბა წარმოდგენებს დაწერებოდა. რადგანაც დიმიტრი ყიფიანს იმ დროს დიდი თანამდებობა ექირა (Директор Походной Канцеля-рии), თავისი მეუღლით არც ერთ წარმოდგენას არ აკლდებოდა.

ნინო დღე-ღღეზე მორჩენას ელოდა, როდესაც წარმოდგენა გა-იმართა და, რადგანაც ვორონცოვი იქ იქნებოდა და მასთან თბი-ლისის მთელი მაღალი საზოგადოება, დიმიტრი და მისი მეუღლეც წავიდნენ.

შუა წარმოდგენა იყო, რომ ნინოს ლოყაში მუცელი ასტივდა და მაშინვე გამოეშურა სახლისაკენ. არ გასულა დიდი ხანი, რომ კოტე დაიბადა. ამგვარად კოტე ყიფიანი თითქმის თეატრში დაბა-დებულა.

ბედის მწერალს მისთვის თავიდანვე დაუწერია: შენ თეატრში დაიბადები, თეატრი იქნება შენთვის ყოველივე, თეატრს შეაღებ შენს ჭანლონეს და მასვე შეაბერდებიო.

კოტე მეორე შვილია. უფროსი იყო ნიკო. დიმიტრისა და ნინოს სულ ექვსი შვილი ჰყავდათ: ხუთი ვაჟი და ერთი ქალი. სამი ვაჟი ბავშვობაშივე დაიხოცა, დარჩნენ ნიკო, კოტე და ელენე.

ნიკომ სწავლა ჯერ თბილისში მიიღო, შემდეგ პეტერბურგში. უკანასკნელი ჩვიდმეტი წელიწადი ის ცხოვრობდა ბრიუსელში და დანიშნული იყო ენების პროფესორად. ნიკო აქ ატარებდა ჟან-მარ-ტენის გვარს. გარდაიცვალა ბრიუსელში და იქვეა დასაფლავებული-მისი დიდი სურათი ჰკიდია ბრიუსელის კონფერანს-ზალაში.

მხოლოდ მისი გარდაცვალების შემდეგ გაიგეს ბრაუსელში, რომ პროფესორი ეან-მარტენი იყო ნიკო ყიფიანი.

საზღვარგარეთ ცნობილი ქიმიკოსი ბარბალე ყიფიანი ნიკოს ქალია.

ოჯახური აღზრდა და კოტეს მასწავლებლები. მხატვრობის ნიქი. კოტე მიღის პეტერბურგს და შეღის სამხატვრო აკადემიაში. მოსკოვში გადმოსვლა და სააგრონომიო-სატყეო აკადემიაში შესვლა. სამშობლოში დაბრუნება. სამხახურში შესვლა. პირველი ნაბიჯი სალიტერატურო ასპირანტურაში. პირველი გამოსვლა სცენაზე.

დიმიტრის შეილებმა საკმაოდ საფუძვლიანი სწავლა ჯერ ოჯახშივე მიიღეს. ოჯახური სწავლის ერთი თვისება იმ დროს ის იყო, რომ ბავშვებს არაფერს აზეპირებინებდნენ: ტვინი მოექანცებათო. ამის გამო ზეპირად რისიმე დასწავლა დიდობაშიც მეტად უძნელდებოდა კოტეს, რადგანაც პატარაობიდანვე არ იყო მიჩვეული. შეილების აღზრდასა და განათლებას დიმიტრი ძალიან დიდ ყურადღებას აქცევდა და არათუ იმ დროს, ჩვენს დროშიაც ძალიან ძვირად ნახავთ ისეთ ოჯახს, სადაც ბავშვების აღზრდა-განათლება ისე იყოს მოწყობილი, როგორც ეს დიმიტრის ოჯახში იყო.

არავითარ ხარჯსა და დაბრკოლებას დიმიტრი არ ერიდებოდა, ოღონდ კი შეილებისათვის საუკეთესო განათლება მოეპოვებია. კოტეს მასწავლებლები იყვნენ თბილესის საუკეთესო პედაგოგები.

ბავშვები სწავლობდნენ შინ, სადაც მასწავლებლებად მოწვეული იყვნენ ბესარიონ ლოლობერიძე, ნიკოლოზ ლოლობერიძე, პირველი გიმნაზიის ინსპექტორი მონასტირსკი. დიმიტრის ოჯახში ხცობვობდნენ ფრანგები შარლე და ლეონტინა დიუშენი; ესენი ასწავლიდნენ ბავშვებს ფრანგულ ენას: შარლე — ვაჟებს, დიუშენის ქალი კი — დიმიტრის ქალიშვილს ელენეს.

ლეონტინა დიუშენი მისთხოვდა შემდეგ კოტე კოლუბანსკის და ამგვარად საჩუღამოლ საქართველოში დარჩა.

აღსანიშნავია ის გარემოება, რომ ქართული ენის მასწავლებელი დიმიტრის ოჯახში არ ყოფილა.

დიმიტრი მსახურისა ოა საზოგადო საქმეებში იყო გართული — ოჯახისათვის დრო აღარ რჩებოდა. ნინო რუსეთში იყო გაზრდილი, ამიტომ ქართული ნაკლებად იცოდა. ის მუდამ უმაღლეს საზოგადოებაში ტრიალებდა და ამგვარად ბავშვების მასწავლებელი ქართული ენისა იყო შვიდი მოსამსახურე, — დიმიტრის ყმება. თავისუფალ დროს სწავლის გათავების შემდეგ ბავშვები მოსამსახურეებში ტრიალებდნენ, და ალბათ ამის ბრალია, რომ კოტეს გლახობა მუდამ უყვარდა. საზოგადოდ იმ დროს ქართული ენის ცოდნასა და ქართულად ლაპარაკს ჩვენი მაღალი საზოგადოება დიდ

ყურადღებას არ აქცევდა. ქართული ენა დაბალ ენად ითვლებოდა და ამ ენის ხმარებას მალ-ალ წრეში ერიდებოდნენ.

სამწუხაროდ დღესაც არა გვაქვს შესისხლხორცებული ის აზრი, რომ ჩვენი ენა უნდა გავამეფოთ ჩვენს ოჯახებში და ჩვენს დაწესებულებებში.

ენა ერის არსებობის ერთი მთავარი ძარღვია და როცა ამ არსებობას ათასი ყვაე-ყორანი დასჩხავეს თავს, მაშინ სამშობლო ენის გამეფება ოჯახში და ოჯახს გარეთ გასაქიცხი უკიდურესობა კი არ არის, არამედ აუცილებელი საჭიროება; ენა სულია ერისა და სამშობლო ენაზე ლაპარაკი იგავე ვარჯიშობაა, გაწვერთნაა ეროვნული სულისა.

ქართული ენა კოტემ ისწავლა პეტერბურგში თექვსმეტი წლონამ. მისი ქართული ენის მასწავლებელი იყო მისივე ძმა ნიკო. ნიკოს პატარაობიდანვე ეტყობოდა დიდი ნიჭი ენების შესწავლისა; მუსიკაც ძალიან უყვარდა.

პატარა კოტე ნიჭიერი ბავშვი იყო და სწავლაც უყვარდა, მხოლოდ ნამეტანი ცელქობა უშლიდა ხელს. განსაკუთრებით შეუყვარდა მხატვრობა. როგორც კი დაინახა დიმიტრიმ, კოტეს მხატვრობის ნიჭი ეტყობაო, მაშინვე მოიწვია მასწავლებელი ბაბაევი, გამოჩენილი აკადემიკოსისა და მხატვრის ბრიულოვის მოწაფე. ამიტომ კოტეს ხუმრობით უწოდებდნენ მხატვრობაში ბრიულოვის შვილიშვილს.

ხატვაში იმდენად დახელოვნდა კოტე, რომ მას მიანდვეს ზღვან მედუზების დახატვა აკვარელით. ნახატი სამაგალითო გამოვიდა, ყველამ მოიწონა და პირველ გიმნაზიაში გამოჰკიდეს.

ბაბაევის სიკვდილის შემდეგ კოტეს მასწავლებლად მიიწვიეს მეფის მოადგილის მხატვარი ფილიპოვი. ფილიპოვმა დაჰხატა დიდი მთავრის ნადირობა ამალით ყარაიაში. კოტემ აკვარელით გადილო პირი ამ სურათისა. კოტეს ნახატი კარგი აღმოჩნდა.

ამგვარი სწავლა ოჯახში გაგრძელდა 1864 წლამდე.

ამ ხანებში გაათავა პეტერბურგის უნივერსიტეტი დიმიტრის ძმისწულმა, მწერლის ლევან ყიფიანის მამამ, დავით ქაიხოსროს ძე ყიფიანმა, მან გახსნა საუკეთესო პანსიონი თბილისში და ორ წელიწადს აქ იყვნენ მიბარებული კოტე და ნიკო.

პანსიონში მოწვეული იყვნენ საუკეთესო პედაგოგები და ორი ბავშვი დიმიტრის უჯდებოდა წელიწადში 4000 მანეთი.

აქედან კოტეს უნდოდა გიმნაზიაში გადასვლა, მაგრამ მეოთხე კლასში ეგზამენი ვერ დაიჭირა.

ამ ხანებში ახალგაზრდა კოტე უკვე ცნობილი მხატვარი იყო

დიმიტრიმ იფიქრა: რა საჭიროა მაინცდამაინც, რომ ჩემს შვილს გიმნაზია გავათავებო, დე თავის ბუნებრივ ნიქს გაჰყვესო.

ამ მიზნით დიმიტრიმ წაიყვანა კოტე პეტერბურგს 1866 წელს და მიაბარა სამხატვრო აკადემიაში.

კოტემ აკადემიაში დაჰყო ნახევარ წელიწადს და დიდის ხალისითა და გატაცებით სწავლობდა მხატვრობას.

შესაძლებელია, ის ახლა იქნებოდა გამოჩენილი მხატვარი, მაგრამ ბედმა სხვანაირად გადასწყვიტა. კოტეს ამხანაგ ნაუმოვისაგან გადმოედო თვალის საშინელი სენი — ტრახომა; სენისაგან, როგორც იქნა, განიკურნა, მაგრამ გამოჩენილმა თვალის ექიმმა ფრებელიუსმა გადაჭრით გამოუცხადა: თუ მხატვრობისათვის თავი არ დაგინებებია, უსათუოდ დაბრმავდებიო.

მეტი რალა გზა იყო! კოტემ დაანება თავი სამხატვრო აკადემიას და თვალცრემლიანი და გულდამწვარი გამოეთხოვა თავის საყვარელ საგანს. მაგრამ გარემოებამ დააპტკიცა, რომ მასში დამალული იყო და ნელა-ნელა იფურჩქნებოდა უფრო ძლიერი ნიჭი ადამიანის სულის ხატვისა სცენაზე.

კოტე ისევ გიმნაზიის კურსს დაუბრუნდა და გადასწყვიტა გიმნაზიის გათავება. იმ დროს პეტერბურგში განთქმული იყო პედაგოგი ალექსანდრე პუტიატა. კოტე და ნიკო ამასთან დაბინავდნენ. ნიკო უკვე სტუდენტი იყო, კოტე კი გიმნაზიაში სიმწიფის მოწმობაზე ეგზამენის დასაპერად ემზადებოდა.

პუტიატასთან კოტე დარჩა ერთ წელიწადს. აქედან გადავიდა მოსკოვს, დაიჭირა გიმნაზიის სრული კურსის ეგზამენი და შევიდა პეტროვსკის სააგრონომიო-სატყეო აკადემიაში.

აკადემიაში კოტე ოთხ წელიწადს სწავლობდა. მთელი კურსი აკადემიისა გაიარა და ის იყო საბოლოო ეგზამენები უნდა ჩაებარებინა, რომ მამისაგან ტელეგრამა მოუვიდა: შენი ჩამოსვლა აუცილებელიაო. დიმიტრი თურმე ავად გამხდარიყო, საქმე ბევრი ჰქონდა და კოტეს ჩამოსვლა საჭირო იყო, რომ საქმეებს გასძლოლოდა.

ამგვარად 1870 წელს კოტემ მოსკოვიდან გამოსწია სამშობლოსაკენ იმ მიზნით, რომ ისევ მალე დაბრუნებულიყო და სახელმწიფო ეგზამენები ჩაებარებია, მაგრამ სახლში ათასი საქმე დაუხვდა და იძულებული გახდა დარჩენილიყო.

გორის მაზრის სააბაშიოს ყველა მონაწილეებმა ამ დროს კოტეს მიმართეს თხოვნით და სთხოვეს თავისი მამულების უფროსი გამგებლობა. კოტემ თანხმობა გამოაცხადა, ჩაიბარა ტაშისკარა, ქვიშხეთი, ციხის ძირი, მონასტერი, ბელღეთი, სათიფე, დამჩხერვა-

ლი და სხვ. აწარმოებდა სხვა თავის საქმეებთან ერთად ამ მამულ-  
ბის საქმესაც და ყოველ წელიწადს თვითეულ მონაწილეს ცალკე  
უსწორებოდა.

ამ წანებში კოტე ძალაუფლებურად სამსახურში შევიდა, მაგრამ  
ამ მამულების გამგებლობისათვის მაინც არ დაუნებებია თავი.

როგორ შევიდა კოტე სამსახურში?

მეფის მოადგილის საბჭოს ერთი წევრი იყო ნეჟინსკი, რომელ-  
მაც წარადგინა პროექტი აქციზის შემოღებისა კავკასიაში არაყსა  
და თუთუნზე.

პროექტი მთავრობან წიოწონა და 1873 წელს დაამტკიცა კიდეც.  
ნეჟინსკი გახარებული იყო, რომ იმისმა პროექტმა გაიმარჯვა  
და სადარბაზოდ ეწვია დიმიტრის.

— აბა, ბატონო დიმიტრი, მომილოცეთ, რომ ჩემმა წინადად-  
ებამ გაიმარჯვა და ყმაწვილი კაცები მიშოვნეთ ახლა სამსახურისა-  
თვის, — მიმართა მან რუსულად დიმიტრის და ამავე დროს კოტეს  
გადაპხედა: — ყმაწვილო კაცო, არ გინდა ჩემთან სამსახური?

— უარი არ უთხრა! — ქართულად წაულაპარაკა დიმიტრიმ  
კოტეს.

კოტეს სრულებითაც არ უნდოდა სამსახურში შესვლა. მაგრამ  
რადგანაც ასეთი იყო მამის სურვილი, დასთანხმდა.

კოტე დანიშნეს ქუთაისში მესამე ნაწილის სააქციზო ზედამ-  
ხედვის უმცროს თანაშემწედ. სამსახურში კოტე დიდხანს არა ყო-  
ფილა. როდესაც ნეჟინსკი გარდაიცვალა, იმის თანამდებობა ჩა-  
აბარეს ვინმე ფესუნის, რომელიც გვარტომობით ბერძენი იყო.  
კოტეს თავის ახალ უფროსთან უსიამოვნება მოუვიდა და სამსა-  
ხურს თავი დაანება. სულ დაპყრო სამსახურში ცამეტ თვეს.

ამ დროს გამოვიდა კოტე სალიტერატურო ასპარეზზე. ქანანა-  
შვილის რედაქტორობით გამოდიოდა „მოამბე“ და კოტემ აქ დასტა-  
მბა თავისი პირველი წერილი: „მოგზაურობა სვანეთში“.

1875 წელს მეფის მოადგილემ დიდმა მთავარმა მიიწვია კოტე  
ბორჯომის მამულების უფროსი გამგებლის თანაშემწედ. კოტე მაშინ  
ერთადერთი ქართველი იყო უმაღლესი სამეურნეო სწავლით აღჭუ-  
რვილი. კოტემ მიიღო ახალი თანამდებობა და თავისი შრომითა და  
საქმის ცოდნით მალე დაიმსახურა დიდი მთავრის პატივისცემა.

დიდი მთავარი და მისი მეუღლე ხშირად მიიწვევდნენ ხოლმე  
მას თავისთან და დიდხანს მსჯელობდნენ მამულის საქმეების გაუმჯო-  
ბესების შესახებ.

ამ დროს კოტე უკვე ცნობილი მსახიობი იყო და დიდი მთავარი

ჭშირად ეტყოდა ხოლმე თავის მეუღლეს, როცა კოტე მათთან იყო: ყიფიანი განათლებით აგრონომია, მოწოდებით კი მსახიობიო.

ამ ხანებში დიმიტრი ყიფიანი ედავებოდა ხაზინას ბორჯომის ხეობის ერთ მებათედს. დიმიტრიმ ეს საქმე შემდეგში კიდეც მოიგო. ამის გამო დიდი მთავრის მთელი მასულის უფროსმა გამგემ კოტეს გამოუცხადა: მამათქვენი ჩვენ ადგილებს გვედავება და გვართმევს და ამიტომ ჩვენ ერთად ვერ ვივარგებთო.

კოტემაც თავი დაუკრა და დაანება თავი სამსახურს.

დიმიტრიმ რომ გაიგო მიზეზი სამსახურიდან კოტეს დათხოვისა, გაიცინა და უთხრა:

— მამების ცოდვებისათვის შვილები აგებენ პასუხს!

ამგვარად დაიწყო და დამთავრდა კოტეს მოღვაწეობა სამსახურის ასპარეზზე.

როგორ და როდის დაიწყო მისი მოღვაწეობა იმ ასპარეზზე, რომელზედაც მან თავი ისახელა და თავისი ერიც ასახელა? კოტე პირველად სცენაზედ გამოვიდა ჩვიდმეტი წლისა. ეს იყო 1868 წელს. მაგრამ სანამ განვიხილავდეთ კოტეს მოღვაწეობას სასცენო ასპარეზზე, მეტი არ იქნება მოკლედ თვალი გადავაავლოთ ქართული თეატრის ისტორიას.

ქართული თეატრის დასაწყისი. ვორონცოვი და გიორგი ერისთავი. კოტეს პირველი თამაშობა. ახალი ჭგუფი წარმოდგენის განამართავად. კოტე და ელენე. კოტე და ხუნდუკიანიცი. მუღმივი დახის დაარსება. კოტეს გამოსვლა რუხულ სცენაზე. კოტეს რუხეთში იწვევენ.

თუმცა მეთვრამეტე საუკუნის გასულს საქართველო მეტად კრიტიკულ მდგომარეობაში იყო, მაგრამ მოწინავე საზოგადოებაში სწორედ ამ დროს ჩაისახა სურვილი თეატრის შექმნისა. ამ დროს იწყებენ თარგმანს უცხო დრამატურებისას. ექვს გარეშეა, ქართველი საზოგადოება ემზადებოდა საკუთარი თეატრის დასაარსებლად, მაგრამ ჩვენი ისტორიის ჩარხი სხვანაირად დატრიალდა და ქართველ ხალხს თეატრისათვის აღარა სცხელოდა. დიდ იმედებს მოჰყვა დიდი უიმედობა, ამბოხება, შეთქმულება, სასოწარკვეთილება და ბოლოს გარეგნული სიმშვიდე და სულიერი მღელვარება.

1845 წელს საქართველოში მეფის მოადგილედ დაინიშნა ვორონცოვი. მან იფიქრა: თუ ქართველ მოწინავე საზოგადოებას გასართობი არ გავუჩინე, წარსულისაკენ ცქერას თავს არ დაანებებსო. ამასთან ის განათლებული, ჭკვიანი და ლმობიერი ადამიანი იყო, ქართველების წარმატება უნდოდა და მოინდომა ქართული თეატრის დაარსება.



ამ დროს გიორგი ერისთავს უკვე ჰქონდა რამდენიმე კომედი-  
ეს კომედიები ხელნაწერად ვრცელდებოდა საზოგადოებაში.

ვორონცოვმა გაიგო ეს, დაიბარა გიორგი ერისთავი და მიანდო  
მას ქართული წარმოდგენების მართვა. გიორგის თავისი დიდხნის  
საწადელი აუსრულდა, ენერგიულად მოჰკიდა საქმეს ხელი, მოამზა-  
და მოთამაშენი და პირველი ქართული წარმოდგენა გაჰმართა 1850  
წელს 2 იანვარს. ითამაშეს გიორგი ერისთავის კომედია „გაყრა“.   
ქართული საზოგადოება დიდის აღტაცებით მიეგება პირველ წარმო-  
დგენას. ვორონცოვმა დიდი მზრუნველობა გაუწია თეატრს და მისი  
განკარგულებით ქართულ თეატრს ყოველწლიურად დახმარება  
ეძლეოდა ხაზინიდან. ვორონცოვი გადაიყვანეს და 1855 წელს  
ქართულ თეატრსაც მოესპო ხაზინიდან დახმარება. ამის შემდეგ  
ივანე კერესელიძემ შეადგინა ამხანაგობა, რომელიც ხანდახან გამარ-  
თავდა ხოლმე წარმოდგენას. მაგრამ მალე ლეკებთან ომი გამწვავდა,  
შემდეგ ბატონყმობის გადავარდნის მოლოდინმა საზოგადოება დაა-  
შორა თეატრს და ამგვარად ქართული წარმოდგენების მართვა სრუ-  
ლებით შესწყდა.

1868 წელს ზაფხულის მიწურულში ხელახლა იმართება ქართუ-  
ლი წარმოდგენა საქველმოქმედო მიზნით. თამაშობენ საფრანგეთის  
დრამატურგის კომედიას „ცოლის შერთვევინება“, დიმიტრი ყიფიან-  
ის თარგმანს.

კოტე ყიფიანი ამ წარმოდგენაში პირველად გამოვიდა სცენაზე.  
ის მაშინ იყო 17 წლისა. პიესაში არის ქალი დორიმენას როლი და  
პაეისა. ქალის გამოსვლა სცენაზე იმ დროს ისეთ თავისმოჭრად  
ითვლებოდა, რომ დედამიწის გადართიალება უფრო ადვილი იყო,  
ვიდრე მსახიობი ქალის შოვნა. დორიმენას როლში გამოიყვანეს  
ვასილ გიორგის ძე მაჩაბელი, რომელსაც ჩააცვეს გრძელკუდიანი  
კაბა. შლეიფი მიბლანდული იყო და ზოგან ქინძისთავეებით მიბნეული  
კაბაზე. პაეის როლი მისცეს კოტეს. მას შლეიფი უნდა ჰკავებოდა  
ხელში.

„რომ დავინახე უშველებელი დარბაზი თეატრისა და აუარებე-  
ლი ხალხი, მე ჯერ გავმტერდი, დავადე პირი და გავშეშდი ერთს  
ალაგას“, — მოგვითხრობს კოტე ყიფიანი („ჩემი არტისტობის თავ-  
გადასავეალი“, — „ფასკუნჯი“). მაჩაბელი, რომელსაც თურმე მშვე-  
ნიერი კომწია ქალისაგან ვერ გაარჩევდით, წინ მიიწევედა, კოტე კი  
ერთ ალაგას იდგა და, როცა მაჩაბელმა ღონიერად გაიწია, შლეიფი  
კოტეს ხელში შერჩა. ასტყდა დამსწრე საზოგადოებაში საშინელი  
სიცილი და ტაშის ცემა. კოტეს შერცხვა და გავარდა კულისებში.

— ყოჩაღ, კოსტიუკ, ჩინებულად შეასრულე შენი როლი. — ამასხარავებდა ამის შემდეგ კოტეს მამა.

1871 წლებიდან თბილისში არსდება წრე დიმიტრი ყიფიანისა და იოსებ მამაცაშვილის ხელმძღვანელობითა და მეთაურობით. წრის ზიზანი იყო წარმოდგენების მართვით ფული ეგროვებია და დახმარება აღმოეჩინა ღარიბი და ნიჭიერი სტუდენტებისათვის. სცენის-პოყვარეთა რეჟისორად იყო ხოლმე ხან დიმიტრი ყიფიანი, ხან ანტონ ფურცელაძე, ხან ვახტანგ თულაშვილი, რომელიც ამავე დროს წრის ზაზინადარიც იყო.

პირველ ხანებში წარმოდგენის მოწყობის საქმეს ის აძნელებდა, რომ ქართველი ქალები სცენაზე სათამაშოდ არ გამოდიოდნენ.

ამისთანა გაკვირვების დროს ქართულ სცენას დაეხმარნენ სომხები და ქალების როლს ასრულებდნენ სათინიკა ჩიმიშვიანი და ნატალია ნაზარიანი.

რემდეგ და შემდეგ ქართველი ქალებიც ნელა-ნელა შეეჩვივნენ თამაშს და წრე საკმაოდ გაიზარდა. წრეს შეადგენდნენ დიმიტრი ყიფიანი, ანტონ ფურცელაძე, ვახტანგ თულაშვილი, ლადო აბაშიძე, კოტე მაისურაძე, ნიკო ავალიშვილი, პეტრე უმიკაშვილი, ალექსანდრე ინაშვილი, კნ. ნინო ორბელიანისა, მამო ხერხეულიძისა, ელენე ანტონოვისკისა, იოსებ მამაცაშვილის ქალები, ოლიკო გურამიშვილისა და ბევრი სხვანი.

ყველა წარმოდგენაში დიდ მონაწილეობას იღებდნენ კოტე, მისი მამა ნიკოლოზი და ელენე. ელენე თამაშობდა ყოველგვარ როლს, უფრო კი ანჩხლ ქალებს და გრან-დამებს. 1877 წელს ელენე გაპყვა ცოლად ანტონ ლორთქიფანიძეს და გადასახლდა ქუთაისს.

ელენე დიდი ენერჯიის ქალი იყო. ყველა საზოგადო საქმეში იღებდა მონაწილეობას, სწერდა და სთარგმნიდა. ელენეს, კატო ნიკოლაძისა და კატო ჭყონიას თაოსნობით ქუთათურმა ქალებმა დააარსეს ყოველთვიური ჟურნალი „ქართული ბიბლიოთეკა“, რომელშიც ელენე დიდ მონაწილეობას ღებულობდა.

ყველაზე თვალსაჩინო ალაგი აქ დასახელებულ ჯგუფში, როგორც მსახიობს, კოტეს ეჭირა.

ამპლუა რა იყო, მისთვის არ არსებობდა. ნიჭის მრავალგვარობა, რის შესახებაც ქვევით უფრო ვრცლად გვექნება ლაპარაკი, კოტეს თავიდანვე დაეტყო. ის ერთნაირის ხელოვნებით თამაშობდა როგორც მოხუცს, ისე ახალგაზრდას, როგორც ტრადიკულ, ისე კომიკურ პირს.

ამ ხანებში კოტეს უთამაშნია, სხვათა შორის, „დამნაშავის ოჯახი“ — დამნაშავის როლი, „შემოსავლიან ადგილში“ — იურო-

ვის როლი, „ვენეციელ ვაჭარში“ შეილოკის როლი, „გაყრაში“ ანდრეაფარის როლი და სხვ. წარმოდგენები და კოტეს მოხდენილი თამაში დიდ საზოგადოებას უყრიდა თავს. ქართველი საზოგადოების მოწინავე ნაწილი არც ერთ წარმოდგენას არ აკლდებოდა. ყოველი წარმოდგენა ნამდვილი დღესასწაული იყო ჩვენს ცხოვრებაში.

რეპეტიციები იმართებოდა ხან დიმიტრი ყიფიანის ოჯახში, ხან იოსებ მამაცაშვილთან, ანდრია ხერხეულიძისას, პეტრე უმიკაშვილთან, ანტონ ფურცელაძესთან და სხვ.

1871 წელს გურამიშვილის ოჯახში წრე ამზადებდა სუნდუკიანცის „პეპოს“. კოტე მაშინ ჯერ კიდევ სრულებით უცნობი იყო და მას აკისრეს სუფლიორობა. პეპოს თამაშობდა ჩიმიშვიანი, გიქოს — ალექსანდრე ინაშვილი, შუშანას — ნატალია ნაზარიანი, კეკეს — სათინიკა ჩიმიშვიანი, რეპეტიციას ხელმძღვანელობდა სუნდუკიანცი. ინაშვილმა ისეთი ხმით დაიწყო გიქოს როლის ასრულება, თითქოს მოხუცს ეი არა, ყარამანს თამაშობსო. ბევრი უსწორა სუნდუკიანცმა, მაგრამ ინაშვილმა ვერა მოუხერხა რა ხმას. ეძებეს სცენის-მოყვარეთა შორის გიქოს როლის შემსრულებელი, მაგრამ ძებნამ უქმად ჩაიარა.

— კაცო, მოდი აქა და მე გასწავლი, თუ როგორ უნდა სთქვას შენი სათქმელი, — მიმართა კოტემ ინაშვილს, ჩაიხრინწიანა ხმა და ისე მიჰბაძა მოხუც გიქოს, რომ სუნდუკიანცი ალტაცებაში მოვიდა, მივარდა კოტეს, აკოცა შუბლში და წამოიძახა: აი, ჩემი გიქო.

კოტე გამოვიდა გიქოს როლში და საერთო ტაში და ალტაცება გამოიწვია.

ამგვარად კოტეს თავიდანვე დაეტყო თავისი ნიჭის ერთი ნიშნობლივი თვისება — მოხუცის როლის იშვიათი შესრულება.

როგორც უკვე მოვიხსენიე, იმ ჯგუფის მიზანი, რომელიც სამოცდაათიანი წლებიდან ქართული წარმოდგენების საქმეს განაგებდა, ფულის შექმნა იყო ღარიბ მოსწავლეთა დასახმარებლად.

ამ ჯგუფის შემწეობით რუსეთსა და საზღვარგარეთ აღიზარდა ორმოცამდე ახალგაზრდა. „ამოდენა ყმაწვილ-კაცებში მხოლოდ ერთმა დაგვიბრუნა ჩვენ იმაზე დახარჯული ფული და სხვამ ყურიც არ გვათხოვა, არც არა გვიპასუხეს რა, როცა ფულის დაბრუნებაზე გავახსენებდით, — მოგვითხრობს კოტე ყიფიანი თავის მოგონებაში: — ბევრი ლანძღვა-გინებაც გვაკადრეს, რომ, იმათის აზრით, ფულებს იმდენს არ ვუგზავნიდით, რამდენსაც გვთხოვდნენ ხოლმე. ამ გარემოებამ იქამდის მიგვალწვია, რომ თითქმის ყველას აგვიცრუვდა გული და ჩვენი წრეც დაიშალა“. წარმოდგენები ამის შემდეგ იმართებოდა იშვიათად ხან კლუბებში, ხან კერძო ოჯახში. ამ წარმო-

დგენების გამართვაში დიდ მონაწილეობას იღებდა ბ. როინაშვილი.

ქართული საზოგადოება იმდენად აომწიფდა, იმდენად შეეჩვია თეატრს, რომ საკუთარი მუდმივი დასის დაარსება მტკიცე ნიდაგზე აუცილებელი შეიქნა. ეს საქმე ითავეს დიმიტრი ყიფიანმა, გიორგი თუმანიშვილმა, დავით ერისთავმა, ნიკო ავალიშვილმა, იოსებ ბაქრაძემ, აკაკი წერეთელმა, ალექსანდრე სარაჯიშვილმა, ილია ჭავჭავაძემ და ნიკო ნიკოლაძემ.

ნიკო ნიკოლაძეს მიანდევს დრამატიული საზოგადოების წესდების შედგენა. ნიკოლაძემ წესდება შეადგინა, შეიმუშავეს ეს წესდება დიმიტრი ყიფიანმა და ილია ჭავჭავაძემ. შეაგროვეს ზოგი ხელის მოწერით, ზოგი წარმოდგენებით საჭირო თანხა და ამგვარად დაარსდა დრამატიული საზოგადოება თავისი გამგეობითა და მუდმივის დასით.

მუდმივმა დასმა პირველი წარმოდგენა გამართა 1879 წელს 5 ენკენისთვის. წარმოდგინეს კნ. ბარბარე ჯორჯაძის კომედია — „რას ვეძებდი და რა ვიპოვე“.

ამ მუდმივ დასში მიიწვიეს კოტე ყიფიანი.

„ჩვენს თეატრს ერთბაშად გამოუჩნდა ოთხი ფრიად ნიჭიერი და სასარგებლო მოთამაშე: მ. საფაროვი, ნ. გაბუნია, ვ. აბაშიძე და კოტე ყიფიანი, — ვკითხოლობთ „ქართულ თეატრში“ (1889 წ. გვ. 18). — როგორც ყოველს მაგარს შენობას ეჭირვება ხოლმე ოთხი დედაბოძი, ოთხი კედელი, ისე ჩვენს თეატრსაც გაუჩნდა ოთხი დედაბოძი, ოთხი საიმედო საძირკველი, რომლებზედაც დიდი და ტურფა შენობის აგება შეიძლებოდა“.

ამ საძირკველზე მართლაც ტურფა შენობა აშენდა. ქართული თეატრი გაიზარდა, გამრავლდა. ქართული წარმოდგენები მოედო საქართველოს ქალაქებს, დაბებსა და სოფლებს. ქართველმა არტი-სტებმა შეიტანეს სინათლე საქართველოს ყოველ კუთხეში.

ეს მძიმე, დიდი ეროვნული საქმე თავის მსცოვან ამხანაგებთან ერთად იშვიათის ენერგიით, მხნეობით, დაუღალავის შრომითა და თავდავიწყებით შეასრულა კოტე ყიფიანმა. აი ამისთანა ადამიანზე არის ზედგამოჭრილი პოეტის სიტყვები:

ნეტავი ბევრი გაზარდოს  
შენისთანები დედამა.

ქართველი მსახიობი სრულებით განსხვავებულ პირობებში მუშაობს. აიღეთ ევროპის მსახიობი და ევროპის სცენა. გამოჩენილი მსახიობები ხშირად ერთს ან ორს ტიპს ასრულებენ. მათ შესწავლილი აქვთ ერთი ან ორი ტიპი და მთელი თავისი სიცოცხლე ამ

ტიპებსა თამაშობენ. ჩვენმა მსახიობმა კი მარტო ერთი სეზონის განმავლობაში უნდა შექმნას სულ უკანასკნელი ოცი ტიპი მაინც.

აიღეთ ახლა ევროპის სცენა. მთელ სეზონს ერთიანად ორი პიესა ჰყოფნის. ჩვენს სცენაზე კი ერთი და იგივე პიესა რომ ზედიზედ გაიმეოროთ რამდენჯერმე, ხალხი აღარ მოგეკარებათ.

მიუხედავად ასეთის პირობებისა ჩვენი მსახიობები მაინც პირნათლად ასრულებენ თავის მოვალეობას და სხვებს არ ჩამოუვარდებიან.

რატომ?

იმიტომ რომ ქართველ ადამიანს ღმერთმა ნიჭი უხვად მისცა და, როცა ის არ ზარმაცობს, სასწაულსა ჰქმნის.

როცა ყოველივე ამას შეუწონებთ ქართველი მსახიობის უზრუნველყოფას, არ შეიძლება არა თქვათ: დიდი გამბედავია ჩვენი კაცი, როცა ის მსახიობის გზას ირჩევსო.

დღევანდელი დღე ქონებრივის მხრით ქართველი მსახიობისთვის ოქროს ხანაა იმ დროსთან შედარებით, როდესაც კოტე ყიფიანი სასცენო ასპარეზზე მტკიცე და გაბედულის ნაბიჯით გამოვიდა. მეორეს მხრით, როგორც უკვე მოვიხსენიე თავში, კოტესათვის ყველა გზა ღია იყო კეთილი და ბედნიერი ცხოვრებისაკენ; მაგრამ კოტე ვერაფერმა ვერ სძლია და მან თავიდანვე გადაწყვიტა თავისი ნიჭი, ახალგაზრდობა, ჯან-ღონე, სწავლა, ცოდნა — ყოველივე მსხვერპლად მოეტანა საყვარელი სამშობლოს წინაშე.

— აჰა, მიიღე ჩემგან ყოველივე, რაც კი მე გამაჩნია, სამაგიერო მე არაფერი მინდა! — უთხრა კოტემ თავის ქვეყანასა და ხალხს და შეუდგა სხვებთან ერთად ქვეყნის აღორძინების საქმეს.

მას შემთხვევა ჰქონდა, როგორც მსახიობს, სახელიც დიდი შეეძინა და სახრავიც, მაგრამ არ მოინდომა.

რატომ? სახელსა და ქონებაზე ერთად ვინ გიყი იტყვის უარს! ამისთანა გიყი სწორედ კოტე იყო:

მას სამშობლო და მშობლიური სცენა თავის თავზე უფრო უყვარდა.

აი ამისი დამამტკიცებელი საბუთიც:

დიმიტრის ოჯახში ხშირად დაიარებოდა ალექსანდრე ივანეს ძე პალმი, რომელსაც კოტეს თამაში ძალიან მოსწონდა. იმის შვილს სერგეი პალმს თბილისში ჰყავდა რუსული დასი, რომელშიაც ერთ საუკეთესო მსახიობად ითვლებოდა გორევის ქალი. ამ დასთან ერთად კოტემ ითამაშა რუსულ სცენაზე ოსტროვსკის „შემოსავლიან ადგილში“ — ლენერალ ვიშნევსკის როლი.

გორევას საშინლად მოეწონა კოტე, მიიხზო თავისთან და დაუწყო რჩევა:

— ქართულმა სცენამ რა უნდა მოგცეს? ენა მშვენივრად იცი, გარეგნობა კარგი გაქვს, ნიჭი დიდი. წამოდი ჩემთან პეტერბურგს, მოსკოვს, სახელიც დიდი გექნება და შემოსავალიც.

ამგვარსავე რჩევას აძლევდა კოტეს ალექსანდრე პალმი, რომელიც ცალკე დიმიტრის ემუდარებოდა: შენი შვილი გაგვატანეო.

კოტეს უნდოდა გაეგო: ნეტავი რას მეტყვის მამაჩემი, ამათი რჩევა რომ შევატყობინოო, და ერთ დღეს გორევის ქალის ნალაპარაკევი გადასცა მამას.

— როგორი მსახიობი ხარ? — ჰკითხა დიმიტრიმ წყრომის კილოთი, თუმცა თვითონაც კარგად იცოდა, როგორი მსახიობი იყო კოტე.

— პირველხარისხოვანი, ასე ამბობენ. — მიუგო კოტემ.

— შენ აქ პირველი ხარ, იქ კი მეორეხარისხოვანი იქნები. — მიუგო დიმიტრიმ. მას ეგონა, რომ კოტეს გადაწყვეტილი ჰქონდა რუსულ სცენაზე გადასვლა და ამით უნდოდა კოტესათვის თავისი განზრახვა შეეცვლევინებინა.

მაგრამ კოტეს ერთხელაც არ გაუვლია გულში სამშობლო სცენის მიტოვება.

„იმაზე ბევრი არა მიფიქრია რა და გორევის ქალსაც და პალმსაც ცივი უარი შევუთვალე და ვირჩიე სამშობლო სცენაზე დარჩენა, რომელიც სულით და ხორციით დიდად შემეყვარდა, — მოგვიტხოვრობს კოტე. — ვარჩიე, ვემსახურო ჩემს სამშობლოს, ჩემს ქართველ საზოგადოებას და არა სხვას ვისმე, რომლისთვისაც მე უცხო ვიყავი; ისევე ჩემიანებში მერჩივნა ჰიერი, ვიდრე ლხინი უცხოთა შორის და დავრჩი აქ“.

კოტე და ამჟღავნა კოტეს რეპერტუარი. კოტეს ხაყვარელი ტიპები. ძველი რეცენზიები კოტეს შესახებ. წერილი „ივერიიდან“. კოტე, როგორც მსახიობი. კოტეს მიერ შექმნილი ტიპები. კოტეს დამოკიდებულება ამხანაგებთან. კოტე და თეატრა. შეფე ლირი. კოტე კერძო ცხოვრებაში. კოტე როგორც მოქალაქე.

როგორც უკვე მოვიხსენიეთ, საზოგადოების ყურადღება კოტე ყიფიანმა სამუდამო დასის დაარსებამდე ჯერ კიდევ ბევრით ადრე მიიპყრო, როცა ის კლუბებსა და კერძო ოჯახებში თამაშობდა. კოტე საუკეთესო სცენისმოყვარედ ითვლებოდა. სამუდამო დასში მან თავიდანვე საპატიო ალაგი დაიკავა. ვისაც ჩემი სიყმაწვილე არ უნახავს, ღმერთმა ჩემი სიბერე იმას ნუ ანახოსო, ამბობს ქართული ანდაზა. თავის სიცოცხლე კოტემ შეუწყვეტელ შრომაში გაატარა

და, მიუხედავად ამისა, ახლაც გვიტაცებს, გვაღელვებს, გულს ხან ტკბილად გვიტოკებს, ხან სევდის შორეულში გვაგდებს მისი თამაში.

კოტეს ახლანდელი თამაში ჩვენ ვერ გვეტყვის იმას, თუ რა იყო კოტე მაშინ, როცა იმის ახალგაზრდა გულს დროისა და ჯათის დალი არ აჩნდა ჯერ.

მაგრამ ცარიელ ქებაში რომ არავინ ჩამოგვართვას, ჯერ სხვანაირად ვუვლით ყურადღებით.

„კოტე ყიფიანი დრამატული არტისტი, — ვკითხულობთ „ქართულ თეატრში“. — ეგრეთწოდებულ დრამატულ რეჟონიერის ამპლუაზე დღემდე ბადალი არა ჰყავს; არა ჰყავს აგრეთვე ბადალი მოხუცებულ, ბებრების კომიკურს როლებში, რომლებსაც დიდის ხელოვნებით ასრულებს ხოლმე. ამ მხრივ კოტე ყიფიანის ნიჭი სწორედ შესანიშნავია. ძნელად გამოვა არტისტი, რომ ერთის და იმავე ხელოვნებით და ბუნებრივის სიმართლით ითამაშოს დრამატული და კომიკური როლები, ბებრები და ახალგაზრდები. ამ შემთხვევაში კოტე ყიფიანი სრულებით არაჩვეულებრივ მოვლენას წარმოადგენს ჩვენს სცენაზე მაინც“.

დომიტრი ყიფიანის შეხედულებით ნიჭიერი მსახიობისათვის ამპლუა არ უნდა არსებობდეს. ამავე აზრს უნერგავდა ის კოტეს და ურჩევდა: ყველაფერი ითამაშე, ყოველგვარ როლში გამოდიო.

უამბულოდ თამაში, — აი უმაღლესი ხელოვნება ბევრის აზრით.

შეიძლება დავეთანხმოთ ან არ დავეთანხმოთ ამგვარ მოძღვრებას, ხოლო ეს კი ცხადია, რომ კოტემ ამგვარი შეხედულება უნაკლულად დაამტკიცა სცენაზე და დაგვარწმუნა, რომ მას ერთნაირის ხელოვნებით შეუძლია წარმოდგენა სრულებით სხვადასხვა წლოვნების, გონების, ხასიათის, ტემპერამენტის, წრის, წოდების ტიპებისა.

რა არის საერთო, მაგალითად, ჟან ბოდრსა და სოსიას შორის? ან და რევაზ ფანტიაშვილსა და სვიმონ ლეონიძის შორის? ერთსაც და მეორესაც კოტე ყიფიანი იშვიათის ხელოვნებით ასრულებს.

გადაავლით კოტე ყიფიანის რეპერტუარს თვალი: მეფე ლირი, ვენეციელი ვაჟარი, რევაზ თავქარიანი, ჟან ბოდრი, სვიმონ ლეონიძე, გიქო, ზამბახოვი, გოროდნიჩი, ოსიპი, სიზოვი, ანდრუყაფარ, გვრიტიშვილი, ელიზბარ ერისთავი და მრავალი სხვა. ამ უბრალო ჩამოთვლიდანაც ნათლად დაინახავს მკითხველი, თუ რამდენად მრავალმხრივია კოტეს ნიჭი.

მიუხედავად ამისა, რომ ერთგვარის სინამდვილით ჰქმნის კოტე სხვადასხვა ტიპის სურათს, მას მაინც განსაკუთრებით მოსწონდა და

მოსწონს ისეთი როლები, საცა საჭიროა დახატვა ადამიანის სულის-  
კვეთებისა, ფსიქოლოგიისა და შესაფერი მიმიკისა.

აქვე საჭიროა აღვნიშნოთ, რომ კოტე სახის გამომეტყველებას,  
მიმიკას სარკის შემწეობით სწავლობდა.

ამგვარად კოტეს უფრო მოსწონს ტრადიკული როლები. მისი  
საყვარელი ტიპებია მეფე ლირი, რიშელიე, კორადო, შეილოხა,  
სვიმონ ლეონიძე.

თვალი რომ გადაავლოთ იმ დროის რეცენზიებს, როცა ჩვენში  
სამუდამო დასი შესდგა, კოტე ყიფიანის შესახებ დაუსრულებელი  
ქების მეტს ვერას წაიკითხავთ. აქა-იქ ხანდახან უსაყვედურებენ,  
როლი არ იცოდაო. უნდა გამოვტყუდეთ, ეს საყვედური ზოგჯერ  
მართალია. საზოგადოდ ქართველმა მსახიობებმა თავისი როლები  
ხეირიანად არ იციან ხოლმე.

ბევრი ამ მოვლენას სიზარმაცითა ხსნის. ჩემის შეხედულებით  
ქართველ მსახიობს სწორედ რომ ზარმაცს ვერ ვუწოდებთ. თვეში  
რამდენიმე ახალი პიესის გაზეპირება ხუმრობა საქმე არ არის.

კოტე ყიფიანი ნამეტანი შრომისმოყვარეა. ყოველი როლი  
ხელახლად უნდა გადასწეროს თავიდან ბოლომდე, თუნდა ათჯერაც  
რომ ჰქონდეს ნათამაშევი, როცა კოტეს ასწავლიდნენ, სისტემა  
სწავლისა იმ დროს სხვანაირი იყო: მისი მასწავლებლები დაზეპირე-  
ბის წინააღმდეგნი იყვნენ. კოტე პატარაობიდანვე არ მიაჩვიეს ზეპა-  
რად რისამე დასწავლას და დღემდე მას ეს ნაკლი შერჩა: რისიმე  
დაზეპირება მეტრამეტად ეძნელება.

აბა ყური დაუვადოთ რეცენზიებს.

1879 წელს ბათუმში უთანაშინიათ „ძალად ექიმი“<sup>1</sup>, და, აი, რას  
ვკითხულობთ კოტეს შესახებ: „თათუას როლს ასრულებდა კოტე  
ყიფიანი და უნდა ვსთქვათ, რომ ფრიად ნიჭიერი მოთამაშე ყოფილა.  
ეტყობოდა, რომ თამაშის დროს ის სხვას არაფერს ფიქრობდა, გარდა  
იმისა, რომ საზოგადოებისათვის ნამდვილი მევაჟსე გამოეხატა“.

„შემოსავლიან ადგილში“ კოტეს უთამაშნია იუსოვის როლი  
და ამის გამო რეცენზენტი სწერს: „კ. ყიფიანს ნიჭი, მიხერა-მოხერა,  
ენა, სცენის ცოდნა და სხვა ყველაფერი სრულ ნებას აძლევს, რომ  
იუსოვისთანა ძველი ჩინოვნიკის როლი კარგად ითამაშოს“.

კოტე ყიფიანი გამოვიდა სუნდუკიანცის „პეპოში“ გიქოს რო-  
ლში. ამის შესახებ რეცენზიაში ვკითხულობთ: „დამჯდარ, აუჩქა-

<sup>1</sup> მოლიერის კომედია, ქართულად გადმოკეთებულია გ. ერისთავის მიერ.  
იხ. რეცენზია—„დროება“, № 149, 1879 წ., 19 ივლისი, „ქართული ტრუპა ბათუმ-  
ში“. — ვ. წ.



რებელ მოხუცის გიქუას როლს კოტე ყიფიანი ისე ტიპიურად თამაშობდა, რომ თქვენი თავი თეატრში კი არ გეგონათ, არამედ გეგონებოდათ, რომ ნამღვილი ხორცშესხმული მოხუცი სდგას თქვენ თვალწინო<sup>ა</sup>.

ნუ დაგავიწყდებათ, რომ კოტე ამ დროს ფრიად ახალგაზრდა იყო.

1882 წელს კოტე ყიფიანმა თავის საბენეფისოდ დასდგა ჭიაკომეტის დრამა „კაცის მკვლელი“ და თვითონ თამაშობდა კორალოს.

აი რას სწერს ამის შესახებ რეცენზენტი: „ოთხშაბათს, 3 ნოემბერს, ჩვენი ნიჭიერის და სცენის ერთი განმანათლებლის ბენეფისი იყო... ბ-მა კ. ყიფიანმა, ჩვენი სცენის დამამშვენიებელმა თაიგულმა, აშკარად თვალწინ გადაგვიშალა, თუ როგორ ჰკვდებიან მოწამლულები და თუმცა რამოდენიმე წუთს იგრიხებოდა, იკლაკნებოდა და იჭიმებოდა, ჩვენი საზოგადოება, დაჩუქული განუწყვეტელს ხარხარს, იმან ერთბაშად შეიპყრო, შებოქა, სული გააქმენდინა და აშკარად აგრძნობინა, თუ რა რიგ წვალებაში უნდა იყოს საწამლავ-მიღებული კაცი. ამ ჩვენი თეატრის მნათობმა დაგვანახვა, რომ საზოგადოების სიცილი ამგვარ შემთხვევაში საზოგადოების მოუშალებლობაზე კი არ ყოფილა დამოკიდებული, როგორც საზოგადოდ ჰფიქრობენ, არამედ აქტიორზედ და იმის თამაშობაზედ. დღითიდღე ნიჭიერი მოთამაშე გვიჩვენებს თავის ღირსებას და ნიქს, რომელიც თანდათან იშლება. ფეურჩქნება და საზოგადოებაც აფასებს ღირსეულად ამ მოთამაშეს. იმან მიიღო რამოდენიმე საჩუქარი და ღირსეულად დაიმსახურა საზოგადოების განუწყვეტლივი ტაშისცემა და „ბრავოს“ ძახილი“.

რომელი რეცენზიაც უნდა აიღოთ მაშინდელი დროისა, კოტეს შესახებ ყველგან ქებაა. შეენება და თაიგული ქართული სცენისა, — აი როგორ იხსენიებენ კოტეს, სხვათა შორის, 1888 წლის „ივერიაში“ იანვრის ერთ ნომერში.

ერთადერთი საყვედური, რაც ხანდახან ზოგიერთ რეცენზიაში გაისმის — როლის უცოდინარობაა.

საყურადღებოა ერთი ფელეტონი „ივერიაში“ 1886 წლის ნოემბერში. ფელეტონი ეხება ქართულ თეატრს. მოვიყვანთ ამ ფელეტონიდან ზოგიერთ ადგილებს.

„ბ-ნი ყიფიანი საკმაოდ ღონიერი ნიჭია და ნიქს გარდა დახელოვნებული არტისტიც არის. ნიჭი და ხელოვნება განუყრელი დძმანი არიან და აუცილებელი საჭიროებაც არის კარგის არტისტისათვის. ბ. ყიფიანს ეტყობა, რომ ორივე სიკეთე სჭირს და ამიტომაც ძნელად შეხვდება კაცი, რომ მან თავისი სათამაშო ოდესმე გაა-

ფუქოს, რაც უნდა არ უხდებოდეს ან არ შეესაბამებოდეს იგი სათამაშო ბ. ყიფიანის ნიქსა და მიდრეკილებასა. ხოლო საცა-კი ბ. ყიფიანი შეხვდება ხოლმე თავის ნიქისა და მიდრეკილების სათამაშოსა, მაშინ იგი სრულიად დაატყვევებს მაყურებელთა ყურადღებას და ამ დატყვევების სამაგიეროს იმითი გადაგვიხდის ხოლმე, რომ ჰეშმარიტის გრძნობის სიმებს ააქლერებს ადამიანის გულში და ესთეტიურს სიამოვნებას აგრძნობინებს. ამ ორ სიკეთეს, ერთად ბედნიერად შეერთებულს, უნდა მიეწეროს ის მუდმივი ღირსება ბ. ყიფიანის თამაშობისა, რომ თავიდან ბოლომდინ მწყობრად, დალაგებულად, თანაბრად გაჰყავს თავისი სათამაშო მაყურებელთა წინაშე. ნიქი ხელოვნებას ეკითხება თავის სამზღვარს და ხელოვნება ნიქსა სთხოვს სითბოს და ბრწყინვალებას. ერთი მეორესა ჰშველის იმდენად, რამდენადაც საჭიროა. არც ერთი ნამეტანობს და კლებულობს, არც მეორე — ორივე ერთმანერთს ემორჩილებიან ერთისა და იმავე ზემოქმედების მოსახდენად. სამართალი ითხოვს, ვსთქვათ, რომ ძალიან იშვიათად შეგვხვდებოდა ბ. ყიფიანის ეგ ერთიანი, მრთელი ზემოქმედება არ მოეხდინოს მსმენელებზე თავისდა სასახელოდ და ჩვენდა სასიამოვნოდ... ხანდახან როლი არ იცის ხოლმეო, დაასკვნის ავტორი.

კილო წერილისა ილიას მოგვაგონებს.

ერთ რეცენზიაში „ბიძიასთან გამოხუმრების“ შესახებ კოტე ყიფიანის შესახებ, სხვათა შორის, ვკითხულობთ: „კ. ყიფიანს სათეატრო მუზა დედინაცვალისავით არ მოჰყრობია და როგორც დრამატული, ისე კომიკური ნიქი უხვად კალთით ზედ დაუბერტყია“.

1888 წელს კოტეს უთამაშნია რიშელიე და ამის შესახებ აკაკი სხვათა შორის სწერს: „უნდა გამოვსტყდე, რომ ბევრი კარგი პირველი ხარისხის მოთამაშე მინახავს ამ როლში და არც ერთზე ნაკლები შთაბეჭდილება არ მოუხდენია ჩემზე კ. ყიფიანს“. კოტეს რუსულად უთამაშნია ფორკატის თეატრში, სადაც ის მთელი ერთი სეზონი თამაშობდა და აკაკის რეცენზიაც სწორედ კოტეს რუსულად თამაშს შეეხება.

დასასრულ არ შემიძლია არ მოვიყვანო ერთი წერილი („ივერიიდან“ 1887 წელი, 19 დეკემბერი, № 267). ამ წერილიდან ნათლად სჩანს, თუ რას წარმოადგენდა კოტე ყიფიანი ქართული სცენისათვის და როგორ უყურებს მას ჩვენი საზოგადოება.

მამის ვერაგულად მოკვლამ იმდენად იმოქმედა კოტეზე, რომ გადასწყვიტა სცენისათვის დროებით თავი დაენებებია. აი ამ გარემოებას ეხება ხსენებული წერილი.

..ბოლო დრომდის მარტო ხმა დადიოდა ტფილისის საზოგადოე-

ბაში, რომ დიდის ნიჭით მომადლებული არტისტი ქართულ დასისა, ბ-ნი კოტე ყიფიანი, აღარ მიიღებს მონაწილეობას წრეგანდელ წარმოდგენებში, რადგან ყველასათვის ცნობილ მწუხარებისა გამო ერიდება ემსახუროს თეატრსო.

დღეს უკვე დაბეჭითებით ამბობენ, ვითომც ეს ხმა მართალი იყოს და ბ. კოტე ყიფიანს გარდაწყვეტილ უარი ეთქვას დრამატულ საზოგადოებისათვის.

ჩვენ გვესმის მწუხარება საყვარელის არტისტისა და მთელმა საზოგადოებამაც დაამტკიცა თავისი განუსაზღვრელი ტკივილი გულისა ხსენებულ უბედურებისა გამო. მაგრამ ამ შემთხვევაში, თუ ეს ხმა მართალია, ჩვენის აზრით, ბ. კოტე ყიფიანს სრული სიმართლე არ მიუძღვის თავის გარდაწყვეტილებაში. უნდა მოვავგონოთ საყვარელს არტისტს ზნეობრივი სურათი იმის მამისა, რომელიც მტკიცედ ადგა მძალას მცნებას, რომ ყოველი ადამიანი მოვალეა თავის კერძო მწუხარება თუ სიხარული, თავის კარგი და ავი მსხვერპლად შესწიროს საზოგადო საქმესა და იმის წარმატებას, როდესაც ამას მოითხოვს გარემოებაო.

დღეს ჩვენი თეატრის ბედობალი სრულიად დამოკიდებულია არტისტების ნიჭიერებაზედ. ჩვენი გულგრილი საზოგადოება თანდათან რწმუნდება, რომ თეატრი იმისათვის ერთი უკეთესთაგანი სკოლაა გრძნობათა გასუფთავებისათვის. ეს რწმენა დაბადა საზოგადოებაში ჩვენთა არტისტთა დიდმა ნიჭიერებამ. ამ მოღვაწეთა შორის თითქმის უპირველესი ადგილი უჭირავს თვით ბ. კოტე ყიფიანს. იმისი არ ყოფნა მოთამაშეთა შორის დიდი ნაკლია ჩვენის თეატრისათვის და ამიტომ იმედი გვაქვს, რომ მოიგონებს ბ. კოტე ყიფიანი თავის დაუვიწყარ მამის ანდერძს, კერძო მწუხარებისა გამო არ უღალატებს საზოგადო საქმეს, რომელიც ისე მკვიდროდ ჰქონდა გულზე მოკიდებული იმის ძვირფასს მშობელსა, და დაუყოვნებლივ შეუდგება თავის არტისტულ მოღვაწეობასა.

ამგვარი სურვილი არა მარტო ჩვენგან არის გამოცხადებული. ჩვენ ამის გამო რამდენისამე კაცისაგან წერილი მივიღეთ და პირადაც უთქვამთ, რომ დიდად პატივსაცემია მგლოვიარობა იმისთანა მამისა, როგორიც დიმიტრი ჯიფიანი იყო, მაგრამ ეს გულითადი მწუხარება შვილისა უნდა დასდუმდეს იქაო, საცა საზოგადო საქმე მეშველს თხოულობსო, და ბ. კოტე ყიფიანი რომ ქართული თეატრის სულის ჩამდგმელია — ამას ეჭვი არ უნდა“.

რითი დაიმსახურა კოტე ყიფიანმა ასეთი სახელი და პატივისცემა?

თვისის ნიჭით, შრომით, შოვალეობის სინდისიერად შესრულებითა და თეატრის უსაზღვრო სიყვარულით.

მსახიობის თამაშის შესახებ დღესაც ორგვარი შეხედულება არსებობს.

პირველი ამტკიცებს: მსახიობმა გარეგნულად უნდა დაგვიხატოს ესა თუ ის ტიპი, ამ ტიპის სულისკვეთების განცდა კი მისთვის საჭირო არ არისო.

მეორე ამბობს: მსახიობმა მარტო გარეგნულად კი არ უნდა დაგვიხატოს ტიპი, მან სცენაზე უნდა დაივიწყოს თავის თავი, გარდქმნეს ტიპად და განიცადოს მისი სულისკვეთება, ზრახვანი და მისწრაფებაო.

ეს ორგვარი თვისება კოტე ყიფიანში ჰარმონიულად არის შეწყობილი და შეთანხმებული.

სცენაზედ თავის დაქერა, მიხვრა-მოხვრა, ხმა, მანერები — ყოველივე ეს უნაკლულად აქვს. დიდკაცის როლში კოტე შეუდარებელია. ერთხელ კოტე თამაშობდა ჟან ბოდრის. სცენაზე საფაროვის ქალიც იყო. კოტეს ჰქონია პატარა უსიტყვო სცენა და თვისის თავდაქერით და სახის გამომეტყველებით ისეთი შთაბეჭდილება მოუხდენია საფაროვის ქალზე, რომ ის ალტაცებული კოტეს შეაჩერდა და თვისი სათქმელი სულ გადაავიწყდა.

სცენაზე კოტე სინამდვილეს იმიტირებს, მისთვის აღარავინ არსებობს, ის თვითონაც აღარ არსებობს, როგორც კოტე, არამედ გადაიქცევა იმ ტიპად, რომელსაც თამაშობს, შეისხამს იმის სისხლსა და ხორცს, აიძვრებს მკერდში იმის გულს, განიცდის იმის სულისკვეთებას, ნებას, მისწრაფებას და ამათ ჰქმნის საოცარ ილუზიას. გასაოცარი რეალიზმი — აი კოტეს ნიჭის თვისება. ყოველივე ამისათვის საჭიროა შრომა. შრომის ენერჯია კოტე ყიფიანში ჰარბად იყო და არის დაგროვილი. ის მარტო ტიპს კი არ სწავლობდა, სწავლობდა ყოველ პიესას, რომელშიაც უნდა გამოსულიყო და სცდილობდა იმის გამორკვევას, თუ რა უნდა ეთქვა ან რისი დასურათება უნდოდა ავტორს. ამგვარი შრომის წყალობით კოტემ შექმნა ჩვენს სცენაზე ას-ოც ტიპზედ მეტი. ენა ადვილად იტყვის, თორემ ამდენი ტიპის შექმნა ერთი კაცის ძალღონეს ფრიად აღემატება.

აი ის პიესებიც, რომლებშიაც კოტე გამოსულა: „ადვოკატები“, „ავადმყოფი ხალხი“, „ავი სენი“, „აირია მონასტერი“, „ანუკა ბატონიშვილი“, „არსენა“, „არც აქეთ, არც იქით“, „აღლუმი“, „აღსდგა მკვდრეთით“, „აყალმაყალი ცოლ-ქმარს შუა“, „ბაიყუში“, „ბედნიერი დღე“, „ბიძიასთან გამოხუმრება“, „ბორკილი“, „ბოშა ქალი ზანდა“, „ბრაზიანი ამერიკელი“, „ბუტიაობა“, „გაყრა“, „გადარტუ-

ლი ფოსტა“, „გემრიელი ლუკმა“, „გზა-დაბნეული ცხოვარნი“, „გლახაყნი სულით“, „გლახა ჭრიაშვილი“, „გულმა იგრძნო“, „დავა“, „დავიდარაბა“, „დათვი“, „დამნაშავეის ოჯახი“, „დატრიალდა ჯარა“, „დაქცეული ოჯახი“, „და-ძმა“, „დედა-შვილი“, „განდგეილი“, „ეჭიმი აშირბაჯიანი“, „ვაი ჭკუისაგან“, „ვენეციელი ვაჭარი“, „თაგვის ბრაღია“, „თამარ ბატონიშვილი“, „თილისმით მოარშიყე“, „როგორც ჭქუხს, ისე არა წვიმს“, „კარდინალი რიშელი“, „კატა — აწონა“, „კაცობრიობის კეთილმყოფელი“, „კეთილი და უმანკო ანგელოზი“, „კიდევ ერთი მსხვერპლი“, „კინტო“, „კოვერლის სიკვდილი“, „კონსტანტინე ბატონიშვილი“, „კრიჟანგი“, „კუდურ ხანუმი“, „მარგარიტა გოტიე“, „მასკარადი“, „მგლები და ცხვრები“, „მეფე ლირი“, „მეჯლისი იტალიელებით“, „მზის დაბნელება“, „მიროვოი სუდიასთან“, „მისანი“, „მონასტრის ზღუდეთა შორის“. „მსხვერპლი“, „ნაპერწყალი“, „ნება მიბოძეთ“, „ორი გმირი“, „ორი ობოლი“, „ორ ცეცხლ შუა“, „ოტელო“, „ოჯახის ასული“, „პარიჟელი ბიჭი“, „პარიკმახერთან“, „პატარა კახი“, „პატიოსნება“, „პეპო“, „ჟან ბოდრი“, „ჟორჟ დანდენი“, „რას ვეძებდი და რა ვიპოვე“, „რაც არ მერგება — არ შემერგება“, „რაც გინახავს — ველარ ჰნახე“, „რევიზორი“, „სამეგრელოს მთავარი ლევან“, „სამზადისი“, „იაკობელები“, „სამშობლო“, „სამშობლოს სადიდებლად“, „სამხედრო ბანაკში“, „საძაგელი“, „სიყვარული ახალგაზრდა ქალისა“, „სკაპენის ცუდლუტობა“, „სოფელი“, „სურათები“, „გლახის ნამბობიდან“, „სურამის ციხე“, „სუსტი მხარე“, „ტივით მოგზაურობა“, „უნდა გავიყარნეთ“, „ურთელ აკოსტა“, „ქალაქში“, „ქმარი ხუთის ცოლისა“, „ქოროლი“, „ქობში“, „ღალატი“, „ყაჩაღები“, „ყვარყვარე ათაბაგი“, „ყომარბაზი“, „შემოსავლიანი ადგილი“, „შემოლილია“, „შემოლილის წერილები“, „ციმბირელი“, „ციხის საიდუმლო“, „ცოლი დროებით“, „ცოლის შერთვევინება“, „ცხოვრების გარედ“, „ცხოვრების გმირი“, „ძუნწი“, „ხათაბალა“, „ხანუმა“, „ხალხის მტერი“, „ჯერ დაიხოცნენ, მერე დაქორწილდნენ“, „ჰამლეტი“.

მარტო სახელების ჩამოთვლით დაიღლება ადამიანი!

როდესაც თვალს გადაავლებთ ამდენ პიესებსა და ტიპებს, მაშინ ცხადი იქნება თვით ურწმუნო თომასათვისაც კი, რომ კოტე ყიფიანი და მასთან ერთად მისი დამსახურებული ამხანაგები აუტანელ შრომას ეწეოდნენ ჩვენი ერის საკეთილდღეოდ.

როცა ასეთს მუშავენ უმზერო, გულს სევდა შორდება, სახეზე მხიარულების ღიმილი იხატება. შორს უიმედობავ, მომავალი ჩვენია — მზადა ხართ წამოიძახოთ. თავის საქმეს კოტე მუდამ ისე უყურებდა, როგორც წმინდა მოვალეობას.

სცენა კოტეს თავიდანვე იმდენად უყვარდა და ზუყვარს, რომ დღესაც არც ერთ ქართულ წარმოდგენას არ გამოსტოვებს და თუნდა ოცჯერაც ენახოს, მაინც დაესწრება.

ამხანაგებთან — ქალებთან და კაცებთან — ყველასთან კარგი განწყობილება ჰქონია და აქვს. ამიტომ კოტეს ყველა დიდის პატივისცემით ეპყრობოდა და ეპყრობა.

კოტე ამაყი და თავისი თავის პატივისმცემელი ადამიანია. ის უბრალოდ არავის მიაყენებს შეურაცხყოფას და არც სხვისაგან მოითმენს შეურაცხყოფას. ხოლო როდესაც საქმე წარმოდგენას, თეატრს შეეხება, მაშინ კოტე ყველაფერს აიტანს და მოითმენს. აი ამისი ერთი მაგალითი.

ერთხელ გურამიშვილისას რეპეტიცია იყო სუნდუკიანცის კომედისა „ხათაბალა“. სუნდუკიანცი რეპეტიციებს მუდამ ესწრებოდა. კოტე თამაშობდა გერასიმ იაკულიჩს. ერთი დიდი მონოლოგი სუნდუკიანცმა თორმეტჯერ ათქმევინა კოტეს. კოტე გრძნობდა, რომ ძალიან კარგად ამბობდა, დაიქანცა, მაგრამ მაინც იმეორებდა.

— აბა, კოტე, ერთი კიდევ! — აღარ ეშვება სუნდუკიანცი.

— აღარ შემიძლია.

— არ შემიძლია რა პასუხია, ხვალ წარმოდგენა!

— სთქვი, ბიჭო! — წამოიძახა ვილაცამ.

კოტე გაბრაზდა, ესროლა თავისი როლი და გავარდა გარეთ.

უკან დაედევნენ ლადო აბაშიძე, ინაშვილი და კ. ხერხეულიძე.

შეიქხა ერთი ხვეწნა — წამოდი, სუნდუკიანცს ნუ აწყენინებო. კოტე არ ჩერდებოდა. წამოეწია ინაშვილი და კარგად გამილანძლა. სხვა მსხიობი ამის შემდეგ ახლოს აღარ წაეკარებოდა ამგვარ პირებს, მაგრამ კოტე სულ სხვახაირად მოიქცა. დაეწია ქუჩაში თვისი და ელენე და დაუწყო ხვეწნა: წამოდი, უშენობა როგორ იქნებაო.

კოტემ დაივიწყა შეურაცხყოფა, დაბრუნდა მაშინვე და შეუდგა რეპეტიციის გაგრძელებას.

თეატრისათვის კოტე ყველაფერს აიტანდა, რადგანაც თეატრი მას მიაჩნია უდიდეს სკოლად ქართველი საზოგადოებისათვის. კოტემ მთელი თავისი არსებით შეიყვარა თეატრი და ის ხანა, როდესაც ახალგაზრდობის ჯანღონით, მხნეობით და გატაცებით სჭედავდნენ ჩვენი სცენის ბედილბალს ვასო აბაშიძე, კოტე ყიფიანი, მარიამ საფაროვი-აბაშიძისა, ნატო გაბუნია-ცაგარლისა, ლადო მესხიშვილი და კოტე მესხი, ჩვენი თეატრის ოქროს ხანად უნდა ჩაითვალოს.

კოტეს ერთ დიდ ღირსებას ის შეადგენს, რომ თავისი ბენეფისების დროს შემოსავალს არ აქცევდა ყურადღებას და არ ეძებდა ისეთ პიესებს, რომლებიც მეტ შემოსავალს მისცემდნენ.

კოტე ბენეფისის დროს ისეთს პიესას ირჩევდა, რომ მაყურებლისათვის თავისი ნიჭის სიძლიერე ცხოვლად დაენახებოდა და რაც შეიძლება მეტი ესთეტიური სიამოვნება ეგრძნობინებოდა.

როდესაც საზოგადოება უფრო ვოლდევილებსა და კოშედიებს ეტანებოდა, კოტე სცდილობდა საზოგადოებისათვის ესთეტიური გემოვნება განევითარებოდა და აცნობდა მას კლასიკურ პიესებს. ამით აიხსნება ის გარემოება, რომ ზოგჯერ იმის ბენეფისებს ხალხი იმდენი არ ესწრებოდა, რამდენისაც ის ღირსი იყო.

მატერიალურად კოტე აცებდა, სამაგიეროდ ის იცებდა ზნეობრივად, რადგანაც კლასიკურ პიესებს ჩვენს სცენაზე გზას უკაფავდა და საზოგადოების ესთეტიურ გრძნობას ავითარებდა.

კოტე კერძო ცხოვრებაში სულ უბრალო კაცია, მხიარული, ხელგაშლილი, თავმდაბალი, კარგი მოლაპარაკე. ის ყველგან და ყველასთან ერთნაირია; თუ კი რამ შეუძლია, არავისთვის არაფერს დაიშურებს. როგორც მემამულესა და მებატონეს, გლეხებთან მუდამ კარგი განწყობილება ჰქონდა და აქვს. გლეხები მას „ჩვენს კოტეს“ ეძახიან. თვისის რწმენით კოტე მუდამ დემოკრატი იყო და ამგვარივე ღარჩა ბილომდის, რის გამოც ჯერ აკადემიაში ყოფნის დროს იგემა დევნა, შემდეგ 1884 წელს სოფრომ მგალობლიშვილთან ერთად იქდა გორის ციხეში.

ოცდაათობის წლისა იყო კოტე ყიფიანი, როდესაც მან ცოლი შეირთო. კოტეს მეუღლე ნინო ტატიშვილის ასული ჩვენს საზოგადოებაში ცნობილია, როგორც საზოგადო მოღვაწე და მწერალი. ნინოს ბევრი საშსახური გაუწევია ჩვენი თეატრისათვისაც, განსაკუთრებით პროვინციებში. ზაფხულობით ის მოუყრიდა ხოლმე თავს სცენისმოყვარეებს და მართავდა წარმოდგენებს ქვიშხეთში, ხაშურში და სურამში.

სხვადასხვა საზოგადო საქმეში ხშირად მიუღია და დღესაც იღებს მონაწილეობას.

თვითონ კოტე ყიფიანი თავისი ნეუღლის აზრს დიდად აფასებდა და აფასებს.

კოტეს მოღვაწეობა სამწერლო ასპარეზზე. მიხი ნაწერები და ხამენიერი შრომანი. ამხანაგების აზრი კოტეს შესახებ.

ამ რამდენიმე ხნის წინეთ ერთი ადგილობრივი გაზეთი სწერდა: კოტე ყიფიანის იუბილე ორგვარია: საარტისტო და სალიტერატურო. ეს სრული ჭეშმარიტებაა. კოტეს საშსახური და ღვაწლი სამწერლო ასპარეზზე საკმაოდ თვალსაჩინოა. აგერ ორმოცდასამი წე-

ლიწადია, რაც კოტე ამ გზაზე გამოვიდა და ჯერაც კალამი ხელიდან არ გაუგდია.

პირველი მისი წერილი ქართულ ენაზე დაიბეჭდა 1877 წელს ამ სათაურით: „მგზავრის წერილები სვანეთზე“. კოტეს რუსულადაც აქვს ნაწერები, ქართულადაც. რუსულად მას უწერია როგორც „Московский Ведомости“-ში, ისე ადგილობრივ ჟურნალ-გაზეთებში. პირველი მისი წერილი საქონლისა და ცხვრის თურქულის შესახებ დაბეჭდილია 1870 წელს „მოსკოვის უწყებებში“.

სულ რუსულ ენაზე აქვს 63 სტატია და შრომა. სტატიები მრავალჯვარი შინაარსისაა, რაც აშკარად ამტკიცებს ავტორის ცოდნასა და მრავალმხრივ განვითარებას: ზოგი პუბლიცისტურია, ზოგი სამეცნიერო. ზოგი ბელეტრისტული. რუსულ ენაზე კოტეს დაუწერია რამდენიმე პიესა: ზოგი დრამა, ზოგი კომედია.

ამ რამდენიმე წლის წინეთ გამოვიდა კოტეს მიერ შედგენილი რუსულ-ქართული საასტრონომიო, საზოოლოგიო და სამინერალოგიო ლექსიკონი.

სამეცნიერო დარგში ყველაზე დიდ შრომად უნდა ჩაითვალოს:

1. რუსულ-ქართულ-ლათინური საბოტანიკო ლექსიკონი და 2. რუსულ-ქართული აკადემიური ლექსიკონი.

ორივე ეს წიგნი მეტად დიდი შრომაა და ჯერ გამოუცემელია.

რუსულ-ქართულ აკადემიურ ლექსიკონში ორასი ათასამდე ქართული სიტყვა აქვს ავტორს ახსნილი და განმარტებული. მართო ეს ერთი დიდი და მეტად მნიშვნელოვანი შრომა საქმარისია, რომ ავტორმა საპატიო ალაგი დაიკავოს ჩვენს მწერლობაში.

ლექსიკონების შედგენის განზრახვა კოტეს ჯერ კიდევ სამოცდაათიან წლებში დაებადა.

როდესაც კოტე ბორჯომში მსახურობდა ბორჯომის მამულების გამგის თანაშემწედ, ბორჯომში ჩამოსულა თბილისის გუბერნიის სახელმწიფო მამულების გამგე გენერალი მურავიოვი და მოუნდომებია მინერალური წყლების მახლობლად ტყის დათვალიერება.

მას გაჰყოლიან კოტე, ბორჯომის მამულების გამგე და ადგილობრივი პოლიციის ბოქაული — ქართველი. დადლილებს შეუსვენიათ დიდი მურყანის ქვეშ.

— Какое это дерево? — ეკითხება მურავიოვი ბოქაულს.

— Муркновое дерево, Ваше Превосходительство — უპასუხა ბოქაულმა.



კოტე გადაბრუნდა და დაიწყო ხარხარი, რადგანაც მურყანი, რუსულად არის ოლხა (Олха). მურავიოვი დაეკითხა კოტეს, რაზედ აგიტყდა სიცილიო. კოტემაც აუხსნა, რაშიც იყო საქმე. აი ამ გარემოებაში დაუბადა კოტეს განზრახვა რუსულ-ქართული ბოტანიკური ლექსიკონის შედგენისა. საცა კი ბოტანიკური შინაარსის სიტყვას შეხვდებოდა, იწერდა უბის წიგნში ქართულად და რუსულად. ცამეტი წლის განმავლობაში აგროვა კოტემ ამგვარად მასალა და შეადგინა საკმაოდ მოზრდილი რუსულ-ქართულ-ლათინური საბოტანიკო ლექსიკონი, სადაც 2300-ზე მეტი ქართული სახელებია მცენარეებისა.

ამგვარმა შრომამ კოტე იმდენად გაიტაცა, რომ მან განიზრახა აკადემიური ლექსიკონის შედგენა პავლენკოვის ენციკლოპედიური ლექსიკონის მსგავსად.

კოტემ დაიწყო ბიბლიიდან; ჰკითხულობდა მას და სწერდა ცალცალკე ქალაღზე ყოველ რუსულ უცნობ სიტყვას. შემდეგ ეძებდა ყოველი რუსული სიტყვის შესაფერ ქართულ სიტყვას. ამგვარი შრომისათვის დიდი სიმტკიცე, მოთმინება და საქმის უზომო სიყვარულია საჭირო. ცალცალკე ამოწერილ სიტყვებს კოტე ანაწილებდა ანბანზე და ყოველ ასოზე დაგროვილ სიტყვებს ინახავდა ცალკე კონვერტებში. შემდეგ ყოველ თვითეულ კონვერტში დაგროვილ სიტყვებს ჩამოსწერდა ხელთნაწერში იმრიგად, როგორც ეს მიღებულია საზოგადოდ ლექსიკონებში. ამგვარი მუშაობის დროს აღმოჩნდა, რომ მრავალია ისეთი ქართული სიტყვა, რომლის გამოსახატავად რუსული სიტყვა არ არსებობს.

აკადემიურ ლექსიკონზე კოტე უკვე თხუთმეტი წელიწადი მუშაობს.

ორივე ეს ლექსიკონი დიდი განძია და თუ აქამდე ვერ დაიბეჭდა, იმიტომ რომ დიდი ხარჯი სჭირდება.

კოტეს ქართული ნაწერები მრავალგვარი შინაარსისა: მას ქართულ ჟურნალ-გაზეთებში უწერია პუბლიცისტური წერილები, მოთხრობები, კრიტიკული წერილები, ვოდვეილები, კომედიები და დრამები.

აი სია მისი ნაშრომებისა ქართულ ენაზედ:

1. მგზავრის წერილები სვანეთზე („ივერია“, 1877 წ.).
2. თამასუქი, მოთხრობა („ივერია“).
3. რაფიელ ერისთავის ბოტანიკური ლექსიკონის გარჩევა („ივერია“).
4. კაცობრიობის ზნეობრივ-გონებრივი განათლება.
5. ქართულად ათასი მონოგრაფია.

6. თეატრის მნიშვნელობა („ივერია“).
7. საწურთენელი გასართობი. სათამაშო ბავშვთათვის.
8. თვითმართველობა.
9. სიბრძნე სიცრუის წიგნიდან („ნიშადური“).
10. დიმიტრი ყიფიანის მკვლელობა („პატარა გაზ.“).
11. ვინ მოიგო? („ისარი“).
12. ჩემი არტისტობის თავგადასავალი („ფასკუნჯი“).
13. დანგრეული ყორე, ესკიზი („საქართველო“).
14. ბოსელში, ესკიზი („თემი“).
15. ხიფათი, ესკიზი („თემი“).
16. გატყდა კვერცხი. ლეგენდა („თემი“).
17. ავი ქალი, ლეგენდა („თემი“).
18. რისთვის, რათა? („ჩანგი“).
19. მეფე ლირი ქართულ სცენაზე („თემი“).
20. წერილი რედაქციას („თემი“).
21. ცოტა რამ დიმიტრი ყიფიანის ცხოვრებიდან („თემი“).
22. ქართული დრამატიული ხელოვნების შესწავლა („სახალ-  
ხო გაზ.“).
23. ცოტა რამ ჩვენი წარსულიდან. თორმეტი ფელეტონი  
(„ქართლი“).
24. „ზემო ქართლიდან“. კორესპონდენციები კოტე სანიხელის  
ხელმოწერით.

კოტეს დრამატიული ნაწერები — თარგმანი და ორიგინალური — შემდეგია:

1. ტორკვემადა, თარგმ.
2. მეირიმა ანუ ბოსნელები, თარგმ.
3. მერკადე, თარგმ.
4. ნაპერწყალი, კომედია.
5. ვახუშტი სპასალარი, ისტორიული დრამა.
6. ორი მამა, ისტორიული დრამა.
7. ბედი ქართლისა, ისტორიული დრამა.
8. კოტნე დადიანი, კომედია.
9. კუზიანი, დრამა.
10. თავხედი, ვოდევილი.
11. დატრიალდა ჯარა. ვოდევილი.
12. ეკა გურიელი, ისტორიული დრამა.
13. უსისხლოდ, ისტორიული დრამა.

როგორც ქართულად, ისე რუსულადაც ბევრი აქვს კოტეს ნაწერი, რაც საცენზურო პირობებისა გამო ვერ დაიბეჭდა.

კოტეს დრამატიული ნაწერები უმთავრესად ისტორიულის შინაარსისაა.

მართალია, ამ დრამებში ხშირად არ არის ის, რასაც დრამის კვანძს ეძახიან, ვერა ვხედავთ მოქმედების თანდათანობით განვითარებასა და გაძლიერებას; ზოგან მომქმედი პირები მეტად მრავალია, მაგრამ ზოგი მათგანი სასცენო ღირსებით საკმაოდ დაჯილდოვებულია და ამიტომ წარმოდგენაც საქირთა.

ავიღოთ, მაგალითად, „ბედი ქართლისა“. ეს პიესა დიდის ინტერესით იკითხება და სცენაზედაც დიდ შთაბეჭდილებას მოახდენს მაყურებელზე. აქ ავტორს საუცხოოდ აქვს დასურათებული საქართველოს არსებობის უკანასკნელი დღეები, ინტრიგები გიორგის სასახლეში და სხვა მიმდინარეობა წარჩინებულ პირთა შორის საქართველოს მომავალი ბედ-იღბლის შესახებ. გარდა იმისა, რომ მდებიოხალხს ეს პიესა მიიზიდავდა, ჩვენს უახლოეს წარსულსაც გააცნობდა.

ბუნებით კოტე დიდი ოპტიმისტია. გულთთ მხიარული, გულუხვი, ამიტომ საამხანაგოდ იგი შეუდარებელია; ის მზად არის, რითაც კი შეუძლია, ყველას დაეხმაროს. ამ თვისებებისა გამო ამხანაგებთ მას მუდამ პატივსა სცემდნენ და აფასებდნენ.

როგორი აზრისა არიან კოტეს შესახებ მისი ამხანაგები?

დავუგდოთ ჯერ ყური ვალ. გუნიას, რომელიც ქართული თეატრის ერთი დედაბოძთაგანია: „ჯერ კიდევ სამუდამო დასის ხსენებაც არ იყო, როცა კ. ყიფიანი ხან კლუბების და ხან კერძო ოჯახების სცენაზე თამაშობდა მაშინდელ სცენისმოყვარულებთან. იმ ხანებშივე დაეტყო კ. ყიფიანს სასცენო ნიჭი დრამატიულ როლებში და მაშინ საუკეთესო სცენისმოყვარედ ითვლებოდა. დაარსდა თუ არა სამუდამო სცენა, ყიფიანს მაშინათვე შესაფერი ადგილი მისცეს და დროგამოშვებით დღემდე ემსახურება ქართულ სცენას. კ. ყიფიანი დრამატიული არტისტია, ეგრეთწოდებული დრამატიულ რეჟონიორის ამპლუაზე დღემდე ბადალი არა ჰყავს; არა ჰყავს აგრეთვე ბადალი მოხუცებული, ბებრების კომიკურს როლებში, რომლებსაც დიდის ხელოვნებით ასრულებს ხოლმე. ამ მხრით კოტე ყიფიანის ნიჭი სწორეთ შესანიშნავია. ძნელად გამოვა არტისტი, რომ ერთის და იმავე ხელოვნებით და ბუნებრივის სიმართლით ითამაშოს დრამატიული და კომიკური როლები, ბებრები და ახალგაზრდები. ამ შემთხვევაში კოტე ყიფიანი სრულებით არაჩვეულებრივ მოვლენას წარმოადგენს ჩვენს სცენაზე მაინც“.

თავის წერილს ვ. გუნია ასე აბოლოვებს: „კ. ყიფიანი ამყამად ერთი საუკეთესო არტისტია ჩვენში და კიდევ ბევრი ხანი გაივლის.“

სანამ ყიფიანს სცენაზე მემკვიდრე გამოუჩნდებოდეს; მისგან შექმნილი ხასიათები და ტიპები დიდხანს დარჩება ქართველ საზოგადოების ხსოვნაში და ბევრი ახალგაზრდა მოთამაშენი მიჰბაძავენ მას“.

დაკუგდოთ ახლა ყური ჩვენი სცენის დამამშვენებელს მარიამ საფაროვ-აბაშიძისას: „მე ყოველთვის სიმწარით მომისმენია ხოლმე კოტე ყიფიანის შესახებ ზოგიერთი ახლანდელების აზრი, რომ კოტე მაინცდამაინც დიდი არტისტი არ არისო. ჩემი აზრით კი, თუ არ მართლა დიდი ნიჭის პატრონი, ვერ შეასრულებდა ისე სამაგალითოდ დრამატიული რეზონიორის როლებს, როგორც ასრულებდა კოტე, მაგალითად, „ჟან-ბოდრში“, „ორ ცეცხლშუა“, „შეილოკში“ და სხვადასხვა. ამ პირებს ამგვარი შეცდომა იმითი მოსდით, რომ არ უნახავთ კოტე, როცა ის პირველ თხუთმეტ წელიწადს თამაშობდა მუდმივი სცენის დაარსების შემდეგ. მე ჩემს სიცოცხლეში სცენაზე ისე არ დამიკარგავს თავი, რომ ჩემი როლი დამეიწყებოდეს, მაგრამ იყო ჩემს სიცოცხლეში ასეთი მაგალითი. კოტე თამაშობდა ჟან-ბოდრს, მე იმის ქალს. ერთ მოქმედებაში კოტე შემოდის სცენაზე, მეც იქვე იმის ქალის როლს ვთამაშობ. ისე გამიტაცა კოტეს თამაშობამ, თუმცა უსიტყვომ, რომ კინალამ დამავიწყდა ჩემი სცენაზედ ყოფნა და ასე შევსძახე: კოტე, რა მშვენივრად თამაშობ-მეთქი. ისეთი მედიდური მიმოხვრა ჰქონდა, ჭული იმნაირად დასდო მაგიდაზედ და ისე შემომხედა, რომ ბევრი მრავალმეტყველება ვერ იტყოდა იმას. რაც იმან ამ ერთის მოძრაობით გამოჰხატა.“

რაც შეეხება სიყვარულს და მოვალეობას სცენისადმი, მე მეორე არტისტი არ მეგულება მაგრე გამსჭვალული და მუყაითი თავის მოვალეობისა თეატრისადმი. რა გინდ დიდ მეჯლისში ჰყოფილიყო კოტე, წარმოდგენელი იყო. რომ დანიშნულ დროს არ გაჩენილიყო თეატრში ყოველთვის ფხიზელი, ზრდილი, მეტად თავაზიანი ყველასთან. მე არ მახსოვს, რომ მაგის მხრით რამე შეფერხება მისცემოდეს წარმოდგენის გამართვას. რაც შეეხება ნივთიერ ჯილდოს, კოტე ყოველთვის იყო უანგარო: რასაც მისცემდნენ, იმას აიღებდა.

ამხანაგებთან კოტე იყო მეტად ზრდილი, თავდაპირილი, რაც ჰმოწმობდა მის საუცხოვო აღზრდასა და ოჯახიშვილობას. მთელი მისი ღედ-მამის ოჯახი ფეხზედ ადგა და თავდავიწყებით ემსახურებოდა თეატრს. სამ-ოთხ ოჯახთა შორის პირველი ადგილი ეკირათ ნეტარხსენებულ დიმიტრი ყიფიანის და აგრეთვე პატივცემულ გიორგი თუმანიშვილის ოჯახს. მაშინდელს ჩვენს ნივთიერად გაჭირვებულ მდგომარეობაში ჩვენთვის ეს დიდ შემწეობას შეადგენდა; ამ პატივცემულ ოჯახების კარი ყოველთვის ღია იყო ჩვენთვის; ჩვენ აქ ვიყრიდით თავს, ვაწყობდით სათეატრო საქმეს და თანაც ვნადიმობ-

დით. ამ დროს ხშირი იყო ისეთი შემთხვევა, როცა მსახიობი ქალი ან კაცი გვაკლდა. ამ შემთხვევაშიც ისევ დიმიტრი ყიფიანის ოჯახი იყო ჩვენი გაჭირვების ტალკვესი. ეს გვიხსნიდა გაჭირვებიდან; ხან კოტეს ვათამაშებდით, ხან იმის ძმას, ხან დას — ელენეს. მაშინდელს დროში ეს არა თუ დიდი დახმარება, დიდი მსხვერპლიც იყო, რადგანაც ძვირი იყო ისეთი ოჯახი, რომელსაც არა თუ ქალი, მამაკაცი გამოეშვა სცენაზე სათამაშოდ. კოტეს ღირსებად კიდევ უნდა ჩაითვალოს ის, რომ მას ძალიან ხშირად მიუღია მონაწილეობა უსასყიდლოდ სხვადასხვა წარმოდგენაში ამხანაგის ან კერძო პირის სასარგებლოდ. საზოგადოდ უნდა აღვნიშნო, რომ კოტეს თეატრი ძალიან ცოტას აძლევდა და ის მეტი წილი თავისი ხარკით ემსახურებოდა სცენას“.

ამგვარია მოკლედ ცხოვრება ამ ადამიანისა, რომელმაც მთელი თავისი სიცოცხლე ქართულ თეატრს შესწირა. კოტე ყიფიანის სახელი განუყრელია ჩვენი სცენის ოქროს ხანასთან და სანამ ქართველი ერი ცოცხალი იქნება, კოტეს სახელიც უკვდავი იქნება.

## ჩვენი მოღვაწე ქალები—ნინო ბეჟანის ასული ჟიჟიანისა<sup>1</sup>

ტაში მსახიობის გულს ყოველთვის ახარებს და ახალისებს, მაგრამ ზოგი დიდ ყურადღებას აქცევს ტაშს, ზოგი ნაკლებს. კოტე ყიფიანი უმთავრეს ყურადღებას იმას აქცევდა, რომ სულიერი მხარე ამა თუ იმ ტიპისა რაც შეიძლებოდა მეტის სინამდვილით გადაეშალა დაეყრებლსათვის.

— ყოველგვარის ღონისძიებით აპლოდისმენტების გამოწვევას არა ვცდილობდი. საზოგადოების აზრს მუდამ დიდად ვაფასებდი, ხოლო ჩემი საუკეთესო მსახური ჩემი მეუღლე ნინო ბეჟანის ასული იყო! ყოველი წარმოდგენის შემდეგ მე მას დავეკითხებოდი: აბა მითხარი, როგორ ვითამაშე-მეთქი. თუ ნინო მეტყოდა: კარგადო, მე კმაყოფილი ვიყავი; თუ მეტყოდა: ცუდადო, ბევრსაც რომ ვეჭე, მე მაინც აღარ ვიყავი ჩემი თამაშის კმაყოფილი. — აი კოტეს სიტყვები.

პატარა ნინო ქვიშხეთში ხშირად სცხოვრობდა ხოლმე თავის დეიდასთან. ქვიშხეთში მას წერა-კითხვას ასწავლიდა კოტეს და ელენე. კოტეს ნინო აი ამ მხრიდან იცნობდა. ბავშვებმა ხშირად იციან ხოლმე ქორწილობიას თამაში. ნინოსაც უთამაშნია ტოლ-ამხანაგებში, რვა-ცხრა წლისა როცა იყო. კოტე მაშინ ახალგაზრდა იყო და ალბათ მისი გარეგნობისა და ბავშვების ქორწილობიას ბრალი უნდა იყოს, რომ ცხრა წლის ნინოს უნატრია: ნეტავი კოტე ჩემი ქმარი იყოსო. არ გასულა ამის შემდეგ სულ შვიდი-რვა წელიწადი, რომ ნინოს ბავშვობის ნატვრა აუსრულდა. ნინოს ძმა ნიკო ტატიშვილი ბორ-

---

<sup>1</sup> კოტე ყიფიანის ბიოგრაფიის შედგენის დროს შემთხვევა მქონდა, უფრო დაახლოებით გამეცნო მღი მეუღლის — ნინოს — მოღვაწეობა. აზრად მქონდა ყველა ჩვენი მოღვაწე ქალების ღვაწლის ანუსხვა, მაგრამ ჯერჯერობით ვერ შევსძელი და მომავალში იმედი მაქვს, ჩემი განზრახვა განეახორციელოს. ჩვენს ქალებში საკმაო რიცხვია ისეთი მოღვაწეებისა, რომლებითაც ჩვენ თავი უნდა მოგვწონდეს და მათი ღვაწლის გათვალისწინება ყოველი ქართველის მოვალეობაა. — ი. ა.

ჯომში მასწავლებლად იყო და ზაფხულობით მინერალური წყლების კანტორასაც განაგებდა. კოტე და ნიკო ერთმანეთს ძალიან კარგად იცნობდნენ. ნინო სწავლობდა გორში ანასტასიას პროგიმნაზიაში. მას ზრდიდა ნიკო. 1884 წელს ნინომ გაათავა ოთხი კლასი და საზაფხულოდ ბორჯომში ეწვია ძმას. ამ დროს ის თექვსმეტი წლისა არც კი იყო.

ნინო ლოგინში ნებივრობდა, როცა ნიკოს კოტე ესტუმრა ბორჯომში.

— კარი მიხურე, ნიკო, კარი! — მიაძახა ნინომ კოტეს. არ უნდოდა, რომ ლოგინში მწოლიარე დაენახა კოტეს.

— არაფერია, შენც ერთი! უცხო ხომ არ არის, ჩვენი კოტეა! — მიუგო ნიკომ და მიეგება კოტეს.

კოტემ პირველად მოჰკრა თვალი ნინოს და მოეწონა.

როდესაც კოტემ ნინო ჩაცმული ნახა, იმის გულში სიყვარულის ნაპერწკალი გაჩნდა.

— ვინ არის ეს ქალი? — ეკითხება კოტე ნიკოს.

— როგორ, ხომ არ მოგწონს?

— ძალიან! აი ამისთანა ქალს შევირთავდი.

ნიკომ გააცნო კოტეს თავისი და.

კოტე ხედავდა, რომ იმის გულში რაღაც ხდებოდა, მაგრამ შედგა და თავს დაეკითხა: მე ოცდა თოთხმეტის წლის ჰუკუადამჯდარი კაცი ვარ, ეს კი ჯერ თითქმის ბავშვია და მაგის გონებრივი განვითარება მე როგორ დამაკმაყოფილებსო.

მაშ რა იყო საჭირო?

ან ყურადღება არ უნდა მიექცია სრულებით, ან უნდა დარწმუნებულიყო, რამდენად იყო გონებაგახსნილი ეს ახალგაზრდა ქალი.

პირველი კოტემ ველარ მოახერხა, თავისი გული ველარ სძლია.

ამიტომ მან დაიწყო ნინოს გამოცდა, მაგრამ ისე კი, რომ ნინოს ექვი არ აელო. გაეცნო ნინოს, კარგად დაუმეგობრდნენ ერთმანეთს; კოტე ჩამოუგდებდა ხოლმე ნინოს ლაპარაკს სხვადასხვა კითხვებით, ხან წერილებს აწერიებდა. ნინო ყოველივეს გულუბრყვილოდ ასრულებდა, ის კი არ იცოდა, რომ ეს იყო ერთგვარი გამოცდა.

ექვს გარეშეა, ნინომ ჩინებულად დაიჭირა გამოცდა; ან იქნება არაჩვეულებრივი ეგზამენატორი ადვილ კითხვებს აძლევდა: ღმერთი არ გამიწყრეს და არ ჩაუკრაო. ასეა თუ ისე, გაბრუნდა თუ არა კოტე ქვიშხეთში, მაშინვე აფრინა წერილი ნიკოსთან. ამ წერილში სხვათა შორის სწერდა: ამ ხნის კაცი ვარ, ბევრი ქალი მომწონებია, მაგრამ იმდენად კი არა, რომ შერთვა გადამეწყვიტოს. ნინო ძალიან შემეც-

ვარდა, გადავსწყვიტე, შევიროთ, და ამიტომ მაგისი აზრი როგორმე გამიგეო.

ნიკომ უპასუხა: მე ძალიან კმაყოფილი და მოხარული ვარ, ნინოს მე ვერავითარ ძალას ვერ დავატან და მაგის აზრს კი მალე გაგაგებინებო.

ნიკომ მიუგზავნა ნინოს მასწავლებელი ქალი რუნგე, რომელიც მოელაპარაკა ნინოს და ყველაფერი გააგებინა.

ნინომ შორს დაიკავა: რა დროს ჩემი ვათხოვებაა, ჯერ თბილისში უნდა დავამთავრო საშუალო სასწავლებელი, შემდეგ რუსეთში უნდა წავიდე უმაღლესი სწავლის მისაღებადო.

კოტემ შეატყობინა ნინოს, თუკი სხვა არაფერი გაქვს საწინააღმდეგო, მე მოვიციდი, ვიდრე კურსს დაასრულებდეო.

ამაზედ შეთანხმდნენ კოტე და ნინო. ნინოს უნდა დაემთავრებინა სწავლა თბილისში და შემდეგ დაეწერათ ჯვარი.

ამგვარი გარდაწყვეტილების შემდეგ კოტემ გამოართვა ნინოს სურათი და მამას შეატყობინა, დავინიშნეო.

— ვინ დანიშნე, კოსტიუკ!

კოტემ აუხსნა, ამოიღო უბიდან ნინოს სურათი და აჩვენა მამას. დიმიტრიმ ახედ-დახედა სურათს და წარმოსთქვა:

— Отлично, отлично!

— ერთი მაჩვენეთ ის შავტუხა გოგო, როგორ გაკეთდა ამდენად, რომ კოტეს მოეწონა! — წამოიძახა ელენემ.

აქ დედამ გამოსთქვა სურვილი თავისი საძლოს მალე ნახვისა და კოტემ და ნინომ თავისი გადაწყვეტილება მალე შესცვალეს: ჯვარი დაიწერეს.

ეს ამბავი რომ გორში გაიგეს ნინოს მასწავლებლებმა, საშინლად ეწყინათ, რადგანაც ნინო საუკეთესო მოსწავლედ ითვლებოდა.

შემოდგა თუ არა ნინომ დიმიტრის ოჯახში ფეხი. მაშინვე შეუდგა სწავლასა და თვითგანვითარებას. დიმიტრი მას ასწავლიდა ფრანგულს, ელენე — მუსიკას.

ნინო თანდათან განვითარდა და „ბოლოს კოტეს აღარ ვარცხვენდიო“, იხუმრა ამას წინათ.

როგორი განწყობილება დამყარდა რძალსა და მამამთილს შორის?

ისეთი, რომელზედ უკეთესიც წარმოუდგენელი. ნინოს სურათს დიმიტრი უბით ატარებდა და პირველ ხანებში ასე აცნობდა თავის ნათესავეებს. სადაც უნდა ყოფილიყო, ნინოსათვის უნდა გაეზიარებინა თავისი ფიქრი, თავისი გრძნობანი, თავისი სულისკვეთება. „ჩემო საყვარელო შვილო ნინუკა“, „ჩემო სასიქადულო შვილუკა ნინუკა“,



„ჩემო სიხარულო ნინუკა“, — აი როგორის გრძნობით საჯსე ალერსისა არის აკრელებული დიმიტრის წერილები ნინოსადმი. როცა ამ წერილებსა კითხულობთ, შეუძლებელია სიამოვნების ცრემლები არ მოგადგეთ თვალზე.

მრავალი წერილიდან მე მოვიყვან მხოლოდ რამდენიმეს. დიმიტრი შეტად დიდი პიროვნებაა ჩვენთვის და იმის ყოველ სიტყვას დიდი ფასი და მნიშვნელობა აქვს. ჩვენი საზოგადოება ნაკლებად იცნობს დიმიტრი ყიფიანს კერძო ცხოვრებაში და აი ეს წერილები ახასიათებენ მას ამ მხრივ. მეც ეს რამდენიმე წერილი უფრო იმიტომ მომეყავს, რომ მკითხველმა მკითრეოდენი წარმოდგენა მიიღო იქონიოს, თუ როგორი იყო დიმიტრი კერძო ცხოვრებაში და თავისიანებში.

ჩემო კარგო და მშვენიერო

Hy-ka! — ნინუკა!

დიდი სიამოვნებით წავიკითხე შენი ამ თვის 22-ის (წერილი) და აი, გწერ პასუხს. რათ დამიგვიანე პასუხი აქამდინო, ამას კი ნუ მკითხავ, თორემ უნდა გითხრა, რომ თუმცა 22-ს იყო დაწერილი, მაგრამ ხაშურს 24-ს გაგიგზავნიათ და იქილამ წუხელის მოგვივიდა.

შენი სახლისკაცებისათვის, როგორც იმათი ამბავი გესმოდა, სასჯელი ძალიან შეუმსუბუქებიათ; ალბათ არა ჰქონდათ დიდი დანაშაული. შენი ფრანცუზულის ამბავი შენვე უნდა შემატყობინო ხოლმე, თუ რომ „დუშკა პაპაშასთან“ წერა არ დაგზარდა. როგორც რას მომწერ, ისე მივიღებ, არც თავის ქებად ჩამოგართმევ რასმე და არც საკიცხავად, რადგან ვიცი, რომ რასაც ჩემი საყვარელი შვილუკა ნინუკა თავის პაპაშას მომწერს, ნათელს მართალს მომწერს, *n'est ce pas, ma chere belle fille?*

ადვილად წარმოვიდგენ შენს კრუხებს როგორ დასტრიალებ და ლოვოს გამოგზავნილს ქათმებს როგორ ადევნებ თვალსა, კარგად დამკავალერობენ და კავალერ-დამობენ, თუ არა. ფრინველების ამბავს კარგს იწერები და ოთხფეხისას კი არაფერს. ამაების წვრილფეხობის იმედი დიახა მაქვს; მაგრამ საქმე ის არის, რომ თვითონ შენი წვრილფეხობაც დამახვედრო როდისმე. — ამ ხელათ რომ წითელი ღვინო მოგვივიდა, ძალიან მოგვწონს; მაგრამ თითქო წითელი ღვინის გამოგზავნას არ აპირებდნენ. ლევან მომოკითხე.

ბევრს გააკოცებ. შენი პაპაშა.

ჩემო საყვარელო და ძვირფასო

შვილო ნინუკა!

ჰე! აგალაპარაკე თუ არა! აქამდისინ შენს პაპაშას ორიოდ სამს სტრიქონს სწერდი ხოლმე. იმასაც რა ნაილაჯობით: ხან თავისებუ-

რად ავით არისო, — ვითამდა კარგათ ყოფნა არა სჯობდეს ავადმყოფობასა; ხან ჯერ ისევა სძინავს და მოწერა როგორ შეუძლიაო. ახლაც კი ლაზათიანათ გაჭრელებული წიგნი მომივიდა შენი, და რასაკვირველია, რომ ძაან მიამა. მაგრამ ერთს ადგილასა სწერ, თუ ნინუკა გიყვართ, პატარა ადრე დაიწყეთ ხოლმე წერაო. მერე ვინ გითხრა, რომ მე ნინუკა მიყვარს. სულაც არა. აქაოდა პაპაშა და ლილა აქ არ არიანო, მუზიკისათვისაც დაგინებებია თავი, ფრანცუზულისათვის.

Mais ce n'est pas bien, ma chère belle fille, savezvous. Vous pouvez lire et écrire: douc vous pourez cotinuez vous même. მაგრამ მაინც ბევრს გაკოცებ, ჩემო ნინუკა, ძალიან ბევრსა, რომ გათქმევიანო: ეპ, კარგია ახლა პაპაშაო. — მაშ მძახლისაგან მძახლის იმედი უნდა ვიქონიო, რალა! დიად კარგი და პატიოსანი. მოვიკითხავ პატივისცემით ორივე დებსა.

შენი პაპაშა.

ჩემო გულით საყვარელო კეკელუცო  
შვილო (belle fille) ნინა!

ოთხი ორს ოთახში მოთავსდებით თუ არა, მაინც, როდესაც ქალაქს ჩამოსვლა მომიხდება, როგორ იქნება, რომ ჩემ შვილებთან არ ჩამოვხდე. მართალია, მზახლების ერთ ოთახში მარტო ყოფნა არ ივარგებს, მაგრამ განა არ შეიძლება ისე მოვეწყოთ, რომ დედა და შვილი ერთს ოთახში იყვნენ და მამა და შვილი მეორეში. აქ შეუძლებელად განშორება მოდისო, შეიძლება სთქვას ვინმემ; მაგრამ ორი-სამი დღით რა დაუშავდებათ? უფრო გაქანებით არ შეუტევენ ერთმანეთსა. კი! შენ-ტე!

ლოკასთან! მოწერილი შენი სიტყვები გადავსწერე ჩემს წიგნში და ისე ვუგზავნი. ასე ჩემო კარგო და ტკბილო ნინო.

ორთავე მოგეხვევით, დაგკოცნით და მამა-შვილურის გრძნობით დაგლოცავთ.

თქვენი პაპაშა.

ჩემო საიმედო შვილო ნინუკა!

ჩვენს ახლანდელს მიწერმოწერაში სხვათა ადამიანის გულის თვისებათა შორის ორი თვისება გამოიხატა შესანიშნავი: 1. როდესაც გული სავსეა გრძნობით რომლითავე, სიტყვა აღარ ეხერხება ამ გრძნობის გამოსათქმელი, თუ რომ ტკბილია თვითონ ეს გრძნობა.

2. როდესაც აღელვებულია რისგანმე, მაშინ თავის თავად იბა-

<sup>1</sup> ლოკას დიმიტრი უძახდა თავის ქალს ელენეს.

ღება ისეთი მრავალსიტყოვნება, რომ საიღამ ახერხებს ამდენსაო, იტყვის მსმენელი.

ამათში პირველი იყო მიზეზი, რომელმაც გამოითხოვა მეორე და ამითი სხვა მოვლინება დამტკიცდა, რომელიც ცხადად გვაძინებებს, რომ შეთანხმებულნი და შეთვისებულნი ყოფილან ის გულიც, რომელსაც სიტყვა შემოაკლდა, შემოაკლდა გრძნობით სავსებისაგან და ისიც, რომელმაც მრავალი აფრქვია აღელვებისაგან. ერთი ერიდებოდა, მეტი არა მომივიდეს რაო, მეორე ჯავრობდა ამ მორიდებასა. შენ როგორ იტყვი. ამით გავათავოთ.

ღედა და ქმარი ბორჯომს წასვლას გირჩევენ, შენი სენისაგან ეგების განიკურნო. და შენ კი ყოყმანობ, აქაოდა წიწილები მოუვლელად დამრჩებიანო. ქალო! შენ ოღონდ შენი საკუთარი, ესე იგი, როსტუქასეული წიწილები, გვაჩვენე და ქათმის წიწილები თუნდა სულაც ნუ გამოგვჩეკიან.

გადაგეხვევით ორთავე ცოლქმარსა (чистейший грузинизм — ჯერ ქალი და მერე კაცი), ძალიან დაგკოცნით და დაგლოცავთ.

შენი პაპაშა.

ახლაც იტყვი, ცოტა მომწერაო?

მე შემეძლო კიდევ ამომეწერა სხვა წერილებიც. რადგან ნინოსა და დიმიტრის ვრცელი მიწერ-მოწერა ჰქონიათ ერთმანეთთან, მაგრამ ისეც ცხადია ამ წერილებიდან, თუ როგორი განწყობილება ყოფილა მამამთილსა და რძალს შორის.

დიმიტრის ყოველ სიტყვაში ჩასკვნილია ღრმა სიყვარული და პატივისცემა ნინოსადმი. ამგვარი ადამიანის სიყვარულსა და პატივისცემას აქვს თავისთავად გარეშე ყოვლისა დიდი მნიშვნელობა და ფასი, რადგანაც დიმიტრი უბრალოდ, დაუმსახურებლად არავის შეიყვარებდა და არავისა სცემდა პატივს, რძალი კი არა, ვინც უნდა ყოფილიყო.

დიმიტრი რომ არა სცდებოდა, ეს მისმა რძალმა მთელი თავის ცხოვრებით დაამტკიცა.

დიმიტრი ნინოს მასწავლებელი იყო. დიმიტრისაგან ისწავლა ნინომ სამშობლოს სიყვარული და მას დღეს აქეთ თავის ძალღონეს და ენერგიას ეს ქალი საზოგადო საქმის სამსახურში ჰხარჯავს.

კოტე და ნინო სხვადასხვა გზით ემსახურებიან მიზანს — სამშობლო ქვეყნის აყვავებას.

საზოგადო საქმეებს გარდა ნინო მწერლობაშიც იღებს დიდს მონაწილეობას.

1895 წლიდან მას აქვს დაწერილი რამდენიმე სურათი — ზოგი

ორიგინალური, ზოგიც ნათარგმნი რუსულიდან და ფრანგულიდან. აქვს დაწერილი სხვადასხვა საკითხებზე პუბლიცისტური შინაარსის წერილები. გადმოთარგმნა რომანი „სპარტაკი“, პიესა „სპარტაკი“, ფრანკოს მოთხრობა „ნაძირალნი“, პიესები: „ავი სენი“, „ახირებულა“, „დონ პიეტრო დე კარუზო“, „წერილი“ და სხვ.

მთარგმნელისათვის დიდად საჭიროა იცოდეს, თუ რა უნდა მიაწოდოს, რითი უნდა დააინტერესოს მკითხველი. ნინოს რომ ეს კარგად ჰქონდა გათვალისწინებული, სხვათა შორის, „სპარტაკის“ გამოცემით დაამტკიცა. ამ წიგნმა დიდი აღტაცება გამოიწვია მუშათა შორის და მათს გათვითცნობიერებას დიდი სამსახური გაუწია.

აი როგორის წერილით მომართეს ნინოს მუშებმა ამ წიგნის გადათარგმნისა და გამოცემის გამო:

ქ-ნო ნინო ყიფიანისა!

თქვენ მიერ ნათარგმნი ისტორიული რომანის „სპარტაკის“ წაკითხვამ დიდათ აღტაცებაში მოგვიყვანა. თუმცა დიდათ ვცდილობდით ჩვენი გულჩვილობა დაგვეფარა, მაგრამ ამაოდ, წმინდა გრძნობამ თავისი გაიტანა და ბევრი ცრემლი გადმოგვცვივდა ჩვენდა უნებურად თვალთაგან. რადგანაც უკანასკნელს გულის სიღრმემდის ჩავვწვდა აღტაცებით გრძნობანი სპარტაკის მოქმედებით გამოწვეულნი და იქ მოეცხო წყლულს მალამოდ.

ნუთუ ჯიოვანიოლის ნაყურთხი კალამი ისე ხელოვნურად აგვიწერდა ორი ათასის წლის წინეთ მომხდარს ამბავს, რომ დღესაც ასე განსაცვიფრებელს და საგულისხმიერო გაკვეთილს წარმოგვიდგენდა? თავისუფლად შეგვიძლიან ვსთქვათ, რომ დღესაც ზედ გამოჭრილს გაკვეთილს შეადგენს სპარტაკის სიყვარული ჩაგრულ ძმებისათვის... ჩვენს თავს მოვალეთ ვრაცბთ, რომ საზოგადოთ ყოველს ჰეშმარიტს მოღვაწეს ღირსეული მაღლობა გამოეცხადოს. ამისათვის მოგმართავს თქვენ ქართველნი მუშა-მკითხველნი, ვინც კი წავიკითხეთ დიდის მაღლობით მაგ თქვენის დიადის შრომისათვის, რადგანაც არ დაზოგეთ არც ნივთიერი და არც გონებრივი ქონება ამ ძვირფასი განძისათვის. რომელიც გაჭხადეთ ყოველი ქართველი მკითხველისათვის ხელმისაწვდომი, თქვენის ნიჭით, დაუზარელის შრომით და მშვენიერი მშობლიურის ენით. ამისათვის ვურჩევთ ყველა ქართველ მკითხველს, რომ უეჭველად წაიკითხოს, რადგანაც მასში ნახავს ბევრს საგულისხმიერო ამბავს, რომელიც გამოჭრილია ღლეჯანდელ ჩვენს ცხოვრებისათვის, რომ დღესაც იგივე მონობაა, დღესაც ერთი ბატონია, მეორე კი მონაა, დღესაც ერთი მეორის შრომის ნაყოფზედ ბატონობს და სხვა... მხოლოდ რასაკვირველია იმ განსხვავებით,

რომ დღეს სხვა ფორმებშია გახვეული. იმედია, რომ ყველა ჩვენი მკითხველი ღირსეულად დაათვას თქვენს შრომას და ვისურვებთ, რომ თქვენებრ სხვანიც აღმოჩენილიყვნენ და თქვენის მიბაძვით სამსახური გაეწიოთ ერისათვის.

დავშთებით თქვენი პატივისცემელნი რკინის გზის სახელოსნოს ხელოსნები ვანო ჭავჭავაძე და სხვანი.

მუშებისაგან ამგვარი შინაარსის წერილის მიღება და ასეთი მაღლობის დამსახურება დიდი განძია საზოგადო მოღვაწისა და მწერლისათვის.

ზაფხულობით ნინო აგროვებდა ქვიშხეთში სცენისმოყვარეებს, რეპეტიციებს მართავდა თავის სახლში, მოამზადებდა პიესებს და შემდეგ მართავდა წარმოდგენებს ქვიშხეთში, ხაშურში, სურამში, ბორჯომში. შემდეგ და შემდეგ საზაფხულო წარმოდგენებისათვის ჩვენს მსახიობებსაც მიიწვევდა ხოლმე.

წმინდა შემოსავლიდან ნინო დახმარებას უწევდა ღარიბ მოწაფეებს, სტუდენტებს, სოფლის მასწავლებლებს და წერა-კითხვის საზოგადოებას.

ამგვარად მიმდინარეობდა აღნიშნულ ალაგებში ზაფხულობით წარმოდგენების მართვის საქმე ნინოს მეტაურობით, სანამ სურამში არ დაარსდა ამ რამდენისამე წლის წინათ დრამატიული საზოგადოება.

თბილისშიაც ნინოს ბევრჯერ გაუმართავს წარმოდგენები მსახიობების სასარგებლოდ.

თავადაზნაურობას ხშირად გამოუღია ფული ჩვენი თეატრისათვის. ამ საქმეში ნინოსაც წილი მიუძღვის, რადგანაც მისის თხოვნით ბევრჯერ მიუცია გუბერნიის მარშალს თეატრისათვის ათას მანეთობით.

დიდი დახმარება გაუწევია ქ-ნ ნინოს წერა-კითხვის საზოგადოებისათვის. მან დააარსა ფულების შესაკრებად ყულაბები და ამ საქმის მოსაწესრიგებლად დიდი შრომა და ენერგია დაუხარჯავს. ჩვენს არისტოკრატ ქალებს დაუბრუნებდა ყულაბა, მიმართა ყველას ცალკე მოწოდებით და „მატიცის“ ნომრებით. უხსნიდა ყველას ამ საქმის დიდ მნიშვნელობას და ამგვარის მეცადინეობით ჩვენი ქალების საზოგადო საქმისადმი გულგრილობის მაგარი კედელი შეანგრია. პირველ ხანებში რამდენიმე ასი თუმანი შეგროვდა ამ ყულაბების შემწეობით, მაგრამ შემდეგ და შემდეგ საქმე თანდათან შეფერხდა და ბოლოს სრულებით ჩაიფუშა.

ნინომ შესწირა წერა-კითხვის საზოგადოებას 800 ცალი „სპარ-

ტაკი“ ნახევარ ფასში და აგრეთვე 600 კვადრ. საყენი სააგარაკო ადგილი.

დიდი შრომა დასჭირდა ნინოს სხვა ჩვენ მოღვაწე ქალთა წრის დასაარსებლად როგორც თბილისში, ისე სხვა ქალაქებშიც.

რაფიელის, აკაკის, ეკ. გაბაშვილის, საფაროვი-აბაშიძის იუბილეზე ქალების წარმომადგენლად იყო ხოლმე ნინო და ყოველთვის გრძნობით და შინაარსით სავსე სიტყვა წარმოუთქვამს.

ნინოს უნდა ვუმაღლოდეთ. რომ განსვენებულმა არჩილ ჯორჯაძემ დასწერა დიმიტრი ყიფიანის საუცხოო ბიოგრაფია, რომელიც სამწუხაროდ დღესაც არ არის ცალკე წიგნად გამოსული.

ყოველგვარი მასალა ნინომ დაუმზადა არჩილს, თორემ ვინ იცის, როდის ველირსებოდით ამ დიდებული ქართველის ბიოგრაფიას.

1915

## თეატრი

არ განგიცდია. მკითხველო, ერთგვარი უსიამოვნო გრძნობა: ზაფხულის გახურებულ დღეში ცა ნელ-ნელა მოიბურება ტყვისფერი მძიმე ღრუბლებით, შუე დაიმალება, სიო არ იძვრის, ჰაერში სიცხეა გამდგარი. ასე გგონიათ, თითქოს ბორკილებით იყოს შებოჭვილი და დედამიწაზე მიმაგრებული მთელი სიმძიმე ამ ღრუბლები-სა კი თქვენ გაწეებოდეთ; სუნთქვა გიძნელდებათ, გინდათ სადმე გაიქცეთ, მთლათ მოსწყდეთ დედამიწას, ასცილდეთ ღრუბლებს და თავისუფლად გაინავარდოთ ცის სივრცეში. მწარე სინამდვილე კი ჩაგჩინებთ, რომ თქვენ არარაინ ხართ, მონა მიწისა, მიწაზე დაღოლიალობთ და მიწამ უნდა შეგკამოთ — ვერც ცოცხალი მოსცილდებით მას, ვერც მკვდარი.

ამგვარი უმწეო მდგომარეობიდან გამოსასვლელად ბუნებამ ადამიანს საუცხოო კარი დაუტოვა; ეს კარი რომ არა, მართლაც ჩვენი არსებობა ხშირად აუტანელი იქნებოდა და ცხოვრება—საშინელება. ეს კარია — ოცნება.

ყოველივე ამაოა და წარმავალი: ახალგაზრდობა, სილამაზე, სახელი, სიმდიდრე — ყოველივე კვდება, ჰქრება, ისპობა, იკარგება, მხოლოდ ოცნებაა უკვდავი, უჭკნობი, მარად მშვენიერი.

ოცნება ცხოვრების სამკაულია. ოცნება რომ არ იყოს, ცხოვრება უმეტეს შემთხვევაში საშინელი სატანჯველი იქნებოდა. ოცნება ადამიანს ამაღლებს, სულს უტკბობს, გრძნობას უფაჩიზებს.

ოცნებამ მისცა ადამიანს სარწმუნოება, ხელოვნება. ოცნებამ ასწავლა მას სიმღერა, ცეკვა, სიყვარული.

ოცნება შემოქრილია ჩვენს ყოველდღიურ ცხოვრებაში, ვერ ნახავთ ადამიანს, რომ უოცნებოდ ცხოვრობდეს.

ჭირისუფალი, რომელიც თავის მკვდარს დასტირის, ოცნებობს: მას სჯერა, ან უნდა დაიჯეროს, რომ სიკვდილს იქით რაღაც არსებობს.

ხელოვანი, რომელიც ჰქმნის, მუდამ ოცნებობს; მსახიობი, რომე-

ლიც თამაშობს სცენაზე, ოცნებობს: მომღერალი, მემუსიკე, შოცეკვავე, დედა, რომელიც შვილს უაღერსებს, ვაჟი, რომელიც თავის სატრფოს წერილს სწერს, — სულ ყველა ოცნებობენ.

მეკუროტნე მუშა, რომელიც დღიურ მონაგარს ითვლის და ოფის იწმენდს შუბლზე, განა ის კი არ ოცნებობს?

ჩასუქებული ვაჭარი, რომელიც თავის სიმდიდრეს ითვლის, განა არ ოცნებობს?

ოცნების დიდი ტაძარი — თეატრია.

ხელოვნების ტაძარიო, გამისწორებს მკითხველი.

— ხელოვნებაში იმდენად არის ჩაქსოვილი ოცნება, რომ გამოყოფა შეუძლებელია. თვით ის სინამდვილე, რომელიც ხელოვნებაშია, ოცნების ქურაშია გატარებული და ფერწაცხებული.

და ამიტომ თეატრი იმდენადვე არის ოცნების ტაძარი, რამდენადაც ხელოვნებისა.

რა მნიშვნელობა აქვს თეატრს?

ის, რა მნიშვნელობაც აქვს ოცნებას, ხელოვნებას.

თეატრი აფაჩიზებს ჩვენს გრძნობას, ამაღლებს ჩვენს სულს, ალამაზებს იმ ყოველდღიურ ცხოვრებას, რომელსაც ჩვენ უპყრითვართ ბრჭყალებში, როგორც მიმინოს გნოლია — პოეტის თქმისა არ იყოს, — და სასიცოცხლო სამოქმედო ძალას გვმატებს.

საჭიროა, რომ ადამიანს სიცოცხლე უყვარდეს. მაგრამ სიკვდილის კი არ ეშინოდეს; საჭიროა, რომ ადამიანი ღირსეულად ატარებდეს ადამიანის სახელს.

ამგვარ მიზანს სხვათა შორის თეატრი ახორციელებს.

უბრალო გასართობიც რომ იყოს თეატრი, ყოველ შემთხვევაში ის გონივრული გასართობია, ადამიანის გულსა და გონებას წრთვნის, მაშასადამე ამ თვალსაზრისითაც ის არის ფრიად საჭირო კულტურული დაწესებულება. დღეს კულტურულ ერად არასგზით ჩაითვლება ის ერი, რომელიც ეროვნულ თეატრს მოკლებულია.

ეროვნული თეატრი მართო შენობა კი არ არის, ეროვნული თეატრია მსახიობი, დრამატურგი, რეპერტუარი და — ბოლოს — შენობა.

ცალიერი შენობა ეროვნულ თეატრს ვერ შექმნის, ხოლო თუ მსახიობია და დრამატურგი, — ეროვნული თეატრიც არის.

რასაკვირველია, შენობას დიდი მნიშვნელობა აქვს. შენობის უქონლობა აფერხებს ეროვნული თეატრის საქმესა და განვითარებას. მაგრამ მსახიობსა და დრამატურგს მეტი მნიშვნელობა აქვს.

ქართული თეატრის დაწვა დიდი უბედურება კი არ იყო, დიდი დანაკლისი იყო. ჩვენ მართლა და მართლა არც იმდენად ღარიბნი



ვართ, რომ სამას-ოთხასი ათასი მანეთის დაკარგვა ეროვნულ უბედურებად დავსახოთ. ხოლო ჩვენ რომ ვერ შევქმენით დღემდე სულ უბრალო პირობები ჩვენი დრამატურგებისა და მსახიობების ნაყოფიერი მოღვაწეობისათვის, ეს კი უბედურებაა.

გედევანიშვილის „სინათლე“ მგონი თექვსმეტჯერ მაინც დაიდგა ერთი სეზონის განმავლობაში. საარაკო ბედია ქართველი დრამატურგისათვის.

მერე რამდენი მიიღო ასეთი ბედის მწერალმა?

შიუჯაშვილს საკმაოდ დიდი ნიჭი აქვს დრამატურგისა, უმეტესი დრო სპეციალურ შრომას უნდა მონადროს სასწავლებელში და შემდეგ დადლილი და მოქანცული უნდა შეუდგეს თვისი სულიერი წყურვილის დაკმაყოფილებას.

რამიშვილი თვალსაჩინო ნიჭია. მთელი დღე და ზოგჯერ ღამეც ავადმყოფებს უნდა მონადროს და დადლილი და დაქანცული უნდა მიუჯდეს საწერ მაგიდას.

გარწმუნებთ, არც შიუჯაშვილს, არც რამიშვილს არ მიუღიათ თავის პიესებში იმდენი, რომ ქალაქის ფასად ჰღირდეს.

განათლებული ახალგაზრდობა მსახიობობას გაუარბის. რატომ?

იმიტომ რომ ეს ოხერი კუჭი ყველასა აქვს.

მე კარგად ვიცნობ ერთ განათლებულ ახალგაზრდას, რომელსაც საკმაო ნიჭი აქვს რეჟისორობისა, დიდი სურვილი და საკმაო მომზადება.

მერე?

— რა ვქნა, ქართული სცენა ვერ მარჩენს და იძულებული ვარ, სხვა საქმეს მოვკიდო ხელით.

მტყუანია? შემცდარი?

როგორ შეიძლება მისი გამტყუნება? ის ხომ ფუფუნებას არა თხოულობს, განცხრომას ხომ არ ეძებს, — ის ითხოვს მინიმუმს, ურომლისოდაც შეგნებულ ადამიანს ცხოვრება არ შეუძლია და ჩვენი სცენა ამ მინიმუმსაც ვერ აძლევს მას.

ქართულ თეატრს სათავეში უდგას გამგეობა.

დადგება არჩევნების დრო და ძველ გამგეობას დამნაშავეის სკამზე ვსვამთ, ასე იყო და ასე არის, — ერთი და იგივე უცვლელად მეორდება.

მე თვითონ ვიყავი ერთ დროს გამგეობის წევრად, თოთხმეტი საათი დღეში სპეციალურ სამუშაოს ვუნდებოდი და შემდეგ მივდიოდი სხდომაზე.

რა უნდა გამეკეთებია? დაღლილ და მოქანცულ ადამიანს გახსნა ნაყოფიერი შრომა მოეთხოვება.

უსასყიდლოდ შრომა მხოლოდ მდიდარს შეუძლია, ჩვენში კი მდიდარი ძალიან ცოტაა.

მაშ რა უნდა ვქნათ?

უწინარეს ყოვლისა, უსასყიდლო შრომა უნდა მოისპოს.

ჩვენში მსახიობიც, დრამატურგიც, დრამატიული გამგეობის წევრიც. ყველანი უსასყიდლოდ შრომობენ, ასეთ პირობებში დღევანდელ დღეს ნაყოფიერი შრომა შეუძლებელია.

აბა მიეცით გედევანიშვილს, შიუკაშვილს, რამიშვილს ყოველ პიესაში საკმაო ჯილდო, არა ნაკლებ ათი თუმნისა თითო მოქმედებაში, — მაშინ ისინი სავალდებულო სამუშაოს შეამცირებენ და მეტ დროს წერას მოანდომებენ; მაშინ გარწმუნებთ, მათი შრომა უფრო ნაყოფიერიც იქნება, უფრო ღირსებიანიც; დაუნიშნეთ გამგეობის ზოგიერთ წევრს მაინც ჯამაგირი, — მაშინ გამგეობის შრომაც უფრო ნაყოფიერი იქნება; გაიღეთ რეჟისორებისა და მსახიობთათვის საკმაო თანხა, — ნიჭიერი რეჟისორებიც მუდმივად გვეყოლება, განათლებული მსახიობებიც.

ამ მხარეს ჩვენი თეატრისას გაცილებით მეტი მნიშვნელობა აქვს, ვიდრე შენობას.

ჩვენ კი ამ მხარეს ნაკლებ ყურადღებას ვაქცევთ და, თეატრი რომ დაიწვა, ლამის შავები ჩავიცვით.

სადა გვაქვს საამისო ფულიო, მეტყვიან.

როცა არა გვაქვს, საყვედურებსაც თავი უნდა დავანებოთ.

თუ გვექნება, მაშინ ეს ფული მარტო შენობას კი არ უნდა მოვანდომოთ, არამედ უნდა შევქმნათ ერთგვარი ფონდი ჩვენი დრამატურგების, მსახიობების და საზოგადოდ სცენის მსახურთა ცოტადენი რიგიანი უზრუნველყოფისათვის.

## ჩვენი ვალიკო

ჯერ კიდევ მოსწავლე ვიყავი, როდესაც სუმბათაშვილთან (იუ-ჟინთან) მომიხდა მისვლა მოსკოვში.

ყოველ ოთახში, ყოველ ნაბიჯზე სიმდიდრე, ფუფუნება! ადამიანს ჰქონია გემოვნება და ჰქონია საშუალება, რომ ეს გემოვნება დაეკმაყოფილებია. სადაც კი მიიხედავთ, კომფორტი.

ადამიანს ჰქონია წყურვილი მშვენიერებისა და ჰქონია მასთან სახსარიც, რომ ეს წყურვილი სრულად, უნაკლოდ მოეკლა, სადაც კი მიიხედავთ, ძვირფასი ქანდაკება, ძვირფასი სურათები, ძვირფასი და ლამაზი მოწყობილობა.

ბუნებას მოუცია ნიჭი, დაჯექი და იმუშავე, — ყოველივე ხელს გიწყობს მუშაობისათვის.

სუმბათაშვილიც მუშაობდა. და მუშაობს მხნედ, ნაყოფიერად. ის ნიჭიერი მსახიობია, ნიჭიერი მწერალი.

განვლო დრომ. თან წარიტაცა ჩემი სიყმაწვილეც.

დღეს მე წილად მხვდა ჩვენს საკუთარ სუმბათაშვილთან, ჩვენს გუნიასთან, ჩვენს ვალიკოსთან სიარული. სიმდიდრეს, ფუფუნებას აქ შორიანხლოსაც კი არ გაუვლია.

ადამიანს ჰქონია და აქვს გემოვნება, მაგრამ არა აქვს საშუალება, რომ ეს გემოვნება დაეკმაყოფილებია.

ადამიანს ჰქონია და აქვს ძლიერი წყურვილი მშვენიერებისა, მაგრამ არასოდეს ჰქონია სახსარი, რომ ეს წყურვილი ცოტათი მაინც დაეკმაყოფილებია.

ბუნებამ მისცა ვალიკოს ნიჭი, მაგრამ პატარა, დაჩაგრულმა, ხელფეხშებოროკილმა სამშობლომ მას ვერაფერი მისცა.

საკირო იყო აუცილებელი მსხვერპლი.

ვალიკომაც შესძლო ამ მსხვერპლის გამოღება და მთელი თვისი ნიჭი, თვისი დაუშრეტელი ენერჯია სამშობლოს ანაცვალა.

აბრამმა შესძლო და თვისი ერთადერთი შვილი ღვთისათვის სამსვერპლოდ გაიმეტა.

ვალიკომ შესძლო და თვისი ცოლი, თვისი შვილები, რომლებსაც დღეს ყველაფერი აკლიათ, თვისი საკუთარი თავი მსხვერპლად შესწირა სამშობლოს სახელსა და დიდებას.

შესძლო იმიტომ, რომ დიდ ნიჭთან ერთად ის არის დიდი გმირი და აქვს დიდი გული შეუპოვარი მოქალაქისა. დიდი მსხვერპლის გამოღებას რომ შეეშინებია ვალიკო და მორიდებოდა, განშორებოდა. სამშობლო კერას, თვისის ნიჭით, თვისის ენერგიით გაიკაფავდა გზას და სხვაგან სხვადავით მოიპოვებდა იმ პირობებს, იმ კომფორტს, რომელიც ფრიად საჭიროა ნაყოფიერი მუშაობისათვის.

კერძოდ მისთვის, მისი ნიჭისათვისაც გაცლა იყო საჭირო; ხოლო მისი სამშობლოსათვის კი — დარჩენა.

ვალიკოც დარჩა.

და თუმცა სამშობლომ მას ვერ მისცა ვერაფერი, ვალიკოს ნიჭი მაინც გაიშალა და იმისმა შრომამ დიდი ნაყოფიც გამოიღო.

დინჯი, დაკვირვებული, ნიჭიერი მსახიობი, მსახიობი-ინტელიგენტი — აი ვალიკო სცენაზედ.

მსახიობი-ადამიანი, რომელშიაც შური და მტრობა არ არის, — აი ვალიკო.

ბევრჯერ მომხდარა: ნიჭიერ მსახიობს არ უყვარს ნიჭიერი ამხანაგი, ზურგს უკან ჰკიცხავს, ამცირებს მას.

ვალიკო კერძო ლაპარაკში მხოლოდ თავის თავს ამცირებს, სხვების ღირსებას კი არ მალავს. პირიქით, ის ალტაცებული მოგვიყვებათ: აი ამას ეტყობა ნიჭი, აი ეს გაგრძობინებთ ნამდვილ განცდას, მე არაფერი ვარ მათთან შედარებითო.

ვალიკო-დრამატურგი — ეს ხომ ბურჯია ჩვენი თეატრისა, და უშრეტელი წყარო ჩვენი რეპერტუარისა. აქ ვალიკოს ტოლი არა ჰყავს: მისი შრომა ამ მხრივ გასაოცარია და დაუფასებელი.

ვალიკომ მიიღო თეატრი მეტად ღარიბი რეპერტუარით და თვისი დაუშრეტელი ენერგიით, შრომითა და თეატრის უზომო სიყვარულით შექმნა რეპერტუარი. ვალიკომ შეაყვარა მდაბიო ხალხს სცენა, და მისი პიესები დღესაც ამშვენებენ ჩვენს სცენას და ჯერ კიდევ დიდხანს მიიზიდავენ მდაბიო ხალხს.

ვალიკომ ნიადაგი გაუმავრა ოპერას ჩვენს სცენაზე და აქაც დიდი ნიჭი და შრომის უნარი გამოიჩინა. თუმცა თითონ მოკლებული იყო სპეციალურ მუსიკალურ განათლებას, მაგრამ მცოდნე პირნი. პირდაპირ განცვიფრებული არიან „სევილიელი დალაქის“ თარგმანით.

ღირსეული მოქალაქე, მებრძოლი დემოკრატი, პირდაპირი,

მოურიდებელი, პირში მთქმელი, დაუძინებელი მტერი ყოველგვარი სხვასთან სხვისი, ჩემთან ჩემობისა, — აი ვალიკო.

ავადმყოფი, სარეცელზე მიკრული ის მაინც მოქმედებაზე, ბრძოლაზე ოცნებობს.

საკუთარ თავზე, თავის ავადმყოფობაზე ვალიკო სულ ცოტას ლაპარაკობს; ის იმდენად გატაცებულია ბრძოლის, მოქმედების წყურვილით, რომ საკუთარი თავი ხშირად ავიწყდება.

საყვარელია, სათაყვანებელი ასეთი პიროვნება.

თავისი დიადი ნიჭი, დიდი ენერგია მან სრულად მოანდომა საქვეყნო საქმეს, — თავისათვის, პირადი კეთილდღეობისთვის არაფერი გაიმეტა.

მადლიერმა სამშობლომ დიდი ხანია შეიყვარა ვალიკო. მომავალი კიდევ უფრო გაზრდის ამ სიყვარულს.

ვალიკომ სრულად მოიხადა თავისი ვალი საზოგადოების წინაშე.

მე მრწამს, რომ ჩვენი საზოგადოება და დაწესებულებანიც სრულად მოიხდიან თავის ვალს ამ იშვიათი ადამიანის წინაშე.

1916

## ს. ფ ა შ ა ლ ი შ ვ ი ლ ი

მაგრამ მე ხვედრსა ჩემსა ვერ ვპოვებ,  
და მით კაემანს ვერა ვიშორებ.

ნ. ბ ა რ ა თ ა შ ვ ი ლ ი

არის პოეტი, რომლის სახეც თქვენთვის პირველი ლექსიდანვე ნათელია. ის მალე ჰპოვებს თავის ხვედრს, მალე იკაფავს გზას და ამაშია მისი ბედი და უბედობაც; თუ ის დიდი ნიჭია, მალე ხდება ხალხის, საზოგადოების რჩეულად; თუ მისი ნიჭი ზერელება, პირველი გამოშუქების შემდეგ თანდათან იღევა და ბოლოს სრულებით იძირება არარაობის, დავიწყების უფსკრულში.

არის პოეტი, რომლის სახეც დიდხანს რჩება გამოურკვეველი, ის დიდხანს არის დუღილში, გარკვეული პოეტის ჩამოყალიბების პროცესი მასში დიდხანს გრძელდება. შეიძლება ასეთი ხანგრძლივი დუღილი მისთვის უფსკრულად გადაიქცეს და შიგ ჩაალუპოს, ხოლო თუ გამარჯვებული გამოვიდა, უსათუოდ ღრმა და მრავალფეროვანი იქნება.

უკანასკნელთ რიცხვს ეკუთვნის პოეტი ფაშალიშვილი.

ააღეთ გრიშაშვილი. მან მალე ჰპოვა თვისი ხვედარი, მალე გაიკაფა გზა და მისი პოეზია თქვენთვის დღესავით ნათელია. გვარიც რომ არ წაიკითხოთ, ისეც იცნობთ იმის ლექსს. მასა აქვს არჩეული ვიწრო ფარგალი, ამ ფარგალში ის ძლიერია. როგორც კი გადასცილდება ამ ფარგალს, ის ნაძალადევია, უღამაზო.

იგივე არ ითქმის ფაშალიშვილზე.

ფაშალიშვილს ერთი, ორი და რამოდენიმე ლექსით ვერ იცნობთ, რადგანაც მისი მუშა მრავალფეროვანია. ფაშალიშვილი ჭერ თვითონ ვერ იცნობს თავის თავს, ის. გარკვეული, ჩამოყალიბებულ პოეტი არ არის.

ვუკვამს ენით რომა ვსთქვათ, ფაშალიშვილი „ფიქრისას აგებს

ყორესა“. მისი ბუნება ფიქრთა და გრძნობათა თაიგულია და იმისდა მიხედვით, თუ როდის რა სჭარბობს, პოეტი ხან მოლიმარია და ბრწყინვალე, ხან მოწყენილი და ცრემლთა მფრქვეველი.

სიცოცხლის საიდუმლოება, სულის უკვდავება — აი ერთ-ერთი მთავარი საკითხი, რომელიც ამართულა პოეტის წინაშე და რომლის გადაჭრას მოუთმენლად პლამობს პოეტის სული.

სად მოვსულვართ, სად მივდივართ,  
რა დავტოვეთ, წინ რა გვხვდება? —  
და ეს ცივი გამოცანა  
ჩემში ხშირად მეორდება.  
ვერ ავხსენი ღლეანდლამდე  
და კვლავ გამოცანად მრჩება.

ნორჩი პოეტი სდგას უდიდესი საიდუმლოების წინაშე, მისი მოუსვენარი სული ცდილობს ამ საიდუმლოების დასშული კარის შეღებას, რათა ახსნას აუხსნელი, იხილოს უხილავი.

ძიების, ბრძოლის დროს პოეტს ხშირად ეპკვი ეპარება, გაშლილი ფრთები ეკვეცება და სასოწარკვეთილება იპყრობს, ის იტანჯება... იტანჯება.

მაგრამ არა მსურს, ცხოვრების ტლანქს ბედს  
ქედმოხრით ვუთხრა სიტყვა მონისა!

დეე, ამგვარი ძიება ტანჯვა იყო, — ის მაინც ამ გზას ირჩევს და ამგვარად სავსებით ღებულობს ცხოვრებას და ტანჯვას ერთად, რადგანაც:

...ყოფნა უტანჯველად ხომ იგივე სიკვდილია.

აქ ფაშალიშვილი ჩვენს ახალგაზრდა პოეტებში ყველაზე უფროა ვაჟას მიმდევარი, ვაჟას მოწაფე.

ჩემს წარმოდგენაში ვაჟა მეტად დიდი, მეტად თავისებური პოეტია. გზაში რომ შეხვდებოდით ვაჟას, თუ არ იცნობდით, ყურადღებას არ მიაქცევდით: სრულებით უბრალო, ჩვეულებრივი ადამიანი, უბრალო ჩოხაში გახვეული!

როდესაც გაიცნობდით, დარწმუნდებოდით, რომ ჩვეულებრივ გარეგნობაში დიდი და უქრობელი სულიერი ლამპარი ენთო.

სწორედ ამგვარივეა ვაჟას პოეზიაც.

პირველს შეხვედრაზე შეიძლება არც კი მოახდინოს თქვენზე შთაბეჭდილება, მაგრამ როდესაც კარგად გაიცნობთ, დიდ ფიქრსა და დიდ გრძნობას უექველად ნახავთ შიგ.

გონებას ფიქრი სტანჯავდეს,  
გულს ცეცხლი სწვავდეს ძლიერი —

აი ვაჟა!

და განა ყველა ჩვენი პოეტები არ არიან ასეთები?

არა — ზოგს ფიქრი ახასიათებს, ზოგს ცეცხლი.

ილია, მაგალითად, ფიქრია, აკაკი — ცეცხლი.

ვაჟაში ორივე პარმონიულად არის შეერთებული.

ვაჟასა აქვს ერთი შესანიშნავი ლექსი: „ჩემი ვედრება“, სადაც პოეტი ღმერთს შესთხოვს:

ნუ დამასვენებ ნურას ღროს,  
მამყოფე შეძრწუნებული,  
მხოლოდ მაშინ ვარ ბედნიერ,  
როცა ვარ შეწუხებული!

ტანჯვაში ბედნიერების ძიება — აი თვისება ქართველი ადამიანისა, ქართული სულისა.

ამ სულის ერთი საუკეთესო გამომხატველი ვაჟაა და მის გზას ბისდევს ფაშალიშვილიც, როდესაც ამბობს:

მაგრამ ყოფნა უტანჯველად ხომ იგივე სიკვდილია?

ფაშალიშვილის ფიქრსა და გრძნობას განუყრელად თან დასდევს ერთგვარი სევდა, ერთგვარი ნაღველი და მთელი პოეზია ახალგაზრდა ხელოვანისა სევდიან სიმებზე არის აწყობილი:

ნაღველო, ჩემო ნაღველო, სახეე სიცოცხლის გმობისა,  
ამხანაგი ხარ მუდმივი ჩემი ფიქრის და გრძნობისა.  
შენ შემხვდი ყრმობის რიყრაყზე და ამყე თანამგზავრადა,  
ცრემლსა და ეკლის სიობლეს ფეხქვეშ მიფენდი სტავრადა!

ჩვენი სამშობლო მზის ქვეყანაა, წარმტაცი ბუნების ქვეყანა. აქ მზის სიცოცხლე და ბუნების სილამაზე ადამიანს ათრობს. მაშასადამე, ცრემლებს, მწუხარებას ალაგი არ უნდა ჰქონდეს, აქ შეუწყვეტელი მხიარული სიმღერა უნდა გაისმოდეს.

ნაცვლად ამისა ჩვენს პოეზიას განსაკუთრებით სჩვევია ცრემლები.

ჩვენი პოეზია მშვენიერი ტარიელია, რომელსაც ცრემლი სდის შეუშრობელი.

ამის უმთავრესი მიზეზი ჩვენი ისტორიული ხვედრია.

მონის უღელქვეშ ძნელია სიცილი.

ფაშალიშვილის სევდის ერთი მიზეზიც სწორედ აქ არის:

ერის კვნესა იქცა ჩემის სულის ჰირად.

ფაშალიშვილი ნორჩი მგოსანია. ყოველ მის მისწრაფებას, ყოველ მის ნაბიჯს სიჭაბუკის ეჭვები თან დასდევდნენ:



ვაჰ, თუ ბუნება მოსტყუვდეს ჩემში  
და გადმოცემა ვერ შევძლო მისი.

ფაშალიშვილის სევდის მეორე მიზეზი აქ უნდა ვეძიოთ. ეს მი-  
ზეზი დროებითია, წარმავალი.

ფაშალიშვილის შემოქმედებაში არის ფილოსოფიური მიდრეკი-  
ლება; მის ყურადღებას განსაკუთრებით იპყრობს სამყაროს დასა-  
ბამი და დასასრული, არსებობის საიდუმლოება, სიცოცხლის მიზანი:

და ვერაინ ვერ გაიგებს  
საწუთროს და ყოფნის მიზნებს.

ფაშალიშვილს წინდაწინვე უხამავს ის ფიქრი, რომ ვერც ის  
გაიგებს საწუთროს, ყოფნის მიზნებს, და იქ არის მესამე მიზეზი  
ფაშალიშვილის სევდისა.

პოეტის სევდას ყველგან თან დასდევს იმედის სხივი:

ხან მხიარულის ოცნებით დავმღერ, ხან ნაღვლიანადა,  
მაგრამ ორსავე დროს ნახნავეში იმედსა ვთესავე ყანადა.

ერთ თავის ლექსში ფაშალიშვილი თვითონ ახასიათებს თავის  
შემოქმედებას:

რწმენა, იმედი, ტრფობა და გლოვა  
ჩემსა გრძნობაში გამოიქარა.

საკმაო ტემპერამენტი, მოუსვენარი ფიქრი, ძიების წყურვილი,  
მდიდარი გრძნობა — ყველა თან ახლავს ახალგაზრდა მგოსანს,  
რომლის მომავალიც წინ არის:

სულ წინ ვისწრაფვი მარადის,  
ჩამდენად შემწვევს ძალია.

ახალგაზრდა მგოსანს ძალა უესწვევს, მაგრამ იმის სევდაში და-  
კვირვებული ადამიანი ბევრგან ამოიკითხავს დაუწერელ სიტყვებს:

ფრთებს მიკვეცს, აღზაფრენასა  
ცხოვრება ყოველდღიური.

ფაშალიშვილი ჯერ მეტად ნორჩი მგოსანია, ის არ არის ჩამო-  
ყალიბებული, ჯერ ისევ დუღილშია. და აი ამ ხანაში მას სჭირდება  
ძლიერი დახმარება საზოგადოებისაგან, რომ ის საკმაო მომზადებით  
წეიარაღდეს და შემდეგ ერთიათასად დაუბრუნოს საზოგადოებას  
წისგან მიძღვნილი.

ფაშალიშვილი უტყუარი ნიჭია და თუ ის საფერისად ვერ გაი-  
შალა, საზოგადოების ბრალი იქნება.

„მეცით ნიქსა გზა დართო!“

## სიტყვაპაწმული მწერლობა 1919 წელს

წელს გამოქვეყნდა ვასილ ბარნოვის დიდი რომანი ისტორიული შინაარსისა — „ტრფობა წაპებული“.

ბარნოვი დიდი მხატვარია და მეტად ნაყოფიერი, მ-არამ თავისებური.

და ეს თავისებურებაა მიზეზი, რომ მას ხალხი არ იცნობს იმდენად, რამდენადაც მწერალი ამისი ღირსია.

ბარნოვი მეტად შინაარსიანი, ლამაზი წიგნია, მაგრამ ძველი წიგნი. ძველ წიგნს კი — ისიც ჩვენს დროში — მეტად მცირერიცხოვანი მკითხველი ჰყავს.

ბარნოვს იზიდავს საქართველოს სიძველე, მისი წარსული ცხოვრება; მისი შემოქმედება განსაკუთრებით წარსულში ეძიებს მასალას და არა აწმყოში.

მას უყვარს წყნარი, ჩუმი, მოსვენებული სახე წარსულისა და არა აღელვებული, აბობოქრებული, მოუსვენარი თანამედროვეობა.

მას უფრო ეხერხება მკვდრების აღდგენა და აპეტუელება, ვიდრე თანამედროვე ცხოვრების დუღილში ძებნა შესაფერი გამირებისა.

დღეს კი ჩვენი ფიქრი და გრძნობა, მთელი ჩვენი არსება აწმყოთია შეპყრობილი, წარსული ჩვენ დროებით დავივიწყეთ; ჯერ ჩვენ მხოლოდ დღევანდელი დღე გვაღელვებს, გვაფიქრებს, გვიზიდავს, გვიმონებს. დამშვიდდება ცხოვრება, გადაიწმინდება დიდი ხნით ჩვენი ცა და მაშინ ინტერესი წარსულისა უფრო გაიღვიძებს.

მაშინ უფრო გაიცნობს მკითხველი საზოგადოება ბარნოვს, რომელიც ღირსია ცნობისა და აღიარებისა.

შიო არაგვისპირელმა დაარღვია თავისი დიდიხნის სიჩუმე და „ცისარტყელაში“ დაიბეჭდა ნაწილი მისი დიდი შოთხრობისა.

ჩვენს მწერლობაში შიოს განსაკუთრებული ადგილი უჭირავს, მისი ყოველი ნაწარმოები სავსეა მხატვრული სახეებით, სულიერი მოძრაობის ანალიზით და ავტორის ტანჯვით.

შიო დედაბრიშვილი მართლა რომ ტანჯული ხელოვანია, ტანჯული ნიჭი.

ბუნებას მისთვის მიუცია უხვი და ნაზი გრძნობა, სპეტაკი გული; ცხოვრების სიღუბეში, ადამიანის სიბეჩავე, არარაობა, ფუქსავატობა და უზნეობა ღრმა სევდით ავსებს იმის გულს და ამიტომ ყოველი ნაწარმოები არაგვისპირელისა ატარებს ბექედს ხელოვნის ტანჯვისა და მწუხარებისას, ხელოვნის წმინდა ცრემლებისას.

არაგვისპირელი არ ჰქმნის მარტო გონებით, არამედ გულითაც. ამიტომ შიოს ნაწარმოები ბევრჯერ ტეხდებციურია; ის არის ხშირად ხასტიკი, მკაცრი მამხილებელი და მქადაგებელი ზნეობრივი განწმენდისა. უმთავრესი საგანი არაგვისპირელის შემოქმედებისა არის ადამიანის სული და განცდანი.

შიო არაგვისპირელი იღებს ჩვეულებრივ ადამიანებს, აყენებს მათ სრულებით ჩვეულებრივ პირობებში და გვაძლევს საშუალებას ჩაიხედოთ ადამიანის სულის ყველა კუნჭულში.

არაგვისპირელმა შემოიტანა ჩვენს მწერლობაში ფსიქოლოგიური მიმართულების ძლიერი ნაკადი და მას დღეს აქეთ მისი მიზანი იყო და არის ადამიანის ზნეობრივად ამალეობა და ცხოვრების გარდაქმნა, ახალი ცხოვრების დამყარება.

და დღეს, როდესაც ამ გარდაქმნას ყველგან საფუძველი ეყრება, შიოს დადუმებული კალმის ამეტყველება ფრიად სასიხარულო მოვლენად უნდა ჩაითვალოს.

მოთხრობა ჯერ დამთავრებული არ არის, ის დამთავრდება „ცისარტყელას“ შემდეგ ნომრებში, მაგრამ დასაწყისი უკვე გვიმტკიცებს, რომ ეს მოთხრობა არაგვისპირელის ნიჭის ყველა ღირსებას ატარებს.

გასულ წელს გამოვიდა თურდოსპირელის „გაწყვეტილი ზღაპარი“.

ქეშმარიტი ნიჭის უტყუარი თვისება გულწრფელობაა.

როდესაც მწერალი ფერუმარილით გვევლინება და ცდილობს თავი იმად მოგვაჩვენოს, როგორც არ არის ნამდვილად, ეს უნიჭობის მომასწავებელია, ზოგჯერ უჭკუობისაც.

როდესაც მწერალი ცდილობს კენესა საკუთარი გულისა მთელი ჯოჯოხეთის ტანჯვად წარმოგვიდგინოს, ეს მეტად ყალბი ხელოვნებაა.

თურდოსპირელი ყველა ამ ნაკლს, რაც ხშირად თან დასდევს ახალგაზრდა ნიჭს, სრულებით მოკლებულია.

გულწრფელობა, სისადავე, მარტივობა თურდოსპირელის

ნიჭის თვისებაა. მისი ნოველები გრძნობით სავსე თაიგულებს წარმოადგენს.

ავტორს აქვს თავისებური სტილი, თავისებური ხასიათი წერისა და იმის პროზაში ბევრგან საუცხოო პოეზიაა.

წარსულ წელს გამოვიდა თავუნას პირველი წიგნი.

ჩვენს მწერლობაში თავუნა უკვე საკმაოდ ცნობილი სახელია.

როდესაც ტარიელი და ავთანდილი ფრიდონთან წავიდნენ, ფრიდონის მეჭოგეებს შეხვდნენ, ტარიელი ავთანდილს ეუბნება: ფრიდონს გავლადობნეთ, მისი ჯოგი მოვიტაცოთ, და თან დასძენს:

ამოა კარგი ლაღობა,  
ლაღსა შე-ვე-იქმს ლაღებად.

ეს ადგილი იმიტომ ამოვწერე, რომ აქ არის ამავე დროს თავუნას უმთავრესი ნიჭის უმთავრესი თვისება:

კარგი ლაღობა.

დაცინვა შეიძლება იყოს მეტად გესლიანი, ბოროტი, მიწასთან გამასწორებელი, ბრაზიანი, ღვარძლიანი.

შეიძლება იყოს მხიარული, კეთილი, ზოგჯერ საკმაოდ მწარე, მაგრამ ყოველთვის უბოროტო, უწყინარი.

იუმორისტულ მწერლობაში ორივე ამ დარგსა აქვს ადგილი და ესა თუ ის მიდრეკილება მხოლოდ თვისებაა ნიჭისა და ინდივიდუალობისა.

პირადად მე მეორეგვარ იუმორს უფრო მაღლა ვაყენებ, რადგანაც მასში მეტია მიუდგომლობა, მხატვრული ზომიერება, სამართლიანობა, გულწრფელობა, სიყვარული — და, მაშასადამე, ხელოვნებაც.

თავუნას იუმორი სწორედ ამგვარი თვისებისაა. მასშია მხიარული სიცილი, ოხუნჯობა, გულკეთილი დაცინვა, მწარე სინამდვილე — ბრაზი და ღვარძლი კი არსად არის.

პირველი ტომი თავუნას ნაწარმოებებისა საკმაოდ მდიდარია შინაარსით, აქ მკითხველის წინაშე აღმართულია ჩვენი ცხოვრების სარკე და შიგ დაინახავთ მრავალ სასაცილო, საძწუხარო და დამაფიქრებელ სახეებს, მდგომარეობას, შეხედულებას და მოვლენას.

წარსული წელი განსაკუთრებით მდიდარი იყო პოეზიით. გამოვიდა მრავალი პატარ-პატარა ჟურნალი: „თოლაბულისის სარტყელი“, „ხელოვნება“, „სმარაგდი“. „კრონოსის სარკე“, „მეოცნებე ნიამორები“ და სხვა. აქ ნახავთ უკვე ცნობილ პოეტებს და სრულებით უცნობებსაც, მაგრამ ყველას აერთებს საერთო მიმართულება — ეგრეთ წოდებული სიმბოლისტური.

სიტყვაკაზმულ მწერლობაში ყოველგვარ მიმართულებასა აქვს

თავისი ადგილი. არ შეიძლება უარყოფა ამა თუ იმ მწერლისა მხოლოდ იმიტომ, რომ ის რეალისტია, სიმბოლურისტია, ფუტურისტია და სხვა. თუ პოეტის შემოქმედებაში პოეზია არ არის, ესა თუ ის მიმართულება მას ვერ იხსნის.

და თუ არის პოეზია, ამით მას უკვე აქვს კარი გახსნილი ხელოვნების სამეფოში, რადგან ესა თუ ის მიმართულება, სკოლა წარმავალია, ჭეშმარიტი ხელოვნება კი უკვდავია.

პირადად მე სიმბოლიზმს არ ვიზიარებ, მაგრამ პოეზიის სამფლობელოში მას აქვს თავისი ადგილი.

სიმბოლისტები განსაკუთრებულ ყურადღებას აქცევენ ლექსში მუსიკას, რიტმსა და რითმას.

ეს ღირსებაა.

მაგრამ ჭეშმარიტი პოეზია მართო ამითაც არ განისაზღვრება: მასში აზრი უნდა იყვეს და, თუ მაინც და მაინც აზრი არ იქნება, დიდ სისულელეს მაინც არ უნდა ჰქონდეს ადგილი.

ახალგაზრდა სიმბოლისტების პოეზიაში კი აქვს ამას ადგილი, როცა ისინი რითმების ძებნაში ყველაფერს ივიწყებენ. რითმა მაშინ არის მომხიბლავი, როცა ის ბუნებრივია, ბუნებრივი კი მართო მაშინ არის, როცა აზრს მოსდევს თავისუფლად და ადვილად.

„კრონოსის“ № 2-ში არის სონეტი ტ. წალენჯიხელისა, სადაც ვკითხულობთ:

ჩემი სონეტი ოქროს ტყეში ზეიმს

აპირებს.

მარსის წიაღში შემეყვარდა მე გაქანება,

ლოთი ჰამლეტი გადამიშლის მარცხენა პირებს.

ერთი მიბრძანეთ, რა აზრი აქვს მთელ უკანასკნელ სტრიქონს? და ეს ჩაიდინა ავტორმა რითმის გულისათვის.

აი უკეთესი ნიმუშები:

„მეოცნებე ნიამორების“ პირველ ნომერში არის ლექსი შალვა კარმელისა „ღამის ფრაგმენტი“, სადაც სწერია:

რა მიკლავს სევდას — ყრუ სიგიჟე თუ ალკოგოლი?

მახინჯ მოწყენით დადიოდა ქვეყნად გოგოლი

აბა ამაზეა ნათქვამი, სად ერეკლე, სად თეკლეო.

რა შუაშია აქ გოგოლი? იმ შუაშია, რომ „ალკოგოლის“ რითმად მოეწონა ავტორს და სისულელე გამოვა თუ არა, რას დაგიღვეთ, ოღონდ ღამაში რითმა გამოვიდეს.

აიღეთ „ხელოვნება“ №2.

აქ არის რაჟდენ გვეტაძის „სინანული“. ლექსი იწყება ასე:

გამაცნეს. ხელი მას ჰქონდა, ვით ლაღარო.  
და შემდეგ ვერ ვნახე, ვერ შევხვდი  
ერთმანეთს.

მარტო თუ სხვასთან, არ ვიცი, სად არი.  
ქუჩაში მათხოვარს ვაჩუქებ ერთ მანეთს.

რა შუაშია აქ მათხოვარი და მანეთიანის ჩუქება! უკანასკნელი სტრიქონი სრულიად არ ეგუება ლექსს; მაგრამ „მათხოვარი“ და „ერთი მანეთი“ პოეტს დასჭირდა ლამაზი რითმისათვის.

თუ ამას სჩადის რაჟდენ გვეტაძე, რომელსაც უცილოდ ეტყობა პოეტის ნიჭი, რაღა უნდა მოვთხოვოთ სხვებს.

გასულ წელს გამოვიდა ობოლი მუშის პოემა „წამების ჯვარზე“. ეს ახალგაზრდა მგოსანი ხალხის წრიდან არის გამოსული და მთელი თავისი მისწრაფებით ხალხს ეკუთვნის.

მის ნიჭს გასულ წელში წინმსვლელობა დაეტყო და ამის მაჩვენებელია მისი ახალი პოემა. პოეზიის მუსიკის, რიტმისა და რითმის მხრივ აქ მგოსანს საკმაო ნაბიჯი გადაუდგამს წინ წინანდელ ნაწარმოებებთან შედარებით.

ერთი ნაკლი უნდა მოიშოროს: ერთობ უყვარს — ახ, ოხ, ეჰ. პოეზიაში გრძნობისა და მწარე განცდის გამოსახატავად ეს სიტყვები სრულებით უძლურნი არიან და წრფელი გრძნობის მაგიერ მხოლოდ ცრუ გრძნობიერებას ააშკარავენ. სხვადასხვა ჟურნალ-გაზეთებში დაიბეჭდა ლექსები ჩვენი ცნობილი პოეტებისა, მაგრამ შესამჩნევი ნაყოფიერება არავის გამოუჩენია, გარდა ვარლამ რუხაძისა, გაფრინდაშვილისა და გალაქტიონ ტაბიძისა.

რუხაძემ გამოსცა თავისი ლექსების მესამე წიგნი — „ცხოვრების ყვაილები“.

ეს მგოსანი ჩვენში უკვე საკმაოდ ცნობილი და სახელმოხვეჭილია. მისი მიმართულება ყველამ იცის და მესამე წიგნშიაც თქვენს წინაშე არის ამართული სახალხო იდეალების მომღერალი პოეტი.

ვ. რუხაძის პოეზიის ღირსება იმაში მდგომარეობს, რომ სინამდვილეს მასში ვერ ჩაუკლავს მეოცნებე, მაძიებელი სული, პოეტი ორივე ფეხებით, მთელი თავისი შემოქმედებით მიწაზე დგას, მაგრამ ამავე დროს ის მარტო მიწით არ კმაყოფილდება, მისი მუზა ხანდახან ცისკენაც გაინავარდებს ხოლმე.

ხალხს არ უყვარს ქაჯური ლაპარაკი, მას მოსწონს ნათელი აზრი, ნათელი ენა.

რუხაძის პოეზია იმითია სახალხო, რომ აქ აზრი მგოსნისა ცხადია, მისი ენა — სადა, მარტივი, უბრალო.

„ცხოვრების ყვავილები“ მდიდარია გრძნობით, აზრით, პოეტური სურათებითა და განცდით.

მუსიკა, რიტმი და რითმა აქ იმდენად გამშვენიერებულია, რომ ზოგიერთი ნაწარმოები ამ მხრივ უნაკლოა, როგორც, მაგალითად, „მზეთამზე“.

ვ. გაფრინდაშვილის „დაისები“ რუხაძის „ცხოვრების ყვავილების“ სრული წინააღმდეგობაა.

გაფრინდაშვილი სიმბოლიზმის ერთი საუკეთესო წარმომადგენელია.

მასში განსაკუთრებით არის თავმოყრილი როგორც ნაკლი, ისე ღირსება ამ მიმართულების მგოსნებისა.

მათ არ უყვართ სინამდვილე, სიცხადე; ისინი ეტრფიან მოჩვენებას, ლანდს, უცნობს, გაუგებარს.

აქედან წარმოსდგება უარყოფა ნათელი, მარტივი აზრისა და ბუნდოვნად, გაუგებრად წერა.

თუ შენი აზრი ყველას ესმის, აქ არ არის პოეზია; თუ ძალიან ცოტას გაეგება, — აი ჭეშმარიტი პოეზია! — ასეთია სიმბოლისტიკის შეხედულება ჩვენში.

ბუნდოვნად წერა განსაკუთრებით ეხერხება ვალ. გაფრინდაშვილს.

ასეთ გამოუცნობ, ბუნდოვან ლექსებს „დაისებში“ პატარა ადგილი უჭირავთ; უმეტესი მათგანი მისაწვდომია და ააშკარაებს პოეტის დიდ ფანტაზიას; მაგრამ ამ ფანტაზიას ავადმყოფის დაღი აზის: პოეტს განსაკუთრებით იზიდავს ლანდები, ორეულები, დამხრჩვალეები, თავის მკვლელები, შეშლილები და სხვ.

ჩემი ოცნება თვითონ ვიცი — უცნაურია, —

წერს პოეტი ერთ თავის ლექსში.

მე კი მგონია, რომ ეს უცნაურობა სისაღის მატარებელი კი არ არის, არამედ სნეულების.

სალი უცნაურობა ჩემთვის მისაღებია, სნეული, კი არა.

პოეტი სრულებით უარყოფს სინამდვილეს, მას სძულს ეს სინამდვილე და სიძულვილი იმდენად ძლიერია, რომ ქალში მას განსაკუთრებით მოსწონს ჩასმული, ხელოვნური თვალი.

ო, რა უცხოა შენი თვალი, მზიბლავი ყალბად,  
ნეტავი იმას, ვინც ამ თვალზე ნაზად გაკოცებს  
თვალის მაგივრად შენ ძვირფას ქვას

მუდამ ატარებ,

რომ მე ყოველთვის ვაოცნებო ხელოვნურ თვალზე.

ამიტომაც პოეტი ეტრფის ყველასა და ყოველივეს, რაც სინამდვილეს ასხვადფერებს: ქარს, ლოტს, მთვარეულს, აშორდიასაც კი

ასხვანაირებ სინამდვილეს, როგორც მგოსანი —

უგალობს ის აშორდიას.

სინამდვილის განსხვავანაირება მეტად მიშვიდველი შემოქმედებაა, მაგრამ ამ განსხვავანაირებას ერთადერთი მიზანი უნდა ჰქონდეს: სინამდვილის გამშვენიერება, უკეთესი სინამდვილის შექმნა თუნდაც მარტო ოცნებაში.

ვალერიან გაფრინდაშვილი ჩვენი სინამდვილის ალაგას უკეთესს კი არა, საშინელ სინამდვილეს გვაძლევს თავის შემოქმედებით წარმოდგენაში: ორეულებს, მთვარეულებს, დამხრჩვალთა და თავის მკვლელთა აჩრდილებს.

ეს არ არის ლამაზად განსხვავანაირება სინამდვილისა, არამედ მახინჯად განსხვავანაირება.

ვალ. გაფრინდაშვილს კი შეუძლია ლამაზად განსხვავანაირება სინამდვილისა და თავისი მძლავრი ნიჭი და ფანტაზია აქეთკენ უნდა გადმოჰხაროს.

რომ ამას თვითონ პოეტიცა გრძნობს, ეს აშკარაა ლექსში — „იავნანა სამგლოვიარო“.

„დაისებში“ მდიდარი შემოქმედებაა, მდიდარი ენა, მომხიბლავი მუსიკა და საუცხოო რიტმი.

„დაისები“ ნაყოფია დიდი პოეტური ნიჭისა, ხოლო ამ ნიჭს გაჯანსაღება ესაჭიროება.

პირველი წიგნის გამოცემის შემდეგ გალაქტიონ ტაბიძე დიდხანს სდუმდა. ეს გარემოება განსაკუთრებით იყო საწყენი ჩემთვის, რადგანაც პირველ ტომში უტყუარი ნიჭი სჩანდა და, ამავე დროს, ბარათაშვილის მონათესავე სული.

მეორე წიგნში გალაქტიონი იმდენად გაიზარდა, რომ ასეთი დიდი ნაბიჯი ჩვენს მწერლობაში მეტად იშვიათი მოვლენაა.

ჩვენში უფრო ხშირად მწერალი დიდ იმედებს იძლევა დასაწყისში, შემდეგ კი ეს იმედი აღარ მართლდება. მწერალს ან აღარ ეტყობა ზრდა, ან კუს ნაბიჯით მიდის წინ.

ამის მიზეზი ქართველი მწერლის ნიჭის თვისებაში არ იყო, არამედ ჩვენი საზოგადოებრივი და ეროვნული ცხოვრების პირობებში.

მომავალი მწერლები ამ მხრივ გაცილებით უფრო ბედნიერნი იქნებიან.



გალაქტიონ ტაბიძის შემოქმედება ცხოვრებამ ვერ ჩაკლა, მიუხედავად იმისა, რომ ის თავიდანვე ცუდ პირობებში იმყოფებოდა და დღესაც იმყოფება.

მიუხედავად მრავალი დაბრკოლებისა, ის საგრძნობლად გაიზარდა და მისი მეორე წიგნი ჩვენი ახალი პოეზიის ერთი საუკეთესო თვალაა.

გრძნობათა სიმდიდრე, სიღრმე და სიწრფელე, განცდათა სიუხვე და სილამაზე, ფორმის მრავალფერობა და სისრულე, მუსიკისა და რიტმის სინაზე და კეთილშობილება, მოცეკვავე, მომღერალი რითმების ნაირნაირობა და სილამაზე ერთმანეთს ეჯიბრებიან და ასეთი ყოველმხრივი სიმდიდრე ხელოვნებისა პირველად მკითხველს ათრობს, აბრუებს, როგორც ცხოველი მზე გასწორებულ თვალს.

პირველად როცა კითხულობთ გალაქტიონის მეორე წიგნს, ის თავისი მდიდარი და მრავალფეროვანი შემოქმედების გამო გაურკვეველ შთაბეჭდილებას სტოვებს.

როდესაც რამდენჯერმე წაიკითხავთ, მხოლოდ მაშინ შესძლებთ იმის ჩაწვდომას, გაცნობას, დაფასებას და მისი პოეზიით დატკობას.

გალაქტიონის ახალი წიგნი სარკეა პოეტის სულისა. აქ მან ჩაგვახედა იშვიათი ლირიზმით გაქლენილ პოეზიაში.

ამდენად ნაზი, სათუთი, ფაქიზი, წმინდა და მომხიბლავი გრძნობა, ხან ჩუმი და წყნარი, ხან კი უსაზღვრო, უძირო სევდით დათალხული, გრძნობა, რომელიც სულისა და გულის სიღრმეში გწვდებათ და მთელს არსებას იპყრობს, იმონებს, ბარათაშვილის შემდეგ პირველად არის ჩვენს პოეზიაში.

გალაქტიონ ტაბიძემ გადაგვიშალა დიდი ესთეტიკური ნიჭი, რომელიც ყველაფერს ზომავს, წონის და აფასებს ესთეტიკურის თვალსაზრისით.

გალაქტიონი რითმის, სიტყვათა მუსიკისა და კეთილშობილების ბატონია.

გალაქტიონის მეორე წიგნში ვერ ნახავთ ვერც ერთ ნაძალადევ რითმას. რითმები და ასონანსები აქ ერთიმეორეს ეჯიბრებიან და რითმათა გადაჯგუფებაში მას ტოლი არა ჰყავს.

აიღეთ მისი ლექსები: „ლურჯა ცხენები“, „Voilos“, „ატმის ყვავილები“. აქ რითმები მარტო ბოლოში კი არ არიან, არამედ შიგ სტრიქონების შუაგულში:

რტობში ავობს ბებერი ქარი,  
ყვავილთა ქარი ფიფქით ბანაობს.  
ტყდება, ნანაობს ეთერი ჩქარი.  
ნანაობს ქარი და მიქანაობს.

ჩაუკვირდით მარტო ამ ერთ ტაეპს „ატმის ყვავილიდან“ და დარწმუნდებით, როგორი ხელოვნებითა აქვს ავტორს აწყობილი რითმი შიგ შუაგულ სტრუქტურებში.

ასეთი რითმებით მოქარგული ლექსები ჩვენს ახალ პოეზიაში მხოლოდ გალაქტიონსა აქვს.

გალაქტიონის სული მეტად ნაზია, გრძნობით აღვსილი. ამიტომ ის ვერ ასცდა გავლენას და იმის მეორე ტომს საკმაოდ აჩნევია კვალი სიმბოლიზმისა.

თუ გაფრინდაშვილის პოეზიას ახასიათებს ერთგვარი მისტიური შიში, აქა-იქ ამასვე ვხედავთ ან ვგრძნობთ გალაქტიონის შემოქმედებაში.

სიმბოლისტებს სჩვევიათ ბუნდოვნად, გაუგებრად წერა.

გალაქტიონის მეორე წიგნშიც არის რამდენიმე ლექსი, რომლის აზრი მეტად ბუნდოვანია.

ყოველივე ეს არის შედეგი მიბაძვისა და არ წარმოადგენს გალაქტიონის ნიჭის თვისებას. ამიტომ რაც ადრე მიატოვებს პოეტი ამ დროებითს ნახტომს განზე და მიენდობა მხოლოდ თავის ნაზ და ლამაზ, ტყბილი სევედით დათენთილ ღმამფრენას, მით უფრო ნაყოფიერი და უფრო სხივოსანი იქნება მისი შემოქმედება.

საზოგადო მიმოხილვაში უალაგოა ვრცლად დახასიათება გალაქტიონის პოეზიისა. იმის სეედას, ისე როგორც ბარათაშვილის გულის კენესას, ხშირად საპირადო საჩიული აქვს.

გალაქტიონი გრძნობს თავის ნიჭს და სულიერ ძალას, იმას საკმაოდ განვითარებული თავმოყვარეობა აქვს და ამავე დროს მეტად ნაზი გრძნობა. სინამდვილე ჭერ არ აძლევს მას, რაც საჭიროა, რომ მისმა ნიჭმა დაუბრკოლებლად გაშალოს ფრთები.

აი აქ არის ახსნა იმისა, თუ რად იმეორებს პოეტი:

რადგან არ მაქვს სამშობლო, რადგან არ მყავს არავინ.

გალაქტიონ ტაბიძე დიდი ნიჭია და მას დიდი ყურადღება უნდა, სხვანაირი მოპყრობა.

ეს ყურადღება და მოპყრობა მაწ დაიმსახურა.

გასულ წელს გამოვიდა ს. გლახაშვილის პირველი ტომი. აქ თავმოყრილია ლექსები, მოთხრობები და პიესები. ლექსები არაფრად ვარგა. მოთხრობებს და პიესებს ეტყობა დაკვირვება და პოეტური ტემპერამენტი.

საერთოდ, დრამატიული ხელოვნება გასულ წელს მეტად მიმქრალი აღმოჩნდა, უმთავრესად იმიტომ, რომ სეზონი არა გვქონდა.

უნდა მართალი ვთქვათ: საქართველოში რომ ქართულ დრამას თავშესაფარი არა ჰქონდეს, სირცხვილია.

დრამატიულ მწერლობას სცენა ასაზრდოებს და ახალისებს.

თეატრმა საზოგადოების გათვითცნობიერებაში მეტად დიდი საქმე გააკეთა და ქართულ ხელოვნებაში ის საპატიო ადგილს დაიჭერს.

გასულ წელს მეტად ცოცხალი კომედიით მოგვევლინა ჩვენი ნიჟიერი დრამატურგი ტრიფონ რამიშვილი. ეს ჩუმი, უჩინარი და წყნარი მუშაკი დიდი მკოდნეა ჩვენი ცხოვრებისა და ამიტომ მისი ყოველი ნაწარმოები მხატვრული შინაარსით არის მდიდარი.

„სტუმარ-მასპინძელიც“ ღირსეულ ალაგს დაიჭერს ჩვენს სცენაზე.

შალვა შარვაშიძის „ავგაროზს“ ვუცადეთ, ვუცადეთ, მავრამბებერი წელიწადი მოკვდა და მისი ჯავრი მიწაში ჩაიტანა: ვერ ეღირსა „ავგაროზის“ ხილვას. იქნება ახალი წელი უფრო ბედნიერი გამოდგეს და მოვახერხოთ მაშინ ამ პიესის განხილვა.

1920

## დავით კლდიაშვილის შემოქმედება

სულმნათი შოთას სიტყვები: „ჩვენ კაცთა მოგვცა ქვეყანა, გვაქვს უთვალავი ფერთა“, ყველაზე უფრო თამამად ჩვენ შეგვიძლია გავიმეორათ.

ჩვენი სამშობლო მართლაც უთვალავია ფერთ, სხვადასხვაობით, რაც საუცხოოდ შეეხება სხვადასხვაობას თვითონ ჩვენს ხალხში. სვანი, რაჭველი, გურული, მეგრელი, იმერელი, ქართლელი, კახელი — ყველა ხომ ერთია, მაგრამ, ამავე დროს, ყველა მათგანს აქვს ისეთი რამ ხასიათში, რაც მეორეს არ მოეპოვება. იმერეთი ოხუნჯობის, მოსწრებული სიტყვის, სიცილ-ა, ლალობის ქვეყანაა. იმერეთის მხატვარიც სწორედ ამგვარის ნიჭით უნდა იყოს დაჯილდოებული. ოხუნჯობა, სიცილი, იუმორი მისი ნიჭის თვისებას უნდა შეადგენდეს.

ასეთია დავით კლდიაშვილი, დავით კლდიაშვილის ხსენებაზე ყველა ჩვენგანს აგონდება ის სასაცილო ამბები, რომელთა გარშემოც ტრიალებს შინაარსი მისი საუკეთესო მოთხრობებისა. თავისი ნიჭის ამ თვისებით ის უახლოვდება ილიას და აკაკის, მაგრამ მაშინ. როდესაც ილიასი და აკაკის იუმორი ხშირად გესლიანია, შეუბრალებელი, კლდიაშვილის იუმორი ნაზია, იმერული. აიღეთ „კაცია ადამიანი“: აქ თქვენ ნახავთ ნამდვილ ოხუნჯობას; მაგალითად ის აღვილები, როდესაც ლუარსაბი და დარეჯანი ბუზებს სთვლიან ქერზე, ან ბოზბაშსა და არტალაზე კამათობენ; მაგრამ საერთოდ „კაცია ადამიანი“ სატირაა. იგივე ითქმის აკაკის სატირულ ლექსებზედაც, სადაც ავტორი ხშირად მეტად გესლიანია, შხამიანი.

იუმორი სატირის ნაწილია, მაგრამ საერთოდ სატირა დაცინვაა, საცინლად აგდება, მაშასადამე პიროვნების გაკიცხვა, დამცილება, თუმცა ღირსეული გაკიცხვა-დამცილება.

დაცინვას, პიროვნების გაკიცხვასა და დამცილებას თქვენ ვერ ნახავთ კლდიაშვილის მოთხრობებში. კლდიაშვილი კი არ დასცინის

თავის გმირებს, პირიქით — ეცოდება, ებრალება ისინი. ეცოდება იმიტომ, რომ თვით ცხოვრება აყენებს მათ სასაცილო მდგომარეობაში.

რაში გამოიხატება ეს მდგომარეობა და მისი სასაცილო მხარე? კლდიაშვილი გაქუცული, გახრეკილი აზნაურიშვილების, შემოდგომის აზნაურიშვილების მეშატიაწაა.

ცხოვრებამ მათი აზნაურობა გააუქმა, მოსპო და გაუთანასწორა ისინი გლებობას. რას ხედავს სონია, როდესაც თავის ქმარს ოტია ქამუშაძეს უყურებს ყანაში მომუშავეს?

„როდესაც იგი თავისი თვალთ ჰხედავდა, ამ წამში, ამ ხანად მისი ქმარი, სახელად ოტია, გვარად ქამუშაძე, წოდებით აზნაური — იყო ნამდვილი გლები, მუშა გლები, ყოველის მხრით ისეთივე გლები, როგორც აი გადაღმა ყანაში რომ მუშაობდა მათი მეზობელი, პეტრია დინარაძე, სრული მსგავსი მისი, გარდა იმისა, რომ აზნაურიშვილად იწოდებოდა, აზნაურობისათვის სასაცილო ხასიათი ეძლეოდა და თითქმის უფრო ამცირებდა ოტიას ამ გარემოებაში...“

გულშოკიანი, დაღონებული, გარეტიანებული, დაბრუნდა სონია სახლში და თვალწინ მოუშორებლად უდგა მისი ქმარი — გლები, ყაზახის სახით. გარეგნობით, შეხედულებით, საქციელით, მოქმედებით და შექცეულია...“

აი საშინელი ტრალიზმი იმერეთის აზნაურობისა წარსული საუკუნის დამლევის და ამ საუკუნის დასაწყისში.

ცხოვრებამ ისარი მდგომარეობით გააგლებკაცა. გლებობისაგან ისინი არაფრით აღარ განირჩევიან.

ამას კიდევ გრძნობენ და კიდევ ჰხედავენ ეს ქამუშაძეები და სამანიშვილები.

მაგრამ წოდება შერჩენიან და ამას ებლაუჭებიან, ამაში ხედავენ ხსნას და სხვა გამოსავალი ვერ უპოვნიან.

ზოგმა გლებმა მათ წინ გაუსწრო, ისინი უკან მოიტოვა.

ბესარიონ ქამუშაძე ცდილობს დაამციროს სამადაძე და უყვირის მას: ყაზახო, მაგრამ სამადაძე თავმოქმდნენ უპასუხებს:

„— ყაზახი ვარ! მარა შენისთანა შემოდგომის აზნაურიშვილს კიდევ ვკობივარ!“

შემოდგომის აზნაურობა თვითონაც ჰხედავს ამას და ამაში მისი მდგომარეობის მთელი საშინელება.

აზნაური ქამუშაძე სწორედ იმ მოსაზრებით ანათვლინება შვილს სამადაძეს, რომ მდიდარი გლებია და თავისი ღონიერი ლუკმიდან შეწვენას არ მოაკლებს ნათლულსო.

აზნაურ ქამუშაძისათვის ეს ერთგვარი დამცირებაა, თავმოყვარეობის შელახვა, მაგრამ რა ქნას, როდესაც ცხოვრება ანადგურებს ძველ წყობილებას, მასთან ერთად წოდებად დაყოფასაც და აყალიბებს ახალს — მოქალაქეაღაც.

ასეთია ბედი აზნაურებისა, რომელთა ერთი წარმომადგენელიც ქამუშაძეა.

თავისი მდგომარეობით ისინი უკვე გაგლეხკაცებული არიან და აზნაურობა მათ ცხოვრებას მხოლოდ სასაცილო ხასიათს აძლევს. ისინი ყველაფერში უნდა გაუთანასწორდნენ გლეხობას, იმიტომ რომ გლეხი სამადაძე ყველა ქამუშაძეს იყიდის, მაგრამ აზნაურული კულაბზიკობა თან დასდევს ჯერ იმათ. პლატონ სამანისშვილი სხვაგან მიდის და ისეთი ცბენი ინათხოვრა, რომელზე შეჯდომაც შეუძლებელია.

„— ამაზე შეჯდომა რავა შეგიძლია? — უთხრა მელანომ.

— აბა, ფეხით ვის მივადგე, შე ქალო?!

— კი, მარა სულ არ მოგჯება ამ საცოდავს ზურგი?

— ფეხ-ფეხა მივყვები, ბატონო, ფეხ-ფეხა მივყვები!... სირცხვილისათვის მიმყავს, თვარა რა!..

და სწორედ უკანასკნელი სიტყვები პლატონისა არის დამახასიათებელი.

ოტია ქამუშაძე მაშვალს ეხვეწება:

„— რომ გული მოვუკლა იმ ოხრიშვილსაც და ზოგიერთ სხვებსაც... თქვენთვის ეგ არაფერი იქნება, ჩემთვის კი ძვირად რადმე ეღირება, იყოს ისე თქმულებად, ცარიელ სიტყვად, რომ ვითომც ბეგლარს დღისთვის ხუთასი მანეთი მიეცეს მზითვად, ცარიელი სიტყვა ქვეყნის გასაგონად, თორემ ფულს თხოვნას როგორ გავუბედავ! ისიც კმარა ჩემს თავზე, ქვეყნის გასაგონად ითქვას მხოლოდ!“

აზნაურობა უკვე დაკარგეს ცხოვრებაში და ზოგი უთანასწორდება გლეხობას. ნაძღველად კი თავი მაინც აზნაურად უნდათ მოაჩვენონ ქვეყანას და აქედან დგება მათი ყალბი და სასაცილო მდგომარეობა.

ისოლომან მორბელაძე მდგომარეობით უკვე გაგლეხებულია, მაგრამ გლეხურ შრომას გაუბრუნდა, მთელი კვირეები ჯორზეა გადამჯდარი და სამაშველოდ დაწანწალებს. ის მდგომარეობა, რომელშია ის ვარდება მაქანკლობის წყალობით, როცა არც ერთი მხარე აღარაჰყავს მადლიერი და არც ქალის პატრონი აძლევს არაფერს, არც სიძის მამა, და ექვსი მანეთითა და ხარის ტყავით უნდა დაკმაყოფილდეს, რასაკვირველია, მეტად სასაცილოა.

თქვენ წარმოიდგინეთ ერთ წამს სოლომან მორბელაძე, რომელიც გულმოსული მთარბენინებს ხარის ტყავით დატვირთულ ჯორს სახლისაკენ და თან ფიქრობს: რა ვქნა, ხვალ ჩემი მოვალე პლატონი რომ მომადგება კარზეო; მოუბატყუე, მომატყუეს და ერთი მოტყუებული ხვალ ან ზეგ კარზე მომადგება კიდევო.

დამეთანხმებით, რომ ეს სურათი მეტად სასაცილოა, თუმცა თვითონ სოლომანი ჩვეულებრივი ადამიანია, თუ გნებავთ, რიგიანიც, მაგრამ თვითონ ცხოვრება აყენებს მას ასეთ სასაცილო მდგომარეობაში.

აიღეთ პლატონ სამანიშვილი. რიგიანი, დარბაისელი, ზრდილობიანი ადამიანია, მაგრამ მთელი მისი თავგადასავალი სადღეინაცვლოს ძებნის დროს და საშინელი გაცრუება იმედისა სასაცილო ამბავია.

პლატონს უნდა თავისი აზხაურული უპირატესობა შეინარჩუნოს ცხოვრებაში. წინ ელობება საშინელი აჩრდილი მამულის გაყოფისა. ის ებრძვის ამ აჩრდილს და სასაცილო მდგომარეობაში ამოპყოფს თავს.

კლდიაშვილის სიცილი მხიარული, გულიანი სიცილია, მაგრამ მასში მაინც ურევია სევდის ხმები. სიცილი ზოგჯერ ცრემლზე მწარეაო, ამბობს აკაკი.

სრული ჭეშმარიტებაა. კლდიაშვილის სიცილი არ არის ქეიფიანი სიცილი: მისი სიცილი მადლიანია, მაგრამ ამავე დროს ფიქრიახიც და ეს ფიქრი ხშირად სევდისაკენ მიდის.

და აქედან წარმოსდგება კლდიაშვილის ნიჭის მეორე თვისებანი: ნაზი სევდა.

სევდას ჩვენს სიტყვაკაზმულ მწერლობაში თავისი ისტორია აქვს და ამ სევდას სხვადასხვა დროს სხვადასხვა სარჩული ჰქონდა.

ნ. ბარათაშვილი უფრო მსოფლიო სევდის მატარებელია. მისი სევდა უფრო ფილოსოფიური შინაარსის არის.

ამაოება და სიფუჰე ჩვენი ცხოვრებისა, მიუწვდომლობა მარადისობისა — აი მიზეზი ბარათაშვილის სევდისა.

ამავე დროს, ეროვნული ჰანგები უსათუოდ ურევია ბარათაშვილის სევდაში.

როდესაც ის იგონებს ძველ დედებს და სევდიანი ამბობს:

რა იქნებოდა, რომ ჩვენთა დედათ  
სულიცა თქენი გამოჰყოლოდათ!  
ჯანი გავარდეს აწ შვილსაც, მამულს,  
ოლონდ ვაამოთ ჩვენს საკუთარ გულს.

რის ქართველობა, რა ქართველობა?  
ვითომ რას გვავენებს უცხო ტომობა —

ამ სიტყვებში უსათუოდ არის ეროვნული სევდის ამონაქენესი. ის, რაც ბარათაშვილის სევდაში მხოლოდ გაკვრით არის, თითქოს შემთხვევითია, შემდეგ და შემდეგ მეტად განვითარდა, გაღრმავდა და გაიზარდა.

ორბელიანების სევდა არის ღრმა ეროვნული, მაგრამ შიგ წოდებრივი ჰანგები ურევია. ილიასა და აკაკის სევდა წმინდა ეროვნულია, სამშობლოს თავისუფლების დაკარგვით გამოწვეული. ეროვნულ სევდას აქ უკვე ერთვის საზოგადოებრივი ჰანგები.

ვაჟას სევდაში ჩვენ ვხედავთ როგორც ფილოსოფიურს, ისე საზოგადოებრივ მოტივებს.

ერთია, თუნდა ჩვენ ვიყვნეთ  
და თუნდა მინდვრის თავები, —

პგოდებს პოეტი.

ღ-როდესაც ის ითვალისწინებს სამშობლოს მდგომარეობას, გულნატკენი დასძენს:

მეემწყვდით ორ წყალ შუაში,  
აღარსაღ ჩვენთვის ნავია.

საზოგადოებრივ ცხოვრებას რომ უკვირდება პოეტი, ჰხედავს რომ

მგლები, აფთარი გამრავლდნენ,  
ჰხარობს იმათი გვარია.  
საწყალი საწყალადე რჩება... და სხვ.

ამგვარად, ვაჟას სევდა უფრო რთულია. არაგვისპირელის სევდაში ორი მხარეა — ფილოსოფიური და საზოგადოებრივი. ადამიანი მთელი თავისი მისწრაფებით არარაობაა; ცხოვრება უზნეობითა და უსამართლობითაა სავსე: აი არაგვისპირელის შეხედულება. აქედან ეძლევა სათავე იმის სევდას.

წინოშვილისა და კლდიაშვილის სევდა მხოლოდ საზოგადოებრივია.

ადამიანი უბედურია, იმიტომ რომ ცხოვრება არ არის რიგიანად მოწყობილი. საზოგადოებრივ წყობილებას გარდაქმნა ესაჭიროება, — აი დედაზრი წინოშვილისა და კლდიაშვილის მოთხრობებისა.



„— საშველი თუ მაინც მოგვეცემა როდისმე, რომ კაცური ცხოვრება გვეღირსოს! — აშბობს სოლომონ მორბელაძე და ეს, ამავე დროს, კლდიაშვილის ამონაკენისიც არის.

კლდიაშვილი გადაგვიშლის სურათს, სადაც უმთავრესი ფერი გაჭირვებაა.

„— ღმერთო, რა დაგიშავეთ ამისთანა?“ — იძახის ეფროსინე „ქამულშაძის გაჭირვებაში“ და ეს არის ამოკენესა მრავალი მისი მსგავსისა.

ასეთი ამოკენესა სევდის ჩრდილში ახვევს კლდიაშვილის შემოქმედებას. გაიხსენეთ ვიქტორის სიტყვები „ირინეს ბელნიერებაში“: „ძმაო, ჭერეთ კიდეც ახეცობაში გვიდგია ფეხი“.

და ასეთი მხეცობის, შეუგნებლობის, ცრუმორწმუნეობის საუცხოო ნიმუში მრავლად არის გაბნეული კლდიაშვილის მოთხრობებში.

ყოველივე ეს სევდის ხმებს ურევს ავტორის სიცილში.

ავტორი გვაძლევს საუცხოო სურათებს სხვადასხვა პირობისას, რომლებიც თავისთავად ურიგონი, სასაცილონი არ არიან, მაგრამ ცხოვრება აყენებს მათ მეტად სასაცილო მდგომარეობაში, ცხოვრება სასტიკად ანადგურებს მათ და ავტორს ებრალება, ეცოდება თავისი გამირეპი.

სიბრალოე, შეცოდება კი სათავეა ერთგვარი ნაზი სევდისა, რაც ასე ახასიათებს კლდიაშვილის შემოქმედებას.

რას ვხედავთ იმის მოთხრობებში?

ერთას მხრით შეუბრალებლობას, სიბნელეს, ცრუმორწმუნეობას; მეორეს მხრით გაჭირვებას და ამავე დროს კუდაბიკობას, რომელსაც ჩაბლაუჭებია აზნაურობა და არ უნდა ხელიდან გაუშვას.

ყველა ეს ერთად ასაზრდოებს კლდიაშვილის სევდას.

ერთ თავის ლექსში ვაჟა, სხვათა შორის, ამბობს: კლდეზე ვარ დაფუქნებულიო.

კლდიაშვილიც სწორედ კლდეზეა დაფუქნებული და ეს კლდეა სინამდვილე. კლდიაშვილი მთელი თავისი ნიჭით არის დაბჯენილი ნამდვილ ცხოვრებაზე და აქ არის მისი ძალა.

რეალიზმი — აი რა ახასიათებს ავტორს.

დავით კლდიაშვილი სინამდვილეში ყოველგვარ წვრილმანს აქცევს უურადლებას, მაგრამ ზშირად ეს წვრილმანხი მეტად დაძახისიათებელია.

აიღეთ „სამანიშვილის დედინაცვალში“ სულ უბრალო წვრილმანხი, როდესაც პლატონი ცხენს კაზმავს, რომ გზას გაუდგეს.

„— აი, ამოგივარდა პატრონი! — მიაძახა პლატონმა, მოსართავს

რომ ხელი მოჰკიდა. — მეიტა, მელანო, ჩხინკი იქნება რამე... ენა არ ქონებია აბზინდს! მეიტა მალე, თუ ქალი ხარ!“

ანდა პლატონი და არისტო რომ ბრეგაძეებს ეწვივნენ და ვახშ-მისათვის ქათმის ქერა რომ შეექნათ მასპინძლისას. „უზოდან მოისმა რაღაც ხმაური... აგერ გაირბინა ქათამმაც, მას უკან მისდევდა ძალღი დასაქერად, აგერ კაცის ფეხს ხმაც მოისმა, რომ შირბოდა“.

ყოველივე ეს ხომ წვრილმანია — ეს უნო აბზინდიც, გაქცეული ქათამიც, რომელსაც უკან დასდევნიან, — მაგრამ წვრილმანებში მთელი იმერეთია.

და დავით კლდიაშვილიც იმერეთის მხატვარია.

იმერეთის ცხოვრებისა და იმერული აზნაურის სულის ზედმიწევნით ცოდნა ავტორის განსაკუთრებული თვისებაა. ყოველი მისი მოთხრობა იმერეთის რომელიმე კუნძულისა.

სისწორით, სინამდვილით გადმოცემა ცხოვრებისა კლდიაშვილს განსაკუთრებით ეხერხება.

მისი აღწერა ქალების მუსაფისა ეკლესიაზე, ლხინისა, მთრალი სუფრისა და სხვ. უნაყოფია.

ყველა ეს — პლატონი, ოტია, დარისპანი, არისტო, კირილე, სოლომანი, ეკვირინე, ბეკანა და სხვ. ხომ ჩვენი ნაცნობები არიან, რომლებსაც ჩვენ ვხედავთ და ვხვდებით იმერეთის ყოველდღიურ ცხოვრებაში.

როგორცა ვთქვით, კლდიაშვილი იმერეთის აზნაურობის, მისი ცხოვრებისა და სულისკვეთების მხატვარია და ამ მხრივ მის მოთხრობებს დიდი სოციალური მნიშვნელობა აქვთ. დავით კლდიაშვილი სწორედ იმ ხანებში გამოვიდა სამწერლო ასპარეზზე, როდესაც ჩვენს ცხოვრებაში წარმოიშვა მესამე დასი და დაიწყო მოქმედება.

თუ მესამე დასის მწერლები პუბლიცისტიკაში არკვევდნენ ჩვენი ცხოვრების გზას და მომავალ სახეს, კლდიაშვილი კაზმული სიტყვით მხატვრულად თვითონ ცხოვრებას და მისი მხატვრობა იყო საუკეთესო დადასტურება მესამე დასის პუბლიცისტიკისა.

დავით კლდიაშვილს არა ერთხელ უთქვამს ჩემთვის შემდეგ: მე ცხოვრებას ვხატავდი და მაშინ სრულებით არ მქონდა წარმოდგენილი, თუ რა დასკვნა გამომდინარეობდა ჩემი მოთხრობებიდანო.

და მართლაც რა დასკვნა გამომდინარეობდა?

დავით კლდიაშვილმა ფარდა ასადა იმერეთის აზნაურობის ცხოვრებას და დაგვანახვა, რომ სინამდვილემ ბაწარი მოაბა აზნაურობას და გლეხობისაკენ მიათრევს. აზნაურობა იბრაქვის, ეწინააღმდეგება, მაგრამ ამოდ.

„— რა აქვთ კიდევ საიმედო?“ — ეკითხება სონია ქამუშაძე გაჭირვებაში თავის თავს მეზობელი აზნაურების შესახებ და პასუხი ერთადერთია: საიმედო აღარაფერია.

აზნაურობა გლახობას გაუთანაწორდა ცხოვრებათ, მუშაობით, შეძლებით, კანონში კი მაინც აზნაურად იწოდებოდა და აზნაურობისათვის სასაცილო ხასიათი ეძლეოდა ყველას.

მაშ რას მოითხოვს ცხოვრება კლდიაშვილის შემოქმედებაში? წოდებათა გაუქმებას.

ცხოვრებამ სრულებით გააპართლა დავით კლდიაშვილი.

ასეა ყოველთვის გაპართლებული ის, ვინც ცხოვრების სინამდვილეს ჰხედავს და გრძნობს მთელი თავისი არსებით.

მაგრამ ცხოვრებას ორი მხარე აქვს: მოძრავი და უძრავი. ორივე ახასიათებს მას, მაგრამ ერთნაირად კი არა; უძრავი მხარე უფრო წარაულისაყენ იყურება, წარსულს ისტორიისა, მოძრავი კი მომავლისაყენ; უძრავს გზა განვლილი აქვს, ის დამთავრებულია, დასრულებული, მოძრავს კი გზა გასავლელი აქვს, ის დაუმთავრებელია, ჯერ კიდევ დაუსრულებელი.

სწორედ ამიტომ მოძრავი ცხოვრების ამოცნობა და დახატვა მეტად ძნელია. ამისათვის განსაკუთრებული ნიჭია საჭირო.

კლდიაშვილი ასეთი განსაკუთრებული ნიჭით არის დაჯილდოებული. მას იზიდავს ცხოვრების მოძრავი მხარე, ახლის მატარებელი მოვლენანი და პირები.

ბეკინა სამანიშვილი, ჯიმშერ სალობერიძე ძველი ცხოვრების პირები არიან. ამათი სრული დახასიათება არ ეხალისება ავტორს. მას უფრო იზიდავს ისეთი პირები, რომელთა ცხოვრებაში და სულში ცვლილება, მოძრაობა სწარმოებს. ასეთებია პლატონ სამანიშვილი, ოტია ქამუშაძე და სხვ.

დავით კლდიაშვილი მარტო ბელეტრისტი არ არის, — მას აქვს დრამატული ნაწერებიც.

ეს ნაწერები მაჩვენებელი არიან ავტორის ნიჭის სუსტი და ძლიერი მხარეებისა.

სინამდვილის გრძნობა, ყნოსვა, ხილვა, სმენა მასში ფანტაზიას სჭარბობს. ამიტომ კლდიაშვილს პიესები ძლიერნი არიან იმდენად, რამდენადაც მათში სინამდვილე იხატება.

იმერეთის ცხოვრება, ჩვეულება, იმერეთის ტიპები, იძერული აზნაურობა — აი მთავარი კლდიაშვილს პიესებში. მათში ცხოვრება ცოცხლად არის გადმოღებული, ხოლო ძლიერი, ღრმა შემოქმედება აქ არ არის.

კლდიაშვილის პიესები იგივე მოთხრობებია, სადაც ზოგან ფსიქოლოგიური განცდა სჭარბობს, ზოგან კი ცხოვრების დასურათება.

„ირინეს ბედნიერებაში“ უმთავრესი პირია აბესალო სალამთაძე, რომელიც ტარიელ მკლავაძის შორეული მონათესავეა.

ამ პიესაში ავტორი განსაკუთრებულ ყურადღებას აქცევს აბესალოს სულიერ ვითარებას.

„დარისპანის გასაჰირში“ იგივე იმერული ცხოვრებაა მისი ზნე-ჩვეულებით. არც დარისპანი, არც აბესალო ფოტოგრაფია არ არის, მაგრამ არც ტიპებია. როდესაც თქვენ შეადარებთ აბესალო სალამთაძეს და ტარიელ მკლავაძეს, მეორე პირველთან შედარებით გოლიათია, იმიტომ რომ ტარიელი ტიპია, ის ფოკუსია თავისი წრისა და წოდებისა.

ცხადია, კლდიაშვილი სინამდვილეს უფრო ენდობა, ვიდრე საკუთარ ფანტაზიას, იმიტომ რომ სინამდვილას მხატვრული განჭვრეტა, განცდა მასში გაცილებით უფრო ძლიერია, ვიდრე ფანტაზია. საერთო დასკვნა ასეთია:

კლდიაშვილი იმერეთია მისი ნაზი, ლამაზი ფერადებით სავსე და ცოცხალი, მხატვრული ბუნებით.

კლდიაშვილი იმერული ნიჭია, ოხუნჯი, ხალისიანი, სიტყვაგამოსწრებული, ლაღი.

კლდიაშვილის ლაღობას თანა სდევს ნაზი სევდა, რადგანაც სევდის აღმძვრელია მისგან გადაშლილი სურათები.

კლდიაშვილს უყვარს ცხოვრების სინამდვილე და ის, როგორც ხელოვანი, იმერეთის ცხოვრებაში შინაურია.

იმერეთის ცხოვრების მხატვარი — აი კლდიაშვილი.

მთელი მისი ნიჭის სიძლიერე ამ ცხოვრების აღწერაშია.

იმერეთის აზნაურების ცხოვრებას კლდიაშვილი ზედმაწევნით იცნობს. ეს ცხოვრება არავის ისე რეალურად არ გადმოუღია, როგორც კლდიაშვილს.

კლდიაშვილი გადაგვიშლის თვალწინ სასაცილო და თან სევდისმომგვრელ ამბებს და გვიხატავს საუცხოო სურათებს იმერეთის აზნაურების ყოველდღიური ცხოვრებისა, მდგომარეობისა და სულისკვეთებისას.

კლდიაშვილი დიდი, ძლიერი რეალისტია, ცხოვრების სინამდვილეს ის ჰხედავს, გრძნობს, ყნოსავს, იმორჩილება. მისი შემოქმედება ამ დარგში სრულებით თავისუფალია, ბუნებრივი: გადაჭარბებული, გადამეტებული მას არაფერი აქვს.

იმერელი აზნაური გარდამავალ ხანაში — ანუ შემოდგომის აზ-

ნაური, მისი ცხოვრება, მისი სულისკვეთება — აი საგანი კლდია-  
შვილის შემოქმედებისა.

აქ ის მეტად თავისებურია, მეტად ძლიერი.

ყოველი მისი სიტყვა ცოცხალი სინამდვილეა და მის მოთხრო-  
ბებს ჩვენ გადავყევართ შიგ ცხოვრების შუაგულში; ვხედავთ აქ  
პლატონს, ოტიას, სოლომანს, კირილეს, არისტოს, ეკვირინეს, ბე-  
კინას, გვესმის მათი საცილი, მათი მუსაიფი, ჩვენ თვალწინ მიმდინა-  
რობს მათი ცხოვრება.

ეს არის დიდი ღირსება ავტორისა, ის მარტო სურათებს, სახეს  
კი არ იძლევა — ის გვაძლევს თვითონ ცხოვრებას. სინამდვილე იმის  
შემოქმედებაში ცოცხლობს, მოძრაობს.

აი ამაში მდგომარეობს დავით კლდიაშვილის ნაწერების დიდი  
ისტორიული მნიშვნელობა.

1920

## ბ. ჭუჩიშვილის პოეზია

ხალხის ბედი ხალხისავე ხელშია.

ხალხს შეუძლია როგორც ხანა თავისი თავისა, აგრეთვე დალუპ-  
ვაც.

ეს ჭეშმარიტი აზრი საკმაოდ იყო მომწიფებული ჩვენს მწერ-  
ლობაში უკვე მესამოცე წლებიდან.

საუკეთესო წარმომადგენლები მაშინდელი მოღვაწეობისა  
მთელ თავის იმედებს ხალხზე ამყარებდნენ.

მაგრამ ხალხი ყოველგვარ პირობებში არ არის გამომკედი თა-  
ვის ბედისა...

საჭიროა შეგნება, შეკავშირება.

ამ თვისებით აღჭურვილი ხალხი წარმოადგენს დემოკრატისა.

დემოკრატიის მომზადება ჩვენში იწყებოდა ოთხმოცდაათი წლე-  
ბიდან.

დემოკრატიული აზროვნება, დემოკრატიული საფუარი იყო მა-  
ნამდევ ჩვენს ხალხში, მაგრამ საჭირო იყო ხალხის დარაზმვა, შე-  
კავშირება ახალი აზრების შესაგნებლად. აი ამან გამოიწვია ოთხ-  
მოცდაათიანი წლების შემდეგ სასტიკი ბრძოლა მამებსა და შვი-  
ლებს შორის.

შვილებმა მესამე დასის მეთაურობით გაიმარჯვეს...

ისტორია ჩვენი დემოკრატიისა იწყება მესამე დასის ისტორი-  
იდან.

შემდეგ ღაიწყო დაუღალავი და მედგარი მუშაობა ჩვენი მუშა-  
თა ხალხის გაცნობიერებისა და ამ მუშაობაში თავისი წვლილი შე-  
იტანა ჩვენმა პოეზიამაც.

ბატონყმობის გადავარდნას თან მოჰყვა ძლიერი ხალხოსნური

ტალღა ჩვენს პოეზიაში, მაგრამ ეს ტალღა იყო გარედან შემოჭრილი, ის დაიბადა დიდკაცურ წრეში.

ხალხთან ის აწლო არ იყო, ამიტომ ვერც ახლენდა შესაფერავლენას.

წარსული საუკუნის ბოლოში დემოკრატიათ თვითონ წარმოშვა თავისი პოეტები, რომლებმაც ხელი შეუწყვეს თავისი პოეზიით დემოკრატიის ზრდასა და დაეფუძვნებინა.

დემოკრატიის აუცილებელი გზა არის ბრძოლა ბატონობისათვის.

ეს ხანა ჩვენი დემოკრატიის ცხოვრებაში ჯერაც არ დამთავრებულია.

ამიტომ დემოკრატიის პოეტებმა შეიტანეს ჩვენს პოეზიაში ბრძოლის სიმღერა. ასეთია ევდოშვილი და ვარლამ რუხაძე.

მშრომელი ხალხის სამსახური და რევოლუციის ღმერთის თაყვანისცემა — აი რა ახასიათებს ამ ორ პოეტს.

ესენი გამოვიდნენ ხალხის წრიდან და ხალხის იდეალი დაისახეს თავის მიზნად.

ამ მიზნის განხორციელება მოითხოვდა ბრძოლას მედგარს, სასტიკს და ამიტომაც რევოლუციის ცეცხლი დაანთეს ჩვენს ახალს პოეზიაში და მისი შუქით შეიჭრნენ მშრომელთა უბნებში.

ამ ორი პოეტის გზას გაჰყვა შემდეგ ბევრი ახალგაზრდა მგოსანი.

მათ რიცხვს ეკუთვნის ქუჩიშვილიც.

ეს პოეტი მშრომელი ხალხის პირმოშვილია მთელი თავისი ცხოვრებით, მოქმედებით, მისწრაფებით, სიხარულით თუ სევდით, სიყვარულით თუ სიძულვილით, ერთი სიტყვით მთელი თავისი აზრით, გრძნობით, მსოფლმხედველობით ეკუთვნის მშრომელ ხალხს.

მისი პოეზიაც სიმღერაა მშრომელი ხალხის ბედისა და უბედობისა და გაცხოველებულია ბრძოლის ჰანგებით, ბრძოლის ცეცხლით.

რისთვის იბრძვის მშრომელი ხალხი? ამქვეყნიური ცხოვრების მოსაწყობად.

ამიტომ მას უყვარს სინამდვილე, სიცხადე.

მწერლობაში ამას შეეფერება რეალური მიმართულება, ბუნებრივობა, მარტივი, უბრალო და სადა ენა.

სწორედ ასეთია ქუჩიშვილი.

საიდუმლო, გაუგებარი, მისტიური მას არა სწამს.

ხილული ცხოვრების სინამდვილე — აი რა იზიდავს მას.

ბუნების სიმშვენიერე — აი რა ჰხიბლავს მას.

სილამაზეს ის არ ეძებს თვალდანუჭული.

ის უმზერს სილამაზეს — ეს არის მთელი ბუნება.

და ის ცდილობს ამ ბუნების სიღიაღის გაშლას, რომ თვითონაც დასტებეს და სხვაც დაატკბოს:

ცისკრის თრთოლა,  
მზის კაშკაში,  
სიოს ქროლა  
ჭალა-მთაში, —  
აი ჩემი აღტაცება!  
ტყის ფოთლებო,  
ტაში, ტაში!

ამ სტრიქონებში მღერის ბუნების მგოსანი, რომელიც ტყის ფოთლებს ეთამაშება და ბუნების ყოველ ზოვლენაში უდიდეს მშვენიერებას ჰხედავს:

„რ, დაჰბერა ნიავმა,  
ტყემ ნაზად დაიშრილა,  
დაირაკრაკა ტოროლამ,  
ბულბულმაც შეიფრთხილა,  
ამღერდა ცა და ხმელეთი,  
აღღერდა ჩანგი წკრილა!  
ღმერთო, რა სანახავია  
რა ძვირი გასაგონია! —  
ქმობამა, ჩემზე მდიდარი  
მე სხვა არავინ მგონია!

ქუჩიშვილი არა თუ მგოსანია ბუნებისა, ის ბუნების მიჯნურია. ბუნების სილამაზეს ის ვაჟა-ფშაველასავით გრძნობს, ჰხედავს. იხიბლება, თვრება ამ სილამაზით და მღერის გულმხიარული, შეყვარებული:

მყის გული ამიმღერდება  
ბუნების დანახავზედა!

ჩვენ აქ აშკარად ვხედავთ, თუ რა დიდი გავლენა აქვს ბუნებას ადამიანის ხასიათზე, იმის სულიერ განწყობილებაზე.

ვინც ბუნებასთან დაახლოვებულია. არ შეუძლია ბუნება არ შეიყვაროს. ვისაც ბუნება უყვარს, ის ბედნიერია. ვაჟა-ფშაველა უდიდესი მგოსანია მთებისა. ჩვენი ქვეყნის მთებმა ვაჟაში ჰპოვეს უბადლო მხატვარი, რომელმაც მთებს სული ჩაუდგა, ფიქრით დაამძიმა და აამეტყველა.

ქუჩიშვილი თავის ლექსში — „მთებს“ ვაჟას მოგვაგონებს.



მთებო, რა საყვარლები ხართ  
ტყე-ლელე-ქალა-სერითა,  
აყვავებული ქედებით,  
მდინარეების ჩქერითა,  
ცის ელვა-ქექა-ქუხილით  
და ქარიშხლის მღერითა, —  
ისე არ მოვკვდე, არ გავძლე  
თქვენი სიტურფის მზერითა.

როდესაც გაზაფხულის რიყრაყზე ამომავალი მზე სხივებსა  
ჰკრავს ცის გუმბათს, იშვიათი სურათი იხატება.

წამოშლილი ჩიტები მზიარული ელურტულითა და ჰიკჰიკით  
ეგებებიან ცის მეფეს, ბუნება აფერადდება, აწითლდება სიყვარულ-  
ლით და ახმაურდება სხვადასხვა სიმღერით ბუნების სილამაზისთან  
ერთად. თქვენ აქ შეჰყურებთ მზის თაყვანისცემას.

ამ საერთო ფერხულშია ქუჩიშვილიც:

მზე ამოდის! მზე ამოდის!  
ფრინველებმა დაჰკრეს ტაში  
მსურს მეც გზაში მივეგებო,  
მეჭინბევე, ჩქარა რაში!

როგორც ის მერცხალი, რომელიც მზიარული ელურტულით  
ეგებება მზის ამოსვლას, ქუჩიშვილიც ბუნების თაყვანისმცემელია.  
როდესაც ის მოსწყდება დედამიწას და ოცნების რაშზე გაღამჯდარი  
თავის აღმაფრენას გაჰყვება, მეტად მოხდენილია:

გასწი! გასწი, ჩემო ლურჯა,  
გასწი, თუ გიყვარა!  
ნიაჲ-ქართან მანავარდე,  
მეყო, რაც ვიდარდე!

და განა რა ადარდებს მგოსანს?  
ბევრი რამ.

მარტო ვარ, მარტო.  
ვის განვეუმარტო  
სიკვდილ-სიცოცხლის  
შაფი ფიქრები.

სიკვდილ-სიცოცხლის საკითხს ბევრი პოეტი ჩაუფიქრებია.  
ამგვარი ფიქრი იწვევს ქუჩიშვილში ერთგვარ სევდას, მაგრამ ეს  
სევდა იმის პოეზიაში შემთხვევითია და წარმავალი.

ქუჩიშვილი ბრძოლის პოეტია. სიკვდილი მას აფიქრებს, მაგრამ  
ბრძოლის ცეცხლი მასში გაცილებით უფრო ძლიერია, ვიდრე სიკ-

ვდილის შიში და ამიტომაც ამ სევდასაც მის პოეზიაში უმნიშვნელო ადგილი უჭირავს.

მართალია, მას აფიქრებს ზოგჯერ ჩვენი არსებობის წარმავლობა:

სიზმარს მკონებს ჩვენი აქ ყოფნა,  
სიზმარიცაჲთაჲ მიჰქრიან დღენი,  
ეჲ, რა ვუქია კაცთა ცხოვრება,  
რა ხანმოკლეა სიცოცხლე ჩვენი.

ან კიდევ:

ჩვენ მგზავრნი ვართ წუთისოფლის,  
მივალთ ლანდებივით;  
სიზმარივით ვიბადებით,  
ვქრებით სიზმარივით...

მაგრამ სიკვდილის სევდას ის ბრძოლის ყიყინაში ახრჩობს და თავისუფლებისათვის ბრძოლაში ხედავს ცხოვრების მიზანს.

მეორე მიზეზი პოეტის სევდისა არის ქვეყნის ცრემლები. ქვეყანაზე უსამართლობა სუფევს, ტანჯულთა ცრემლი იღვრება, და ეს სევდით ავსებს პოეტის გულს.

მაგრამ მან იცის, რომ მშრომელი ხალხის ბრძოლა და გამარჯვება შეაშრობს ამ ცრემლებს და წუთიერი დასევდიანების შემდეგ ის ისევ იმედიანად მოუწოდებს ყველას ბრძოლისაკენ ჯა მებრძოლთა წმინდა სახელებს უმღერის გმირულ სიმღერას.

პოეტის სევდაში დიდი ალაგია უკავია მშრომელი ხალხის მღვობარეობას:

ყველა მთვარის ლანდებს ვგევაართ,  
შეგვხმობია ყველას ყებრ.

შრომის ჰანგში მას ხშირად ესმის ბედის სამღურავი და ჩივილი:

და ამ ჰანგში, შრომის ჰანგში,  
ცხოვრებაზე მოსთქვამს ყველა.

მაგრამ პოეტმა იცის, რომ

შრომის წმინდა სამეფოში  
შრომის ღრომით შევალთ ყველა!—

და ამიტომ ამაყი და გამხნევებული მეღვრად მოუწოდებს შრომის შვილებს:

ერთად, ძმებო, ძმებო, ერთად!  
ჩაქუჩით და თოფით ხელში!

სირცხვილი მას, ვინც გაებას  
მაედურების გაბმულ ქსელში

პოეტის სევდას ასაზრდოებს სამშობლოს ბედი.

მისი სული არის — საქართველოთი მოწყენილი, მოუღბინარი...  
ერის ცრემლით დამძიმებულნი.

მაგრამ პოეტმა კარგად იცის, რომ მისი საყვარელი სამშობ-  
ლოს ხსნა მხოლოდ ბრძოლაშია და ყველას მოუწოდებს ბრძოლი-  
საკენ:

წავიდეთ, ძმებო, წავიდეთ,  
ჩავებათ ცხარე ბრძოლაში.  
ვამა, ვინც ჩვენთან იქნება  
თოფ-ზარბაზნების სროლაში!

პოეტის ლექსებში გატარებულია საღი გრძნობა მამულის სიყ-  
ვარულისა და თქვენ აქ ვერ ნახავთ ვერავითარ გადაჭარბებას. მას  
უყვარს თავისი სამშობლო, როგორც ხალხის შვილს, და მოუწოდებს  
ყველას მის დასაცავად.

ქუჩიშვილს განსაკუთრებით მოსწონს თავისი სამშობლოს  
ბუნება:

ვინც მისწვდება ჩემი მთების  
მწვერვალებს და ღრუბლებს,  
ისიც მგოსნად გადიქცევა,  
ღმერთთან ისაუბრებს.

სამშობლო პოეტს ესახება, როგორც ზღვაში ობლად მავალი  
ზომალდი და ფიქრი პოეტისა თან დასდევს მას.

ამ ფიქრში ხშირად იქვია, ზოგჯერ იმეღი, ზოგჯერ კი სევდა  
და უნუგეშობა.

ქუჩიშვილი უხვად არის დაჯილდოვებული გრძნობით, ტემპე-  
რამენტით, სამხატვრო გემოვნებით და ამიტომ მისი ასპარეზი  
ფართოა.

მაგრამ მისი ჩანგის სიმები განსაკუთრებით მუშა ხალხის ბედის  
სამღერლად არიან განწყობილნი; პოეტს განსხვავებულად უყვარს  
მუშა ხალხი; მას მუშა ხალხთან აქვს სულიერი ნათესაობა, ის მუშა  
ხალხის მგოსანია.

მუშათა უბანი, სარდაფები და ქოხები, მათი მუშაობა, ტანჯვა,  
გაპირვება, იმეღი, ბრძოლა და გამარჯვება — აი რა იზილავს ქუ-  
ჩიშვილს.

რისთვის არის მუშა ხალხი უმთავრესი საგანი პოეტის შემოქ-  
მედებისა?

იმისთვის, რომ ქუჩიშვილი მუშა მგოსანია და მთელი თავისი შეგნებით, მისწრაფებით ის შეკავშირებულია მუშა ხალხთან: გრძნობით, ფიქრით და ოცნებით მუშა ხალხის გულსა და გონებასთან არის გადაჯაჭვული.

ქუჩიშვილს გათვალისწინებული აქვს, რომ ცხოვრება უკულმართობით, უსამართლობით, ბოროტებით არის სავსე.

ცხოვრების გასაწმენდად, ბოროტების მოსასპობად ბრძოლაა საჭირო.

საუკეთესო მებრძოლებს პოეტი ხედავს მუშა ხალხში.

ერთ თავის ლექსში („შავი სამეფო“) აგვიწერს კიდევ მუშა ხალხის განსაკუთრებულ დანიშნულებას:

მხოლოდ მუშები, გულამაღო  
ქარხნის მუშები  
დიდი ხანია, რაც საომრად  
ემზადებოდნენ,  
იქ, იმ ჭურღმულში ერთდებოდნენ,  
ირაზმებოდნენ  
და ამბოხების ნანატრ ძახილს  
ელოდებოდნენ.

გაისმა ნანატრი ძახილიც, დადგა ეამი ბრძოლისა. უნდა უყუროთ, როგორი შეგნებითა და თავგანწირვით იბრძვიან თავისუფლების გულისათვის ეს გოლიათები:

მკერდგაღელიანი აწვებოდნენ  
მტარვალთა ჯარებს,  
კოჭრიან ხელით წინ მიჰქონდათ  
წითელი დროშა  
და ვეფხვებივით ასკდებოდნენ  
ციხეთა კარებს.

რევოლუციის მოწინავე ჯარს, რომლის მოწოდებაც არის ძველი ქვეყნის დანგრევა, პოეტი ჰხედავს მუშათა კლასში.

ამიტომ უმღერის ის მუშებს. დაჩაგრულთა ხსნა, ძველი წყობილების დანგრევა, სამშობლოს განთავისუფლება, — ყოველივე ეს მხოლოდ მუშა ხალხს შეუძლია, პოეტის რწმენით.

ამიტომ უყვარს მას მუშები. ქუჩიშვილი რევოლუციის მგოსანია და ვის უნდა უმღეროს მან, თუ არა რევოლუციის მებრძოლებს!

ქუჩიშვილის პოეზიის ერთ განსაკუთრებულ თვისებას ის შეადგენს, რომ ეროვნული და კლასობრივი იქ გადაჯაჭვული, შედუღებულია, ერთი უმეოროდ პოეტს ვერ წარმოუდგენია. მუშა ხალ-

ხი მის წარმოდგენაში მარტო კლასი კი არ არის, არამედ მთელი ერის მისწრაფებათა გამომხატველი და მატარებელი.

თავისი ბრძოლით ის მარტო თავის თავს კი არ ანთავისუფლებს, არამედ მთელ ერს. მუშათა კლასის გზა ჯა მთელი ერის გზა ერთი და იგივეა.

საუცხოო პოეტის „ახალი ნანა“:

აჯანყებულ ქუჩებიდან  
ისმის ყიყინაო,  
ისმის ხალხის მოწოდება:  
წაეიღეთ წინაო.

ინგრევა და ილეწება  
ძველი ქვეყანაო;  
იავ-ნანა, ვარდო-ნანა,  
იავ-ნანინაო.

ბრძოლის ცეცხლი ჩვენს ახალ პოეზიაში ევლოშვილმა და ვარლამ რუხაძემ დაანთეს; პოეზიაში მათ ააფრიალეს წითელი დროშა ამ ცეცხლის გარშემო ფერხული გამართეს მშრომელი ხალხის წრიდან გამოსულმა პოეტებმა და ერთი ამათგანია ქუჩიშვილი.

ზოგჯერ სევდიანი, ზოგჯერ აცრემლებული, ბევრჯერ იმედიანი, ის მიუძღვის მშრომელ ხალხს წინ თავისი ლამაზი, მოხდენილი სიტყვით და შეურყევლად სწამს, რომ ცხოვრება წინ მიდის სულ უკეთესი და უკეთესი მომავლისაკენ.

იმის პოეზიაში თქვენ ნახავთ ცრემლებს, სევდას, სასოწარკვეთილებასაც, მაგრამ რწმენის ჩირაღდანი მის ხელში არც ერთხელ არ ჩამქრალა და არც ჩაქრება.

ოცნების რაშით მიისწრაფის წინ მშვენიერებისაკენ, უკვდავებისაკენ — მზისაკენ.

ქუჩიშვილის შემოქმედებაში ცეცხლია ჭეშმარიტი ხელოვნებისა. გრძნობით საესეა მისი პოეზია, სიყვარულით გამთბარი.

ძალდატანება მას არსად არ ეტყობა, ბუნებრაფია, როგორც მთის ანკარა ნაკადული და მეტად გულწრფელი. მაგრამ მისი გონების ფრთები მეტად სუსტია მისი აღმაფრენისათვის და ამიტომ ქუჩიშვილის პოეზიას სიღრმე და სიგანე აკლია.

თანამედროვე ცხოვრება მეტად რთულია და თანამედროვე პოეზიაშიც გულის ცეცხლი გახვეული უნდა იყოს გონების შუქში, რომ ის კიდევ სწვაავდეს და შორსაც ანათებდეს.

ქუჩიშვილის პოეზია მდიდარია მუსიკალობით, სიმღერა ჩაქსო-

ვილია ქუჩიშვილის ლექსში ჯა ამიტომაც არის ის ხმატკბილი მოალერსე.

თავისი შემოქმედების მნიშვნელობას თვითონ პოეტი ახასიათებს ერთ თავის ლექსში:

მე ზარი ვარ მოგუგუნე,  
მოწოდების ზარი,  
ჩემს რეკაზე ირაზმება  
შრომის შვილთა ჯარი.  
მე ზარი ვარ მოწერიალე,  
სასოების ზარი!  
ხან მწუხარი, ხან მქუხარი,  
ხან კი ხმანარნარი!

წმინდა, ქეშმარიტი ხელოვნება ქუჩიშვილმა შეუხმატკბილო მშრომელი ხალხის ბედ-იღბალს; სამშობლოს მომავალი მან გადააწნა მუშათა კლასის მერმისს, ეროვნული და კლასობრივი ერთმანეთს დაუკავშირა პოეზიაში.

ქუჩიშვილის შემოქმედებაში კლასობრივ ჰანგებთან ერთად განისმის ეროვნული ჰანგები და, ამავე დროს, მუსიკის ხმატკბილობა არა თუ არ ირღვევა, უფრო საგრძნობი და ძლიერია.

ამაშია განსაკუთრებული თვისება ქუჩიშვილისა.

პოეტსა სწამს სამშობლოც, სოციალიზმიც, ეროვნულიც და ინტერნაციონალურიც და ეს რწმენა ლამაზად არის აკინძული იმის პოეზიაში.

ბუნებრივი ნიჭი ქუჩიშვილისა საკმაოდ ძლიერი და თავისებურია, მაგრამ ამ ნიჭის დახვეწა, გაზრდა და გაღრმავება ვერ შესძლო პოეტმა.

მისი შემოქმედება შეჩერდა ერთ წერტილზე და აღარც ფორმას, აღარც შინაარსს წინმსვლელობა არ ეტყობა.

მაგონდება გრიშაშვილის სიტყვები ერთ ლექსში: „სად ვყოფილვარ, რა მინახავს?“ — იგივე სიტყვები შეუძლია გაიმეოროს ქუჩიშვილმაც.

მარტო ნიჭმა რა ჰქნას, თუ მას არ ექნება ხელის შემწყობი პირობები, როგორ გაიზარდოს და გაივსოს.

მაგრამ ეროვნული აღორძინება უსათუოდ გამოიწვევს ჩვენი პოეზიის მძლავრ ამეტყველებას და შექმნის ისეთ პირობებს, როდესაც ყოველ ნიჭს საშუალება მიეცემა მთელი თავისი ძალღონე და შესაძლებლობა ბოლომდე ამოსწუროს.

## ი. გრიშაშვილის „საიათნოვა“

ყარაჩოღელი და კინტო ერთი და იგივე ჰგონიათ!!.

ჩვენი წარსულის უცოდინარობით მოსდით.

ყარაჩოღელი უპირველესად თბილელი მოქალაქეა. შეიძლება ის ქართველი იყოს, შეიძლება სომეხი — სულ ერთია, ის შვილია საქართველოსი, საქართველო მისი სამშობლოა.

და მას უყვარს ეს სამშობლო, ის არ გასცვლის მას სხვა ქვეყნის სამოთხეზე. არ უღალატებს, არ გაჰყიდის მას.

ამ მხრივ ყარაჩოღელების სულისკვეთების, მათი გრძნობის გამომხატველია მგოსანი საიათნოვა, რომელიც მღეროდა: „ჩემი სამშობლო თბილისია, საქართველოს გული“.

ყარაჩოღელთა ერთი ნაწილი სომხობა იყო, მაგრამ სამშობლოს სიყვარულში ეს ნაწილი შეუღლებული იყო ქართველობასთან.

ქართველ და სომეხ ყარაჩოღელს — ორთავეს ერთი სამშობლო ჰქონდათ. ორივენი ერთი ცხოვრებით სცხოვრობდნენ, ორივეს საერთო ჰქონდათ ჭირი და ლხინი. კეთილდღეობა ჩვენი ქვეყნისა იმოთხოვნს, რომ როგორც ძველად ყარაჩოღელებს, ისე დღესაც საერთო გვექონდეს — ლხინიც, ჭირიც:

ნუ დაავდებ ძველსა გზასა,

ნურცა ძველსა მეგობარსა.

ძველი, ყარაჩოღელური ძმობა და ერთობა ჩვენს შორის სიყვარულისა და თანხმობის განუწყვეტელ ჯაჭვად უნდა გადაიქცეს.

ძმობისა და ერთობის სიმები საქართველოს სხვადასხვა ერთა შორის ჯერ, სამწუხაროდ, არ არის მტკიცე. მაგრამ საერთო მუშაობით, შეერთებული ძალებით უნდა განვამტკიცოთ.

ამიტომ სასარგებლოა იმ დროში ჩახედვა, როდესაც ეს სიმები მტკიცედ იყო გაბმული და მათზე დამღერებით საიათნოვა ატკობდა ძველ თბილისს, ძველ თბილელს, ძველ ყარაჩოღელს — სომეხსაც,

წართველსაც, თათარსაც. ეს დრო, მისი მარტივი ცხოვრება, მისი ბავშვური გულუბრყვილობა, მისი საღაობა და სილამაზე ეშხიანად და ბაკმიანად გადაგვიშალა თვალწინ თვითონ ბაკმიანმა გრიშა-შვილმა.

გრიშაშვილის „საიათნოვა“ სწორედ დროის შესაფერისია.

რომაული ანდაზაა: წიგნებს თავისი ბედი უწერიათო.

საიათნოვასაც თავისი ბედი ეწერა.

ჩვენ გაგვეგონა საიათნოვა, ვიცოდით, რომ ის ერეკლეს დროს რაღაცას სწერდა, უკრავდა, თუ მღეროდა, მაგრამ მას არ ვიცნობდით.

გრიშაშვილის ნიჭი და მაღლიანი კალამი იყო საჭირო, რომ საიათნოვა მკვდრეთით ამდგარიყო ჩვენი საზოგადოებისათვის.

ესეც საიათნოვას ბედი, რომ ის ხელში ჩაუვარდა მზის სხივებში მოტივტივე სიტყვათა ჰარამხანის მბრძანებელს.

საიათნოვა გაუგებარია, თუ ძველი თბილისი არ გაიგეთ. ძველი თბილისი გაუგებარია, თუ ძველი ყარაჩოღელი არ გაიცანით.

გრიშაშვილიც გვიხატავს ყველა ამათ საუცხოო სურათს: „ძველს პოეტებში მეც მყავს ჩემი გულის მურაზი“.

ერთი მათგანი უეჭველად საიათნოვაა.

გრიშაშვილს აქვს საერთო როგორც საიათნოვასთან, ისე ყარაჩოღელთან. გრიშაშვილის ნიჭში არის ბევრი რამ ყარაჩოღელი: ყველგან და ყველადღერში საკუთარი მეობა, სულისა და გულის იშვიათი სიმდიდრე, გონებამახვილობა, თავისებური ფხიანობა, საკუთარი გზის საკუთარი შრომით გაკაფვა და სხვა... აბა რამდენი ერთი უნდა ჩამოვთვალო!

საიათნოვასთან კი გრიშაშვილს აერთებს მოტივები, ჰანგები, რითმი. სიყვარულის ენა, სამიჯნურო გალობა, მგოსნობა.

საიათნოვა პოეტიც იყო. მგოსანიც — ესე იგი მომღერალი.

გრაშიშვილიც პოეტი და მგოსანია.

მართალია, ის არ მღერის, მაგრამ სამაგიეროდ მისი ლექსის სიტყვები სულ მღერიან და ცეკვავენ.

ბუნებრივი პოეტიც ამით განირჩევა ნაცოდვილარისაგან: მისი ლექსის კითხვამ უსათუოდ უნდა აგამღეროს და სხეული ავითამაშოს. საიათნოვას სიყვარული მსხვერპლიანი, ზვარაკიანი სიყვარულია. ამგვარივეა გრიშაშვილის სიყვარულიც. უმთავრესი მოტივი საიათნოვას პოეზიისა სიყვარულია. გრიშაშვილის ცელქი, ცქრილა, მოსხლეთილი, ხან მხიარული, ხან სევდიანი, მაგრამ მუდამ მოცეკვავე და მომღერალი სიტყვაც ხომ უფრო სიყვარულს ევლება გარშემო.



საიათნოვა რაც იყო, თავისით იყო, — თავისი ნიჭით, თავისი ენერგიით გაიკაფა მან გზა და გახდა სასახლის დიდი მგოსანი.

ამ შირივ გრიშაშვილი საიათნოვას გამეორებაა. ამანაც დიდი და თავისებური ნიჭით გაიკაფა გზა და შეიჭრა ძლიერ და მეტად ლამაზ ნაკადულად ჩვენს პოეზიაში.

ამიტომ უყვარს გრიშაშვილს საიათნოვა და მასთან ერთად ძველი თბილისი და ყარაჩოღელები.

უსიყვარულო არ შეიძლება ისეთი სურათების დახატვა, როგორსაც გვაძლევს გრიშაშვილი თავის „საიათნოვაში“.

ძველი თბილისი, მისი ცხოვრება, მისი ზნე-ჩვეულება, მისი დროსტარება, საქმიანობა ცოცხლდებიან.

და როდესაც საიათნოვას ჰკითხულობთ, გგონიათ, რომ ყოველივე ამას ჰხედავთ ცოცხლად, ნამდვილად, საკუთარი თვალით.

ამ ძველ ცხოვრებაში სადაობასა და სიმარტივესთან ერთად დიდი სილამაზეც არის და ეს სილამაზე თავის გამომხატველს ჰპოვებს საიათნოვაში.

დიდი პოეტი ის არის, ვინც თავის დროს საუკეთესოდ გამოჰხატავს. საიათნოვას პოეზია ღარიბია მოტივებით, როგორც მაშინდელი ცხოვრება, მაგრამ ის მდიდარია ფერადებით; ის მარტივია, მაგრამ მეტად ლამაზი.

საიათნოვა ხარკეა თავისი დროისა და ამიტომ ის დიდი პოეტია.

## ლიტერატურული შენიშვნები.

დღევანდელ დღეს ახასიათებს საერთოდ ადამიანის დაწვრილმანება, დაქვეითება.

ეს გამოწვეულია საშინელი სიძვირით.

მთელი ყურადღება ადამიანისა კუჭს დაემორჩილა. ვერ შოულობ იმდენს, რომ კუჭი ოდნავ მაინც დაიკმაყოფილო და ასეთ გარემოებაში ვიღას სცალია სულისათვის?

მიუხედავად ამისა, ხელოვნების დარგშიაც სწარმოებს ჩვენში დიდი მუშაობა.

ქართული ოპერა, ქართული დრამა, ქართული მხატვრობა ბრძოლით იკაფავს გზას წინ.

სიტყვაკაზმული მწერლობაც ვითარდება; სწარმოებს გადასინჯვა ძველი გზებისა, ძიება ახლისა, ბრძოლა.

ყოველივე ეს უტყუარი ნიშანია ერთგვარი ძვრებისა.

რაც უნდა გაურბოდეს მწერლობა ცხოვრების სინამდვილეს, ამ სინამდვილეს მაინც ვერსად დაემალება, — ისე როგორც ადამიანი ვერსად გაექცევა თავის ჩრდილს.

სინამდვილე თავის დაღს აჩენს მწერლობას.

სინამდვილე ერთფეროვანია და სადა არ არის, — რთულია, მასში გადახლართულია ადამიანთა, კლასთა და წოდებათა ინტერესები, წინააღმდეგობანი.

აი ყოველივე ამის სარკეს, აჩრდილს, ხმაურს ან ანარეკლს ჩვენ ვხედავთ სიტყვაკაზმულ მწერლობაშიაც.

ყოველ მწერალს თავისი სული შეაქვს შემოქმედებაში, სული კი შეგნებულად ან შეუგნებლად ატარებს კლასის ან წოდების სახეს.

ამიტომ სიტყვაკაზმულ მწერლობაში უსათუოდ არის კლასობრივი. წოდებრივი სული, მაგრამ ყოველგვარი მიმართულების სი-

ტყუარაზე მწერლობას ახასიათებს საერთოდ მშვენიერება. მშვენიერება კი ყველა კლასისათვის მისაღებია.

შეიძლება არ ვიზიარებდეთ ამა თუ იმ პოეტის მსოფლმხედველობას. მაგრამ იმის პოეზიის მშვენიერებას, მისი შემოქმედების ხელოვნებას თაყვანს ვსცემდეთ.

ყოველ კლასსა და წოდებასა ჰყავს მწერალი, რომელიც განსაკუთრებით მისთვის არის ძვირფასი.

ასეთი იყო მუშათა კლასისათვის ნოე ჩხიკვაძე, რომლის კალაზიკ უდროოდ გადატყდა გასულ წელს.

ამ უბრალო ადამიანში, რომელიც ზოგჯერ მშვიერი იყო, ზოგჯერ ქუჩაში ათენებდა, ნამდვილი ცეცხლი იყო ჰუმანიტატი პოეტისა.

პოეტის ლექსთა პირველ კრებულს აქვს ორი წარწერა: „ცისა და მიწის“, „სიცოცხლეა — სიყვარული!“ აი ამ ორ აზრში მთელი შინაარსია ჩხიკვაძის პოეზიისა და მასთან გარკვეული მსოფლმხედველობა.

პოეტის გული დედამიწის მწუხარებით არის დაღარული, მაგრამ ის მაინც ცისაყენ იყურება და იქითკენ უხმობს ყველას!

ვაი მას, ვისაც ცის გალობა არა ჰსმენია .

რა თქმა უნდა, პოეტის ცა არ არის მორწმუნე ადამიანის ცა, არ არაა ამაღლებული ცხოვრება, სულიერი ნეტარებით სავსე.

გარეშე სიყვარულისა პოეტს არა სწამს სიცოცხლე. მთელი მისი პოეზია გაცხოველებულია ადამიანის სიყვარულით:

- მერე რა ჰქვია ესრედ ტანჯვით ჩემში შობილსა?
- ადამიანი!
- ამინ! — შევსძახე უკვდავებს სულსა სათვისოდ და შემეყვარდა საუკუნოდ, სამარადისოდ!

პოეტის სიყვარული არ არის უძრავი, უმოქმედო. მისი სიყვარული მოძრავია, მას სწყურია ადამიანის ბედნიერება.

მაგრამ იბადება შემდეგი საკითხი: რა არის ბედნიერება, რაში გამოიხატება ის?

ცისა და დედამიწის დაკავშირებაში, — უპასუხებს პოეტი:

- დაკავშირება თუ რომ შესძლო მიწის და ცისა,
- ზეცის საუნჯე, საიდუმლო მიწას აჩვენა, —
- იგი დარჩება საუკუნოდ გამარჯვებული.

როგორც კი ამ დასკვნამდე მივა პოეტი, თავს წამოჰყოფს მეორე საკითხი: რითი, რა გზით, რა საშუალებით შეიძლება ცისა და

დედამიწის დაკავშირება? უნგარო სიყვარულითა და თავისუფლებით, — უპასუხებს პოეტი.

ცხოვრებაში უნდა გამეფდეს უნგარო სიყვარული და თავისუფლება. მხოლოდ ამის შემდეგ გახდება შესაძლებელი ცისა და მიწის დაკავშირება.

მრწამს ერთი რამე: უნგარო თავისუფლება...  
და სიყვარული, სიცოცხლისა სასუფეველი.

პოეტის ძიება აქ არ ჩერდება, რა გზით შეიძლება თავისუფლებისა და სიყვარულის გამეფება ცხოვრებაში? ეკითხება თავის თავს. არსებობს მხოლოდ ერთი გზა — ეს არის გზა ბრძოლისა:

ბრძოლა ყოფნის ქარია, რღვევის ქარიშხალი!

მიზანი გარკვეულია, გზაც გამონახული. მაგრამ საქმე იმაშია, ვინღაა ეს მებრძოლი?

მებრძოლები არიან მხოლოდ დაჩაგრულები, შრომის შეიღები. მუშათა კლასი, რადგანაც ბრძოლის ცეცხლი მხოლოდ ოფლისა და ცრემლის შეერთებით ჩნდება.

ვინაც კვნესის, იმან იცის ყოფის ვალი!  
აწმყოსაგან მსხვერპლსა ითხოვს მომავალი;  
და როდესაც სამსხვერპლოზე იგი დნება,  
როცა ოფლსა ცხარე ცრემლი ეთვისება,  
ის ნაღველი ბრძოლის ცეცხლად უნდა იქცეს,  
ძველი ყოფნა ჩაიტანოს და დაიქცეს!..

ამიტომ, რომ პოეტს განსაკუთრებით უყვარს მუშათა კლასი:

გაუმარჯოს მამ შრომის შვილს,  
გაუმარჯოს ჩაგრულთ კერას!

პოეტი ჩაგრულთა მგოსანია. მაგრამ მისი ჩანგის ამ თვისებით არ აიხსნება მისი სიყვარული მუშათა კლასისადმი. მუშათა ხალხში ის ხედავს მებრძოლს, რომლის მოწოდებაც არის ცხოვრების გარდაქმნა, სიყვარულისა და თავისუფლების მოპოება და ამით ცისა და დედამიწის დაკავშირება.

ჩხიკვაძის პოეზია სავსეა ბრძოლის ცეცხლით. ანთებული ჩირალდნებით მიუძღვის ის მუშა ხალხს წინ და სევდით სავსე კილო ქექა-ქუხილად იცვლება.

დაკარ. დაკარ მტრისა გულს აღსასრულის ლახვარა,  
რომ ბედისგან დაჩაგრულს შეშრეს ცრემლისა ღვარი!  
დაკარ, დაკარ ბიროტ სულს, ცოდვით ვალღებულსა,

სანამ ძმობა-სიყვარულს ეპოვებთ გამარჯვებულსა!  
დაჰქარ. დაჰქარ! დაეცეს სიმართლისა მტარვალი!  
შემდეგ ძირს საზარელი სისხლი, ომი და ხმალი!  
დაჰქარ. დაჰქარ! დალეწე ტანჯვის ციხე-ბორჯილი,  
მკედრებით აღსდგეს მწუხარე მონა, წელში მოხრილი!  
დაჰქარ, დაჰქარ სიკვდილსა, რომ სიციოცხლე იწამოს,  
სიყვარულის ნათელი მოეფინოს მიდამოს!  
რომ დამყარდეს სიმართლე, შრომის შეება-უფლება.  
დაჰქარ, დაჰქარ! ნეტარი ეპოვით თავისუფლება!

მარტო ბრძოლის მგოსანი არ არის ჩხიკვაძე. ის ამავე დროს  
სევდის მგოსანიც არის, ნაღველი და ბრძოლის ცეცხლი ერთაჲ არის  
შეზავებული იმის პოეზიაში:

მე მიცნობდა მხოლოდ ერთი: ჰმუნვა და დარდი,  
ჰმუნვა იყო ჩემი მოძმე, ოა და ვარდი.

მიაი კენესა გულსა, 'ჟულიერი ტანჯვა თავისი სიყრმიტა და  
წარმტაცი სინაზით ბევრგან გვაგონებს ბარათაშვილის მარტოობასა  
და სულის ობლობას.

უკანასკნელ ლექსებში პირდაპირ გასაოცარია პოეტის წინათ-  
გრძნობა სიკვდილსა: ის დარწმუნებულია, რომ მისი ბოლო ახლოს  
არის, სიკვდილს ნათლად ხედავს და ხელითაც ეხება:

მე სიკვდილს ველი. ჩემს გარშემო ეამი ბნელდება.  
საფლავის კართან ჩრდილთა ღმერთის ვუციდი ბრძანებას.

ნოე ჩხიკვაძის სევდას ერთი რამ ახასიათებს: პოეტი მეტისმე-  
ტად გულწრფელი და ბუნებრივია.

მისი სევდა, ამავე დროს, არ არის შედეგი უიმედობისა, სასოწარ-  
კვეთილებისა და გულგატეხილობისა. რწმენა და იმედი წინ მიუ-  
ძღვის მას. ის დარწმუნებულია, რომ ცხოვრება წინ მიდის, სიმართ-  
ლე და სამართლიანობა გაიმარჯვებს:

ბოროტებისა ბოლო მაინც აღსასრულია.

ასეთის რწმენით განმტკიცებული მოუწოდებს შრომის შვილებს  
იმედიანის ყიყინით:

შორს მონის ხუნდი გაბედულად ასწიე ქელი  
და გამოსჰედე, დაჩაგრულო, შენ შენი ბედი!

ასეთია საერთოდ მუშათა კლასის ყოველი მგოსანი, იმიტომ  
რომ თვითონ მუშა ხალხია ამგვარი.

ნოე ჩხიკვაძის პოეზია გამონატვავა მუშათა კლასის სულისა.

პოეტის სიმღერაში არის სევდის კილო, მაგრამ აქ არ არის სა-  
სოწარკვეთილება განწირულისა.

ასეთია ბუნება თვით მუშათა კლასისა: მან იცის სევდა, მაგრამ  
ფარ-ხმალის დაყრა კი არასოდეს; სევდაში ის მხოლოდ სულს იკა-  
ვებს და ახალ ძალას, ხალისს კპოვებს ახალი ბრძოლისათვის.

ნოე ჩხიკვაძის სევდის სათავე არის პირადი ცხოვრება:

ღუბჯირ ბედმა სიჰაბუე არ გამივარდა.

პირად სევდას აღრმავებს და აძლიერებს საზოგადოებრივი,  
ცხოვრების სიმანინჯითა და უსამართლობით გამოწვეული.

რადგანაც ცხოვრების უსამართლობის ბრჭყალებში მუშა ხალ-  
ხი იტანჯება, ამიტომაც პოეტის სევდა კლასობრივია იმდენად, რამ-  
დენადაც ის მუშა ხალხის ბედს დასტრიალებს თავს და იმის განთა-  
ვისუფლებას უგალობს.

სევდა სჩვევია ყოველ კლასს — პროლეტარიატსაც, ბურჟუა-  
ზიასაც. პოეტის სევდის გულში ჩახედვა ჩვენ ამავე დროს გვიჩვე-  
ნებს, თუ ვინ ზის ამ გულში. ნოე ჩხიკვაძის გულში მუშათა კლასია  
და პოეტიც მუდამ დარჩება ამ კლასის საყვარელ მგონსად. დაჩა-  
გრულთა ტკბილ მომღერალს, ამაყს, გატაცებულს, გაუტეხელს. ადა-  
მიანის სიყვარულით აღსავსეს, საუკეთესო იდეალებისათვის მებრ-  
ძოლს არ დასცალდა ამოეწურა თავისი უნაზესი გრძნობებით საესე  
გული.

დიდება იმას, ვინც დაიწვა ნათლის ძიებით! —

ნათელს ეძებდა პოეტი, ნათლისაყენ უხმობდა ყველას — ქება და  
დიდება მას.

სიტყვაკაზმული მწერლობა ხელოვნების ნაწილია და ხელოვნე-  
ბის დანაკლისი ამავე დროს დანაკლისია მწერლობისაც.

ჩვენმა ხელოვნებამ გასული წლის ბოლოს დაჰკარგა დიდი გან-  
ძი — მსახიობი ლადო მესხიშვილი.

მსახიობი სასცენო ხელოვნების მსახურია, მაგრამ დიდი კავში-  
რი აქვს სწორედ სიტყვაკაზმულ მწერლობასთან. რადგანაც მწერ-  
ლობის აზრსა და იდეალებს ხორცს ასხამს, სულს უდგამს და ანსა-  
სიერებს, თვალსაჩინოდ ხდის მაყურებლისათვის; ამ მხრივ ლადო  
მესხიშვილი დიდი ჯადოსანი იყო და ღირსეული ქურუმი სასცენო  
ხელოვნებისა.

დიდი მსახიობისათვის ყველაფერი უხვად ჰქონდა მას მომად-  
ლებული ბუნებისაგან: იშვიათი გარეგნობა, მოქნილი სახე, მატყვე-  
ვებელი თვალები და მეტად მუსიკალური ხმა, რაც ბოლო ხანებში

ყელს ავადმყოფობამ დაჩრდილა, და დიდი ნიჭი პირველხარისხოვანი მსახიობისა.

ყოველივე ეს მსახიობმა მოიტანა ჩვენი თეატრის სამსხვერპლოზე. დასწვა სრულიად და თვითონაც დაიწვა, დაიფერფლა. არავის არ ეხერხებოდა მაყურებლის სულსა და გულში ისე ღრმად, მძლავრად ჩაწვდომა, როგორც ლადო მესხიშვილს და არავის არ აუტოკებია ჩვენი ახალგაზრდობის გული და ოცნება, არავის არ მიუტია მისთვის ისეთი სანეტარო განცდა, როგორც ამ მსახიობს.

ნამდვილი ჯადოსანი იყო, რომელიც სულიერი ნეტარების წყაროს აპყურებდა ყველას.

ამავე დროს ის იყო ღირსეული მოქალაქე და ქეშმარიტი დემოკრატი.

ხელოვნების დროშა თუ მადლა ეჭირა, არა ნაკლების გატაცებით ემსახურებოდა საჭიროების დროს რევოლუციის დროშას...

1905 წელში ქუთაისის სცენა მან გადააქცია სარევოლუციო ტრიბუნად და მისმა სარევოლუციო პიესებმა მთელი ქარიშხალი დაატრიალეს მაშინდელ ახალგაზრდობასა და დემოკრატიაში.

მისი გზა ეკლითა და ვარდებით იყო მოფენილი. ეკალს ვარდი სქარბობდა და ეს თაყვანისცემა მან ღირსეულად დაიმსახურა.

გასულ წელს გამოვიდა ლექსთა კრებული გ. ქუჩიშვილისა, „ბაღდაძინი“ კოლაუ ნადირაძისა, „დაბინდული ქარვეზი“ რაქდენ გვეტაძისა, „მინანქრები“ შალვა ამირეჯიბისა, რაულ გოგოხიას „ზამთრის ჩუქურთმა“, ერთაწმინდელის ლექსები.

ერთი წლისათვის ეს საკმაოდ მოზრდილი ტვირთია და ჩვენი პოეზია ნაყოფიერი გამოდგა.

გ. ქუჩიშვილი უკვე სახეგარკვეული მგოსანია და თავისი ნიჭის თვისებით უახლოვდება ნოე ჩხიკვაძეს.

ქუჩიშვილი პირადი განცდის პოეტია და მისი შემოქმედება გრძნობაზე არის აგებული. ეს ღირსებაა, მაგრამ ცალმხრივი.

ერთ ლექსში („ჩემი ვედრება“) ვაჟა-ფშაველას შემდეგი საგულისხმო სტრიქონები აქვს:

გულს დარდი გამიღიადე  
იმ სანეტარო საგანზე;  
დაწერე ფიქრი ღრმა, მწვავე  
ჩემი გონების საბანზე,  
გონებას ფიქრი სტანჯავდეს,  
გულს ცეცხლი სწვავდეს ძლიერი.  
მშვიდ-მწყუროდეს კეთილი,  
ვერ გავძლე, მოვკვდე მშვიერი.

აქ მოკლედ და მკაფიოდ მთელი დახასიათება ნამდვილი პოეზიისა: გულს ძლიერი ცეცხლი უნდა სწვავდეს, გონებას ღრმა და მწვავე ფიქრი უნდა სტანჯავდეს, — მაშინ არის სრული პოეზია.

ქუჩიშვილის პოეზიაში პოეტური ცეცხლი საკმაოდ ძლიერია. მწვავე ფიქრიც არის შიგ, მაგრამ ამ ფიქრს სიღრმე და სიძლიერე აკლია.

ეს ნაკლია, დიდი ნაკლი, მაგრამ ქუჩიშვილის ბრალი არ არის.

ქუჩიშვილი მუშათა კლასის მგოსანია, ნიჭით, გრძნობით, პოეტური ხაზით დაჯილდოვებული, ბრძოლის საყვირი, ჭეჭა-ქუხილით წინ მიუძღვის მშრომელ ხალხს, მაგრამ მისი სიმღერა მეტად მარტივია, თუმცა გრძნობებით სავსე.

პოეტს მარტო გრძნობათა ძაფები კი არ უნდა ეპყრას ხელთ, არამედ გონების ლამპარი.

დღეს განსაკუთრებით სავალდებულოა ეს მუშათა კლასის პოეტისათვის. მუშა ხალხი თანდათან იპყრობს პოლიტიკურ ასპარეზს და აქ მარტო ბრძოლა აღარა კმარა, საჭიროა წინდახედულ, გონივრულ ბრძოლასთან ერთად შემოქმედება. მეტად დიდი, ძნელი და საპასუხო შემოქმედება.

ამ საქმეში მარტო გრძნობა, ათასი ნაზი და წარმტაცი იყოს ის. შორს ვერ წაგვიყვანს. საჭიროა გონების სისრულე და აზრის სიღრმე.

მუშათა კლასი მარტო ფიზიკური ძალა არ არის, ის უნდა იყოს ამავე დროს დიდი ზნეობრივი და გონებრივი ძალა.

უანისოდ მისი გამარჯვება უნაყოფო იქნება და შეიძლება სასტიკი დამარცხებითაც დამთავრდეს ბევრჯერ.

ქუჩიშვილი უმთავრესად ლირიკოსია. მისი პოეზია გრძნობათა კრიალოსანია. სევდის ხმები ზშირად გაისმის პოეტის სიმღერაში. მაგრამ მისი სევდა მუშური სევდაა. ბრძოლის ცეცხლითა და იმედით სავსე.

ქუჩიშვილში საკმაოდ განვითარებულია ბუნების გრძნობა. პოეტი ბუნების შვილია და მან იცის ბუნების სილამაზის გამოცნობა და ბუნების სიმშვენიერით დათრობა.

ნიჭის ამ თვისებით პოეტი უახლოვდება ვარლამ რუხაძეს და ბუნების დიდ მესაიდუმლეს ვაჟა-ფშაველას.

ფიქრი და სიყვარული პოეტისა შრომის შვილებისავენ არის.

ქუჩიშვილის ლექსი მდიდარია თავისებური მუსიკით; იმას მღერა უფრო შეეფერება, ვიდრე კითხვა.

მე ზარი ვარ მოგუგუნე,  
მოწოდების ზარი,



ასე ახასიათებს თავის პოეზიას თვით პოეტი.

შრომის შვილთა ჯარის სმენას მართლაც დაატკბობს მისი ახალი კრებული.

კოლაუ ნადირაძე და რაჟდენ გვეტაძე ერთი მიმართულების, ერთი სკოლის პოეტები არიან; ამიტომ მათ ბევრი რამ აქვთ ერთმანეთში საერთო: ერთგვარი ხასიათი წერისა, რიტმი, რითმა, შეხედულება და ხშირად შინაარსიც.

სიცხადის ნაცვლად — ბუნდოვანობა; სინამდვილის ალაგას — ქამერები; სილამაზის ალაგას — სიმახინჯე; ჯანსაღობის ნაცვლად — სნეულება; სიცოცხლის სიყვარულის ნაცვლად — სიცოცხლის სიძულვილი და უარყოფა; საღი ადამიანების ნაცვლად — შეშლილები, თავის მკვლელები.

ამგვარია ესთეტიკა სიმბოლისტებისა, ასეთია კოლაუ ნადირაძეც.

მატყუარაა სამყაროს სახე, — აცხადებს პოეტი ერთ ლექსში.

ამიტომ უნდა უარვეყოთ სამყარო მთელი მისი სინამდვილით და ვეძიოთ მხოლოდ ფარული, იდუმალი; ასე მსჯელობს პოეტი:

იწამე ყოფნა ჩვენი ლანდურა.

სიცოცხლე უნიჰო პიესაა, — სწერს ის ერთგან, — მაგრამ ისეა მოწყობილი, რომ არსაიდან გამოსავალი გზა არ არის:

არ არის სხვა გზა, არ არის არსად;  
ეს მასკარადი შოეწყო ისთე!  
დაფერფლე სული და ეცვი ჯვარსა,  
ვით ავაზაკი და როგორც ქრისტე.

ამ უილაჯო სასოწარკვეთილების რკალიდან ადამიანი რომ შეშლილებსა და თავის მკვლელებს შესტრფოდეს, ბუნებრივია.

პოეტი ძლიერია, როდესაც თავის ჩვეულებას პლატატობს და გულიდან ამოხეთქილ ნაკადულს წრფელი გრძნობისას ბუნებრივ გამოსავალს აძლევს.

მაშინ სულიერი განწყობილებაც პოეტისა სხვანაირია: თუ სხვა დროს მას სიცოცხლე სძაგს, მზად არის თავის თავს სილა გააბრტყას და ღმერთს ევედრება:

ო. ღმერთო ჩემო, დაასრულე ჩემი წამება.  
და დააჩქარე ეს დღეები და ეს წამებოი —

ასეთ იშვიათ წუთებში პოეტი დამშვიდებულია და სულით ბედნიერი.

მე ვგრძნობ სიცოცხლეს, სისუფთავეს მივარდნილ ქვაშიც.

ღმერთო ძლიერო, მე შენთან ვარ, მე ყველა მიყვარს!

როდესაც პოეტი ბუნებრივ სახეს უბრუნდება, მაშინ ის გვაძლევს წრფელსა და ძლიერ განცდას, რაც მხოლოდ ჭეშმარიტი პოეტის თვისებაა.

ლექსი ცოცხალი არსებაა: ისახება, იბადება, იზრდება, ცოცხლობს და კვდება, თუ ჩვეულებრივია, ხოლო უკვდავია, როგორც გენიოსი, თუ არაჩვეულებრივია.

ლექსს სხეულიც აქვს, ტანისამოსიც. მისი სხეული — აზრია; მისი ტანისამოსი — გარეგანი მოკაზმულობა, ფორმა.

შიშველი ლექსი მკვდარია; უსახელო ლექსიც ცარიელი ტანისამოსია.

ცხადია, ლექსს უნდა ჰქონდეს როგორც სხეული, ისე 'სამოსიც; ორივე აუცილებელია და სავალდებულო ლექსისათვის.

შემცდარია, ვინც მარტო სხეულს აქცევს მთავარ ყურადღებას; შემცდარია არა ნაკლებად ისიც, ვინც მარტო ტანისამოსს აქცევს მთელ თავის ყურადღებას.

ლექსში ზოგი მარტო აზრს აფასებს, — შეცდომაა: ძონძებსა და ჭდანებში გამოწყობილ ლექსს ვერავითარი აზრი ვერ გაამართლებს.

ზოგი მხოლოდ ტანისამოსს სინჯავს, — ესეც შემცდარია: ვერავითარი ლამაზი სამკაული უაზრობას ვერ გაამართლებს.

ახლო წარსულში ჩვენს პოეზიას ჰქონდა დიდი ნაკლი: გარეგნობას, ტანისამოსს ნაკლებ ყურადღებას აქცევდა.

ახლაგაზრდა პოეტებმა მიაქციეს ამ გარემოებას დიდი ყურადღება და ლექსის გალამაზებას შეუდგნენ. ამ გზაზე დიდი ნაყოფი მოგვეცეს გრიშაშვილმა, აბაშელმა, სხვებმაც.

მაგრამ ყველაზე უფრო მტკიცედ, მხნედ და გარკვეულად დადგნენ ამ გზაზე სიმბოლისტები.

მათი ძიება ლექსის ფორმის სფეროში, თავისებური ელფერის შეტანა რიტმში, მეტრში, რითმაში, სიტყვების დახვეწა და სხვ. ზოგჯერ ახირებულია თავისი უჩვეულობით, მაგრამ საჭირო და აუცილებელი.

ასეთ ძიებას ყოველთვის თან ახლავს შეცდომები, გადაჭარბებაც, მაგრამ ყოველივე ეს ბუნებრივია.

ასეთი გზა აუცილებელია, მაგრამ თავდაპერილობა და ზომიერება არის საჭირო. სიმბოლისტებს სწორედ ეს აკლიათ და ხშირად მეორე უკიდურესობაში ვარდებიან: ივიწყებენ ლექსის სხეულს და

მთელ თავის ყურადღებას სამკაულს აქცევენ, კარგი რითმისათვის მზად არიან აზრი გასწირონ.

ეს ნაკლი თან დასდევს ყოველ მათგანს; თან დასდევს კოლაუ ნადირაძესაც.

აიღეთ შემდეგი ტაქტი:

ჩვენი თვალები იმ ბეჭედში შეხვდნენ მგზავრებად.

ო. სინამდვილე სანატრელი სპარსულ ნოხების!

მრავალი მთვარე ამყობდა აქ ღვდელმთავრებად,  
თითქოს შეშურდათ მათ წარსული დიადოხების.

სამკაული კარგია, მაგრამ სხეული არ არის, — ლამაზი უაზრობაა. ეეკვობ, რომ აქედან მკითხველმა რამე გაიგოს.

ალაგ-ალაგ ლექსის მუსიკა მოშლილია, რიტმი დარღვეული. ბალებში — ოთახებში, ჭალებს — მწვერვალებს და სხვა ამგვარი რითმები მიუღებელია.

მიუხედავად ამისა, ნადირაძის პოეზიის სამკაული, ფორმა საკმაოდ დამუშავებულია, დახვეწილი და მოხდენილი.

რაჟდენ გვეტაძე გამოვიდა „დაბინდული ქარეზებით“.

პოეტი სიმბოლისტთა ძმობას ეკუთვნის, მაგრამ ამ მიმართულების ბევრ თვისებას მოკლებულია.

სიმბოლისტები საერთოდ უარყოფენ ძველსა და ახალ პოეზიას, შოთას, ბესიკსა და საკუთარ თავს გარდა არავინა სწამთ.

ბოლო დროს ცდილობენ ძველ პოეზიასთან შერიგებას. მაგალითად, გაფრინდაშვილი ღირსეულად აფასებს გურამიშვილს.

შემდეგში რას იზამს რაჟდენ გვეტაძე: არ ვიცი, ხოლო თავის პირველ კრებულში ის ძველ პოეზიასაც ენათესავება. ახალსაც, სიმბოლისტებსაც.

მისი „სულამიტ“, „უსათაურო“ ატარებს ნიშანს გრიშაშვილის გავლენისას.

ალაგ-ალაგ ბუნდოვნად წერა, რითმის გულისათვის აზრის განწირვა გვეტაძესაც სჩვევია. მაგრამ საერთოდ მისი დედააზრი ნათელია. მისი წერის ხასიათი რეალიზმზეა დამყარებული.

ზოგან მისი რეალიზმი გადაჭარბებულიც არის, როგორც, მაგალითად. „ჯარისკაცი და მოსამსახურე გოგო“.

პოეტს უყვარს სინამდვილე, სიცხადე, ბუნება და თავისი განცდისათვის ეძებს ახალ სამკაულებს. ამიტომ რაჟდენ გვეტაძე ერთგვარი შემრიგებელია, შემაერთებელი ხილია ძველი და ახალი პოეზიისა.

ამ მხრივ ის საინტერესოა და უხვი, თუ არ გადაუხვია.

ახლო მომავალი დაგვიანებებს, საითკენ წავა პოეტის ნიჭის განვითარება.

მისი სიმღერის საგანი მრავალფეროვანია, უმთავრესი ძარღვი კი პირადი განცდაა.

განცდათა შუაგულში პოეტის პიროვნებაა. საკუთარი სევდის სინღერაში ალაგ-ალაგ ნევრასტენია ხმაურობს.

ზოგიერთი მისი სურათი, როგორც „ღამე სოფელში“ ან „მარტობა შემოდგომის წვიმიან ღამეში“ („საქართველოში“ დაიბეჭდა) საუცხოოა თავისი შესრულებით.

ალაგ-ალაგ პოეტს აქვს ნაძალადევი რითმები, როგორც „მერცხლებს“ — „ვერცხლებს“, მაგრამ ფორმა საერთოდ საკმაოდ დასრულებულია და შინაარსიც — ზოგიერთი ახირებულობისა და გადაჭარბებული ნატურალიზმის გარდა — მისაღები.

შალვა ამირეჯიბის სიმბოლისტები თავისი წრის პოეტად სთვლიან. „მინანქრებში“ ძალიან ცოტაა ამის დამამტკიცებელი საბუთი.

ზოგიერთი ლექსი, როგორც თუნდაც „მასკარადი“, თავისი ფორმით მოგვაგონებს სიმბოლისტურს, ხოლო საერთოდ „სხვაგან ჰქონს მისი გონება“.

რაჟდენ გვეტაძეს ერთ თავის ლექსში აქვს შემდეგი სტრიქონი:

მგზავრის სამოსზე წელს მიმშვენებს ძველი ქაპარი.

ეს სიტყვები უფრო ამირეჯიბს შეეფერება.

იმის ლექსებში ძველი პოეზიის სურნელებას ჰყნოსავს მკითხველი.

მაჰარი ენის შეხებისთანავე გატკობთ. სულ სხვაა ძველის-ძველი ღვინო: უნდა რამდენჯერმე გასინჯოთ, კარგად დაწუწნოთ, ძარღვებში გაგიჯღეთ, მხოლოდ მაშინ დააფასებთ და იგრძნობთ სიამეს.

სწორედ ასეთია „მინანქრები“. პირველი გადაკითხვით არ ახდენს შთაბეჭდილებას: აქ არ არის მყვირალა სიტყვები, გაბერილი გრძობა, აზრის წვალეობა. ყალბი ხმაურობა და მოჩვენებანი შთაბეჭდილების შესაქმნელად.

სიდარბაისლე. თავდაპერილობა, ზრდილობა თან ახლავს შალვა ამირეჯიბის პოეზიას.

ის პატარა ზომისაა, მაგრამ რაც არის, ეულია, ხალასი. წმინდა.

მთელ პოეზიას წარსულის ნაზი აჩრდილი დასტრიალებს. პოეტს განსაკუთრებით უყვარს წარსული. ამ სიყვარულში ძველი, გარდა-

სული წოდების სულია. ამას იმიტომ კი არ ვამბობ, რომ ვუკიეინო პოეტს. — მე მხოლოდ ახსნა მინდა მისი შემოქმედების ზოგიერთი თვისებისა.

როგორც ყოველთვის, ეხლაც ისე ვიმოკლებ დღესაც  
ვიგონებ წარსულ ცხოვრებასა — განვლილს ოცნებით. —

წარსულის მოგონება ტკბილი სევდის ზეწარშია გახვეული. ალბათ იმიტომ, რომ ჩვენი წარსულის ბევრი მხარე სევდათა ამშლელია, თორემ ამირეჯიბი სევდის მგოსანი არ არის, არც ცხოვრებისა და მისი სინამდვილის უარყოფელი:

რა რიგ მახარებს მე ეს ქვეყანა,  
ცა, მზის ამოსვლა, მის დასავალი.

პოეტი მართლაც სიხარულის მომღერალია.

ხასიათი მისი წერისა, სტილი, რიტმი, მუსიკა, მეტრი უფრო ძველი მწერლობისაა.

ამ მხრივ ყველაზე მეტი გავლენა ბარათაშვილისაა; ზოგიერთ ძველ სიტყვასა და გამოთქმას ბარათაშვილისას ხმარობს. ალაგ-ალაგ პოეტს ემჩნევა ლექსის ძვირობა, მაგრამ საერთოდ აზრი და ფორმა საკმაოდ შეხამებული და შეწყობილია.

მეტად ნაყოფიერი იყო გასულ წელს ობოლი მუშა.

ქართველ პოეტს ერთი ნაკლი აქვს: მას ზრდა არ ეტყობა.

თითქოს მისი ოცნება პირველი გაფურჩქვნისთანავე გამოაც-ლის ნიჭს მთელ შემოქმედებას და იმიტომ პოეტის პირველი ნაბი-ჯება უფრო უშეიანია, ვიდრე შემდეგი.

იშვიათ გამონაკლისს წარმოადგენს ობოლი მუშა. დიდი ხანი არ არის, რაც ის სამწერლო ასპარეზზე გამოვიდა, პირველი მისი კრე-ბული ჩემი წინასიტყვაობით დაიბეჭდა; მას შემდეგ ეს ახალგაზრდა მგოსანი თანდათან იზრდება და სრულდება. მისი სული მუდამ ძიე-ბაშია და ამ გზაზე მისი გრძნობა თანდათან ღრმავდება, აზრი ვითარ-დება და მადლდება. ობოლი მუშა უხვად არის დაჯილდოვებული პოეტური ცეცხლით. მოუსვენარი სული, მეტად ნაზი გრძნობა და მაღალი აზრი — აი ობოლი მუშა. თუ პირველი ნაბიჯები პოეტისა ერთფეროვანი იყო და მნატვრულ სახეებსა და განცდას გალექსილი მსჯელობა სჭარბობდა, დღეს მისი შემოქმედება მდიდარია, მრავალ-ფეროვანი შინაარსით და საკმაოდ გაშალაშინებული ფორმით... რო-გორც შინაარსით, ისე ფორმით პოეტმა მოკლე დროში დიდი ნაბი-ჯი გადადგა წინ, რაც შედეგია მართო ნიჭის კი არა, არამედ შრო-

მის. პოეტში დიდი შესაძლებლობაა, მისი შემოქმედება ახლა იწყებს ფრთების გაშლას, ახლა ემზადება სრული ფრენისათვის, —

ლამაზ ოცნების ყვავილებით შემოქარგული.

თავისი მსოფლმხედველობით პოეტი მუშათა კლასს ეკუთვნის, მუშების მგოსანია: მისი ფიქრი და გრძნობა მუშა ხალხის ბედის მახიებელია, ამ ბედისათვის მებრძოლი, მაგრამ მისი ოცნება არ არის მოქცეული მარტო დღიური საკითხების ფარგლებში. პირიქით, მას უფრო მსოფლიო საკითხები იზიდავს:

მარადისობის სხივთა ელვით გავიმსკვალე.

მისი „ორი სარკე“ თავისი რაობით ფილოსოფიურია და მდიდარია შინაარსით.

არის ძიება უფსკრულთა შორის  
წმინდა მიზნისკენ მიმავალ გზების, —

და პოეტი შეპყრობილია ამ ძიებით. ძიების გზაზე ბევრი ამოუცნობი საკითხი შეხვდა პოეტს და ეს იწვევს იძიან ნათესაობას დანების პრინციტან:

გაორებულ სულის კვნესით რისთვის ვმღელვარებ?

სულის გაორებას თან სდევს სევდა, რაც საკმაოდ ახასიათებს პოეტის შემოქმედებას. მისი გული ტანჯვის ქსელშია გახვეული და აქედან იწყება მეტად ნაზ და სათუთ გრძნობათა მშვენიერი ნაკადული.

მისი სევდის ბარათი საუცხოოდ არის გადაშლილი „სამ ლექსში“, მაგრამ ისეთი გულწრფელი, ღრმა და უნაზესი სევდით სავსე განცდა, როგორსაც პოეტი იძლევა „უპასუხო ალერსში“, იშვიათია; ლუკმა-ლუკმად დაჭრილი გული ცრემლშია ამოვლებული და სათუთი გრძნობის ძაფზე ასხმული. არც ერთი ყალბი სიტყვა, არც ერთი ყალბი ამონაკენესი. უდიდესი მიღწევაა გამოუთქმელი სევდის ჩამოსხმა უბრალო, ჩვეულებრივ სიტყვებში. აქ მთელი ცხოვრებაა, მთელი ტრალედია ადამიანისა.

ობოლი მუშის სევდა მუშური გულის კვნესაა; რაც უფრო ღრმა არის ის, მით უფრო ძლიერია რწმენა და იმედი ძლევისა და გამარჯვებისა.

სევდის ფურცელი მას კი არ უხშობს ოცნების კარს, პირიქით, უფრო უღებს და იმედგაცხოველებული და სახეგაბრწყინებელი მისწრაფვის წინ.

პოეტის ლექსი საკმაოდ მუსიკალურია და შინაარსი და გარეგნობა შეთანხმებული მიდიან სრული გამარჯვებისაკენ.

გასულ წელს ჩვენს ეურნალ-გაზეთებში იბეჭდებოდა ხარიტონ ვარდოშვილის ლექსები.

პოეტი ახალგაზრდაა და ამიტომ მისი სული, მისი აზროვნება ქაოსიდან ახლა იბადება და ცდილობს გარკვევას.

იქვიანი, მოუსვენარი ფიქრი და მტანჯველი სევდა — აი მთელი შინაარსი ვარდოშვილის პოეზიისა:

არც სიხარული, არც ვარდებია  
ჩემს ბაღში ეხლა ლამაზ ფერებით.

პოეტი ებრძვის საკუთარ ბედს, მაგრამ გამარჯვება არა სწამს, სიმტკიცე და იმედი დაჰლუპვია:

გადამეტერა ქარიშხალები,  
ფიქრებმა შავათ იწყეს შეფერვა.

ბრძოლას ერთგვარი აზრიც ეკარგება, რადგან პოეტი წინდაწინვეა დარწმუნებული, რომ

დახშული არის ბედის კარები  
და სავლელ გზებზე ღმუის გრიგალი.

შინაგანი ხმა ეუბნება პოეტს:

შენ ღამეები მოგიპარავენ  
და გაწამებენ კუდიანები.

ხანდახან მგოსნის სევდიან გულში იმედის სხივი ჩაესვენება და პოეტს სული გაუბრწყინდება:

ელვიან ცეცხლის ხარ მადევარი.

ასეთ წუთებში პოეტი შორს მიჰყავს ოცნებას, სტოვებს ძველ გზას, ჯოჯოხეთის შავი სანთლებით მოფენილს, და ეძებს ახალს, სპეტაკს, ბრწყინვალეს:

აინთე გრძნეულ იღუმალებით  
და დაიცალე მზიურ ჰანგებად.

მაგრამ წუთიერი გატაცება და იმედის გაელვარება გაივლის და პოეტის სულსა და გულს ისევ სევდა დაეპატრონება.

სევდის, უიმედობისა და იქვიანობის ნიადაგზე იშლება ერთგვარი შიში:

მაგრამ შემოვა იქვთა გროვა ჩემს სულში ბნელი  
და გამოუცნობ შავი შიშის ბინდით დამბურავს.

პირადი სევდის თვალსაზრისით უცქერის პოეტი საზოგადო ცხოვრებას.

ქვეყანა ცოდვით არის შემოქარგული, ძმობა და სიყვარული არ არსებობს, საწუთრო დაწყველილია და ცხოვრება არ ღირს არაფრად, — აი პოეტის შეხედულება.

მკითხველი ადვილად მიხვდება, რომ ვარდოშვილს ბევრი რაჲ აქვს საერთო სიმბოლისტებთან: საერთო მოტივები, საერთო კილო, საერთო სულიერი განწყობილება და საერთო ფორმა.

მაგრამ ეს მსგავსება არის მხოლოდ დროებითი ნაყოფი სიმბოლისტების ძლიერი გავლენისა. ამ გავლენიდან ფორმა სიმბოლისტებისა სამუდამოდ შერჩება ვარდოშვილის პოეზიას, შინაარსი კი არა. იმიტომ რომ სიმბოლისტების სევდასა და გამოუცნობ შიშში სოციალური მოვლენა, მთელი კლასი იხატება, ვარდოშვილის სევდასა და გამოუცნობ შიშში კი მხოლოდ და მხოლოდ ყრმობის დუდილიან ჩვეულებრივი, ბუნებრივი და წარმავალი სულისკვეთებაა. ამას ცხადად ამტკიცებს ის წინააღმდეგობა, რომლითაც მდიდარია ვარდოშვილის პოეზია. ასეთი წინააღმდეგობანი ყრმობის სულიერი ძიების დამახასიათებელია.

ერთ წამს პოეტი სასოწარკვეთილებით არის შეპყრობილი:

სახრჩობელები შენთვის მზად არი  
და გელოდება კორიანტელი.

მეორე წამს გრძნობს, რომ ელვაზე ჩამონათალ ცეცხლს ატარებს გულში და იმედით სავსე ჰგალობს:

ელვიან ცეცხლის ხარ მადევიარი,  
გიყვარს ვულკანის დიდი ანთება.

და ღრუბლებისაკენ მიისწრაფვის, რომ იქ დააბინაოს თავისი ოცნება:

ჩემი ოცნება დავაბინავე  
მაღალ ღრუბლებში, ვით ღმერთის ნება.

ასეთ წინააღმდეგობას სულიერი განწყობილებისას პატარა მანძილზე საზოგადოებრივი სარჩულით ვერ ახსნით, მას აქვს:—თუ გნებავთ — ფიზიოლოგიური სარჩული: ყრმის სხეული სრულდება, მწიფდება, გულში უცნობი გრძნობანი იშლებიან, ფიქრი თავს აიწყვეტს და გაურკვეველ ძიებაშია.

ასეთი ყრმობის ხანაში მყოფი სული პოეტისა არ კმაყოფილდება ძველი შინაარსითა და ფორმით, ის ახალს, უცნობს ეძებს და ამ გზაზე ხვდება სიმბოლისტურ პოეზიას.



გავლენა და ერთგვარი გაბრუება, დამორჩილება აუცილებელია.

ხარიტონ ვარდოშვილს ცხოველი ნიჭი აქვს, ტემპერამენტი, მდიდარი გრძნობა, აღმაფრენა, ხოლო ეს ნიჭი ჯერ დუდილშია და გარკვეული სახე ვერ მიუღია. მას ჯერ დიდი შრომა სჭირდება.

ქართულ ნიჭს ხშირად აქვს ერთი ნაკლი: „მე ვარ და ჩემი ნაბადი“...

რაკი ახალგაზრდას ნიჭი აღმოაჩნდებოდა, ყოველივეზე გულის უცრუედებოდა, ნიჭიც მეყოფათ. წამოახტებოდა ცარიელ ნიჭს და იმდენს ახრიგინებდა, რომ სულ მოკლე დროში გააძვალტყავებდა.

თავადიშვილს სწავლა რად უნდაო, — ჰფიქრობდა ძველად თავადიშვილი, — ყმა და შამულიც ეყოფათ.

პოეტს სწავლა რად უნდა, ნიჭით გზას გაიკვლევსო, — ჰფიქრობს ჩვენში ზოგიერთი ნიჭით აღბეჭდილი ახალგაზრდა.

მარტო ნიჭი, რაც უნდა ძლიერი იყოს. დაბმული ლომია.

ყოველი პოეტისათვის წასაბაძი მაგალითი უნდა იყოს დიდი გოეთე: დიდ ნიჭთან ერთად მას ჰქონდა დიდი ცოდნა, დიდის შრომით შეძენილი. თავისი ცოდნის წყალობით მეცნიერებაშიაც კი დასტოვა კვალი.

„ფაუსტი“ იმდენად ძლიერია შინაარსით და ღრმა და მდიდარია აზრით, რომ ვერავითარი ნიჭი ვერ შესძლებდა იმის დაწერას, თუ არ იქნებოდა შეიარაღებული დიდი ცოდნითა და განვითარებით. მუხამბაზური ხანა, როდესაც პოეტისათვის მარტო გრძნობა იყო საჭირო, სამუდამოდ წავიდა და აღარ დაბრუნდება. დღეს პოეტისათვის საჭიროა დიდი ცოდნა, ყოველმხრივი განვითარება.

ეს კარგად უნდა ახსოვდეთ ახალგაზრდა მგოსნებს.

დინჯი, აზრიანი მგოსანია იასამანი, მაგრამ ძუნწია. გასულ წელს ის შედარებით უხვი იყო და მისი ლექსები უმთავრესად „ცისარტყელაში“ იბეჭდებოდა.

წარსულის სიღარბისლე და თავდაპირილობა, აღმოსავლეთის მხურვალე ლოცვა და ჩუმი, აზრიანი სევდა შეერთებულია იასამნის პოეზიაში; მხატვრული ზომიერება, აუჩქარებლობა თან ახლავს მგოსანს. მას გრძნობათა სადავე ხელში უჭირავს და ყოველგვარ მოვლენაში აზრს ეძებს.

მგოსნის შემოქმედება მდიდარია შინაარსით და განყენებული აზრისა და ბუნების დასურათება მას ერთნაირი სილამაზით ეხერხება.

პოეტი შემოქმედება სევდის ნაზ ბურუსშია გახვეული. მისი სევდის სარჩული არც პირადულია, არც საზოგადოებრივი, არამედ

უფრო ფილოსოფიური, აზროვნების ამ თვისებით პოეტს აქვს მსგავსება ბარათაშვილთან, ამ მსოფლიო სევდის მგოსანთან.

ბარათაშვილის გულისთქმა ზეცას იქით „ეძიებს სადგურს, ზენაარსთ სამყოფს“, მას სწყურია მისწვდეს მთელი სამყაროს საიდუმლოებას. მაგრამ ფიქრი უძლურია, სიძნელე დაუძლეველი, ბჭენი მსოფლიო საიდუმლოებისა მაგრად ჩაკეტილი ადამიანის გონებისათვის.

აქედან იშლება ბარათაშვილის სევდა მიუწვდომლისა და აუხსნელის გამო.

სწორედ ამ გარდუვალ ბჭეთა გაღებას ცდილობს იასამნის მადიებელი სულიც, მაგრამ

ამ ჭყეყნის ტანჯვით მე ვერ მივსცემ ანგარიშს ბეჭითს,  
იღუმალია, მოკლებული კაცთა ცნობისა.

ამიტომ არის მშვიდი სევდით შეფერილი მგოსნის პოეზია.

ლექსი იასამნისა კარგად არის დამუშავებული და მუსიკა საუცხოოდ შეეფერება შინაარსს.

ამეტყველდა გასულ წელს აბაშელიც, ეს მზის მგოსანი.

როდესაც აბაშელს ერთხელ ეს სახელი ვუწოდე, ზოგმა არ მიიღო: პოეტი, რომლის სიმღერაშიც სევდის ჰანგები ისმის, მზის მგოსნად არ ჩაითვლებო.

სევდის გარეშე მყოფ მგოსანს ვუწოდებდი უფრო მზიურ მგოსანს. აბაშელმა მოგვცა საუცხოო, მეტად პოეტური სახე მზისა, უკვდავი, ყოვლად ძლიერი მზისა.

პოეტს უყვარს უძილო ღამე, სევდის წვეულება, მაგრამ ამავე დროს მზის თაყვანისმცემელია, მზის შუქთა აღტაცებული მომლოდინე, მზის ამოსვლას ისე შეჰზარის, როგორც ტოროლა, ვარდის კოკორი ან ცვარი.

ბუნების მოვლენათა ამეტყველება და გადმოცემა შესაფერისი ფერადებით ყველაზე ძლიერად აბაშელს ეხერხება.

აბაშელის შემოქმედებაში ორი ხანაა: პირველ ხანაში ის საზოგადოებრივი სევდით დანისლული და დიადი ბუნების ტრფობით ამღერებული მგოსანია, მეორეში კი — საკუთარი სულის მხატვარი.

უკანასკნელ დროს მისი შემოქმედება უფრო ამ სულიერი განცდის ხვეულებში ტრიალებს.

„ღამის სარკეში“ და „ღამის მხატვარში“ ძველი აბაშელია. აქ ის იძლევა დიდებულ სურათს ბინდისა და შეღამებისა, როდესაც

სალამოს ჩრდილში დაისვენებს ღღის მოჩვენება.

ხენი ცისაკენ ამართავენ ტოტებს მულარით;

ღამისა, როდესაც

ჩამქრალ მნათობის გაბრწყინდება ცაში ხსენებზე  
იისფერ ნისლში გათეთრდება კოშკი ღრუბლისა,

განთიადისა, როდესაც

ბროლის ქალაქს უცებ ცეცხლი წაეკიდება,

და გათენებისა, როდესაც

დაინგრევა წითელი წვიმით თეთრი მშვენება.

სულიერი განცდა პოეტისა სევდის ნაზ ფერებშია დაფერილი:

ერემლმა დაპტვირთა ჩემი სიტყვები  
დაუსრულებელ სიმწუხარეში.  
და დამრჩა მხოლოდ ძვირფასი ქვები  
მოგონებათა უცხო მხარეში.

გრძნობათა სინაზე, ღრმა სულიერი განცდა საუცხოოდ არის  
შეთავსებული „ტაძარში“, რომელიც შეუღარებელი სურათია თანა-  
მედროვე ინტელიგენტის გაორებული სულისა:

არა მწამს ღმერთი და მის სახლში რად მტკიცება?

აბაშელი ჭკვიანი, აზრიანი და გრძნობით მდიდარი პოეტია. მას  
ადვილად ეხერხება ჩვენი გულის უნაზეს გრძნობათა ტკბილად, სა-  
თუთად შეხება და სანეტარო განცდის სხივებში დამშვიდება ჩვე-  
ნი სევდისაგან დაფორაჩებული 'ჭულისა.

მუსიკა მისი ლექსისა ტკბილი და ალერსიანია, ფორმა დამთავ-  
რებული.

გასულ წელს ვარლამ რუხაძეს იმედის საყვირი ეპყრა ხელთ.

მისი პოეზია მუდამ ბრძოლისა და იმედის საყვირი იყო.

პოეტის შემოქმედება მეტად სალი და მტკიცეა. ამ მხრივ ის  
უტყუარი გამომხატველია მუშათა კლასის სულისკვეთებისა. ვარლამ  
რუხაძე ერთგვარი ფოკუსია, სადაც თავი მოუყრია მუშურ აზროვნე-  
ბას, ფიქრს, გრძნობას, სევდას, იმედს და სიმტკიცეს.

პოეტის ფიქრი მუშათა კლასის ფიქრია, მისი კენესა გულისა —  
მუშათა კლასის სევდაა, მისი გულის წყრომა — მუშათა კლასის  
კულის წყრომა; მისი ცეცხლი და იმედი — მუშათა კლასის ცეცხ-  
ლი და იმედი.

სევდის ალები მგოსანს სჩვევია, მაგრამ სევდა მას ვერ ერევა,  
ის თვითონ სძლევეს სევდას და ასეთი ბრძოლის შემდეგ —

მეც ახალ ძალით, ახალ რწმენით შევიმოსები.

პოეტი სიცოცხლის მოტრფიალეთა:

ჰადარა მავიწყდება, გრძნობა სჩქედს ნაკადებად.  
და ვიძახი: სიცოცხლე რა კარგია! რა კარგია!

იკვიანობა, შავი ფიქრები მგოსანსაც სჩვევია, მაგრამ სასო-  
წარკვეთილება, შიში, უიმედობის უღლის ქვეშ ქედის მოხრა და და-  
ღაბუნება რა არის, არ იცის:

მაგრამ გული კვლავ მღერის, სევდა არ ეკარება.

რატომ არ ეკარება? იმიტომ რომ პოეტის ბუნება მთლიანია  
და რწმენით გაკაყებული, როგორც ბუნება თვითონ მუშა ხალხისა.

პოეტის სიმღერაში ძველებური ბრძოლის კიჟინა ისმის:

მომეცით ცეცხლი მომეცით, ცეცხლი!  
მინდა დავბუგო ქვეყანა ძველი,  
გავაძამტვერო ოქრო და ვერცხლი,  
რომ არ ხარობდეს იულა გველი!

მგოსანმა იცის, რომ რევოლუციის ქარიშხალს ბევრი გაჭირვე-  
ბა მოაქვს თვით მუშათა კლასისათვის. ფიქრი, ტანჯვა, შევიწროება,  
შიმშილი, სიცივე უფრო მატულობს მოკლების ნაცვლად, მაგრამ ეს  
მოვლენა მას არ აშინებს: მას სწაძს. რომ ყოველივე ეს გაივლის  
და რევოლუციის ნანგრევებიდან მუშათა ხალხისათვის აღმოცენდე-  
ბა ახალი ცხოვრება:

სადაც სევდა არ სტირის, არც კენეს ფიქრი ჩაგრული,  
სიყვარულზე მღერიან შვების ფარშევანგებში

გასულ წელს გამოვიდა მგოსანის ზღაპრები, რომელიც პირდა-  
პირ განძია ჩვენს სახალხო და ყრმათათვის საკითხავ მწერლობაში.  
მსუბუქი, ცელქი, მხიარული ენა, მოცეკვავე სიტყვები, მუსიკა და  
აზრი საუცხოოდ არიან ერთად შეწყობილი.

თავის ზღაპრებში პოეტი მაგონებს ჩვენს აკაკის.

რა კარგი იქნებოდა, რომ ამ წლიდან ვარლამ რუხბაძე უფრო ნა-  
ყოფიერი იყოს!

დიდ რევოლუციას თან მოსდევს დიდი ნგრევა; დიდ ნგრევას  
თან ახლავს დიდი გაჭირვება.

ჩვენი მუშათა კლასის მდგომარეობა აუტანელია. გოლიათი  
სულგრძელობა და მოთმინება ჰქონია მას.

რომ არ მოითმინოს, რა უნდა ჰქნასო, იტყვის მკითხველი.

თუ ვერაფერს იზამს და ვერას გახდება, გულს ხომ მოიფხანს,  
აბობოქრებულ სულს ხომ დაიოკებს, დალეწავს ყველაფერს და მე-  
რე აღარაფერს დაეძებს.

არა გვაქვს შეშა, არა გვაქვს პური,  
ვერვიართ უმწეოდ ბედის ამარა...

როდემდე ვზილოთ სიკოცხლე კრული?!  
როდის შეგვერება ცრემლთა კამარა?! —

ასეთი გოდება დღითი დღე მატულობს მუშათა კლასში და სწორედ ასეთ დროს საჭიროა, რომ მუშათა კლასს ყოველდღე სწვდებოდეს ვარლამის გამამხნევებელი, იმედითა და ცეცხლით სავსე სიმღერა.

გასულ წელს დაიბეჭდა სხვადასხვა ახალგაზრდა მგოსნის ლექსები. ზოგიერთი რიგიანი იყო, მაგრამ:

მას მელექსე არა ჰქვია,  
რომელმა სთქვას ერთი, ორი.

მოვეუცადოთ, — დრო წაშლის უეარგისს და იგივე დრო გამოაჩენს ჭეშმარიტ ნიჭს.

გამოვიდა რამდენიმე ნომერი „ბარიკადისა“, რომელიც ცდილობს ახალი გზების გაყვანას ჩვენს პოეზიაში.

მეტად დიდი, პასუხსაგები და საპატიო საქმეა. ვინც ასეთ საბუშაოს ჰკიდებს ხელს, ის ნაცარქექიას კორიანტელს არ უნდა იმეორებდეს. სერიოზულ საქმეს სიღინჯე შეშვენის, ყვირილი, პაი-პუი, ხუმრობა და ბაქიბუქი კი არა.

ეს სხვათა შორის, ახლა თვით საგანზე გადავიდეთ.

ახალი გზის გამკაფველნი პოეზიაში არიან ჩვენში ცნობილი სიმბოლისტები.

ჰყავთ მათ ნიჭიერი წარმომადგენლები.

ერთია ნიჭი, მეორე — სკოლა, მიმართულება. ჩვენში ხშირად ამ ორ სრულებით სხვადასხვა მოვლენას ერთმანეთში ურევენ. თუ მოსწონთ მიმართულება, ყველა ნიჭიერი ჰგონიათ; თუ მიმართულებას არ იზიარებენ, ნიჭსაც უარყოფენ.

ნიჭიერი და უნიჭო წარმომადგენელი ყოველგვარ მიმართულებასა ჰყავს. ერთია აგრეთვე ნიჭი, მეორე საქმეა — მისი მიღება სრულად.

პოეზიაში უნდა ვარჩევდეთ შინაარსსა და ფორმას.

ყოველი მიმართულების პოეზიაში საზოგადოებრივი სული ლაპარაკობს.

ვისი სულია სიმბოლისტების პოეზიაში, რომელი საზოგადოებრივი კლასის სულიერი განწყობილებაა შიგ გახვეული?

ჩვენში სიმბოლიზმი გადმონერგილია ევროპიდან, უფრო საფრანგეთიდან.

დასავლეთში სიმბოლიზმმა ფრთები გაშალა რევოლუციის ხანაში. ბურჟუაზიის ბატონობის დროს, რევოლუციის ქარიშხალში უმთავრეს მოქმედ კლასად გამოვიდა პროლეტარიატი.

ბურჟუაზიას დაეკარგა რწმენა საკუთარი ტანტის სიმტკიცისა. შრომისა და კაპიტალის სრული წინააღმდეგობა, სამკედრო-სასიცოცხლო ბრძოლის აუცილებლობა, პროლეტარიატის ზრდა და გაძლიერება, კაპიტალიზმის აუცილებელი დამარცხება, — აი როგორი სურათი გადაიშალა ბურჟუაზიის წინ.

სულიერი სიმტკიცე ბურჟუაზიისა დაირღვა, შავი აჩრდილები გაჩნდნენ, ის შიშმა შეიპყრო.

ამას წინათ ბურჟუაზიის წარმომადგენელმა ლოიდ ჯორჯმა ერთ თავის საჯარო სიტყვაში ნათლად გამოააშკარავა ეს შიში: შავი აჩრდილი იზრდება ჩვენი ქვეყნის ცაზედო.

აქედან უკვე იბადება იქვიანობა, ტანჯვა, სასოწარკვეთილება, პესიმიზმი, სარწმუნოებრივი გრძნობის გაძლიერება, სრული უნუგეშობა, სულიერად გაორება, ლანდებით, ქიმერებით, ოცნებით, ცრუმორწმუნეობითა და სხვა საშუალებით აზროვნების გაბრუება სინამდვილის დასავეიწყებლად.

თავისთავად ცხადია, ასეთი სულიერი განწყობილება მთელი კლასისა ბუნებრივია, როდესაც ამ კლასმა სულიერი სიმშვიდე და მყუდროება დაკარგა და პროლეტარიატის ძლევამოსილება საშინელი სინამდვილის აუცილებლობას უხატავს წინ.

ეს კლასობრივი სულიერი ვითარება გადადის პოეზიაშიც. რა უნდა შეიტანოს შიგ აუცილებლად?

კველა თავისი თვისება.

მიემართოთ ახლა ჩვენს პოეზიას:

იტანჯვი მალვით და გაშინებს შენც დაღამება:  
კანკალებ ჩუმად, როს გაიარს ლანდი სიკედილის...  
როდესაც დალილს აღარსად მაქვს გზა წასასვლელი,  
და ველარ შევძლებ გამოუცნობ შიშის ატანას,  
გაერბივარ შენგან... მეჩვენებო ჯალათი, მკვლელი,  
და თრთოლვით ველი, რომ ბეჭებში დამარტყამ დანას.  
მაშინ ეს ქუჩაც ფეხს აიდგამს, გამოიქცევა,  
შავი სახლები დასაქერად მიწვიდიან ხელებს;  
ამ მოჩვენებად ეს ქალაქი გადაიქცევა,  
გამომავიდე მთვარეულებს და თავის მკვლელებს.

ვისი სულიერი განწყობილებაა აქ?

დამარცხებულნი და საშინელი სინამდვილის წინაშე მდგომი ბურჟუაზიისა.

ამ სტრიქონებში მეტად სამაგალითო და მეტად მხატვრული სურათთა გამოუვალი შიშით და სასოწარკვეთილებით შეპყრობილი კლასობრივი სულისა.

განა სევდა, სასოწარკვეთილება და მწუხარება პროლეტარიატ-  
მა არ იცის?

იცის, როგორ არ იცის. გადაშალეთ რუხაძე, ქუჩიშვილი, აბაშე-  
ლი, ობოლი მუშა, ევდოშვილი, ჩხიკვაძე და თქვენ აქ ნახავთ მუშა-  
თა ხალხის გულის კენესას, სევდასა და მწუხარებას.

მაგრამ განსხვავება დიდია, პრინციპიალური:

ბურჟუაზიის სევდიდან არავითარი გამოსავალი არ არის, — უნ-  
და ჭვარს ეცვა და დაიღუპო აუცილებლად.

პროლეტარიატის სევდიდან კი არის გამოსავალი: რწმენა გამარ-  
ჯვებისა და თავგანწირული ბრძოლა სრულ გამარჯვებამდე...

ბურჟუაზიას ეს რწმენა არა აქვს და ამიტომ მუდამ შავი აჩრდი-  
ლები ელანდება.

პროლეტარიატს ეს რწმენა აძლევს ძალ-ღონეს და სევდა უფ-  
რო აძლიერებს მასში ბრძოლის ცეცხლს.

ვინაც კენესის, იმან იცის ყოფის ვალი!  
აწმყოსაგან მსხვერპლსა ითხოვს მომავალი;  
და როდესაც სამსხვერპლოზე იგი დნება,  
როცა ოფლსა ცხარე ცრემლი ეთვისება,  
ის ნაღველი ბრძოლის ცეცხლად უნდა იქცეს,  
ღველი ყოფა ჩაიტანოს და დაიქცეს! —

კვიგალობს ნოე ჩხიკვაძე. ეს არის მუშათა კლასის შეხედულება.

ვარლამ რუხაძეს აქვს ერთი პატარა ლექსი „ვულკანის მოლო-  
დინში“:

მიწა გუგუნებს, მიწა ზანზარებს,  
ხომ ხედავთ, აგერ მის ღრმა ნაბზარებს?  
ალბათ ვულკანიც ამოხეთქს მალე  
და ნანგრევებში ჩაფლავს ამ ზარებს!  
ბევრს ეშინია: თრთის და კანკალებს...  
მე ეს მოვლენა ისე მახარებს,  
მე ისე მიყვარს განმწმენდი ცეცხლი,  
რომ ჩემი სული ცეკვავს, ხარხარებს!

აი სულიერი განწყობილება მუშათა კლასისა.

აქედან ჩემი ერთადერთი დასკვნა ასეთია:

სიმბოლისტების პოეზია თავისი შინაარსით გამოხატავს ბურ-  
ჟუაზიის სულისკვეთებას და რეაქციონურია, ქართველი მუშათა  
კლასი მას ვერ მიიღებს და არც მიიღებს.

„ბაროკადის“ პირველი ნომრის მეთაურში ვკითხულობთ:

„პროლეტარიატმა გამოიხშმო საქართველო ახალი ცხოვრებისა-  
თვის და ის მისცემს მის ცხოვრებას ახალ რიტმს“.

ეს სრული კეშმარიტებაა.

ქვევით გაზეთი განაგრძობს:

„ამ ახალ ცხოვრების ბარიკადებზე ვიბრძვით ჩვენ“.

აი ეს სრული გაუგებრობაა.

სიმბოლისტების პოეზიის სულიერი განწყობილება არ არის პროლეტარიატის სულიერი განწყობილება, მაშასადამე, პროლეტარიატის ახალი ცხოვრება ვერ გახდება სიმბოლისტების ახალ ცხოვრებად. ამიტომ ვერც იბრძობებენ ისინი ერთსა და იმავე ბარიკადებზე.

რა თქმა უნდა, სიმბოლისტებს გულწრფელად ჰგონიათ, რომ ეს ასე იქნება. ჩემთვის კი საბუთია არა ის, თუ მათ რა ჰგონიათ, არამედ ის, რაც მათ პოეზიაშია.

მეცხრამეტე საუკუნის ქართულ პოეზიას მათ ქვა და გუნდა მიაყარეს, პოლიტიკას ემსახურებოდაო.

ისინი უარყოფენ პოლიტიკას პოეზიაში, წმინდა პოეზიას ემსახურებიან. ძალიან კარგი საქმეა, მაგრამ ჩვენს სინამდვილეში განუხორციელებელი. სანამ საზოგადოება კლასებად არის დაყოფილი, პოლიტიკაც იქნება. მაშასადამე, ვერც პოეზია ასცდება ამ პოლიტიკის გავლენას.

მაგრამ არის პოლიტიკა პროლეტარიატისა. არის პოლიტიკა ბურჟუაზიისა.

თქვენ გგონიათ, ჩვენი სიმბოლისტები ასცდნენ პოლიტიკას?

სრულებით ვერა.

მათ მხოლოდ უნდოდათ პოლიტიკა თავიდან მოეშორებიათ. მაგრამ როგორც კი ცხოვრების სინამდვილეს შეეჯახნენ, ამ სინამდვილემ მათ მოახვია პოლიტიკა.

მიუხედავად ამისა, სიმბოლისტებმა მაინც შეიტანეს ახალი ჩვენს პოეზიაში—ეს არის ლექსის სილამაზე. მისი ფორმა, ამ მხრივ ჩვენმა პოეზიამ ძალიან დიდი ნაბიჯი გადადგა წინ და სიმბოლისტებს დიდი ღვაწლი მიუძღვით ამ გზაზე.

ლექსის გარეგნობისათვის ისინი მუშაობენ მეტს, ვიდრე წინათ მუშაობდნენ. მათ მიერ შემუშავებულ ფორმას ლექსისას ზოგიერთი შესწორებით ჩვენი პოეზია ვერ ასცდება.

ჩვენი დღევანდელი პოეზია ამას მოწმობს, მათ მიგვითითეს ლექსის ბევრ ისეთ მხარეზე, რასაც ჩვენი პოეზია ან ვერ ამჩნევდა, ან ყურადღებას არ აქცევდა, ანდა არ იცოდა.

სიმბოლისტებს აქვთ ერთი დიდი ღირსება: მათ შეჰქმნეს პოეზიის ორდენი, პოეტების ძმობა.



ისინი ერთი აზრით არიან გამსჭვალულნი, ერთი მეორე უყვართ, პატივსა სცემენ და ერთმანეთი ზეპირად იციან, ერთიმეორისათვის ცოცხალი წიგნები არიან და ერთმანეთს სიყვარულითა და დაჟინებით ავრცელებენ.

სხვამ ვინ მოახერხა ეს ჩვენში?

ვინ იფიქრა ან იზრუნა ამაზე?

ეს კი აუცილებელია, მისაბაძია.

ამით გავათავოთ პოეზიის განხილვა და მივმართოთ ბელეტრისტიკას.

გასულ წელს ისიც შინაარსიანი იყო.

ბელეტრისტიკის ცას ჯერ ისევ ძველი მნათობნი ამშვენებენ. დიდი ხნის სიჩუმის შემდეგ ხმა ამოიღეს არაგვისპირელმა, კლდიაშვილმა.

არაგვისპირელის „გაბზარული გული“ თავისებური აზრიანი და შინაარსიანი ნაწარმოებია. აუცილებელია, რომ ის ცალკე წიგნად გამოვიდეს, რაც შეიძლება მალე. ორი მთავარი გმირია: მახარე და ეთერი. მათი სულიერი ტრადედია ორ ნაწილად იყოფა, ერთია ეთერის გათხოვებამდე, მეორე—ეთერის გათხოვების შემდეგ. პირველში მეტი ძლიერება, მეტი მოქმედებაა, ვიდრე მეორეში. არაჟის ღასიათიც არ არის ყველგან დაცული: ზოგან შინაარსი არაჟისა არის, სხვა ალაგას კი სინამდვილის დამასურათებელი მოთხრობისა; ეთერის სურათშიაც არის ყალბი ხაზები.

მაგრამ ყოველივე ეს მცირეოდენი ნაკლია.

„ოთარაანთ ქერივის“ შემდეგ „გაბზარული გული“ საუკეთესო ნაწარმოებად მიმაჩნია ენის მხრივ.

შიო არაგვისპირელის ენა აქ საუცხოო ქართულია.

ღავით კლდიაშვილის „ბაკულას ღორები“ დაიბეჭდა „ცისარტყელას“ № 8-ში. ეს მოთხრობა საუცხოო და მეტად ლამაზი სურათია იმერეთის ყოფა-ცხოვრებისა.

ღავითი იმერეთის ცხოვრების საუკეთესო, შეუდარებელი მხატვარია, იმის მოთხრობებში იმერეთის სინამდვილეა მისი ყოველი დამახასიათებელი თვისებით.

ღავით კლდიაშვილის თვალს არ გამოეპარება უბრალო წვრილმანიც კი, რაც ამ ცხოვრებას რაიმე მხრით ახასიათებს.

მისი ნიჭის ღირსებას ის შეადგენს, რომ არ ეძებს უჩვეულოს, შეუძლებელს ან მეტად რთულსა და დახლართულ კვალს მოთხრობისას. აიღებს სრულებით ჩვეულებრივ შემთხვევას და მოგვეცემს დასრულებულ სურათს მთელი ცხოვრებისას.

გასაოცარია, რა ადვილად და თავისუფლად ემორჩილება ბელეტრისტს სიტყვა იმერეთის დასახატავად.

ჩვეულებრივი შემთხვევა, უბრალო ამბავი, უბრალო სიტყვები, — მთელი მოთხრობა კი მეტად ლამაზი.

რაშია საიდუმლოება, რომ კლდიაშვილი ამ უბრალო მასალით იძლევა სრულ ნაწარმოებს? იმერეთის ცხოვრების ზედმიწევნით ცოდნასა და პოეტურ ზომიერებაში.

ბელეტრისტს შემოაქმედის თვალი აქვს, მეტად მჭრელი და განვითარებული.

საკუთარი ფანტაზია დავითისა არ არის დიდი, წაართვით მას სინამდვილე და ის ვერ მოგცემთ თავის სინამდვილეს.

ხოლო სინამდვილეში ის ერთის თვალის გადავლებით დაინახავს ყოველ ხაზს და გაიმეორებს სიტყვის შემწვობით ზედმიწევნითა და უნაკლებად. კი არ ხედავს სინამდვილეს მარტო, გრძნობს, ყნოსავს ამ სინამდვილეს და ამიტომ მისი სურათიც დასრულებულია.

ამ შემთხვევაშიც კლდიაშვილს აღებული აქვს უბრალო შემთხვევა: მეზობლის ღორების გადასვლა მეზობლისავე ბოსტანში.

მაგრამ ამ შემთხვევის ნიადაგზე ბელეტრისტი ხატავს საუცხოო სურათს იმერეთის ყოფა-ცხოვრებისას.

ვასილ ბარნოვი რწმენისა და ოცნების მწერალია. არსებული სინამდვილე, ყოფა ნივთიერი, სხეულიანი მას არ იზიდავს. იმის ფიქრს უფრო უსხეულო სხეულთა, უნივთო ნივთთა არსებობა ასაზრდოებს.

ბელეტრისტს სწამს, რომ არსებობს ასეთი სინამდვილე, ხოლო ყველას არა აქვს თვალი იმის არსთა სანახავად და ყური იმის უცხო ხმათა სმენად.

ასეთი ბუნების მწერალს უფრო წარსული იზიდავს. ერთი იმიტომ, რომ იქ მეტია რწმენაც, ოცნებაც, მეორე იმიტომ, რომ წარსული კიდევ არსებობს და არც არსებობს, ის უსხეულოა და შენახული ჩვენს წარმოდგენაში, ჩვენს მეხსიერებაში.

ბარნოვს უყვარს ამ წარსულიდან, „შევეთიდან“ ძველი სახეების გამოძახება.

იმის თვალწინ „კაშკაშდებიან ძველი სახეები, იძვრიან, ცოცხლდებიან; მეორდებიან უწინდელი ამბები“.

ძველი ცხოვრება, ძველი ამბები — ი სად არის ბარნოვის გონება, ხოლო ხანდახან თუ ის აწმყოსაც მოჰკიდებს ხელს, მხოლოდ იმიტომ, რომ არაჩვეულებრივი, არაბუნებრივი, უსხეულო არსებობის დამახასიათებელი რამ გვაჩვენოს.

„ცისარტყელაში“ დაიბეჭდა მისი „განასკვილი სიმი“ და „ყვავილი მიმომავალი“. ორივეში ბარნოვის ნიჭის ძირითადი თვისებაა.

პირველში თითქოს აწმყოც არის, მაგრამ მხოლოდ იმდენად, რამდენადაც ეს აუცილებელია ძველი თბილისის მოქალაქის, ძველი ცხოვრების აღსადგენად.

ბარნოვს უყვარს ძველი მოქალაქე მისი მარტივი ცხოვრებით! ეს ცხოვრება გარდვიდა, აღარ არსებობს და ბარნოვის შემოქმედებაში ერთგვარი სევდაა ამის გამო.

„მივდიოდით პირმხიარულნი, მწვანილ-ბოლოკი, მოთალი, თევზ-ხიზილალა; ტბილი ღულუნი, თარზე ღიღინი. მარჯვე დიასახლისი მოსიყვარულე. სხვებიც შეგვესწრებოდნენ ხანდახან. სამხარი ვახშმად გადაგვექცეოდა, ჩუმი შექცევა — ახმაურებულ მხიარულებად, მეტადრე თუ აშულ მიქელა შემოგვესწრებოდა. რა თქმები, რა ხმები! საარშიყო ლექსები, ძველებური ამბები“.

ბარნოვი საუცხოო მხატვარია წარსულისა, წარსულის სიყვარულითა და სევდით სავსე. წარსულის სახეებს ყველაზე უკეთ ბარნოვი ხედავს ჩვენს მწერლობაში, ყველაზე უკეთ უგდებს ყურს და გადმოგვცემს მათს ნაამბობს, სევდიან მოთხრობასა და სიმღერას.

„ყვავილი მიმომავალი“ აგებულია უჩვეულო სინამდვილის არსებობაზე და ბევრად უფრო მკრთალია, ვიდრე „განასკვილი სიმი“. შეიძლება იმიტომ მეჩვენება ასე, რომ ჩემს საკუთარ ბუნებას არ ეგუება დედააზრი ამ მოთხრობისა.

აქ გამოყვანილია ახალგაზრდა ქალი ნანო, რომელიც „სხვა რამეზედ ფიქრობს შორეულზედ, სულ ოცნებობს, ზღაპრულ არეში ცხოვრობს, თითქოს ვერ ესმის, რა ხდება მის გარშემო, ან რას ამბობენ“.

ნანო მართლაც არაჩვეულებრივია, ამქვეყნიური არ არის, მაგრამ საკითხავია, საღია ფიზიკურად, სხეულით, თუ არა? ავტორს ის მიაჩნია სრულებით ჯანსაღ ადამიანად.

მე კი არ მიმაჩნია, იმის ოცნებას სარჩულად უდევს ერთგვარი სნეულება—ეპილეფსია, ავი ზნე,

ყური დაუფგდოთ თვითონ ნანოს: „მხოლოდ ხანდისხან დამავიწყდება, რასა ვმუშაობ და ხელში შემიჩერდება საკეთებელი, შემიგვიანდება; ხან სხვაგან მივდივარ, სხვა გზაზე კი შევუხვევ“.

ასე გეგონებათ, ნერვების სნეულებათა სახელმძღვანელოდან არის ეს სიტყვები ამოწერილიო, ეს არის ზედმიწევნით სწორი და ცნობილი ნიშნები ჯერ კიდევ უაუშთავრებელი ავი ზნისა.

ცხადია, ნერვიული სისტემა ნანოსი სნეულია; ასეთი ნიადა-

გი და ქალის მეტად ნაზი ბუნება ერთად იძლევიან ავადმყოფ ოცნებას.

ავადმყოფობას მე არ ვხედავ იმაში, რომ ნანოს სწამს უსხეულო სხეულთა ზექვეყნიური არსებობა—ეს რწმენის საქმეა, მაგრამ ნანოს განა სწამს მარტო?

არა.

— „უცნაურ სახეებს ვეალერსები ტურფა წალკოტში“, — გვიცხადებს ნანო. ის ხედავს მას, რაც სხვებისათვის უხილავია, უსმენს; შეჰხარის, ეალერსება.

ნანოს ეჩვენება, ელანდება და ეს არის ავადმყოფობა, ჰალუცინაცია.

ავტორს უნდოდა დაემტკიცებია, რომ მძიმე წარმავალ სინამდვილეს გარდა არსებობს უხილავი, მარაღიული სინამდვილე.

ამის დასამტკიცებლად მან დაგვიხატა ქალი, რომელიც ხედავს ამ მარადიულ სინამდვილეს. ნანოს სახით ავტორს უნდოდა დაემტკიცებია, რომ ზოგიერთ რჩეულს შეუძლია მარადიული ცხოვრების ცხადად ხილვა.

ამის მაგიერად ავტორმა დაამტკიცა, რომ ზექვეყნიურ არსთა ხილვა და მოსმენა თვისებაა მხოლოდ ნერვებით დასნეულებული აუამიანისა.

ეს კი მეცნიერებაში დიდი ხანია დამტკიცებულია.

ავტორში ერთმანეთს დაეჯახა რწმენა და სამხატვრო ნიჭი. სამხატვრო ნიჭმა გაიმარჯვა, რაც იმას ამტკიცებს, რომ ვასილ ბარნოვი დიდი ბელეტრისტია.

დიდი სამხატვრო ნიჭია აგრეთვე ნიკო ლორთქიფანიძეში. მოხდენილი, დაკვირვებული და აზრიანი მხატვარია.

მრავალსიტყვაობა მას არ უყვარს. არც ერთი ზედმეტი სიტყვა. არც ერთი ზედმეტი ხაზი. შემოქმედება მას ეადვილება. ერთის შემოხაზვით იძლევა დამთავრებულ სახეს.

არც ერთი ყალბი მოხაზულობა, არც ერთი ყალბი ადგილი: წმინდა ჯა თავისებური ხელოვნება. თავისებური, დროის შესაფერა სასიათი წერისა.

„ყეფდა ძაღლი, ყიოდა მამალი; სახურავიდან ამოდიოდა კვამლი, და იყო პატარა ოჯახი. ოჯახი იგი ეკუთვნოდა სილიბისტრო ქაშაძეს. ან კიდევ:

„ჯამებით ხარშო..

მერიქიფეები.. ღოქები.. კათხები..

სუნი და ოხშივარი მოხარშულნა და შემწვრისა;

ჯერ კიდევ ჩუმი სმა;  
გამალებული ჭამა;  
წვენი დასველებული თითები;  
გაქონილი უღვაშები;  
მათხოვრების ურიგო სიტყვები, ჩხუბი ულუფაზე და იულონის  
მკაცრი ბრძანება ფარეშებისადმი:

— თქვენ თვითონ დაუბრუნეთ და ყველა გაყარეთ ეზოდან!...  
ნახევრად ტიტველა ბავშვების სირბილი, მათი ყივილ-ყივილი  
და საკმლით გამოტენილი ლოყები.  
ძაღლების ლაქუცი, კუდის ქნევა, საკმლის მოტაცება და გალა-  
ქულების წკავწკავი“...

საუცხოო სურათია, რომლისთვისაც სხვას დასჭირდება რამდენიმე გვერდი.

ლორთქიფანძის „ჟამთა სიავეს“ ჰეშმარიტი ხელოვნების ბეჭე-  
დი აზის და ფეოდალური წარსული ყველა მისი ღირსება-ნაკლით  
მეტად მკაფიოდ და ლამაზად არის მარმარილოდან გამოკვე-  
თილი.

ჟურნალ-გაზეთებში დაიბეჭდა რამდენიმე მოთხრობა რემონი-  
ძისა. იმის ნიქს უფრო აღწერა ეხერხება, ამიტომ ის სინამდვილის  
მხატვარია და მასალას თავისი შემოქმედებისათვის იღებს ცხოვრე-  
ბიდან.

ბელეტრისტიკის მოთხრობებს დამუშავება და ბუნებრივი განვი-  
თარება აკლია.

ავტორი მასალას ხშირად შესაფერისად იღებს ცხოვრებიდან,  
მაგრამ შემთხვევათა მსვლელობასა და განვითარებას არ აძლევს  
თავისუფალ გზას, თვითონ ჩაერევა ხოლმე შიგ.

სულიერ განცდათა გადაშლა, ფსიქოლოგიური ანალიზი ავ-  
ტორს არ ეხერხება, მისი რკალია—ამბავი, მოთხრობა, დასურათება  
ნახულისა და გაგონილის.

აი ამ გზას უნდა დაადგეს რემონიძე.

მკედლიშვილი პოეტიკ არის, ბელეტრისტიკ. მისი ლექსი მოხ-  
დენილია, შინაარსიანიც, მაგრამ თავისებურობა, პოეტის „მე“ გა-  
სულ წელს არა სჩანდა იმის პოეზიაში. სამაგიეროდ ეს თავისებუ-  
რება სჩანდა „მეოცნებე გოგიში“. ამ მოთხრობაში თქვენ ნახავთ  
ისეთ ხასიათს წერისას, ისეთ სტილს, სიტბოს, სიყვარულს, სევდას  
და ოცნებას ერთად შეზავებულს, რაც მკედლიშვილის შემოქმედე-  
ბას ახასიათებს.

ალაგ-ალაგ მკედლიშვილს აქვს კნუტ ჰამსუნის თვისება წერისა,

ბელეტრისტი მკედლიშვილი ნიჭიერი მწერალია, ოცნება და სინამდვილე საუცხოოდ არის შედუღებული მის შემოქმედებაში. და თუ თავისი ნიჭის ეს თვისება მწერალმა დააფასა და განავითარა, კარგ ნაყოფს გამოიღებს.

ლეო ქიაჩელის „ესკალადი“ ლამაზი ნაპერწკალია ცხოველი ნიჭისა.

პუბლიცისტისა და ბელეტრისტის მიზანი ხშირად ერთი და იგივეა. ისინი ერთსა და იმავე საკითხს, მოვლენას აშუქებენ, ხოლო სხვადასხვა საშუალებით: პუბლიცისტი — მსჯელობით, ლოდიკით, ბელეტრისტი — მხატვრული სახეებით.

თუ ბელეტრისტი მხატვრულ სახეებსა და მსჯელობას ერთმანეთში ურევს, ასეთი მწერალი სუსტი ხელოვანია: როცა მხატვრული საღებავი შემოაკლდება, ენას წააგრძელებს.

ლეო ქიაჩელი საუცხოოდ იცილებს ამ ნაკლს თავიდან. ის ბევრჯერ პუბლიცისტია, მაგრამ მხატვრული ფერებით მდიდარია და მშრალი მსჯელობის მოშველიება არ სჭირია.

კაცობრიობის ბრძოლა იდეალისათვის—აი დედააზრი ლეო ქიაჩელის „ესკალადისა“.

ამ დედააზრზე მან ააშენა ლამაზი, კეკლუცი მოთხრობა.

რა კარგი იქნებოდა, ლეო ქიაჩელი ასეთი ძუნწი არ იყოს!

პუბლიცისტი და მხატვარი ერთიმეორეს ეჯიბრებიან მალაქიაშვილში.

ასეთია მისი „ბედნიერი კაცი“.

ეს მოთხრობა საყურადღებოა იმ მხრივ, რომ აქ ინტელიგენტი და გლეხია დაპირისპირებული.

ერთის მხრივ — რყევა, ყოყმანი; მეორეს მხრივ—სიმტკიცე.

ერთის მხრივ—იქვები, უიმედობა; მეორეს მხრივ—რწმენა და იმედი.

ერთის მხრივ — დაუსრულებელი მსჯელობა; მეორეს მხრივ—საქმიანობა.

ერთის მხრივ — გაუბედაობა, მეორეს მხრივ — სრული მთლიანობა.

აი დაახლოებით გაბო და პაპუნა.

გაბოში ჰამლეტის ჭია ზის და იმის სულსა ღრღინს; პაპუნაში კი დონ-კიხოტის კეთილშობილი რწმენაა, რა უბედურებაც კი უნდა დატრიალდეს იმის თავზე, მაინც სწამს და უყვარს ცხოვრება.

პაპუნა საყურადღებო ტიპია, რომელსაც იძლევა ჩვენი დღევან-

დელი ცხოვრება, პაპუნასთანა კაცები დიდ როლს თამაშობენ ჩვენს ცხოვრებაში. ავტორი სრულებით მართალია, პაპუნები მუდამ წინ იხეუებიან, გაბედულად მიდიან და იხსნეს დღემდე ჩვენი ქვეყნის მდგომარეობა.

ერთშია ავტორი შემცდარი:

პაპუნას მსჯელობა მეტის მეტად ინტელიგენტურია, რაც მხატვრული სახის მთლიანობას არღვევს.

განსაკუთრებული ადგილი უჭირავთ სიტყვაკაზმულს მწერლობაში თურდოსპირელსა და არჩილ რუხაძეს.

წერის ხასიათითა და შემოქმედების თვისებით ამ ორ მწერალს ბევრი რამა აქვთ ერთმანეთთან საერთო.

თურდოსპირელი ბუნებისა და ცხოვრების მგოსანია, ზოგჯერ კი სევდით დანისლული.

მასში გრძნობა ლაპარაკობს და შთაბეჭდილებანი ფიქრთა ნაკადულად გადმოსჩქეფს.

მისი „ამირანის ცეცხლი“ გამთბარია ადამიანისა და მამულის წმინდა, საღი სიყვარულით. ნაკლად უნდა ჩაითვალოს, რომ შიგ მსჯელობას დიდი ადგილი უჭირავს.

არჩილ რუხაძე პირადი შთაბეჭდილების მხატვარია. ის უფრო პოეტია, ვიდრე ბელეტრისტი. და მის პატარა მოთხრობებში ნაზი, ტკბილი ლირიკაა საამო, სანეტარო ოცნებით შეზავებული, ხან კი წყნარ სევდაში გახვეული ფიქრის ნაპერწკლები და გულის ამონაქვნესი—აი არჩილ რუხაძე. ის არ არის პირდაპირი მხატვარი ბუნებისა ან ცხოვრებისა.

ის არის მხატვარი მხოლოდ იმ შთაბეჭდილებისა, რასაც მის არსებაში იწვევს ცხოვრების ესა თუ ის მოვლენა.

სტილი არჩილ რუხაძეს თავისებური აქვს და ხასიათი მისი წერისა დღევანდელი ცხოვრების სწრაფ მიმდინარეობაზეა ზედ გამოჭრილი.

დიდი რომანების ჯრო წავიდა. თანამედროვე ადამიანს აღარ სცალია მათ წასაკითხავად. ის ითხოვს დროის დიდ ეკონომიას ყოველი მწერლისაგან... წერის სისხარტე, აზრისა და გრძნობის სისრულე.

დაიბეჭდა ცალკე წიგნად ორი მოზრდილი მოთხრობა ტ. ართმელაძისა: „მარკოზა“ და „შუამავალი აღათი“.

პირველში დასურათებულია ის საშინელი ქსელი მექრთამეობისა, რომელშიაც ებმებოდა ჯარში გასაწვევი ყოველი ახალგაზრდა.

სოფელი მექრთამეების ხელშია. სხვადასხვა მუქთახორა წურბელასავით ჩაფრენია ხალხის სხეულს და სისხლსა სწოვს. ბოროტება დღესასწაულობს და საშველი არსად არის.

სოფლისავე შვილი მარკოზა აიმაღლებს ხმას და ებრძვის ხალხის მტრებს, მაგრამ მტერი ჭერ ძლიერია და მარკოზა დამარცხდება.

ხალხი თანდათან ერკვევა და არჩევს, ვინაა მოყვარე, თუმცა ჭერ არ შესწევს საკმაო ერთსულოვნება და გამბედაობა ბოროტების დასამხობად.

„შუამავალი ალათი“ ჩვეულებრივი ამბავია ჩვეულებრივი ცხოვრებისა. დამახასიათებელი, განსაკუთრებული რაიმე მხრივ აქ არაფერია.

ალათი ცხოვრობს შუამავლობით.

მისი ერთადერთი ქალი დედის უნებურად გაჰყვება ალათის ნამოქამავიარაღს. შერიგდებიან. ოჯახი ბედნიერია, მაგრამ ალათის სიძე ჯარში გაჰყავთ და იქ ბრძოლის ველზე დაეცემა განგმირული. ამის გამო მთელი ოჯახი დაიღუპება: ზოგი კვდება, ზოგი შეიშლება.

ორივე მოთხრობა უფრო მასალას წარმოადგენს, ვიდრე დამუშავებულ ნაწარმოებს. მომქმედი პირი აუარებელია; მოქმედების განვითარება ხშირად ნაძალადევი; მწუხარების გამო იმავე წამს უეცარი გაგიჟება მხატვრული საშუალება არ არის. ყოველივე ეს ნაკლია და მოთხრობებს სამხატვრო ღირსებებს უკარგავს.

ბელეტრისტს დაკვირვების ნიჭი აქვს და ამ ნაკლის აცილებას შემდეგში შესძლებს.

რევოლუცია ყველგან იძლევა დიდძალ მასალას ყოველგვარი შემოქმედებისათვის. ასეა ჩვენშიც, მაგრამ ჭერ ისევ რევოლუციის მიმდინარეობაში ვიმყოფებით და მოვლენათა დასაფასებლად და გასარკვევად ცოტა მოშორებით დგომია საჭირო.

ასეთ პირობებშია უფრო განვლილი 1905 წლის რევოლუცია. რომლის მასალის დამუშავებას უკვე შეუდგნენ ჩვენი ბელეტრისტები.

გამოვიდა ორი დიდი მოთხრობა: ჟუჟისპირელისა—„ტყის ძმები“ და ზოტიკესი—„ახალი ტალღები“.

ორივეს შინაარსი — პირველი რევოლუციაა.

ბელეტრისტებს უნდათ მოთხრობის სახით დაგვიხატონ მხატვრულად ის, რასაც სინამდვილეში ჰქონდა ალაგი. ამგვარად შინაარსია ისტორიული სინამდვილე, ფორმა კი ბელეტრისტული.

ეს არის ისტორია, ბელეტრისტულ კალაპოტში გამოყვანილი.



შეიძლება თუ არა მოთხრობის ან რომანის ჩარჩოებში ისტორიის მოთავსება?

შეუძლებელი აქ არაფერია, ნიჭის საქმეა.

რომელიმე ისტორიული მოვლენა თუ შეიძლება გახდეს პოეზიის საგნად, რატომ არ შეიძლება, ბელეტრისტმა მიმართოს ისტორიას თავისი შემოქმედებისათვის. ხოლო ამ შემოქმედებას აქვს ერთგვარი საზღვარი: ისტორიული სინამდვილე უნდა იყოს დაცული.

როდესაც მხატვარი იღებს ისტორიიდან ერთ რომელიმე შემთხვევას მხოლოდ სახელოვნო მიზნით, ეს სულ სხვა საქმეა: მას შეუძლია ეს შემთხვევა ისე გარდაქმნას ოცნების გრდემლზე, როგორც ენებება.

სულ სხვაა, როდესაც ბელეტრისტი მთელ ისტორიას მოჰკიდებს ხელს. მით უმეტეს ახლობელ ისტორიას, რომლის მთავარი გმირები დღესაც ცოცხლობენ და მოქმედებას განაგრძობენ.

აქ ბელეტრისტი ვერ მისცემს დიდ თავისუფლებას ოცნების გრდემლს, რადგანაც თავი და თავი მაინც ისტორიაა, მისი გარდაქმნა და დამახინჯება ერთი და იგივეა.

ჟუჟისპირელის მიზანია გურიის რევოლუციის დასურათება. ავტორს აქვს ბელეტრისტის ნიჭი, შემოქმედება, ფანტაზია, და სწორედ ამ ფანტაზიას აძლევს მეტად დიდ თავისუფლებას.

ამის გამო იმის ისტორია გურიის მოძრაობისა სინამდვილეს არ შეეფერება, წვრილმანებს მე არ ვედავები. ბელეტრისტი იმის ბელეტრისტია, რომ წვრილმანები გადააკეთოს, გამოაკლოს, მიუმატოს მხატვრობისათვის, მაგრამ უმთავრესი დამახასიათებელი მხარეები ისტორიისა უნდა მკაფიოდ, უცვლელად წარმოუდგინოს მკითხველს.

ეს ნაკლი აქვს ჟუჟისპირელის მოთხრობას.

ზოტიკეს მიზანია 1905 წლის მოძრაობის ჩასახვა და განვითარება. ისტორიიდან ის იღებს მხოლოდ შინაარსსა და ხალხს, გმირებს კი არა.

მის მოთხრობაში თქვენ ვერ ნახავთ ისტორიულ გმირებს; არც შეადგენდა ეს ავტორის მიზანს. მას უნდოდა ხალხური მოძრაობის დახატვა რომანის სახით და ამ მიზანს აღწევს.

განვლილი მოძრაობის დაახლოებით სწორი სურათია „ახალი ტალღები“. ამ თხზულების შესახებ ორი სხვადასხვა აზრი გამოითქვა: ერთი ბევრ ღირსებას ხედავს შიგ, მეორე კი სრულებით უარჰყოფს, მიწასთან ასწორებს. ბ. პაპავას კრიტიკა ამ ნაწარმოებისა მეტად უსაფუძვლოა და სტოვებს შთაბეჭდილებას იმ მოსამართლი-

სას, რომელსაც წინდაწინვე გადაწყვეტილი აქვს ბრალდებულის გამტყუნება და დასჯა.

ბელეტრისტს ცალკე თავების სახელებსაც კი უწუნებს. რა შუაშია აქ სახელი? განა არ შეიძლება, სახელი შეუფერებელი, უხეირო იყოს; შინაარსი კი კარგი? ვისაც საზარელი ჰქვია, გლახა ან საძაგ-ლიშვილი, ყველა წყალში გადასაყრელი ყოფილა!

აიღეთ შემდეგი: „ახალ ტალღებში“ ერთი ვაჭარი მეორეს ეუბნება, ესა ჯა ეს ნოქარი უშველებელი კეტით შემომივარდა და თვალებს მიბრიალებდა, გეგონებოდა ჩამყლაპავსო.

ბ. პაპავა დასძენს: ზოტიკეს ცუდი წარმოდგენა ჰქონია მოწინავე მუშებზეო, და სხვა.

ზოტიკეს კი არა ჰქონია ცუდი წარმოდგენა, ვაჭარსა ჰქონია და ავტორმაც სწორედ ეს დაასაბუთა. როგორ შეიძლება ყოველი მოქმედი პირის აზრი და შეხედულება თვით ავტორს მიაწეროთ! დღეს ჩვენს ცხოვრებაში ბევრია ისეთი, რომელსაც პროლეტარიატს უშველებელი უამი ურჩევნია. ვინც ასეთ პირებს დახატავს, გამოღის, მუშა ხალხს ამცირებს.

ბ. პაპავა ავტორს უკიჟინებს: რა საჭიროა პროგრამა მინიმუმის მოყვანა, როდესაც ღღეს ეს ყველა ქუჩის კუთხეშია გაკრულიო.

ვერც ერთი მწერალი, რომელიც კი მონინდომებს 905 წლის მოძრაობის დახატვას, ამ პროგრამას ვერ ასცდება, ათასი გაკრულიც რომ იყოს დღეს ის ქუჩებზე.

რატომ ვერ ასცდება?

იმიტომ, რომ მოძრაობა ამ პროგრამით მიდიოდა და იმ მკითხველმა, რომლის წინაშეც 905 წელს არ გაუვლია, უნდა იცოდეს, როგორი მოთხოვნილებანი იყო მაშინ წამოყენებული.

რა თქმა უნდა, სინამდვილე მასალაა მწერლისათვის და მასალას გარდაქმნა უნდა საკუთარ სულსა და გულში, მაგრამ ეს არ ითქმის ყოველ სინამდვილეზე.

რა მიზანი ჰქონდა ზოტიკეს? რომანის დაწერა?

არა.

მისი მიზანი იყო მოძრაობის დასურათება რომანის სახით. რომანი მისთვის მხოლოდ საშუალებაა. მეტი არაფერი. ის ვალდებული იყო მოძრაობის სინამდვილე უცვლელად, პროტოკოლურად გადმოეცა და ასეც მოიქცა.

ავტორს ტიპები არა ჰყავს. განა ყველგან და ყოველთვის არის ტიპი საჭირო?

მას უნდოდა ხალხური, მუშური მოძრაობის დახატვა და მიზანს მიაღწია.

„ახალი ტალღები“ სტოვებენ მთლიან და გარკვეულ შთაბეჭდილებას. რა თქმა უნდა, აქ არც ღრმა ფსიქოლოგიური ანალიზია, ბევრიგან გაჭიანურებულია, ალაგ-ალაგ ენასაც უნდა შესწორება, მაგრამ საერთოდ წიგნს აქვს ბევრი ღირსება.

ენის მხრივაც ნაწარმოები მისაღებია. ამხელა მოთხოვნაში რომ თითო-ოროლა ცუდი გამოთქმა ნახოთ, რა საკვირველია! არც ერთი ჩვენგანი არ სწერს უნაკლო ქართულით. არ ვიცი თუ ჯერ გადაჭრით და საბოლოოდ, რომელია სწორი, უნაკლო ქართული.

ჩვენი ქვეყნის მომავალი მუშა ხალხის შეგნებასა და გათვითცნობიერებაზეა დამყარებული. მუშა ხალხს უნდა მივაწოდოთ ყოველი დარგიდან საკითხავი წიგნები, რომ მას სულიერი მოთხოვნილება გაეზარდოს და დაეწაფოს ცოდნას, ხელოვნებას.

„ახალი ტალღები“ სწორედ სახალხო წიგნია, წერა-კითხვის მცოდნე მუშებისათვის საჭირო და სასარგებლო.

წერა-კითხვის საზოგადოება მადლობის ღირსია, რომ ასეთ წიგნებს აწვდის ხალხს.

გასულ წელს ამ საზოგადოებამ მეტად დიდი საქმე გააკეთა, სიტყვაჯამბული მწერლობა გაამდიდრა: გამოსცა „ვეფხისტყაოსანი“, არაგვისპირელი, გიორგი წერეთელი, ნინოშვილი, ლალიონი, კლდიაშვილი, ბარნოვი, მელანია და სხვა.

ახლა მუშაობაა საჭირო სათეატრო ხელოვნების ასაყვავებლად.

დაიბეჭდა ერთაწმინდელის დრამა „სადარაჯოზე“, ტრიფონ რამიშვილის „სტუმარ-მასპინძლობა“ და „ფრთამოტეხილი ყორანი“, გერგესელის „გზაჯვარედინზე“, იოსებ იმედაშვილისა და შალვა გომართელის პატარა პიესები.

ერთაწმინდელი უფრო ნიჭიერია პოეზიაში. გასულ წელს გამოვიდა მისი ლექსთა კრებული, რომლის გამო თავის დროზე გამოთქვა კიდევ ჩემი აზრი. პოეზიაში მას აქვს საკმაო გრძნობა, გატაცება, ცეცხლი. იმის პოეტურ ტემპერამენტს სამწუხაროდ მისი შემოქმედება ვერა სწვდება.

პოეტს უყვარს ჭამბაზობა რითმებში და ეს კი მეტად სახიფათოა. ასეთი თვისება წერისა უფრო ხშირად სილამაზის მაგიერ იძლევა უაზრო რახარუხს სიტყვებისას და ყალბ ეფექტს.

ეს ნაკლი აქვს ერთაწმინდელს პოეზიაში, იგივეა იმის დრამაში.

„სადარაჯოზე“ სავსეა ასეთი ყალბი იდელებით და ამის გამო სუსტია.

ერთი ღირსება აქვს ავტორს: დიდი ენერჯის პატრონია და იმის დრამაშიაც მოქმედება საკმაოდ არის განვითარებული.

გერგესელი ჯერ ახალგაზრდა მწერალია, იმის პიესაში არის კვანძი, დასაწყისი მოქმედებისა, სულიერი დრამისა, მაგრამ ზრდა, განვითარება კი არ არის. აქ ლაპარაკი უფრო მეტია, ვიდრე მოქმედება. სულიერი მოძრაობა და მისი გარეგანი სახე — მოქმედება დრამაში თანდათან უნდა იზრდებოდეს და ვითარდებოდეს ისე, რომ ბოლო სრულებით ბუნებრივი და აუცილებელი იყოს.

იოსებ იმედაშვილისა და შალვა გომართელის პიესებში არის ცხოვრება, დაკვირვება, მაგრამ არ არის შემოქმედება.

ტრიფონ რამიშვილი ნიჭიერი დრამატურგია. იმის პიესებს ყოველთვის აქვს კვანძი და ავტორს ეხერხება სულიერი მოძრაობისა და მოქმედების განვითარება.

„სტუმარ-მასპინძლობა“ ცოცხლად არის დაწერილი და დასცინის ჩვენებურ ჩვეულებას ახირებული და დაუსრულებელი, უვადო სტუმრობისას.

ჩვენი მოქალაქე თავის ოჯახშიაც არ არის თავისუფალი და ბეზიამისის ნათლულის მამიდაშვილსაც არ ეხამუშება მისი შეწუხება გაუთავებელი წვეულობით.

აი ეს დედააზრია გატარებული „სტუმარ-მასპინძლობაში“.

„ეხ, ყველაფერს გაუძღვებდი, ამ ოხერ სტუმრებს რომ არ ამოვექამე“, — ჩივის ერთი გმირი კომედიისა.

ტიპები ცხოვრების სინამდვილეს შეეფერებიან, გარდა არიმანისა, რომლის პიროვნება საიდუმლოებით არის მოცული.

შინაარსი უფრო საეოდევილოა.

სარეველუციო ხანა არის ბრძოლა ძველსა და ახალს შორის. ძველი შეხედულება და მისი წარმომადგენლები ერთბაშად არ ისპობიან და დიდხანს ებრძვიან ახალს.

ეს ბრძოლა ხშირად საშინელ სახეს ღებულობს.

ესაა შინაარსი „ფრთამოტეხილი ყორნისა“.

იასე ბროგიშვილი წარმომადგენელია ძველი ცხოვრებისა.

ჯამლეთ ინგერაძე კი შეგნებული მუშაა, რომელიც თავგამოდებული იბრძვის სოფლის ასაყვავებლად. იასე ბროგიშვილი დაუგებს მას მახეს და დაჰლუპავს.

პიესა შინაარსიანია და შთაბეჭდილებას ახდენს.

ტრიფონ რაშიშვილს უყვარს ბევრი მომქმედი პირი, რაც თანამედროვე პიესაში არ არის სასურველი.

მაგრამ მისი მთავარი ნაკლი ის არის, რომ საზოგადოება გაყოფილი ჰყავს ორ ნაწილად: ერთია თავიდან ფეხებამდე ბოროტებით აღსავსე, მეორე — უაღრესად კეთილი და პატიოსანი.

ეს მეტისმეტი გამარტივებაა ცხოვრებისა და სინამდვილეს არ შეეფერება.

1920

## ნოე ჩხიკვაძე

უსიერ მთებს შუა გაწოლილ საუცხოო ჭალას ანკარა მდინარე ჩაუდიოდა. მგზავრის თვალს იტაცებდა სილამაზე ბუნებისა, მაგრამ განსაკუთრებით წარმტაცი იყო ის ლამით.

მზე რომ მთებს ამოეფარებოდა და შავი ზეწარი გადაეფარებოდა ჭალას, ამოგორდებოდა ლამის მნათობი, ნაზი სხივებით დაცრეცდა შავ ზეწარს და ანკარა მდინარეში ეალერსებოდა თავის სიბადრეს, — ტრფობით დამთვრალი ბუღბული ველარ შეიკავებდა თავადაპხუჭავდა თვალებს და მორთავდა ცისა და ქვეყნის გალობას. გალობდა თავდავიწყებით; გალობდა მთელი თავისი არსებით და არემარე სულგანაბული უსმენდა მგოსანს.

ირემი თავისი ნუკრით მედიდურად გამოვიდოდა, გაიხედავდა აქეთ-იქით, გაწეებოდა მდინარის პირას, ამაყად ააღებდა თავს და მიეცემოდა ოცნებას.

გალობით დამთვრალი ბუღბული ერთხელ ეკალს წამოეგო გულით. გაჩერდა დაკოდილი გული, შეწყდა სამუდამოდ გალობა.

ანკარა მდინარე ძველებურად მოდუღუნებდა. მთვარეც ისევ ეალერსებოდა შიგ თავის თავს. მაგრამ ჭალის ცხოვრება ძველს აღარა ჰგავდა, ჭალას აკლდა რაღაც.

მიდიოდა ამაყი ირემი, გაწეებოდა მდინარის პირას და დიდხანს იყო გალურსული, შემდეგ მოუსვენრობა დაეტყობოდა, წამოდგებოდა, იხედებოდა აქეთ-იქით და მიიმალებოდა ტყეში.

— დედილო, წინათ დიდხანს ვრჩებოდით ჭალაში, ახლა რად ვბრუნდებით მალე? — ჰკითხა ერთხელ ნუკრმა.

— იმიტომ, რომ წინათ ჭალა ტკბილი იყო, დღეს კი აღარა.

— რატომ იყო წინათ ჭალა ტკბილი?

— იმიტომ, რომ მას თავისი ბუღბული ჰყავდა.

— ახლა რა იქნა ბუღბული?

— შეშურდა მტერს და მოსტაცა ჭალას.

ჩვენი ქვეყნის კალასაც ამშვენებდა მგოსანი, ბედმა ის ხელიდან უღროოდ გამოგვაცალა.

ეს მგოსანია ნოე ჩხიკვაძე.

როდესაც ნოე სამწერლო ასპარეზზე გამოვიდა, მალე მიიპყრო ბევრის ყურადღება, — ჩემიც: წრფელი გრძნობა, მუსიკალური ენა, ლამაზი რითმა თავიდანვე ააშკარავენდნენ მასში დიდ ნიჭს.

და როდესაც მე ის პირველად გავიცანი, ვიხილე სრულებით ჩვეულებრივი ადამიანი, რომელიც არაფრით არ განირჩეოდა სხვებისაგან: ჩვეულებრივი ტანი, ჩვეულებრივი სახე, უბრალო ჩაცმულობა, მოუხეშავი მიხვრა-მოხვრა... მხოლოდ თვალებში იხატებოდა მისი თავისებურება. მოუსვენარი; მუდამ მოძრავი, ცეცხლითა და გრძნობით სავსე თვალები ამბობდნენ, რომ მათი პატრონი ძლიერი ნების, კეთილშობილი გულისა და დაუქმყოფილებელი ძიების ადამიანი იყო. მართლაც ასეთი ადამიანი იყო ნოე ჩხიკვაძე.

თავმდაბალი, უბრალო და ამავე დროს მედიდური, ამაყი, გაუტეხელი; ღარიბი, მაგრამ ამავე დროს მდიდარი ნიჭით, ბუნებით — ლმობიერი, მაგრამ ამავე დროს შეურიგებელი; რბილი, მაგრამ ამავე დროს მტკიცე; გულკეთილი, მაგრამ ამავე დროს მუდამ ცისაკენ მზირალი — აი ნოე ჩხიკვაძე.

თავიკუთლება და სიყვარული — აი რას აფასებდა მგოსანია:

მრწამს ერთი რამე: უანგარო თავისუფლება.

და სიყვარული, — სიცოცხლისა სასუფეველი.

თავისუფლება საჭიროა, რომ ადამიანი ამაღლდეს; სიყვარული კიდევ იმიტომ არის საჭირო, რომ ადამიანთა შორის ბედნიერება გამეფდეს.

პოეტს მთელი თავისი არსებით უყვარს ადამიანი:

— მერე რა ჰქვია ესრეთ ტანჯვით ჩემში შობილსა?

— ადამიანი!

— ამინ! — შეესძახე უკვდავების სულსა სათვისოდ

და შემოყვარდა საუკუნოდ, სამარადისოდ!

ადამიანის ბედნიერება იმაში მდგომარეობს, რომ ცა და დედამიწა ერთმანეთს დაუკავშირდეს, — ასეთია პოეტის რწმენა:

დაკავშირება თუ რომ შესძლო მიწის და ცისა,

ზეცის საუნჯე, საიდუმლო... მიწას აჩვენა, —

იგი დარჩება საუკუნოდ გამარჯვებული.

ადამიანი, რომელიც მუდამ ოცნებობდა კაცობრიობის ბედნ-

ერებაზე, ადამიანი, რომელიც მუდამ ზეცისაკენ უთითებდა ყველას, — აი ჩხიკვაძე.

ადამიანი, რომელიც ორივე ფეხით მიწაზე იდგა და მუდამ კი მზეზე ოცნებობდა — აი ჩხიკვაძე.

ვაი მას, ვისაც ცის გალობა არა ჰსმენია,  
ვაი მას, ვისაც მზის ოცნება არა ვლენია.

ამავე დროს ის არ იყო უნიადაგო ოცნების ადამიანი, — იმის ოცნებას საფუძვლად ედო ცხოვრების ღრმა ცოდნა და დაკვირვება.

მან იცოდა, რომ ბრწყინვალე გამარჯვება ადამიანისა მხოლოდ ბრძოლით შეიძლებოდა და ამიტომ მის სიმღერაში ოცნების გვერდით არის ბრძოლის ყიყინაც:

დაკარ, დაკარ, ნეტარი ვპოვოთ თავისუფლება.

ჩვენ ახალ ქვეყნისა წითელი ჭარი ვართ;  
ბრძოლაში ვეძიებთ ჩვენ ჩვენსა უფლებას.

პოეტმა იცის, რომ „შიმშილ-ტანჯვაში იბადება აზრი ძმობისა“ და ამავე დროს აზრიც ბრძოლისა.

პოეტს, როგორც კეთილშობილი გულის პატრონს, ყველა დაჩაგრული უყვარს. მაგრამ დაჩაგრულებში — შრომის შეილებში — ის ხედავს საუკეთესო მებრძოლებს თავისუფლებისა და სიყვარულის გასამეფებლად და ეს აორკეცებს მის სიყვარულს შრომის შეილები-სადმი.

ჩხიკვაძე რევოლუციის მგოსანია:

გაიღვიძე, ბორკილებში მძინარევი!  
აბობოქრდი, ცხოვრებისა მდინარევი!

ღირიკული ლექსები ჩხიკვაძისა სავსეა ნაზი, სათუთი სევდით:

ვმღერი მარტო... კენესის ჩანგი,  
ღნება ცრემლი ამ არეში,  
და ეს ცრემლი, სევდის ჰანგი  
თან ჩამყვება საშარეში.

მისი ნაზი, წარმტაცი სევდა ხშირად გვაგონებს ბარათაშვილის სულის ობლობას:

და მხოლოდ შეგვჩა განწირული კმუნვა სულისა.

ჩხიკვაძეში დიდი პოეტური სული იყო, დიდი შესაძლებლობა. მისი სტრიქონი თავისებური, მძლავრი, ფაფარაყრილი იყო. დიდი



ოცნებითა და გატაცებით გამოვიდა ის ცხოვრების გზაზე, მღეროდა, რომ ეხილა „სრულ ქმნა ყოფნისა“, მაგრამ ცხოვრებამ იმის ახალ-გაზრდულ გატაცებას ფრთები შეაკვეცა:

ლუბკირმა ბელმა სიკაბუკე არ გამოვიარდა.

პოეტი ასე ახასიათებს თავის თავს:

მე მიცნობდა მხოლოდ ერთი: კმუნეა და დარდი,  
კმუნეა იყო ჩემი მოძმე, ია და ვარდი.  
და მიყვარდა მხოლოდ წინსვლა, ბრძოლა, ნავარდი.

„გედის ყივილი“ და „N-ს“ საუკეთესო ნიმუშებია უნაზესი და ღრმა სევდით სავსე ლირიკისა.

დაჩაგრულთა ტკბილ მომღერალს, ამაყს, გაუტეხელს, ადამიანი-სადმი სიყვარულით აღსაესეს, მებრძოლს საუკეთესო იდეალებისათვის არ დასცალდა ამოეწურა თავისი გრძნობით სავსე გული და მეც გავათავებ მისივე სიტყვებით:

დიდება იმას, ვინც დაიწვა ნათლის ძიებით.

1922

## სახალხო დრამატიული დასის რეპერტუარი

დღევანდელს თეატრსა და ტაძარს შორის თითქოს არაფერია საერთო; ნამდვილად კი ორივეს ერთნაირი დასაწყისი აქვთ. ორივეს სათავე არის სარწმუნოება.

თეატრი წარმოიშვა წარმართობის დროს; იქ აღიდებდნენ ერთ-ერთ ღმერთს.

ტაძარი წარმოიშვა შემდეგ და აქაც თავყანსა სცემენ და აღიდებენ ღმერთს.

როდესაც გავეცნობით ძველი ელინური თეატრის არქიტექტურას, დავრწმუნდებით, რომ დღევანდელი ტაძარი მისი პატარა კოპიაა.

მთელს ბუნებაში გამეფებულია სასიცოცხლო ძალა. სიკვდილი შეუბრალებლად და შეუჩერებლად ანადგურებს ყველაფერს, რასაც კი მისი ცელი მიეკარება. მაგრამ ძალა სიცოცხლისა სჩქეფს ყველგან და ერთი დაღუპულის ალაგას აჩენს ათასს.

მას თან დასდევს ახალგაზრდობა, გატაცება, მხიარულება და ღვინო, როგორც აღმძვრელი, გამომწვევი მხიარულებისა.

ყოველივე ეს ძველი ელინის შემოქმედებამ ერთად შეაერთა და დაუქვემდებარა ღმერთს დიონისოს.

და აი თეატრი თავდაპირველად იყო საზეიმო წირვა დიონისეს სადიდებლად. ამგვარად ის აღმოცენდა სარწმუნოების ნიადაგზე და მალე გადაიქცა დიდ ეროვნულ და სახელმწიფოებრივ მოვლენად.

ძველი საბერძნეთის საზოგადოებრივ ცხოვრებაში კულტურა წარმოუდგენელია უთეატროდ. თეატრი მაშინ არა თუ უმწვერვალესად იყო განვითარებული, ერს და ერის მთავრობას კარგად ჰქონდათ გათვალისწინებული თეატრის უდიდესი საზოგადოებრივი და ეროვნული მნიშვნელობა და თეატრი იყო მთავრობის უდიდესი საზრუნავი.

თეატრი იყო უდიდესი სკოლა მოქალაქეთა აღსაზრდელად; ეს სკოლა იყო უაღრესად დემოკრატიული. ამ სკოლაში უნდა მიეღო აღზრდა და მომზადება ყოველ მოქალაქეს. ზოგიერთი თეატრი იტყევდა

ორმოცი ათასამდე მაყურებელს. შესვლა თავდაპირველად უფასო იყო. შემდეგ დაწესდა მცირეოდენი ფასი თეატრის შესანახად, სამაგიეროდ ყოველ მსურველს შესასვლელ ფასს ხაზინა აძლევდა.

რას ემსახურებოდა მაშინ თეატრი?

საზოგადოების განვითარებას.

ამ მიზანს ახორციელებდნენ ტრადიციები, რომლებშიაც ზნეობრივი და საზოგადოებრივი აზრები იყო გატარებული.

მაგრამ საკირო იყო ერის აღზრდასა და განვითარებასთან ერთად ერის ნერვიული ძალ-ღონის აღდგენა და გაზრდა სანახაობით, მხიარულებით.

ამ მიზანს ახორციელებდნენ სხვათა შორის კომედიები და მიმები.

როდესაც შეადარებთ ევროპის თანამედროვე თეატრს თავის უძველეს ელინურ წინაპარს, რა დიდი განსხვავებაა!

ელინური თეატრი იყო ეროვნული დაწესებულება. ის აძლევდა გონებრივსა და ზნეობრივ საზრდოს მთელ ერს და რადგანაც ყველგან ერის უმრავლესობას მშრომელი ნაწილი შეადგენს, ამიტომ ელინური თეატრი ემსახურებოდა მშრომელ ხალხს და წარმოდგენდა უდიდეს სკოლას მშრომელი ხალხისათვის.

ბურჟუაზიულმა წყობილებამ დღევანდელ თეატრს დააჩნია ერთი დიდი შავი ლაქა — ფული.

რაც შეიძლება ბევრი ფულის აღება, — აი ერთი მიზანთაგანი დღევანდელი თეატრისა. ამიტომ ის იძულებულია ემსახუროს მათ, ვის ხელშიცაა ეს ფული.

თეატრი არის დიდი ეროვნული საქმე. მას აქვს ფართო საზოგადოებრივი მნიშვნელობა: კერძო პირის ხელში ან კერძო საზოგადოებას, ამხანაგობის ხელში ის ძალაუნებურად გადაიქცევა ფულის მომგებ დაწესებულებად. ამიტომ ის უნდა იყოს მთავრობის ხელში და უზრუნველყოფილი მთავრობისაგან. ეს ძალიან კარგად ჰქონდათ შეგნებული ძველ ელინებს.

ევროპის თეატრი ასცდა ამ გზას და ამიტომ, რა თქმა უნდა. მიუხედავად თავისი დიდი ღირსებისა, მას არა აქვს ის მნიშვნელობა საზოგადოებისა და მთელი ერისათვის, რაცა ჰქონდა თეატრს ძველ საბერძნეთში.

თეატრი უსათუოდ უნდა დაუბრუნდეს ხალხს. მისი მიზანი უნდა იყოს მშრომელი ხალხის აღზრდა, გაწვრთნა, სულიერად გაჭანსალება, გადახალისება და მისი სამოქმედო ენერჯიის გაზრდა.

თეატრი უნდა აშუქებდეს ყველა იმ საკითხს, რასაც კავშირი აქვს მშრომელი ხალხის წაბსულთან, აწმყოსა და მომავალთან.

თეატრი უნდა არკვევდეს მხატვრულ სურათებში ყველა იმ საზოგადოებრივ და ზნეობრივ საკითხებს, რომლებსაც აქვთ მნიშვნელობა მშრომელი ხალხის აღზრდა-განვითარების საქმეში.

მშრომელი ხალხი ყოველ დღე ხარჯავს თავის სამუშაო ძალ-ლონეს, რაც მას მარტო ფიზიკურად კი არა, სულიერადაც ჰქანცავს. სულს დასვენება, გადახალისება ესაჭიროება ახალი შრომისათვის, დახარჯულ ჯან-ლონეს კიდევ — ანაზღაურება.

ეს კი უნდა მისცეს მას თეატრმა.

რითი, რა საშუალებით?

სანახაობითა და ესთეტიური მხიარულებით. დღიური შრომისაგან მოქანცული ადამიანი უნდა გამოვიდეს თეატრიდან მარტო გონებრივი საზრდოთი დატვირთული კი არა, არამედ დასვენებული, ხალისიანი და სამუშაო ძალლონით შევსებული. ამისათვის კი საჭიროა სადი, მხიარულა სიცილი, ხალისიანი, მხიარული განწყობილება სულისა..

წარმოიდგინეთ მშრომელი ადამიანი, ზნეობრივ-საზოგადოებრივი აზრებით დატვირთული, მაგრამ მოშვებული, მოდუნებული, უხალისო, უენერგიო. ასეთი ადამიანი, მიუხედავად თავისი სულიერი ღირსებისა, ხშირად უსარგებლო წევრია საზოგადოებისა და ერისათვის.

მეორეს მხრივ ენერგიით სავსე, მაგრამ ზნეობრივ-სოციალური აზროვნებით ღარიბი მშრომელი ადამიანიც დიდ ნაყოფს ვერ მისცემს საზოგადოებასა და ერს.

ერთი მიზანიცა და მეორეც შეერთებული უნდა იყოს სახალხო თეატრში, — მხოლოდ მაშინ მისცემს ის საზოგადოებას მთლიან მშრომელ წევრს.

სწორედ ასეთი მიზანი ჰქონდა დასახული ქართულ სახალხო დრამატიულ დასს და, მიუხედავად მრავალი დაბრკოლებისა, ის პირნათლად და თავგანწირვით ემსახურებოდა ამ დიდ ეროვნულ მიზანს. თეატრის გახალხოსნება, მშრომელი ხალხის დაახლოება თეატრთან და მისი ესთეტიური აღზრდა — აი რისთვის იბრძოდა სახალხო დრამატიული დასი იმ ოცდაათი წლის განმავლობაში.

ეს არის მეტად დიდმნიშვნელოვანი საზოგადოებრივი მოღვაწეობა.

უნდა მივიღოთ მხედველობაში, რომ სახალხო დრამატიული დასი მოღვაწეობდა თვითმპყრობელობის დროს. მის კისერზე არა ერთხელ გადუვლია შავრაზმულ რეაქციას, რომელიც წინ ეღობებოდა და ყოველგვარი საშუალებით აღრჩობდა ხალხის შეგნებას, გათვითცნობიერებას და განვითარებას.

სახალხო დასი კი ამ დროს მშრომელი ხალხის აღზრდას, განვითარებას და შეგნებულად დარაზმვას ემსახურებოდა.

ამიტომ მისი მოღვაწეობა არის არა მარტო საზოგადოებრივი, არამედ სარევიოლუციო.

თუ ქართველი მშრომელი ხალხი სარევიოლუციო ბრძოლაში მუდამ პირველ რიგებში იდგა, მტკიცედ და გაბედულად მიდიოდა წინ და რევიოლუციას შეგნებულად შეეგება, ეს არ ყოფილა შედეგი მარტო პარტიული მოღვაწეობისა, — ამ დიად საქმეში მიუძღვის თავისი წვლილი სახალხო დრამატიულ დასსაც, რომელიც ოცდაათი წლის განმავლობაში ემსახურებოდა მშრომელი ხალხის შეგნებას.

თეატრი თავის მიზანს ანხორციელებს რეპერტუარის საშუალებით.

როგორი იყო სახალხო დრამატიული დასის რეპერტუარი ამ ოცდაათი წლის განმავლობაში?

ეს რეპერტუარი სრულებით შეეფერებოდა იმ მიზანს, რომელსაც უნდა ემსახურებოდეს სახალხო თეატრი.

თეატრი თავისი მიზნით საერთაშორისო მოვლენაა, მაგრამ მისი გზა არის ერთადერთი — ეროვნული.

მიუხედავად იმისა, რომ სოფოკლე დღესაც ყველას ატკობს, ის, უწინარეს ყოვლისა, არის უაღრესად ელინი და ელინური ნიჟარის გარეშე ის გაუგებარია და შეუძლებელი.

სახალხო თეატრმა უნდა მისცეს ხალხს ყოველი აზრი და განცდა იმ გაგებით, გამოსახვითა და სურათებით, რაც უფრო ახლოს არის ხალხთან. ხალხთან კი უფრო ახლოს არის ყოველივე ეროვნული.

მაგრამ ეს იმას არ ნიშნავს, რომ სახალხო თეატრი მარტო ეროვნული შემოქმედების ჩარჩოებში ჩაიჭედოს: ეროვნულიდან ის თანდათანობით უნდა გადადიოდეს საერთაშორისოზე.

სწორედ ამგვარად მოღვაწეობდა ქართული სახალხო დრამატიული დასი. იმის რეპერტუარში უმთავრესი ადგილი აქვს დათმობილი ეროვნულ შემოქმედებას. აქ სრულად არის მოცემული ჩვენი ძველი და ახალი დრამატურგები.

რაც უნდა სუსტი იყოს ეროვნული შემოქმედება, ის არის გამომატველი ერის ესთეტიური ენერჯიისა. თქმულა ჩვენში და ახლაც ამბობენ ხოლმე ჩვენი თანამედროვე მწერლობის ამა თუ იმ დარგის სისუსტეზედ. რა თქმა უნდა, ევროპის რომელიმე ერის მწერლობას ჩვენი დღევანდელი მწერლობა ვერ დაეძარება. მაგრამ ჩვენი მწერლობა და შემოქმედება არის ის, რისი მოცემაც კი შეუძლია ჩვენს ერს დღევანდელს პირობებში.

ერისთავი, ცაგარელი, კლდიაშვილი, რამიშვილი, გედევანი-  
შვილი, შიუქაშვილი, დადიანი, ეკალაძე, ირეთელი, გერგესელი, ნა-  
კაშიძე და სხვ. უსათუოდ გამოხატავენ ქართული ესთეტიური  
ენერჯის შესაძლებლობას, გამოსახავენ ქართულ სინამდვილეს,  
ქართულ სულს. ქართველ ხალხთან ესენი ახლოს არიან და, რა  
თქმა უნდა, ქართულ სახალხო თეატრში ესენი პირველ რიგში უნდა  
იყვნენ.

სახალხო დრამატიული დასი სწორედ ასეც მოქმედებდა და  
ეროვნულ თეატრს მან მტკიცე საძირკველი ჩაუყარა მშრომელი  
ხალხის გულში. ბევრ ჩვენგანს შექსპირზე გაუთენებია ლამეები. რა  
თქმა უნდა, ერისთავი ამისთანასათვის ანბანია და საჭირო აღარ  
არის, მაგრამ ხალხს ჯერ ეს ანბანი ესაჭიროება, უამისოდ ის შექს-  
პირს ვერ გაიგებს, ვერ ჩასწვდება.

გიორგი ერისთავი არის საძირკველი ქართული თეატრისა. იმის  
პიესებში არ არის არც აზრის სიღრმე, არც ხასიათთა სირთულე, არც  
დიდი ფსიქოლოგიური ანალიზი. მიუხედავად ყოველივე ამისა მათ  
აქვთ ერთი დიდი ღირსება: ისინი იძლევიან ქართული ცხოვრების  
უტყუარ სურათებს. ქართველმა მშრომელმა ხალხმა კი ცოცხალი  
სურათებით უნდა გაიცნოს როგორც ჩვენი წარსული, ისე აწმყო.  
რომ უკეთ გაითვალისწინოს ჩვენი მომავალი.

გიორგი ერისთავის კომედიები საყურადღებონი არიან საზო-  
გადოებრივის თვალსაზრისითაც: მიუხედავად იმისა, რომ იმ დროს  
ჯერ კიდევ ბატონყმობა იყო, წარჩინებული წოდების დაშლის ნიშ-  
ნები უკვე იყო ჩვენს ცხოვრებაში და „გაყრისა“ და „დავის“ ავ-  
ტორს ეს არ გამოეპარა.

სუნდუქიანცი ხიღია ქართველ და სომეხ მშრომელთა შორის.  
ჩვენი მშრომელი ხალხისათვის ის მუდამ ძვირფასი იქნება, როგორც  
სოლიდარობის მასწავლებელი და იმის „პეპოს“ ჯერ კიდევ ღიდ-  
ხანს ექნება ჩვენი ხალხისათვის აღმზრდელი მნიშვნელობა.

ა. ცაგარელი გაგრძელებდა გ. ერისთავისა. მისი პიესები სუ-  
რათებია ქართული ცხოვრებიდან ამოღებული.

ერთგვარი დეკადანსი წარჩინებული წოდების ცხოვრებაში მას  
უფრო მკაფიოდ აქვს ასახული და კომიკურ მდგომარეობათა შექმ-  
ნით მას ეხერხება გამოწვევა იმ მხიარული, გულიანი სიცილისა,  
რაც მშრომელი ხალხისათვის აუცილებელ საჭიროებას შეადგენს  
ნერვული ენერჯის აღსადგენად.

იმერეთის ყოფა-ცხოვრების საუკეთესო მემატიანე კლდია-  
შვილია.

კლდიაშვილი იმერეთის გოგოლია. მის შემოქმედებას დიდი

საზოგადოებრივი მნიშვნელობა აქვს განსაკუთრებით ჩვენი მშრომელი ხალხისათვის.

კლდიაშვილს აქვს გასაოცარი მხატვრული განსჯერეცა-შეგრძნობა მომავალისა. მისი შემოქმედება ყავარჯენია მშრომელი ხალხისათვის, მისი სრული გამარჯვების მხატვრული წინასწარმეტყველება.

კლდიაშვილსა აქვს განსაკუთრებული იუმორი და ყოველივე ეს დიდი ღირსებით ამკობს მის პიესებს.

კლდიაშვილი და ნინოშვილი ერთმანეთის დამატებაა.

კლდიაშვილს ეხერხება ცოცხალი სურათების ზედმიწევნით გადმოცემა. მის ნიჟს დიდი დაკვირვება ახასიათებს.

ნინოშვილს ეხერხება სინტეზი, განზოგადება. ნინოშვილი ახალი ცხოვრების წინამორბედია, რევოლუციის მებაირალტრედ-აშლა წოდებრივი ურთიერთობისა და ახალი ფორმები საზოგადოებრივი ცხოვრებისა, — აი რას გვიჩვენებს მისი შემოქმედება.

სასცენოდ გადაკეთება მისი მოთხრობებისა უსათუოდ შეადგენს ირეთელის ღირსებას და „ქრისტიანე“ და „სოფლის გმირები“ დიდხანს იქნებიან სახალხო სცენაზე.

რამიშვილი მეტად ნაყოფიერი და დაკვირვებული დრამატურგია. რეალიზმი, ცხოვრების სინამდვილის გამოსახვა მისი თვისებაა.

ის მეტად ჩუმი, წყნარი, თავდაბალი მუშაკია, რომელიც უკვირდება, კვალდაკვალ მისდევს ცხოვრებას და რასაც ახალს დაინახავს, მხატვრულ სურათებში აყალიბებს.

ცხოვრების ცოდნის გარდა იმის პიესებს აქვთ ზნეობრივ-აღმზრდელობითი მნიშვნელობა.

დამაფიქრებელ სურათებთან ერთად მას ადვილად ეხერხება სასაცილო მდგომარეობათა აკინძვაც, რაც ფრიალ საჭიროა განსაკუთრებით სახალხო სცენისათვის.

გადამეტებული არ იქნება, თუ ვიტყვით, რომ რამიშვილი ჩვენი სახალხო სცენის ბურჯია და მის პიესებს: „მეზობლები“, „დედინაცვალი“, „სტუმარ-მასპინძლობა“, „სალომეს ოჯახი“, „ჭკუამხიარული“ და „შეშლილები“ — მუდამ დიდის ყურადღებით ეპყრობა ჩვენი მშრომელი ხალხი.

ჩვენს მშრომელ ხალხს დიდი მონაწილეობა მოუძღვის სარევოლუციო მოძრაობასა და ბრძოლაში.

ამ ბრძოლის სურათების გადატანა სცენაზე მეტად საჭირო იყო მშრომელი ხალხისათვის. ეს დიდი საქმე იყისრეს ირეთელმა და ს. გედევანიშვილმა.

პირველი გვიხატავს პარტიულ ბრძოლას, მაგრამ მას აკლია სიღრმე ფსიქოლოგიური ანალიზისა და ზნეობრივი ენერჯის სიძლიერე.

ეს ნაკლი შევსებულია გედევანიშვილის „მსხვერპლსა“ და „გამცემში“. ზნეობრივი სიძლიერე მშრომელი ხალხისა აქ მეტად დიდ შთაბეჭდილებას ახდენს და ხალხისათვის ამ პიესებს დიდი აღმზრდელობითი მნიშვნელობა აქვთ.

ია ეკალაძე საკმაოდ ცნობილი და დამსახურებული მწერალია. მას ახასიათებს მხატვრული ზომიერება, ტემპერამენტი და რეალიზმის თვისება.

ამავე თვისებებით დაჯილდოვებულია მისი პიესა „ჭვარი № 21“. მშრომელი ხალხის იდეურად აღზრდის საქმეში ია ეკალაძის ამ პიესას დიდი მნიშვნელობა აქვს.

შიუკაშვილი ერთბაშად, მოულოდნელად გამოცხადდა ჩვენს სცენაზე და ერთის დაკვირვებით მოიხვეჭა სახელი ნიჭიერი დრამატურგისა.

ცხოვრებისა და ადამიანის სულში ღრმად ჩახედვა — აი რა ახასიათებს შიუკაშვილის შემოქმედებას.

საჭირბოროტო საკითხების გაშუქება, თავისებური შეხედულება, მოუსვენარი სული, შეუჩერებელი ძიება შიუკაშვილის პიესების თვისებას შეადგენს და საერთოდ მას დიდი აღმზრდელობითი მნიშვნელობა აქვს მშრომელი ხალხისათვის.

შალვა დადიანის სასცენო მოღვაწეობა უმთავრესად სახალხოა. არც ერთი კუთხე არ მოიპოვება ჩვენი სამშობლოსი ისეთი, რომელიც შალვა დადიანს არ მოეგლოს და სახალხო წარმოდგენები არ გაემართოს.

შალვა დადიანის ლიტერატურული მოღვაწეობაც უმთავრესად სახალხოა იმ მნიშვნელობით, რომ იმის პიესებს მიზნად უფრო მშრომელი ხალხი ჰყავს დასახული.

ზოგჯერ შეხვდებით შიგ გადაჭარბებულს ტენდენციას, მაგრამ საერთოდ ცხოვრების სინამდვილის ხატვა, კეთილშობილი მისწრაფება, ცხოვრების მოვლენათა შეფასება ზნეობრივის თვალთახედვით და ბუნებრივი იუმორი მისი პიესების ღირსებას შეადგენს და მშრომელი ხალხის რეპერტუარში დიდხანს ეკავებათ საპატიო ალაგი.

გერგესელი სულ ახალგაზრდა მწერალია. მისი ნიჭი მრავალფეროვანია, მაგრამ მისი მიდრეკილება უფრო დრამატული ხელოვნებისაკენ არის.

ცოტა ხანია, რაც სამწერლო ასპარეზზე გამოვიდა, მაგრამ არის



პიესებს უტყუარი დალი აზის ნიჭიერი და დაკვირვებული მწერლისა.  
გერგესელი სულიერ განწყობილებათა მხატვარია.

მას განსაკუთრებით იზიდავს ადამიანის სულის მოძრაობა სხვადასხვა მდგომარეობაში.

ამ მხრივ მისი უკანასკნელი პიესა „დამზრალი წალკოტი“ განსაკუთრებით საყურადღებოა.

ავტორი აქ ჩეხოვს გვაგონებს თავისებური სულიერი განწყობილებებით.

ავტორი ღრმად ჩასწვდა ადამიანის სულს და დაგვანახა რთული სულიერი დრამა მთელი რიგი პერსონაჟებისა.

ავტორი იმდენად გატაცებულია სულის მოძრაობით, რომ მოქმედებას ნაკლებ ყურადღებას აქცევს.

მოქმედების განვითარებაში ავტორი ძუნწია.

რთული მოძრაობა სულისა იშლება მოღუენებულ და სუსტი ნიჭმედების არეში.

მშრომელ ხალხს კი მოქმედება უყვარს, მოქმედებას ეძებს ის, მოქმედება მისთვის აუცილებელია როგორც ცხოვრებაში, ისე სცენაზე.

ამ ნაკლს გერგესელი ადვილად დააღწევს თავს და ჩვენს რეპერტუარს დიდ ნაბიჯს გადაადგმევინებს წინ.

ნინო ნაკაშიძის პიესები კვენესაა კეთილშობილი გულისა, ცხოვრების სიდუხჭირით და უსამართლობით გამოწვეული. მშრომელი ხალხისათვის ბევრი დამაფიქრებელი სურათია შიგ და საგულისხმო აზრი.

რაც შეეხება უცხო დრამატურებს, მათ უნდა მივუდგეთ ისე-თივე საზომით, როგორც ეროვნულს. ყოველივე, რაც ხელს შეუწყობს მშრომელი ხალხის განვითარებას, ესთეტიურ აღზრდას და დახარჯული ენერჯიის აღდგენას, საჭიროა და სასარგებლო.

სახალხო დრამატიული დასი ამ ოცდაათი წლის განმავლობაში აწვდიდა მშრომელ ხალხს მოლიერს, შილერს, ჰაუპტმანს, გოკის, ანდრეევს, გოგოლს, ოსტროვსკის, სერვანტესს, იბსენს და სხვ.

ყველა ეს ისეთი სახელებია, რომლებიც შეადგენენ ყოველი სცენის სიამაყესა და მშვენებას. შილერის „ყაჩაღები“, მოლიერის „ტარტუფი“, იბსენის „შტოკმანი“ და „საზოგადოების დედაბოძნი“, გოგოლის „რევიზორი“ სწორედ მშრომელი ხალხისათვის არიან უაღრესად აღმზრდელი მნიშვნელობისანი. მშრომელ ხალხს ანვითარებს მათი შემოქმედება, თვალებს უხელს, აწვდის საზოგადოებრივ იდეებს, უსახავს მაღალ იდეალებს და ასწავლის ბრძოლას ამ იდეალებისათვის.

რა თქმა უნდა, შეიძლებოდა უფრო ვრცლად წარმოდგენა უცხოეთის დრამატურგებისა, მაგრამ იმ პირობებში, როგორშიაც მიმდინარეობდა ქართული სახალხო დრამატიული დღის მძიმე მოღვაწეობა, მეტის გაკეთება ყოვლად შეუძლებელი იყო.

დრამატიული დასი მოკლებული იყო ტექნიკურ და ქონებრივ საშუალებას. თამაშობდნენ უმეტესად სცენისმოყვარენი, რომლებიც თავისი კერძო საქმეებითა და სამუშაოთი იყვნენ დატვირთულნი.

დრამატიულ დასს წინ ეღობებოდა მრავალი დაბრკოლება; მიუხედავად ამისა ის გატაცებით, თავგანწირულად ემსახურებოდა თავის წმინდა საქმეს და სწამდა, რომ მომავალი მისი იყო.

დიდ ღირსებას ქართული სახალხო დრამატიული დასისას ისიც შეადგენს, რომ მან ეროვნულ შემოქმედებას გაუხსნა ფართო ასპარეზი და არა ერთი და ორი ნიჭი აღმოაჩინა, გაუკაფა გზა და გაფურჩქნა.

თავისი რეპერტუარით სახალხო დრამატიულმა დასმა მარტო მშრომელი, მდაბიო ხალხის განვითარებასა და ესთეტიურად აღზრდას კი არ შეუწყო ხელი, არამედ ქართული დრამატიული ხელოვნების განვითარებასაც და მანვე მისცა ერთგვარი მიმართულება ქართულ დრამატიულ ხელოვნებას.

## იზვიათი ღმრთაული

თუ ხელოვნება წყაროა უზენაესი ნეტარებისა, არსად ეს წყარო ისე ანკარა, ისე ტკბილი არ არის, როგორც ხელოვნების უდიდეს ტაძარში — თეატრში.

თუ ხელოვნება სიმღერაა ადამიანის უნაზეს გრძნობათა სიმებზე ახმატკბილებული, არსად ეს სიმღერა ისე წარმტაცი და დამატყვევებელი არ არის, როგორც ხელოვნების უდიდეს საგალობელში — თეატრში.

თუ ხელოვნება ლოცვაა ადამიანის მაძიებელი ბუნებისაგან გამოუცნობისადმი მოვლინებული, არსად ეს ლოცვა ისე დატვირთული არ არის საიდუმლოებითა და სიწმინდით, როგორც ხელოვნების სამლოცველოში — თეატრში.

თუ ხელოვნება ჩირაღდანია ადამიანისათვის გზის გასანათებლად, არსად ეს ჩირაღდანი ისე სხივმოსილი არ არის, როგორც თეატრში.

სათეატრო ხელოვნება არა თუ აუცილებელია ყოველი ერისათვის, ის არის საზომი ეროვნული კულტურისა.

თეატრის საკუთხეველში თავს იყრის სხვადასხვა მიმართულება და ყოველი მათგანი გამოშასხველია ერის კულტურის ამა თუ იმ თვისებისა.

ერთ დიდ ნაკლს ფეოდალურ-ბურჟუაზიული თეატრისას ის შეადგენდა, რომ მდაბიო ხალხი მისთვის არ არსებობდა: თეატრი მდაბიო ხალხს ნაკლებად ემსახურებოდა.

სასცენო ხელოვნება წარმოიშვა მდაბიო ხალხის გულში. ეს იყო ლოცვა მდაბიო ხალხის გულიდან აღმოხეთქილი მარადიული ახალგაზრდობის, მარადიული სიხარულის, მარადიული მხიარულების, შეუჩერებელი გატაცების — დიონისოს სადიდებლად.

შემდგომ თეატრმა განზე დატოვა მდაბიო ხალხი, ბევრგან დივიწყა ის.

არ დაივიწყა ის მხოლოდ სახალხო სახლის ქართულმა დრამატიკულმა დასმა.

მან დაუახლოვა თეატრი ხალხს, სცენა გადაიტანა მდაბიო ხალხში, მიზნად დაისახა ხალხის აღზრდა, ხალხის მომზადება და ხალხის განთავისუფლება ხელოვნების საშუალებით.

ვაშა სახალხო სცენის ქართველ მოღვაწეებს!

მიუხედავად მრავალგვარი დაბრკოლებისა, მტრული განწყობილებისა, გულგრილობისა და დაცინვისა ისინი ოცდაათი წლის განმავლობაში ეწეოდნენ მძიმე უღელს მშრომელი, მდაბიო ხალხის აღზრდისას და არარაობიდან ჰქმნიდნენ უდიდეს, საშვილიშვილო საქმეს.

ჩვენი უღრმესი პატივისცემა გატაცებულ, თავდავიწყებულ მუშაკებს სახალხო სცენისას!

თვითმპყრობელობის რეჟიმი სულთამხუთავი იყო როგორც ერისათვის, ისე მისი მშრომელი ნაწილისათვის. ზოგს წილად ხვდა იარაღით ბრძოლა. ჩვენმა სახალხო სცენის რაინდებმა კი გააჩაღეს ბრძოლა მხატვრული სიტყვით და განსახიერებით, მთელი ოცდაათი წლის განმავლობაში ისინი შეუდრეკელი რწმენით ჰკვერავდნენ უდიდეს ეროვნულ, მოქალაქეობრივსა და სარევოლუციო საქმეს.

ჩვენი გულწრფელი სიყვარული სახალხო სცენის რაინდებს!

ოცდაათი წლის განმავლობაში ხელოვნების ჩირაღდნებით ჰფანტავდნენ ისინი შეგნების, გათვითცნობიერების სპეტაკ სხივებს მდაბიო ხალხში და დახვესებული წყობილება ქართველი მშრომელი ხალხის შეგნებაში რევოლუციისაზე ადრე დაანგრის, რევოლუციისაზე ადრე ჩამოაყალიბეს ტიპი ქართული შეგნებული მოქალაქისა.

ჩვენი თაყვანისცემა მშრომელი ხალხის სადარაჯოზე მტკიცედ მდგომ გოლიათებს ქართული სახალხო სცენისას!

ვინ შექმნა ჩვენი სახალხო თეატრი?

ქართველი მშრომელი ხალხის საუკეთესო შვილებმა.

ვინ იყვნენ სახალხო თეატრის პირველი მსახიობები?

ჩვენი მშრომელი ხალხის შვილები.

ვინ ანგრევდა ყოველგვარ დაბრკოლებას სახალხო თეატრის გზაზე?

მშრომელი ხალხის შვილები.

სახალხო თეატრი იშვა მუშების უბანში და ოცდაათი წლის განმავლობაში ის მიუძღვის წინ მშრომელ ხალხს სრული გამარჯვებისაკენ.

დიდება ქართველ მუშებს!

## „ანთეზული ხეივანი“

და გზა მოენახე, სადაც სევდის  
წყალი მდინარებს.  
ს. აბაშელი.

აგერ ათი წელი შესრულდება, რაც აბაშელის „მზის სიცილი“ გამოვიდა.

აბაშელის პოეზია აქ მეტად თავისებურია. არის სამოქალაქო მოტივი, პირადი განცდა, სევდაც, მაგრამ უმთავრესია აღფრთოვანება კოსმოური მოვლენებით და ამ მოვლენათა გამოსახვა მეტად ლამაზ პოეტურ ფორმებში.

აბაშელი აქ ნამდვილი კერპთაყვანისმცემელია ბუნებისა, სადაც უმთავრესი ღმერთი მზე არის. მისი პირველი სტიქიონი ნამდვილი ლოცვაა მზეზე:

მზეე მშვენიერო, მნათობთ მეფეე  
ცხოველმყოფელო,  
სიცოცხლის წყაროე, საკურთხეელის  
ცეცხლო დიადო,  
ლავეარდ სიერცეში ოქროს სიმთა  
ამირთოლებელო,  
სხივოსან ზღვაო, ქვეყნის დილაე,  
ცის განთიადო!

ეს თემა აბაშელმა თუ სრულად არ ამოსწურა, ყოველ შემთხვევაში მან მოგვცა, რისი მოცემაც კი შეეძლო.

ვიწრო გზით სიარული პოეტისათვის დიდი საფრთხეა: ბოლოს და ბოლოს გამეორებას მიმართავს და მოსაწყენი გახდება.

ამიტომ აუცილებელია გზის გაფართოება: ან ახალი გზა, ან ზიკვდილი — ასეთია ხვედრი ყოველი პოეტისა, რაც უნდა დიდ იყოს ის.

აბაშელმა შესძლო ამ საფრთხის დაძლევა. ამას ადასტურებდა მისი „ანთებული ხეივანი“.

აქ დავისვენებ, შორს მიმავალი,  
რომ შემდგომ მეტის გახალისებით  
ვიმღერო, ზეცამ რაც დამავალა,  
და გავანათო ახალი გზები.

და მართლაც დასვენების შემდეგ პოეტმა მოგვცა მეორე ტომი, სადაც სხვა განცდაა, სხვა თემა, სხვა სულისკვეთება, ვიდრე პირველ წიგნში.

მე მიეყვებოდი სულის ქრუანტელს  
და ვატირებდი გულის თქმას მართალს.

ამ სტრიქონებში არის ერთგვარი დახასიათება მეორე ტომისა. თუმცა სევდის ჰანგები პირველ წიგნშიც საკმაოდ არის, მაგრამ ეს სევდაც ღიმილიანია და პოეტის ალტაცებული გული ნაზი სიმებით გადმოგვცემს სამყაროს სიდიადეს და ჰარმონიას. მეორე წიგნი უმთავრესად სულის ქრუანტელია და აკვნესებული გულის თქმა.

ზანდახან პოეტის აღმაფრენა ისევ განვლილ ოცნებებს უბრუნდება და ყურს ატკბობს მშვენიერი ჰიმნი მზის თაყვანისმცემლისა:

და მზის სიცილის დაღლილმა შუქმა  
ამ წიგნშიც მკრთალად შემოანათა.

ეს შემონათება საკმაოდ ატყვია „დილის ლოცვას“, „ცისარტყელას“, „წირვას“, „მზის ამოშვლას“, „ჩემს გზას“. ეს უკანასკნელი ლექსი ამ მხრივ მეტად საყურადღებოა და თან მეტად ლამაზი. იქვიათ იმედი, სევდა და ალტაცება, მუსიკა გლოვისა და სამსიარულო ერთიმეორესა სცვლიან.

აქ ორი აბაშელია: აბაშელი — მზის თაყვანისმცემელი და აბაშელი — სევდითა და იქვით შებყრობილი. ეს ორი აბაშელი ერთმანეთს ებრძვის და ერთხელ კიდევ იმარჯვებს პირველი.

! და ჩემ წინ დრომად აღიმართა  
! მზის ძოწეული, —  
! ათას ფერებით მოღალადე  
! ცეცხლის მარაო,  
და მე ვლოცულობ: სხივდამრეტილ  
! დღეთა მპარავო!  
შენ დამხსენ წყვდიადს და ამინთე  
! სული სნეული.

მთელი პოეზია მეორე წიგნისა ამ სტრიქონებამდე თითქმის ერთგვარი შესავალია: სწეული სული აინთო ახალი ცეცხლით და უწინარეს ყოვლისა მას სწყურია განკურნება. ამ მიზნით ის მიმართავს ჯერ ცეცხლის მახვილს, შემდეგ ცისფერ ყვავილებს. პირველი რევოლუციაა, მეორე — სიყვარული:

და ჩემს გრძნობაში სევდის ალი  
რომ კვლავ არ იშვას,  
მე გზა მივეცი დაგუბებულს  
სულის ქარიშხალს  
და ხელთ ავიღე საბრძოლველად  
ცეცხლის მახვილს.

რა თქმა უნდა, აბაშელი უნაზეს გრძნობათა და უწმინდეს განცდათა მგოსანია და არა ბრძოლისა, მაგრამ მიუხედავად ამისა, მთელი რევოლუცია და მისი ჩასახება, დასაწყისი ქარიშხალისა — იშვიათის ხელოვნებითა აქვს ასახული.

წითელი ფრინველები — რიქრაქია რევოლუციის.

წითელმა ფერიამ ცეკვით მოიარა  
ზღვები და ხმელეთი.  
წითელი ფრინველები  
დაჰფრინავენ ჰაეღში,  
ანთებული ბულბული  
სცივია ალის ფრთებიდან.  
ერთნაირი სიმღერა  
ისმის სხვადასხვა ერში.  
აგუგუნდა ქვეყანა  
ცეცხლის მღრქვეველ მთებითა!

ცეცხლის მახვილში მოცემულია უტყუარი სახე რევოლუციისა:

ქუჩა გაგიჟდა და განგაშებს  
ათას ხმიანი.  
წითელ ფრინველებს ათამაშებს  
ხალხთა მდინარე.  
რეკა მოისმის და მეზარე  
არ სჩანს ვინ არი,  
რისთვის მახვილი დათარეშობს  
ხალისიანი.  
ძალა უცნობი, მიუწვდომი  
და უჩინარი  
ახალ ქვეყნის ეტლს მიაჭროლებს  
ცეცხლის ფრთიანი.

პოეტი აქ ამჟღავნებს ერთგვარ სარწმუნოებრივ შეხედულებას რევოლუციის წარმომშობ ძალაზე:

რღვევა-შენების ქარიშხალით  
ცის შემეირველი,  
ყოველთა დროთა წინამძღოლი,  
მუდამ წარსული, მუდამ აწმყო  
და მომავალი, —  
სამყაროს წიგნში იწყებს ბრძოლის  
ახალ რვეულსა.

ფსიქოლოგია რევოლუციისა პოეტს საუცხოოდ ესმის:

და მას წყევს უთვლიან ხშირი  
განმეორებით,  
მაგრამ რღვევის სტიქიონს  
წყევია არ ეყურება.

თუ რამდენად ზედმიწევნით ჩასწვდა მგოსანი რევოლუციის ფსიქოლოგიას, ამას ამტკიცებს ლექსი — „მებრძოლს“. მეტად ნაზი და სათუთი გრძნობის პოეტი აქ შეუბრალებელია და დაუნდობელი. ყოველგვარი დაზოგვა მტრისა უარყოფილია და ყოველკითხვის გადამჭრელად მხოლოდ ხმალია აღიარებული. პოეტის სული აქ შორდება რღვევის სტიქიონს და მიმართავს მისთვის უჩვეულო სფეროს — ცისფერი ყვავილების ბაღს, ბაღს სიყვარულისას. ამ ბაღში პოეტი მეტად ლამაზი, ტკბილი, ნაზი, წმინდა და მომხიბლავია, ხან ბავშვით გახალისებული, აღფრთოვანებული, გატაცებული, ხან ტკბილი სევდით, ხან მწარე უიმედობით აღსავსე. სიყვარულის განთიადი, შუაღლე და საღამო, სიყვარულის გაღვივება, გაფურჩქვნა და დაჭკნობა იშვიათის სიცხადითა და სულის დამატკბობელი მუსიკითა აქვს გაღმოცემული.

„ცისფერ ყვავილებში“ შეყვარებული სულის ყოველგვარი რხევაა აღბეჭდილი. ალაგ-ალაგ — თუნდაც მე-50 გვ. — პოეტი მოგვაგონებს გრიშაშვილს, მაგრამ ეს მსგავსებაა მხოლოდ თემაში, გაშუქება და განცდა სრულებით სხვადასხვა გვარია.

აბაშელის გალობა სიყვარულისა — ეს არის ლოცვა შეყვარებული სულისა.

გრიშაშვილს კი უფრო ეხერხება ბორგვა შეყვარებული სულისა და ყვირილი შეყვარებული ხორცისა.

გრიშაშვილის სიყვარული უფრო ხორციელია, აბაშელისა — უფრო ზეციური.

შიშველი სხეული მეტად მომხიბლავია გრიშაშვილის პოეზიაში. აბაშელი კი წმინდა ბერივით გაურბის შიშველ სხეულს:



გშენოდა ტანის სიშიშველე,  
ვით უკოდველსა ევასა  
და გარს მეხვია სირცხვილი,  
ვით სამოსშემოხეულსა.  
სანამ შორს იყავ, — გეძახდი,  
მზიბლავდა შენი სახელი,  
ახლა შენთან მყოფს, დარცხვენილს,  
რად მტანჯავს ჩუმი ნალველი?  
ნეტავ თვალს რისთვის ვარიდებ  
აქამდის ნანატრ სხეულსა?!

სიყვარულმა არ იცის სირცხვილი — აქ უფრო ბუნებრივია: გრიშაშვილი; მაგრამ მაინც სიყვარულს ორი სახე აქვს; გრიშაშვილს უფრო იზიდავს ერთი, აბაშელს — მეორე.

აბაშელის სიყვარული ვნებას გაუბრბის, ის უფრო წმინდა ოცნებაა, ლოცვაა:

შენი სურვილი ჩემს ოცნებას  
ეურჩებოდა,  
და ჩემი გრძნობა უკუქცეულ  
ლოცვად რჩებოდა.

განიკურნა ცისფერი ყვავილების წალკოტში პოეტის სხეულა  
სული?

არა მგონია.

აქ სხვა ცეცხლი დაენტო  
და ფიქრებიც სხვა იშვა;  
სიყვარული — ელვაა  
სტოცხლობს წუთით, დროებით. —

აი რა დასკვნა გამოიტანა პოეტმა ცისფერი ყვავილების ბაღიდან. მარტოდ მარტო დარჩენილი მგოსანი ისევ თავის სევდას უბრუნდებდა, მაგრამ ახლა ეს სევდა დამძიმებულთა ცხოვრების ტვირთით, განვლილი გზით და გამოცდილებით. თუ უწინ პოეტი მიეცემოდა სევდას —

ეგ იყო სევდა სხვანაირი,  
სევდა მზიანი,  
იმედგახსნილი და თვით ცრემლში  
ხალისიანი.

ახლა კი პოეტის სევდა უფრო ღრმა და ძლიერია:

სული შემექნა უიმედო  
და ნალვლიანი.

და აი, ამ ნალველსა და უიმედობას პოეტი მიჰყავს უკანასკნელ კარებთან, იმ კარებთან, რომლის შეღებასაც ამაოდ ცდილობდა ბარათაშვილი.

როგორც ბარათაშვილს, აბაშელსაც სწყურია ცის სასწაულის ამოცნობა:

მაგრამ მოსწყურდა სულს უჩვევი  
ცის სასწაული.

ცის სასწაულს იყო მოწყურებული ბარათაშვილიც.

მე შენსა მკვრეტელს შავიწყდების  
საწყუთროება,  
გულისთქმა ჩემი შენს იქითა ეძიებს  
საღგურს, —

შიმართავდა ბარათაშვილი ცას.

სულს ესიზმრება უფსკრულს იქით  
სხივთა მკრთომელი.  
ღროს იქით მყოფი, არც მტირალი  
და არც მცინარი,  
მარადისობის უდაბნოში  
ცეცხლად მღინარი,  
იგი უცნობი, უხილავი,  
მიუწვდომელი, —

მაგრამ ყოველივე ამას შავი კარი ჰფარავს და აბაშელის ტანჯული სული ამაოდ ეჭახება ამ კარებს. აბაშელის პოეზია ლოცვაა და რაც უნდა იყოს მისი ლოცვის საგანი — მზე, წითელი ქაოსი თუ სიყვარული, — სულერთია: იმის ლოცვაში სარწმუნოებრივი შეგნება და წყურვილი ისახება; რევოლუციის ქარცეცხლში მას ესახება პირველყოფილი შემოქმედი ძალა. ფილოსოფიურ ძიებას სევდიანი სულისას ის მიჰყავს უცნობთან, უხილავთან, მიუწვდომელთან.

მისწვდება მგოსანი მიუწვდომელს?

შესაძლებელია ამის პასუხი მოგვეცეს მესამე წიგნმა.

მესმის ქუხილი, უკვე დროც არი  
გაიხსნას კარი უფსკრულისაკენ.  
აენთოს ხაზი გასაოცარი  
და გაბზარული გამოჩნდეს სარკე.

„ანთებული ხეივანი“ სარკეა აბაშელის ანთებული, მოუსვენარი და მუდამ მაძიებელი სულისა. ამ სარკეში ყოველი ჩვენგანი

დაინახავს ნაწილს საკუთარი სულსას, საკუთარ ძიებას, საკუთარ ტანჯვას, იმედს, იჭვებს, უიმედობას.

თუ „მზის სიცილში“ ფორმა არ იყო დამთავრებული, მეორე ტომში ამ მხრივ დიდი მიღწევაა, დიდი გამარჯვებაა. აბაშელის პოეზია მდიდარია მუსიკით და მისი მუსიკა ჰარმონიულად არის შეკავშირებული შინაარსთან. მეორე ტომი აფერადებულია ახალი რითმებით. ყოველი რითმა პოეტისა ქალწულსა ჰინაზეს და უმანკოებს ატარებს.

„მზის სიცილის“ წინასიტყვაობას მე ასე ვათავებდი:

„პოეტმა მეტად მოხდენილად, მეტად კარგად და ლამაზად დაიწყო და თუ ამგვარადვე განაგრძო, ფრიად საპატიო ალავს დაიჭერს ჩვენს მწერლობაში“.

სიამოვნებით უნდა აღენიშნო, რომ აბაშელმა უკვე დაიკავა საპატიო ალავი ჩვენს ახალ პოეზიაში.

1923

## ტაბილი ყმა.

უსიერი მთების უძირო ტბაში ტყის დედოფალი ცხოვრობდა — ტანაყრილი, ნატიფი, თვალგიშერა.

ის იყო ჯადოსმპყრობელი: ვინც მოეწონებოდა, მოჰხიბლავდა, მონად გაიხდიდა, დაატყვევებდა და შემდეგ გულს ამოაცილდა. მისი სრა-სასახლე მოჭედილი იყო ადამიანთა გულებით.

ერთხელ ტბის პირას ნებივრობდა დედოფალი და თავისი ჯადოთი ცდილობდა მზის დატყვევებას.

შველივით გამოხტა თმახუჭუჭა ყმა, დასტაცა ხელი ჯადოს და სწრაფად გამოტრიალდა. მშვენიერი დედოფალი გომბეშოდ გადაიქცა და დიდ ლოდს ამოეფარა.

დადის მას აქეთ თმახუჭუჭა ყმა და თავისი ჯადოთი ყველასა ჰხიბლავს, ატყვევებს, იმონებს.

ვინ არის ეს ყმა?

ჩვენი ვანო სარაჯიშვილი...

რა არის ეს ჯადო?

მისი მომხიბლავი ხმა.

ჩვენ ვამაყობთ ვანო სარაჯიშვილით მარტო იმიტომ კი არა, რომ ის ხმაჯადოსანია, —

იმიტომ კიდევ, რომ ის ჩვენია, ჩვენი სისხლი და ხორცი, რომ: ნასში ქართველი ერის მზოური სისხლი სჩქევს.

ვანო სარაჯიშვილი ქართული მელოდიის ავთანდილია:

მიიმღერის ხმასა ტკბილსა.

იშვიათი სიტკბო ხმისა, იშვიათი მოქნილობა, იშვიათი სიღრბილუე, სინაზე და მეტისმეტად მგრძნობიარება:

მისსა ხმასა თანა ხმაცა

ბულბულისა ჰგვანდის ბუსა.

თილისმიანი ხმა, რომელსაც შეუძლია დასვედიანებული სულის გადახალისება და გულის კმუნვათა შეცვლა ყვავილებით, —თილისმიანი ხმა, რომელსაც შეუძლია მოღერებული მახვილის ჩაბრუნება და გაბოროტებული გულის დარბილება, დამშვიდება და მოთვინიერება, — აი ვანო სარაჯიშვილი.

მისი ხმა ზღვის აბობოქრებულ ტალღებს მიაყუჩებს, ქარიშხალს დააწყნარებს და მინდვრის აბიბინებულ მოლს აზვირთებულ ზღვის ტალღებად გადააქციეს; დედამიწას დაგავიწყებინებს მისი ყოველდღიური საზრუნავით და ცისაკენ გაგაქანებს, მეორე წამს ცხოვრების სიღრმეში ჩაგახედებს და საკაცობრიო სიტკბოებით შეგბოჭავს; უდარდელ ადამიანს ფიქრთა ზღვაში ჩასძირავს და დარდით შეპყრობილს იმედის სხივებით მოუქარგავს სულს; მისი მომხიბლავი ხმა ცხოვრებას კუქყუს აცლის და ყოველივე სპეტაკს, კეთილშობილს აღვივებს.

—რა ლამაზი, რა მშვენიერია სიცოცხლე! —ჰკანკალებენ თქვენი გულის სიმები, როდესაც ვანო სარაჯიშვილს უსმენთ; გიყვართ ყოველივე, ურიგდებით თვით მოსისხლე მტერსაც კი და ამავე დროს აღარც სიკვდილის გეშინიათ.

უნაზეს გრძნობათა გაღვიძება, უწმინდეს ზრახვათა წამოშლა, უკეთილშობილეს მისწრაფებათა აგიზგიზება და უსაზღვრო ოცნების აღძვრა, —რა აღვილად ეხერხება ყოველივე ვანო სარაჯიშვილს!

რა ესმოდის მღერა ყმისა,  
სმენად მხეცნი მოვიდიან;  
მისვე ყმისა სიტკბოსაგან  
წყლით ქვანიცა გამოსხდიან;

და ამ თხუთმეტი წლის მანძილზე ადამიანები მოდიან, რომ მოისმინონ, განიკურნონ, დასტკბნენ და გაჰკვირდნენ.

ვანო სარაჯიშვილიც თავისი ჯადოსნური ხმით ყველასა ჰხიბლავს, ყველას იმონებს, ყველას ატყვევებს ამ თხუთმეტი წლის გზაზე.

რაკი ერთხელ მოჰკრავთ ყურსა, გინდათ სულ გესმოდეთ, სულ, სულ ეს ტკბილი, ეს მთელი სხეულის მომშლელი, მთელი სულის გარდამქმნელი, ფიქრთა ამშლელი და გრძნობათა დამშაქვრელი ხმა.

ვანო სარაჯიშვილის ხმა უწმინდესი ლოცვაა საკურთხეველზე საკაცობრიო მშვენიერებისადმი.

ვანო სარაჯიშვილის ხმა მომხიბლავი ზღაპარია, ქართველი

ერის სადიდებლად, ქართველი ერის სანუგეშებლად და ასამაღლებლად მოვლენილი.

ვანო სარაჯიშვილის ხმა ქართველი ერის ბუნებაა — სინაზით დაფერილი, სევდით დატვირთული, იმედით გასპეტაკებული და რწმენით გაქანებული.

ვანო სარაჯიშვილმა მშობელი ერის ბედს შეურია თვისი ბედი და თხუთმეტი წლის განმავლობაში საარაკო ხმებით ჰფანტავს იმის უბედობას და ნეტარების სხივებით უქსოვს საბედნიერო გვირგვინს. ვაჟა ჩვენს ვანოს!

1923

## ქართული ჟურნალი

ისეთი ჟურნალის გამოცემა, რომელიც თავის თავს გაამართლებს, ყოველთვის ძნელი იყო.

ჟურნალში თავმოყრილია სხვადასხვა განყოფილება; მკითხველი საზოგადოება კი ჭრელია. ამიტომ ჟურნალმა უნდა დაჰფაროს ეს სიჭრელე, მისცეს ყოველ მკითხველს ის, რაც მისთვის საყურადღებოა; ამავე დროს ყოველი განყოფილება ჟურნალისა უნდა იყოს სრული და ერთიმეორესთან ჰარმონიულად შეთვისებული. ყოველივე ეს ითხოვს დიდ ცოდნას, დიდ ერუდიციას, დიდ შრომას, დიდ განვითარებას და დიდ ესთეტიურ ცნოსვას.

ამიტომაც სათაურით ჟურნალი ბევრი ყოფილა და არის სხვაგან, ნამდვილი ჟურნალი კი ცოტა იყო და არის.

ნამდვილი ჟურნალისათვის ჩვენში არასოდეს არა ყოფილა საქმალად ხელის შემწყობი პირობანი.

ვერც ერთი ის ჟურნალი, რომელიც ჩვენში გამოდიოდა, საფუძვლიან კრიტიკას ვერ გაუმკლავდებოდა. ზოგიერთი აუცილებელი განყოფილება ან სულ არა ყოფილა ჟურნალში, ან სრულებით მიღებული სახე ჰქონია, ზოგიერთი განყოფილება კი შემთხვევითი ხასიათის იყო.

ჟურნალში ერთი მთავარი ადგილი უჭირავს უცხოეთის ლიტერატურას. მან უნდა გაუშუქოს მკითხველს თანამედროვე უცხოეთი, ახალი მიმდინარეობა იმის აზროვნებასა და ხელოვნებაში, მკვეთრი ნიმუშები მისი წარსულიდან.

ჩვენს ძველ ჟურნალებში ეს დიდი განყოფილება მუდამ უფერული იყო. ვისაც რა მოეწონებოდა, იმას სთარგმნიდა და ჟურნალის რედაქციას გარკვეული გეგმა არა ჰქონდა, ან ჰქონდა, მაგრამ ვერ ახერხებდა განხორციელებას.

თუ გავითვალისწინებთ მრავალ დაბრკოლებას —მატერიალურს, ფსიქოლოგიურს და სხვ., უნდა გულახდილად ვთქვათ, რომ ჟურნალ „კავკასიონის“ გამოცემა დიდი გმირობაა, დიდი კულტურული საქმე.

ასეთი ჟურნალი დღევანდელ პირობებში დიდი მიღწევაა, მეტად სანუგეშო მოვლენა და დიდი ეროვნული საგანძური.

ეს ჟურნალი ნაყოფია მარტო დიდი შრომისა და ცოდნის კი არა, — დიდი მხატვრული გემოვნებისა, დიდი მსხვერპლისა და დიდი სიყვარულისა.

პატივცემულ რედაქტორს დღემდე ვიცნობდით, როგორც ფრიად ნიჭიერ მკვლევარს, რომელიც ფარდასა ჰხდის ჩვენი წარსული კულტურის საიდუმლოებას და შუქსა ჰფენს ისეთს კუნძულებს, რომლებიც მტკიცედ იყვნენ ჩვენს თვალწინ გადაარაზულნი.

მაგრამ მასში ყოფილა იშვიათი ნიჭი ნამდვილი ჟურნალის იშვიათი რედაქტორისა.

ჟურნალი იზიდავს მკითხველს ჯერ თავისი გარეგნობით, ზომით, ფორმატით, ქალაღმით, შრიფტით და საერთოდ მთელი გარეგანი სილამაზით. ამ სილამაზეში არ არის შეტანილი არც ერთი ხაზი, შეუფერებელი სიდინჯისა და საფუძვლიანობისათვის. აქ არის სილამაზე, შეერთებული სისადავესთან, სიდინჯესთან და სიღარბაისლესთან.

სილამაზე მშვიდი, დამკდარი, გამობრძმედილი ქანდაკებისა.

ჟურნალი არის წმინდა სამეცნიერო და სალიტერატურო. აქ არა აქვს ადგილი არავითარ ვიწრო ჯგუფურ მიმდინარეობას, ერთი სიტყვით, ყოველივე იმას, რაც ქართველ მწერლებს თავს კი არ მოუყრიდა, არამედ ერთმანეთს დააშორებდა.

ჟურნალი მიზნად ისახავს ერთად შეჰკრიბოს ქართველი მწერლები და გააშუქოს ქართული კულტურის ყოველი დარგი.

„სათათბირობ ძნელთა თათბიროთა“ —

მაგრამ სიძნელიდან ღირსეულად გამოდის რედაქტორი. ჟურნალი განიყოფება რამდენიმე ნაწილად და თვითეული მათგანი იძლევა მდიდარ და საუცხოოდ შერჩეულ მასალას.

რომელი დარგიც უნდა აიღოთ, ყველა დადალულია დიდი მოფიქრებით, გაზომილი მიზნით, შრომით, სიყვარულით და ნიჭით.

ქართულ ლიტერატურას ფარდა ეხდება კოტე მაყაშვილის ლექსით. აქ შეკრილია ლექსთწყობის ახალი ნაკადულები: თავისებური რიტმი და მეტრი (პენტამეტრი) ისეთს მუსიკალურ ხმაურს იძლევიან, თითქოს ფაფარაყრილი მერანი მიჰქრისო.

მთელი ლექსიდან სიახლე, იმედიანობა და გაუტეხელობა მოჰყვის.

გრიშაშვილის ლექსში „ტფილისის მიწა“ გარეგანი სილამაზე აზრის სიმშვენიერეს ეჯიბრება და ტკბილი, მათრობელი მელოდია სმენას ჰხიბლავს.



გრიშაშვილი თბილისის რაინდია, თბილისზე შეყვარებული. პოეტს ჰხიბლავს, ალექსებს და სტანჯავს თბილისი.

შენი ვარ, შენთვის მოვკვდები  
შენზედვე მგლოვიარეო! —

აკაკის სიტყვებში იხატება თბილისზე შეყვარებული გრიშაშვილი.

კეთილშობილი და საღი გრძნობის მოუწყინარი სურნელება მოჰქრის მთელი ლექსიდან, სურნელება, რომელიც გულის სიმებს ტკბილად არხევს და ეს რხევა მთელ სხეულში ვრცელდება.

შანშიაშვილის პოეზიას თან დასდევს სითამამე, სიღარბაისლე, ხილინჯე, ზშირად ტალკვესიანობა და სიხალისე.

მისი „დალი“ საუცხოო აფერადებაა პოეზიის შემოქმედებისა ხალხურ თქმულებებში. მდიდარი აზრი, მითოლოგიური კოლორიტი, ხალისიანი და ლალი ტონი, — ყოველივე ეს ხომ ჩვენი სამშობლოს ბუნების ფერადები და ხაზებია.

„დალი“ მთელი ჩვენი მითოლოგიაა და გონებას ჰხიბლავს აქ ბევრი ახალი სიტყვა, ახალი სახელი, სმენას კი — ანკარა ბგერათა წხრიალი, იუმორით აცინცხალებული.

„უბედური რუსის“ მხოლოდ ნაწილია დაბეჭდილი, ამიტომ უმჯობესია მოეუცადოთ დანარჩენს. მაგრამ დასაწყისივე ამტკიცებს, რომ ის იქნება ერთი საუკეთესო რომანი ჩვენს მწერლობაში.

ერთხელ იღია ზურაბიშვილი წერდა შალვა დადიანზე: მისი ნიჭი უფრო რომანშია ძლიერი, ვიდრე სცენაზე და სასცენო ხელოვნებაშიო.

მართლაც „უბედურ რუსში“ მძლავრი ნიჭი სჩქეფს. მოკლე, მკაფიო და მკვეთრი დახასიათება, დახვეწილი, დაწმენდილი, ნამდვილი ლიტერატურული ენა კლასიკურ სილამაზეს აძლევს რომანის დასაწყისს.

რა თქმა უნდა, რომანი არ წარმოადგენს მეცნიერულ გამოკვლევას, მაგრამ ამ შემთხვევაში — მგონია რუსეთის თავადის მოწვევა თამარის საქმროდ მეტად იოლად არის ახსნილი.

იმერეთის წვრილფეხა აზნაურობის ყოფა-ცხოვრებას დავით კლდიაშვილისთანა მხატვარი არა ჰყოლია და აღარც ეყოლება. დავით კლდიაშვილი გრძნეული ნიჭია, რომელსაც გასათოცარი სიადვილით ეხერხება ხასიათისა და ცხოვრების მთავარი ძარღვის აღმოჩენა. იმის ყოველ სტრიქონში მოძრაობაა, დუღილი და ამ მოძრაობის გამოაშქარავება კლდიაშვილის განსაკუთრებული თვისებაა.

მისი „კიბოთუ მეშველიძე“ პატარა ნაგლეჯია ცხოვრების სურათისა. ჩვენ ველით მისგან მთელ სურათებს მორიგ ნომრებში.

დავით კლდიაშვილს დიდძალი მასალა აქვს დაგროვილი, დიდი

დაკვირვება, და ის უნდა იყოს უზრუნველყოფილი, რომ დაჯდეს და ეს მასალა დაამუშაოს.

ლეო ქიაჩელი გამოცდილი ბელეტრისტიკა. მას აქვს თავისი სიუჟეტები, სტილი და მეტრი. დახვეწილი ენა, მოკლედ თქმა, სულიერ განცდათა სისწორით ასახვა, ხან ნაზი სევდა, ხან კი იუმორი და ირონია აფერადებენ იმის პატარა მოთხრობებს.

სიცოცხლე, სიხალისე და იუმორი ბრწყინავენ „კრიმანქულში-აყ“, სადაც ტრადიციული და სასაცილო საუცხოოდ არიან ერთმანეთში შეხამებული.

აბაშელის ლექსში „უძილო ღამე“ ტყბილად მოდუღუნე რომანტიზმია და ნაზი, დარბაისლური ფილოსოფიური სევდა, ცხოვრების წარმავლობითა და ამაოებით გამოწვეული. აქ ისმის ბარათაშვილისა და ვაჟას მოტივი.

ლექსი დაწერილია პოეტისავე „შორეული ნაპირის“ რიტმითა და მეტრით და დადალულია მწარე განცდით.

რითმა მუსიკალურია, მდიდარი, ორიგინალური და ბევრგან — ახალი.

კონსტანტინე ჭიჭინაძემ ბევრი საფეხური გაიარა და ნიჰთან ერთად დაუღალავი შრომით დიდი მიღწევა მოგვცა.

ამას ადასტურებს მისი „რიონის აპოლოგია“.

თემა, რომელიც პოეტს აუღია, მეტად ძნელია: რიონი, მისი ფაფარაყრილი დაქანება და მდებარეობა სათავედან მოყოლებული ზღვაამდე მეტად დიდი სურათია და ძნელად დასაგემელი. დახატული სურათი დიდებულ შთაბეჭდილებას სტოვებს და „რიონის აპოლოგიაში“ პოეტი სრულებით გამარჯვებულია. მე პირადად მეუცხოვება ცოტაოდნად უცხო სიტყვათა სიჭარბე.

„ყრმაო პოეტო, უღვთო იყო შენი სიკვდილი. ვინ უწყს რამდენა საუნჯენი დავკარგეთ ჩვენა!“ — ეს სიტყვები ილიასი სანდრო ცირეკიძესაც შეეფერება და ნიკოლოზ ბარათაშვილი არ მეტყვის სამდურავს ასეთი განაწილებისათვის: სანდრო ცირეკიძე უდროოდ გაგვმორდა და თან წარიტანა დიდი შესაძლებლობა, დიდი იმედები.

„პირიმზეს“ წინ უძღვის ალი არსენიშვილის წერილი. არსენიშვილს აქვს საკუთარი სტილი და ხასიათი წერისა, ხშირად მისი მოზღვაებული ფიქრი და გრძნობა სიტყვებში აღარ ეტევა და მაშინ მისი აზრი ბუნდოვანია.

სანდრო ცირეკიძეს მოხდენილი ხაზებით ჰხატავს არსენიშვილი, მისი შედარებანი და პროფილი უდროოდ დაკარგული ნიჰისა საუცხოოა.

თვითონ „პირიმზე“ სუსტი ნაწარმოებია. არის აქ ჩახაზვა ორი-

გინალური შემოქმედებისა, თავისებური ცდა, სიახლე ცხოვრების ზოგი კითხვების გაშუქებაში, მაგრამ საერთოდ აკლია სიმძლავრე და ის ზვიადობა, რომელზედაც ლაპარაკობს ალი არსენიშვილი.

ვალერიან გაფრინდაშვილის „ოთახი — ბალდახინი“ მეტად ორიგინალურია და აელვარებული ლამაზი და ახალი ასონანსებითა და კონსონანსებით.

ხოლო მთელ კონცეფციას ლექსისას, აზრის მთელ მიმდინარეობას არ ეგულება შაჰის სრულიად მოულოდნელი შემოქრა:

მე დავიჩოქე წვერშეღებოლ შაჰის წინაშე.

თანამედროვე პოეზიაში არის მიმდინარეობა ჩვეულებრივი ლოგიკის გადალახვისაკენ, მაგრამ პირადად მე მგონია, ასეთი მიმდინარეობა ყალბი და დღენაკლულია.

ნიკო ლორთქიფანიძის „ხელოვანთა ყავახანა“ ბანს აძლევს გრიშაშვილის „ტფილისის მიწას“.

„ტფილისის მიწა“:

არ არის ქვეყნად ტფილისის გარდა  
სხვა უფრო მძაფრი და ნაზი მხარე.

„ხელოვანთა ყავახანა“:

„ტფილისი, აი სად უნდა გადადნეს და გადადუღდეს ქართული სულიც და ქართული გონებაც“.

„ხელოვანთა ყავახანა“ დაუმთავრებელია და მისი დაფასება ნაადრევია, ხოლო აქ იგივე უნდა ვთქვათ, რაც „უბედურ რუსზე“: უდავო ნიჭი მეტყველებს.

ნიკო ლორთქიფანიძემ უკვე გაავლო თავისი ხაზი ჩვენს მწერლობაში და მას ახასიათებს როგორც სიუჟეტის ორიგინალობა და თავისებური დამუშავება, ისე სტილი და საკუთარი ხასიათი წერისა. მოკლედ თქმა, მკვეთრი დახასიათება რამდენიმე მოხაზვით, გამოკვეთილი და ნათელი სიტყვა, ღრმა დაკვირვება და წმინდა ლიტერატურული ენა — აი ნიკო ლორთქიფანიძე.

მე მინდა მას გაეუმეორო მისივე სიტყვები თბილისზედ: ასეთი მწერლის სულიც და გონებაც აუცილებლად უნდა გადადუღდეს ტფილისში, ამას მოითხოვს ინტერესი ჩვენი მწერლობისა, — მარტო მწერლობაც არა...

შალვა კარმელის „მკვლევრობა სონეტში“ მთვარის შუქშია დაფერილი, მაგრამ ეს შუქი გაფრინდაშვილის ეკუთვნის.

ვახტანგ კოტეტიშვილის წერილში „ალექსანდრე ყაზბეგი“ დიდი ცოდნაა, დიდი შრომა, დიდი სიყვარული და დიდი მიღწევა ყაზბეგის ამოცნობაში.

ვახტანგ კოტეტიშვილი მარტო ნიჭიერი მხატვარი კი არ არის

ყაზბეგის სურათისა, მისი გატაცებული და მოსიყვარულე დამცველია. ინტერესი ყაზბეგისადმი განსაკუთრებით იზრდება ამ ბოლო ხანებში და აქ უსათუოდ არის დიდი ღვაწლი ვახტანგ კოტეტიშვილისა, რომელსაც ერთი მაგარი მოქნევა კიდევ სჭირია ყაზბეგის შუბლის სრული გადაწმენდისათვის.

უცხოეთის ლიტერატურა იწყება ჟურნალში შარლ ბოდლერიტ, რომლის „ჰიმნი მშვენიერებას“ თარგმანი ვალერიან გაფრინდაშვილს ეკუთვნის.

ბოდლერი უდიდესი პოეტია, ქართველი მკითხველი მას ნაკლებად იცნობს. ამიტომ კარგი იყო, რომ როგორც მას, ისე ვერჰარნს, ანატოლ ფრანსს წინ უძლოდეს იმგვარივე შინაარსის წერილები, როგორც ომარ ხაიამის რუბაიებს.

ვალერიან გაფრინდაშვილი იშვიათი მთარგმნელია; მას ადვილად ეხერხება ორიგინალის ღირსების უნაკლოდ გადმოცემა და დაცვა როგორც სინამდვილისა, ისე სურნელებისა, ტონისა და სილამაზისა.

ამ შემთხვევაში „ჰიმნი მშვენიერებას“ თარგმანი საუცხოო და უნაკლოა.

ემილ ვერჰარნი წარმოდგენილია „ქარის ქებით“, რომლის თარგმანიც კონსტანტინე ჭიჭინაძეს ეკუთვნის.

ჭიჭინაძე სტიქიონს ეთამაშება. თუ საუცხოოა ასახვა სტიქიონისა „რიონის აპოლოგიაში“, არა ნაკლებ ლამაზად გადმოგვცა მან ვერჰარნის ქარის სტიქია.

არც ერთ სიტყვაში არ მოსჩანს ნიშანი ნაძალადევობისა. სინამდვილით გადმოცემა, დახვეწილი, დაწმენდილი და მუსიკალური რითმა — აი ღირსება თარგმანისა.

შემდეგ ჟურნალში მისდევს პოლ კლოდელის „წმინდა საკითხავი“ — თარგმანი A.S-ისა. თარგმანი კარგია, ენა — საუცხოო, არ ვიცნობ ორიგინალს და ამიტომ არ ვიცი, არის იქ თუ არა რითმა. ხოლო ლექსის ტონს ურითმობა სრულებით არ ეგუება. იქ, სადაც არის ლოცვა, იღუმალ გრძნობებში სულის დაწმენდა და დარბილება, რითმა აუცილებელი აკომპანიმენტია, რადგანაც ის აძლიერებს, აცხოველებს შესაფერ განცდას.

ანატოლ ფრანსის „პროკურატორი ურიასტანისა“ წმინდა ლიტერატურული ენით არის თარგმნილი. მოთხრობა წარმოადგენს უნაკლო პორტრეტს რომაელი წარჩინებულისას; ეს წარჩინებულია პინციუს პილატუსი ანუ პილატე. შ. შ.-ს სახით ანატოლ ფრანსს ღირსეული მთარგმნელი აღმოსჩენია.

შემდეგ იწყებიან საფრანგეთის ლიტერატურის ახალი მიმდინარეობის წარმომადგენლები: ჟიულ რომენი, გილიომ აპოლინერა.

ქან კოკტო, ბლეზ სანდრარ. თარგმანებს წინ უძღვის მოკლე დახასიათება ავტორებისა. ქართველი მკითხველი ნაკლებად იცნობს თანამედროვე ძიებას ევროპის ხელოვნებაში, დღემდე მას სიმბოლიზმი და ფუტურიზმი ერთიმეორისაგან ვერ გაურჩევიან და ამ ძიების წარმომადგენელთა გადმოთარგმნა უფრო ვრცელი დახასიათებით ფრიად საჭიროა და სასარგებლო. თარგმანი და განმარტებანი ეკუთვნის Petronius-ს, რომელსაც საუცხოოდ შეუსრულებია დასახული მიზანი.

ბლეზ სანდრარის „კოშკი“ ისე საუცხოოდ არის ნათარგმნი, რომ მკითხველს მარტო ამ ერთი ლექსით შეუძლია იქონიოს წარმოდგენა ფუტურიზმზე.

ექსპრესიონიზმი დღეს ლიტერატურული მოდაა, გერმანიიდან მოვარდნილი და საუცხოოდ ახასიათებს დღევანდელი ადამიანის სულის სიმტკიცეს, ფოლადის ნებას, სიდიადეს და გაუტეხელობას. აქ არის ფსიქოლოგია არა ლაჰრისა, მხდალისა. გატეხილისა და ძაბუნისა, ჯაბანისა, არამედ რვალივით მაგარი ადამიანისა, რომელსაც ყოველგვარ განააცდელში თან დასდევს სიმამრე, იმედი საკუთარი თავისა და შეუჩერებელი გაქანება, ყოველგვარ დაბრკოლებათა გამამთელავი.

მსოფლიო კლასიკოსების უქონლობა არა თუ დიდი ნაკლია, დიდი სირცხვილია, უნდა ვთქვათ აშკარად და გამოტეხილად.

ერთ ასეთ ნაწარმოებს წარმოადგენს გოეთეს „ფაუსტი“, რომლის თარგმანიც უკისრია იბერიელს. დიდი შრომა, დიდი ენერჯია დაუხარჯავს პატივცემულ მთარგმნელს და ღირსეულად დაუძლევიან ეს მეტად ძნელი, მძიმე და რთული საქმე. თუ იბერიელმა ბოლომდე ასე მიიტანა თავისი ტვირთი და დიდი მოვალეობა, უდიდეს სამსახურს გაუწევს ქართულ კულტურას და გაამდიდრებს ჩვენს მწერლობას ერთი უდიდესი საგანძურით.

ედგარ პომ მთელი თავისი მწველი აზრები, სულის კვნესა, სევდა მარადი „ყორანში“ ჩააქსოვა; აქ ყოველი სიტყვა, ყოველი სტრიქონი სისხლით არის დაწერილი. ამ სისხლში სულია პოეტისა.

„სხვისი სისხლის ამოცნობა ძნელი არის“, — ამბობს ზარატუსტრა, მაგრამ პოეტმა კონსტანტინე ჭიჭინაძემ მოგვცა ისეთი საუცხოო თარგმანი, რომ მკითხველს აღარ გაუჭირდება ედგარ პოს სისხლის ამოცნობა და სულის წაკითხვა. იშვიათია ასეთი ხელოვნებით, მშვენიერებითა და ოსტატობით შესრულებული თარგმანი. კონსტანტინე ჭიჭინაძე ამ თარგმანში ბრწყინვალედ გამარჯვებულია და ზვიადად გამართული. საუცხოო ძელოდციას ჰქმნიან მისი შინაგანი და გატყორცნილი რითმები.

იგავი „სიჩუმე“ დამახასიათებელია ედგარ პოს შემოქმედებისათვის და ირაკლი ტატიშვილის თარგმანი უნაკლოდ არის შესრულებული.

ომარ ხაიამის რუბაიებს წინ უძღვის რედაქტორის წერილი, რომელიც ნათელსა ჰყენს ქართველი მკითხველისათვის თითქმის სრულებით უცნობ მგოსანს საშუალო საუკუნეების სპარსეთისას. მიუხედავად ასეთი სიძველისა, რუბაიები თანამედროვეობის შთაბეჭდილებას ახდენენ. თარგმანი ეკუთვნის იუსტინე აბულაძეს და, თქმავარ უნდა, ზედმიწევნით გამოჰხატავს დედანს.

სასურველია, რომ პოეტურ თარგმანში, რომელსაც გვპირდება რედაქტორი, დაცული იყოს ხაიამის მეტრი, სტილი, რიტმი და რითმის საერთო ხასიათი.

ოვანეს თუმანიანი უყვარს ქართველ საზოგადოებას, რადგანაც ის იყო კეთილშობილი პიროვნება, უყვარდა საქართველო და თავის თავსა სთვლიდა საქართველოს ერთგულ მოქალაქედ.

მისი შესანიშნავი ლექსი „ერთი წვეთი თაფლი“ გადათარგმნილია გრიშაშვილისაგან, რომლის სახელიც თავისთავად ლაპარაკობს თარგმნის ღირსებაზე.

თურქული ხალხური პოეზიის ნიმუში მკრთალია. „რაქბადინ ბეულადის“ პოეტურ ღირსებებზე ვერას ვიტყვი, რადგანაც პროზით არის თარგმნილი.

მთიელთა პოეზიას არ ვიცნობთ და რედაქცია ძალიან კარგს იზამს, თუ ჩვენი ახლო მეზობლების სულში ღრმად ჩავგახედებ.

ლექური ხალხური ლექსის თარგმანი გრიშაშვილის მიერ შესრულებულია უნაკლოდ.

კოტე მარჯანიშვილის წერილი ქართულ თეატრზე მეტად საყურადღებოა.

პატივცემულ ავტორს ვერ დავეთანხმებით ჩვენი თეატრის წარსულის დაფასებაში. რა ვუყოთ, რომ ჩვენი დრამატურგების პიესები ევროპელი მწერლებისას მიემსგავსებიან! ასეთი მსგავსება აუცილებელია. სამაგიეროდ მათ შეიტანეს ქართული სული, ქართული ტემპერამენტი, იუმორი, გადაშალეს ქართული ყოფა-ცხოვრება. აი ეს მხარე ავტორს უყურადღებოდ აქვს მიტოვებული და მთავარ ყურადღებას პიესის არქიტექტონიკას ანიჭებს, თორემ როგორ ვერ დაინახავდა, რომ ერისთავიც, ცაგარელიც სამშობლო ნიადაგზე არიან დაყრდნობილი?

ჩვენს დრამატიულ ხელოვნებას და მწერლობას განახლება ესაქიროება; აუცილებელია ახალი ძიება, ახალი გზები, — ეს დებულებანი ავტორისა უდავოა.

ვან-დიკი იძლევა მოქანდაკე იაკობ ნიკოლაძის შემოქმედების დახასიათებას და იმის პორტრეტს.

ქართულ სინამდვილეში ნიკოლაძე დიდი ხელოვანია და ღირსეული მოქალაქე.

პროფ. დიმიტრი არაყიშვილის „ქართული ხალხური მუსიკა“ არკვევს ქართული მუსიკის ბუნებას, ხასიათს, ევოლუციას, თავისებურებას და იმ თავისებებს, რომლითაც ის განირჩევა სხვა ერთა მუსიკისაგან.

არაყიშვილი დიდად მცოდნეა, განვითარებული და განათლებული მუსიკოსია და ყოველი მისი გამოკვლევა ჩვენთვის მეტად მნიშვნელოვანია.

ქართული მუსიკა უსათუოდ არის ჩვენი დიდი გამარჯვება და ჩვენი სიამაყე, რომელსაც ჩვენ თამამად მივიტანთ განათლებული ერების საერთო კულტურის სამსჯავროს წინაშე.

ფილოსოფია წარმოდგენილია პლატონით, რომლის „კრიტონშიაც“ დახატულია სოკრატის ზვიადი და ბრწყინვალე პორტრეტი. „კრიტონს“ აქვს უაღრესი მნიშვნელობა ყოველი დროისათვის; ასეთი ნაწარმოები მარადიულია, დაუბერებელი და მისი საუცხოო თარგმანი ეკუთვნის სიმონ ყაუხჩიშვილს.

ირაკლი ტატიშვილის „საკია-მუნი“ დიდი ცოდნითა და ერუდიციით არის დაწერილი და იძლევა სწორ სახეს ამ იშვიათი ფილოსოფიისა და სარწმუნოების დამაარსებლისა და მისი მოძღვრებისას. ხოლო მარადისობის დახშული კარი საკია-მუნის არ გაუხსნია და ვერც გახსნიდა, რადგანაც საერთოდ მისი გახსნა შეუძლებელია.

მეტად საინტერესოა პროფ. გრიგოლ წერეთლის „ალკეო და საფო“. ალკეოს მკითხველი არ იცნობს, საფოს — კი, მაგრამ ამ გენიალურ პოეტ ქალსაც ვიცნობდით უფრო სახელით, ვიდრე მისი შემოქმედებით. აღნიშნული წერილი ფარდასა ჰხდის და სრულიად ახასიათებს ამ ორ უბადლო ლირიკოსს ძველი საბერძნეთისას. ალკეოს ბედი ცოტათი წააგავს ჩვენი პოეტის ჩახრუხადის ბედს, რადგანაც ორივე გარდაიხვეწა სამშობლოდან; მაგრამ მიზეზი ამ გარდახვეწისა სხვადასხვა იყო და სხვადასხვა იყო მათი მდგომარეობაც სამშობლოს გარეთ. წერილს დართული აქვს საუცხოო თარგმანი პოეტ ჰიქინაძის მიერ და მკითხველი სრულად ეცნობა ამ ორ სახელოვან პოეტს ძველი კულტურისას.

აკადემიკოს ნიკო მარის წერილი წარმოადგენს ერთ უძველეს ქართულ ტექსტს და იმის განმარტებას.

ტექსტში გატარებულია მისტიური ქება და განდიდება ქართული

ენისა. ტექსტი ამტკიცებს: როდესაც ქრისტე მეორედ მოვა, უკანასკნელი განსჯა ყველასი ქართულ ენაზე შესრულდება.

ეს ტექსტი საინტერესოა აი რა მხრით: ცხადია, იმ ხანებში, ე. ი. მეათე საუკუნის მიწურულში, ქართველი ერი თანდათან წელში იმართებოდა, მაგრდებოდა, ძლიერდებოდა, მის წინ განვითარების დიდი პერსპექტივები იშლებოდა. სწორედ ამისი ამოძახილია ტექსტშიც.

სამეცნიერო ნაწილს ჟურნალისას ამშვენებს პავლე ინგოროყვას „ჩახრუხაის-ძე“, რომელიც წარმოადგენს მაღალი ღირსების დიდ მეცნიერულ შრომას.

პატივცემული ავტორი ნამდვილი კოპერნიკია ჩვენი წარსულისა და ისეთს ბნელეთში შეიტანა სინათლე, სადაც ჩვენ იმედიც კი არა გვქონდა რისიმე დანახვისა.

ჩახრუხაისძე მეტად დიდი სახელია ჩვენს მწერლობაში და ამავე დროს არაფერი ვიცოდით ამ მგოსანზე. დღეს პავლე ინგოროყვა ნათელსა ჰფენს ამ პიროვნებას და გასაოცარი სისწორით და დაწვრილებით აგვიწერს იმის ცხოვრებასა და მოღვაწეობას. ჩვენი წარსულის შესწავლისათვის ამ გამოკვლევას მეტად დიდი მნიშვნელობა აქვს და მისი წაკითხვა სავალდებულოა ყოველი შეგნებული ქართველისათვის.

ის გზა და მეთოდი კვლევისა, რომელიც ასე მომარჯვებული აქვს პავლე ინგოროყვას, მეტად ნაყოფიერი გამოდგა და უკვე დიდი მიღწევა მოგვცა სულ მოკლე ხნის განმავლობაში.

საინტერესოა იაკობ ნიკოლაძის წერილი როდენზე, რომელმაც მარმარილოს სული ჩაუდგა და აამეტყველა ისე, როგორც არ აუმეტყველებია არავის თანამედროვე ხანაში.

ალექსანდრე ყაზბეგის წერილების გამოქვეყნებას მეტად დიდი მნიშვნელობა აქვს, რათა ბოლო მოეღოს იმ მითქმა-მოთქმას და კორიებს, რომლებიც შავი ყორნებივით გარს ახვევია ამ დიდი ბელეტრისტის სახელს.

ჟურნალი თავდება თვითური მიმოხილვითა და ბიბლიოგრაფიული განყოფილებით. ჟურნალში იმდენი მასალაა, რომ მისი ვრცელი განხილვა ერთ ჟურნალს დაიჭერდა. მასალა მეტად მიზნიანად არის შერჩეული, ფრიად საყურადღებოა, დიდი ღირსებისა და მნიშვნელობისაა და პატივცემულმა რედაქტორმა სრულიად დაიმსახურა შოთას სიტყვები:

„შაბაშ სიტყვა, შაბაშ კაცი, შაბაშ საქმე მისგან ქმნილი!“



## განვლილი სეზონი ქართული აკადემიური თეატრისა

განვითარების როგორ საფეხურზედაც უნდა იდგეს ერი, თეატრალობა იმის თვისებას და მოთხოვნილებას შეადგენს.

როდესაც ველურ მდგომარეობაში მყოფი ადამიანი სახეს ისახიჩრებს, ცხვირის ნესტოში ფრინველის ფრთებს იყრის, ამაში უსათუოდ არის დიდი ნაწილი თეატრალობისა.

ყოველი ადამიანი ცხოვრებაში მსახიობია:

ის ცდილობს ყველას ან ვისმე აჩვენოს, წარუდგინოს თავი ისეთად, როგორიც მას სურს იყოს.

ვინც პირველად ტანისამოსი მოიგონა, ის იყო უდიდესი მსახიობი.

ქართველ ერში განსაკუთრებული თეატრალობაა და ქართველი ადამიანი — უწინარეს ყოვლისა მსახიობია.

ჩვენს სუფრაზე, ლხინში, ჭირში, ომში თეატრალობას ძალიან დიდი ადგილი უკავია.

აიღეთ ყოველდღიური ცხოვრება ქართველი ადამიანისა, მისი მუსაიფი, მიხვრა-მოხვრა — ყველაფერში დაინახავთ ნაწილს მსახიობობისას.

ამიტომაც სასცენო ხელოვნება ჩვენში ძალიან ადრე უნდა განვითარებულიყო, მაგრამ ჩვენი ქვეყანა მზიური ქვეყანაა და მისი ბუნება — ყოველ ნაბიჯზე წარმოდგენა თავისი საუცხოო ფერებით და გასაოცარის ნაირნაირობით.

ამიტომაც სანახაობამ, თამაშმა გადიზიდა ქართველი ერი და სხვა მრავალ მიზეზთან ერთად ალბათ ამითაც აიხსნება, რომ ნამდვილ სასცენო ხელოვნებას ჩვენში არა აქვს გრძელი ისტორია.

ჩვენში გავრცელებულია აზრი, თითქოს ქართული თეატრის საძირკველი პირველად ვორონცოვს ჩაეყაროს.

ასეთი შეხედულება გაუგებრობის ნაყოფია.

ვორონცოვმა ისარგებლა მხოლოდ იმით, რაც უკვე არსებობდა და ქართული თეატრი მან გამოიყენა პოლიტიკური მიზნისათვის.

ვორონცოვი, უწინარეს ყოვლისა, იყო რუსის მოხელე და თვით-მპყრობელობის განმამტკიცებელი საქართველოში.

რუსიფიკაცია და მშვიდობიანობა — აი რა იყო მისი მიზანი.

ერთი მშვიდობიანობას ამყარებს ცეცხლით და მახვილით; მეორე უფრო შორს იყურება და იარაღად ჰმარობს კულტურულ საშუალებას.

ქართველი თავადაზნაურობა ოცნებობდა წარსულის დაბრუნებაზე, მასში იყო მემამბოხის სული. საჭირო იყო ამ სულის გადახალისება, გადაგვარება. ამისათვის ვორონცოვს უნდა გამოეყვანა გარეთ თავადაზნაურობა, გაერთო, მიეცა მისთვის სხვა საზრდო.

ერთ-ერთ ასეთ საშუალებას ის ხედავდა თეატრში და ამიტომ ჩასჭიდა გიორგი ერისთავს ხელი.

მე ამით არ მინდა ვორონცოვის ხსოვნას საყვედური მივეზღო: ადამიანს, ვინც უნდა იყოს ის, თავისი ნაღვაწი არ უნდა დაეკარგოს და არც ჩვენა ვართ უმადურნი.

რა მიზანიც უნდა ჰქონოდა ვორონცოვს, ჩვენს სასცენო ხელოვნებას მან უსათუოდ მოუტანა სარგებლობა, ხოლო უნდა გვახსოვდეს, რომ ვორონცოვის განზრახვა სულ სხვა იყო, და არ უნდა გავიმეოროთ აკაკის შეცდომა, რომელიც ვორონცოვში ქართველი ერის დიდ მოამაგესა ჰხედავდა.

ქართული სასცენო ხელოვნება თავიდანვე დაადგა ჩვენი ყოფაცხოვრების ასახვის გზას.

მხოლოდ მარჯანიშვილის ნიჭს შეუძლია გააცოცხლოს და გააბრწყინოს გიორგი ერისთავი და ანტონოვი, თორემ დღეს ისინი აღარათერს წარმოადგენენ.

მაგრამ ისტორიულად ორივემ ძლიერ დიდი როლი ითამაშა და დიდი სამსახური გაუწია ჩვენს სასცენო ხელოვნებას.

გიორგი ერისთავმა თავის პიესებში აშკარად დაჰკმო ძველი თავადაზნაურული ცხოვრება მისი ჩვეულებით, აზროვნებით, შეხედულებით. უპირატესობა მისცა ახალთაობას, რომელიც ევროპული კულტურის გადმონერგვას სცდილობდა და მიუთითა ქართველ საზოგადოებას ახალი, ევროპული, განათლებული ცხოვრებისაკენ.

მაშინდელი დროისათვის ეს იყო მარტო ახალი სიტყვა კი არა, არამედ გაბედული სიტყვაც.

ჩვენმა სასცენო ხელოვნებამ — როგორც მწერლობამ. ისე თეატრმა რამდენიმე ეტაპი განვლო თავისი განვითარებისა და ყველ-

გან მათებს სიმტკიცე, გაუტეხლობა და საქმის სიყვარული ქართველი მსახიობისა.

ქართველ მსახიობს საერთოდ ისეთს მძიმე პირობებში უხდებოდა მუშაობა, რომ საჭირო იყო დიდი გმირობა, დიდი მსხვერპლი, რომ ეს დაბრკოლებანი გადაელახა.

ქართველმა მსახიობმა დიდი გმირობაც გამოიჩინა, დიდი მსხვერპლიც გაიღო და მით ოქროს ასოებით ჩასწერა თავისი თავი საერთოდ ხელოვნების ისტორიაში.

მე ვერ ვიტყვი, ჩვენი თეატრი წინ უსწრებდა ცხოვრებას-მეთქი. ის მისდევდა ცხოვრებას და შეძლებისდაგვარად აშუქებდა ამა თუ იმ დროულ პრობლემას, ამა თუ იმ საჭირობოროტო კითხვას.

ასე იყო რევოლუციამდე.

რევოლუციამ ერთბაშად გაავლო ღრმა ნაპრალი თეატრსა და ცხოვრებას შუა. თეატრი დარჩა ნაპრალის იქითა ნაპირზე, ცხოვრება კი გაექანა წინ ცეცხლისა და ოცნების ტალღებზე.

ამგვარივე ტალღები იყო საჭირო თეატრისათვის, მაგრამ მან ეს ვერ შესძლო, ვერ შესძლო, რადგანაც ეს მეტად ძნელი საქმეა.

თეატრისათვის საჭიროა მაყურებელი, მსახიობი და ავტორი.

ახალ ცხოვრებას უნდა ახალი მაყურებელი, ახალი მსახიობი და ახალი ავტორი. ახალი მაყურებელი მალე ჩნდება რევოლუციის ხანაში, მაგრამ ძნელია ახალი მსახიობის შექმნა; გაცილებით უფრო ძნელია, და ხშირად შეუძლებელიც, ახალი ავტორის წარმოშობა.

ამით აიხსნება, რომ ისეთი რეჟისორი, როგორც მეიერხოლდია, იძულებულია ოსტროვსკი დადგას ხოლმე.

ასეთს პირობებში კრიზისი ჩვენი თეატრისა აუცილებელი იყო და ეს კრიზისი იმდენად მწვავე იყო, რომ ჩვენი თეატრის ბედი იმის მოყვარულს მეტად აფიქრებდა.

საჭირო იყო დიდი ნიჭის, დიდი ნებისყოფის, დიდი გამოცდილების, დიდი სკოლის ადამიანი, რომ ჩვენს თეატრს ეს კრიზისი გადაეტანა.

ასეთი პიროვნება არის კოტე მარჯანიშვილი.

ქართული აზრი კოტე მარჯანიშვილს მედგრად დაეჯახა და გამოიღო ხმა როგორც ქებისა და ალტაცებისა, აგრეთვე უარყოფისა და დაწუნებისა.

ასეთია თვისება ყოველი დიდი ნიჭისა და დიდი ნოვატორისა: მისი მოვლენა მოწინააღმდეგე აზრთა კიდილით ხასიათდება.

კოტე მარჯანიშვილი რომ დიდი ნიჭი და დიდი ხელოვანია,

ამას ვერავენ უარპყოფს. ზოგი მხოლოდ უწუნებს: ეროვნული სახე დაუქარგა ქართულ თეატრსო.

რა თქმა უნდა, უცოდინარობის ნაყოფია ასეთი მსჯელობა.

კოტე მარჯანიშვილმა ისეთი მტკიცე და მაგარი საფუძველი ჩაუყარა ქართულ თეატრს, რომ იმის ეროვნულ ამაყ სახელს ვერაფერ ვეღარ წაშლის.

კოტე მარჯანიშვილმა ქართული თეატრი ევროპული თეატრის სიმადლემდე აიყვანა; მან შექმნა ახალი მაყურებელი, ახალი მსახიობი და ახალი ავტორი.

ჩვენს რეჟისორებს ძალიან დიდი ღვაწლი მიუძღვით, მაგრამ ახალი ისტორია ჩვენი თეატრისა იწყება კოტე მარჯანიშვილიდან.

ეს განსაკუთრებით ნათელპყო განვლილმა სათეატრო სეზონმა.

ყოველი დადგმა — „ინტერესთა თამაშს“ აიღებთ, „გმირს“, ერისთავის „გაყრას“, „ადამიანი მასსას“ თუ „მალშტრემს“ — სრული გამარჯვება იყო ქართველი მსახიობისა, ქართული ხელოვნებისა და კოტე მარჯანიშვილისა.

მე ვიცი: უცხოელები, რომლებმაც ერთი სიტყვა ქართული არ იციან, ესწრებოდნენ ქართულ წარმოდგენებს და ბოლომდე უყურებდნენ.

ომმა და დიდმა რევოლუციამ გამოიწვიეს ყველა „ღირებულე-ბათა გადაფასება“ ყველგან. შინაგანი რევოლუცია მოხდა ყველგან: იქაც, სადაც ის პოლიტიკურად არ მომხდარა. განა საფრანგეთში საზოგადოებრივი აზროვნება, ესთეტიური შეხედულება და მოთხოვნილება იგივე და იმგვარია, რაც ომამდე იყო?

რა თქმა უნდა, არა.

ყოველ დარგში, ხელოვნებაშიც, აუცილებელი გახდა ახალგზების გამოჩენა. მაგრამ ერთბაშად არაფერი არ გამოინახება, — ამისათვის საჭიროა ხანგრძლივი შრომა და ძეგნა.

აი ამ გზას ადგა მარჯანიშვილი განვლილი სეზონის მიმდინარეობაში. ეს იყო გზა ძიების. ხელოვანი ეძებდა ახალ ფორმას, ახალ სიტყვას, ახალ ავტორს.

სწერდნენ: დადგა ერისთავის „გაყრა“, ანტონოვის „მზის დაბნელება“, ძველისძველი „ცხვრის წყარო“, რა არის აქ ახალიო.

ამაზეა ნათქვამი: *СМОТРИТ В КНИГУ И ВИДИТ ФИГУ.*

ყველა ძველი პიესების წარმოდგენაში არის ახალი დადგმა. ახალი თამაში, ერთის სიტყვით ახალია ფორმა, რომელშიც ჩამოასხა მარჯანიშვილმა ძველი შინაარსი. ახალი შინაარსიცა გნებავთ?

განა თვითონ მარჯანიშვილს კი არ უნდა, მაგრამ ის დრამატურგი არ არის.

ერთ-ერთ საჯარო კრებაზე მან განაცხადა: ჩვენ ვქმნით ფორ-  
მას, შინაარსის მოცემა კი თქვენი საქმეა, მწერლებისო.

განვლილი სათეატრო სეზონი დაიწყო ერისთავის „გაყრით“.

როდესაც გამოცხადდა, სეზონი ამა და ამ პიესით გაიხსნებაო, უმრავლესობა უკმაყოფილო დარჩა.

მართლა და ჩვენს დროში განა შეიძლება „გაყრამ“ მიიზიდოს მაყურებელი?

მე თვითონ წავედი თეატრში მხოლოდ იმისათვის, რომ შემეს-  
რულებია ჩემი მოვალეობა, როგორც მოქალაქეს და როგორც შვილს  
ქართველი ერისას.

მაგრამ ნამდვილი სასწაული მოხდა. კოტე მარჯანიშვილმა „გა-  
ყრა“ ჩასვა ისეთს ჩარჩოებში, რომ მაყურებელი დაატყბო, მოჰხიბ-  
ლა, დაათრო და დაატყვევა.

შემდეგ მოჰყვა „ინტერესთა თამაში“, „გმირი“, „ადამიანი მა-  
სსა“. „გააზნაურებული მდაბიო“, კლდიაშვილის პიესები და ბოლოს  
შალვა შარაშიძის მიერ სასცენოდ გადაკეთებული „სამანიშვილის  
დედინაცვალი“.

ყოველი პიესის დადგმა რომ ცალკე განვიხილოთ, შორს წა-  
გვიყვანდა.

ვიტყვი მხოლოდ, რომ ყოველი დადგმა დიდი მიოწყვა იყო და  
დიდი გამარჯვება.

თამამად შემიძლია ვთქვა, რომ ხელოვნების არც ერთ დარგს არ  
მოუცია ისეთი გამარჯვება, როგორც მოგვცა გასული სეზონის გან-  
მავლობაში ქართულმა აკადემიურმა თეატრმა (და ქართულმა მუ-  
სიკამ — „დაისი“).

კოტე მარჯანიშვილს გასული სეზონის განმავლობაში მხარს  
უშეუენებდნენ ახმეტელი, ქორელი, კონ. ანდრონი<sup>1</sup>.

მაგრამ მთავარი ხაზი კოტე მარჯანიშვილისა არის და ამიტომ  
მიხდება ლაპარაკი მხოლოდ მარჯანიშვილზე.

როგორც აღვნიშნე, მარჯანიშვილი ძიების ადამიანია. ის უკან  
კი არ ახედება, წინ მიისწრაფვის, ახალს ეძებს. ამ ძიებაში მას საკუ-  
თარი გეზი აქვს აღებული.

შეიძლება ბევრ რამეში მას არ დაეთანხმოს საზოგადოების  
ერთი ნაწილი, მაგრამ ცხადზედ უცხადესია შემდეგი: მარჯანიშვილის  
ნიჭმა და შემოქმედებამ ახალი ენერგია ჩაჰბერა ქართულ თეატრს,  
გადაშალა მის წინაშე ახალი პერსპექტივები და ააყვავა ჩვენს გულ-  
ში იმედები.

<sup>1</sup> კონსტანტინე (კოწო) ანდრონიკაშვილი. ვ. წ.

ძვირად ახსოვს ქართულ სცენას ის წესრიგი და დისციპლინა, რომელიც არსებობდა გასული სეზონის განმავლობაში.

მარჯანიშვილმა მოსპო მოკარნახე: ის აღარავის ესმის.

მან მოსთხოვა ქართველ მსახიობს ცოდნა, მუშაობა, შრომა, საქმის უსაზღვრო სიყვარული და გაწვრთნა-განვითარება, დახელოვნება.

და მართლაც გასული სეზონის განმავლობაში ჩვენს წინაშე იყვნენ ახალი მსახიობები: მარჯანიშვილმა შეჰქმნა სრულებით ახალი ტიპი ქართველი მსახიობისა.

დღემდის ჩვენ გვყავდა ქართული ყოფა-ცხოვრების მსახიობი და თითო-ოროლა ბუმბერაზი. აქამდე ჩვენი თეატრი იყო უფრო პიროვნული: თამაშობდა მხოლოდ ვასო ან ლადო; დანარჩენები თუ არ აფუჭებდნენ საერთო შთაბეჭდილებას, კმაყოფილი ვიყავით.

გასულმა სათეატრო სეზონმა მოგვცა თეატრი ანსამბლისა და ევროპული განვითარების მსახიობებისა და ევროპული ტემპის თამაშისა.

გასულ სეზონში ჩვენ ვიხილეთ ქართველი მსახიობი სერიოზული, მომზადებული, გაწვრთნილი, მრავალმხრივი, მხატვრულად განვითარებული.

მსახიობი მარტო ესთეტიკური გემოვნებით კი არა. ცოდნით. განვითარებით, მომზადებით, ერუდიციით უმაღლეს საფეხურზე უნდა იდგეს საზოგადოებაში.

საზოგადოებას ის კი არ უნდა ართობდეს მხოლოდ, არამედ აფიქრებდეს, აკვირებდეს, აოცებდეს, ასწავლიდეს და თავისი თავისადმი პატივისცემას აღუძრავდეს.

განვლილმა სეზონმა დაგვანახვა, რომ ქართველმა მსახიობმა გაითვალისწინა თავისი მოვალეობა და მოწოდება და ის მიისწრაფის უკვე სერიოზული გამარჯვებისაკენ.

უწინ თუ ჩვენს სცენაზე მხოლოდ რამდენიმე მირონცხებულნი თამაშობდა, სხვები კი გზადაბნეულებივით დადიოდნენ სცენაზე და მოკარნახის ნათქვამს იმეორებდნენ, განვლილი სეზონის განმავლობაში მსახიობები წარმოადგენდნენ ერთ მთლიან კორპორაციას და მთლიანად ჰქმნიდნენ საერთო საქმეს.

მათი მიხერა-მოხერა, თავის დაქერა, მიმიკა, დიქცია. პლასტიკა საგრძნობლად დამაჯერებელი იყო.

განვლილი სეზონის განმავლობაში დაარსდა მსახიობთა ძმობა „დურუჯი“.

რაც უფრო მეტი იქნება ასეთი ძმობა ხელოვნების ყოველ დარგში, მით უფრო აყვავდება ხელოვნება.

ჩვენმა პოეზიამ იცის ასეთი ძმობა „ცისფერი ყანწები“.

ჩვენი პოეზიის ასპარეზზე ასეთი ძმობა პირველია საერთო ძალღონით, მჭიდრო შეკავშირებით, ერთმანეთის უზომო პატივისცემით, პოეზიის სიყვარულით და გატაცებით. ამ ძმობამ დიდი საქმე გააკეთა, საგრძნობლად წასწია წინ ჩვენი პოეტიკა და პოეზია და ამით სრულიად გაამართლა თავისი არსებობა და ბრძოლა.

„დურუჯის“ დაარსებამ დიდი აურზაური გამოიწვია ჩვენს საზოგადოებასა და მწერლობაში და უმრავლესობამ მერე დააფასა, რომ ასეთი ძმობა სასცენო ხელოვნებაში მეტად საჭირო და სასურველია.

„დურუჯი“ უსათუოდ გაიმარჯვებს, თუ მისი წევრები მიჰბაძავენ უფროსი ძმის — „ყანწელების“ მაგალითს და შეკრული ნებით, შეკრული ენერჯით, ერთმანეთის სრული პატივისცემითა და საქმის უზომო სიყვარულით მუშაობენ. გაბედულად და შეუპოვრად გაემართებიან წინ, ახალი საკურთხევის მოსაპოვებლად.

1924

## მიხეილ ჯავახიშვილი-ადამაშვილი

ქართული ანდაზა არის: წყალნი წავლენ და წამოვლენ, ქვიშანი დარჩებიანო.

ეს ანდაზა შეიძლება უცვლელად შევუფარდოთ ხელოვნებას.

სხვა და სხვა ეპოქას სხვა და სხვა ესთეტიური გემოვნება შეაქვს ხელოვნებაში და აქედან ჩნდება მიმართულება, მოდა, რომანტიზმი, რეალიზმი, სიმბოლიზმი, ფუტურისმი და სხვა.

ყოველივე ეს წარმავალია და ჰქრება. უკვდავია მხოლოდ ჰეშმარიტი ხელოვნება, რომელიც სამუდამოდ რჩება, ვითარცა ქვიშა წარმავალი წყლისა.

ჰეშმარიტი ხელოვნება არის მხოლოდ იქ, სადაც შეერთებულია ფანტაზია, თავისებური სტილი, მანერა წერისა, სიმკვეთრე გამოსახვისა, სიცხოველე ამა თუ იმ პრობლემის გაშუქებაში და სხვა.

ყოველივე ეს ერთად აღებული წარმოადგენს იმას, რასაც ჩვენ მხატვრულ ნიჭს ვუწოდებთ.

მ. ჯავახიშვილ-ადამაშვილის პირველი ტომი დადაღულია შეპოქმედის უტყუარი ნიჭით.

ბელეტრისტი გამოვიდა სამწერლო ასპარეზზე ოცი წლის წინათ. დაწვა ერთ ღამეს უბრალო ადამიანად და ადგა მეორე დღეს უკვე სახელმწიფოებრილ მწერლად: მისი შემოქმედების პირველმა ყვაველებმა საერთო ყურადღება დაიმსახურეს. მაგრამ მ. ადამაშვილი მეტეორივით მოველინა ჩვენი ხელოვნების ცას; ელვით გაისრიალა და მიიშალა.

მთელი თხუთმეტი წლის განმავლობაში ბელეტრისტი სდუმდა და დღეს ისევ ამეტყველდა, ისევ გააშუქა ჩვენი ხელოვნების ცა „კვაჭი კვაჭანტირაძით“ და სხვ.

კვაჭი კვაჭანტირაძე ჰღირს იმად, რომ ბელეტრისტის ჩანგრძლივი დუმილი გაამართლოს და გამოისყიდოს.



ეს ტიპი საკმაო მომწიფებული იყო ჩვენს ცხოვრებაში და ეძებდა თავის მხატვარს, სანამდის არ ნახა მ. ადამაშვილში.

პირველი ტომის მოთხრობები ყველა წარსულს ეკუთვნის, გარდა „ტყის კაცი“ და როდესაც შეადარებთ ერთმანეთს, უსათუოდ ნახავთ დიდ განსხვავებას: სტილი დაიხვეწა, მანერა წერისა უფრო გამოიკვეთა. ასახვა უფრო გაცხოველდა და გასპეტაკდა, შეიქრა შიგ ბუნება და სხვა; სიუჟეტებში კი არის განუწყვეტელი ჯაჭვი, მსგავსება: ღრმად ჩახედვა საბრალო და უბედური ადამიანის გულში.

სიუჟეტების არჩევაში მ. ადამაშვილი თავისებურ ორიგინალურია: ის აქცევს განსაკუთრებულ ყურადღებას ცხოვრების იმ მხარეს, რაც ჩვენს მწერლობაში გაუშუქებელი იყო.

მ. ადამაშვილის ორიგინალობას ჯერ სათაური ამჟღავნებს: „ჩანჩურა“, „უპატრონო“, „კურკას ქორწილი“, „ტყის კაცი“.

ვინ არის ჩანჩურა?

საიდან არის მოსული?

არავინ იცის, მას არც სახელი აქვს, არც გვარი. ახ კი რა საჭიროა, ვის რათ უნდა? ვის აინტერესებს საცოდავი, ბეჩავი, საბრალო, უბედური ადამიანი — არშინნახევარი სიგრძით და ფუთ-ნახევარი წონით!

ადამიანია ის თუ პირუტყვი? ძნელი გამოსარკვევია, რადგანაც თავისი მდგომარეობით და იმ ხალხის თვალშიაც, ვისც მას გარს ახვევია, ის უფრო პირუტყვია.

პთელა მისი მე, მისი ავლადიდება, მისი გარეგნობა გამოიხატება ერთ სიტყვაში — ჩანჩურა.

უკეთესი, უფრო მკვეთრი, უფრო მოსწრებული, მოსხლეტილი დახასიათება პიროვნებისა შეუძლებელია. ერთი სიტყვა — ჩანჩურა. და თქვენ უკვე იცით, ვისთანა გაქვთ საქმე.

მოთხრობის სიუჟეტი მარტივია, უბრალო, მაგრამ ამ სიმარტივეში არის სიღრმე, უბრალოებაში — დიდი აზრი.

დამოკიდებულება ბრბოსი ჩანჩურასადმი იშვიათის მიღწევით აქვს ავტორს ასახულა და იმისი ძლიერება მოსჩანს უსახო ბრბოს ფსიქოლოგიის საუცხოო და იშვიათ გაშუქებაში.

ბრბოს სწყურია სანახაობა და სანახაობით დამთვრალი ის შეუბრალებელია, სასტიკი, უღმობელი, მკაცრი, გულცივი, გულქვა.

და როდესაც გაათავებთ მოთხრობის წაკითხვას, ერთგვარი სირცხვილი შეგიპყრობთ, სირცხვილი იმის გამო, რომ ამ ბრბოსთან ერთად ატარებთ თქვენც ადამიანის სახელს.

ამავე დროს გაიმსჭვალებით ჩანჩურასადმი სიბრალეულითა და

თანაგრძნობით, რადგანაც ჰხედავთ, რომ ამ უსახო პიროვნებაში მაინც ადამიანის ნასახია დამალული.

თქვენში თანდათან იზრდება ზიზღი ისეთი ცხოვრებისადმი, სადაც ერთის მხრით უსახო ჩანჩურა იტანჯება, მეორეს მხრით ბრბო ერთობა იმისი ტანჯვით, დაგებადებათ წყურვილი ანალი, განწმენდილი და ამაღლებული ცხოვრებისა.

„უპატრონო“ ჩანჩურას მიემსგავსება. აქაც საბრალო, უმნიშვნელო, უბედური ადამიანია, რომელიც გასართობი ნივთია მეორისათვის, და როდესაც მეორე იჭერებს გულს და მოიხალისებს, უპატრონოს ისე გადაავლებს, თითქოს უბრალო ნივთი იყოს და არა ადამიანი.

უპატრონოს სულისკვეთება გასაოცარის სიცხადით არის გადაშლილი და ბევრი ადგილი ქრუანტელის მომგვრელია თავისი სიძლიერით.

უპატრონოც. პავლეც ბეჩავი, საბრალო ადამიანები არიან, ისინი ჩანჩურას ენათესავენ, თუმცა უკანასკნელზე ბევრად მალლა დგანან.

ჩვენ ვიხედებით მათს გულში, ვეცნობით მათს უბრალო, უფერულ, მარტივ ცხოვრებას. ვიმსჭვალებით მათდამი თანაგრძნობით და ამავე დროს განვიცდით ერთგვარ სირცხვილს, რომ მათი ბატონი ჩვენთან ერთად ადამიანის სახელს ატარებს.

ეკლავ თანდათან გვებადება ზიზღი იმ ცხოვრებისადმი, სადაც ერთის მხრით უპატრონონი არიან, მეორის მხრით — ბატონები, და იზრდება მისწრაფება ამაღლებული და განწმენდილი ცხოვრებისაკენ, სადაც უპატრონოც, პავლეც ბედნიერები იქნებიან.

„თავდავიწყება“ წარმოადგენს საუცხოო სურათს კემმარიტი სიყვარულისას.

სურათი მარტივია, უბრალო, მაგრამ მეტად ლამაზი და მოხდენილი თავისი ბუნებრივობით. წმინდა. გატაცებული, ამოხეთქილი სიყვარული დაეჯახება ცხოვრების სინამდვილეს თავისი უხეში წყობილებით, ყალბი შეხედულებით.

სიყვარული მარცხდება და უხეშე სინამდვილე იმარჯვებს: სიყვარულს ურემზე დასვაშს და გადაავლებს, როგორც ნაგავს.

„ეკა სამუდამოდ დამეკარგა. არც მიძებნია, ცოლ-შვილი მყავს. მაგრამ... ვინ იცის ვინ იყო ჩემი ნამდვილი საბედო?“

ვინ იცის? ვინ მეტყვის? ვინ გამოიცნობს?“

აი უკანასკნელი მწარე სიტყვები შეყვარებულსა.

ჩვენ ვიცნობთ, ვიცნობთ ამ ცხოვრებას.

ეს ის ცხოვრებაა, სადაც ბრბო გულგრილად ფეხქვეშ სთელავს ჩანჩურას, ბატონი უპატრონოში უბრალო სათამაშო ნივთსა ჰხედავს, და სიყვარულს ურმით ისტუმრებენ. თქვენი გული ისევ იცვება ზიზლით ასეთი სინამდვილისადმი და მისწრაფით განწმენდილი, ამაღლებული სინამდვილისაკენ.

ვინ არის „მეჩქმე გაბო“?

ჩანჩურას, პაუელს ახლობელი, — პატარა, უმნიშვნელო, ბეჩავი ადამიანი, რომლის მთელი მოთხოვნილება, მთელი ადამიანური ცხოვრება საროსკიპოში დროს გატარებით ამოიწურება.

და როდესაც საროსკიპოს კარი მისთვის დაიხურება, რადგანაც მან მთელი საცხოვრებელი საროსკიპოში შექამა და მათხოვრის მდგომარეობამდე მივიდა, ის მაინც ბინდიდან შუალამემდე საროსკიპოსთან არის ატუზული და ფანჯრებიდან ზალაში იცქირება. „ზალაში შესვლას ნატრობს, მაგრამ შესვლას ვერ ჰხედავს, რადგან შესაფერი ტანისამოსი არა აქვს“.

შეხედეთ ამ უბედურ, უმნიშვნელო ადამიანს, — რა განსხვავება არის იმასა და ჩანჩურას შორის? არაფერია.

ჩანჩურა თითქმის პირუტყვად დაბადებულა და ცხოვრობს, როგორც პირუტყვი. მეჩქმე გაბო კი თავისი ცხოვრებით პირუტყვულ მდგომარეობამდე მისულა და ბედნიერია, სხვაგვარი ცხოვრება მას ვერ წარმოუდგენია.

მაგრამ როდესაც ჩაიხედავთ ამ დაცემული პიროვნების გულის სიღრმეში, დარწმუნდებით, რომ ისიც ადამიანია.

თქვენში ისევ იზრდება ზიზლი იმ ცხოვრებისადმი, სადაც მეჩქმე გაბო, მისი ძმობილი ქიყელა პირუტყვებს დამსგავსებთან და გწყურაათ განწმენდილი, ამაღლებული, ადამიანური ცხოვრება.

„კურკას ქორწილი!“ თვალის მომჭრელი ფერადებია, ალაგ — სასაცილო, ალაგ — ცრემლების მომგვრელი.

იშვიათი სილამაზის თვალია, ნიჭიერი ხელოვანის მიერ ცხოვრების ბნელი კუნჭულებიდან ამოკვეთილი.

რამდენი სინამდვილე, რამდენი სიმართლე, რამდენი უბრალოება და მხატვრული ზომიერებაა!

უშნო, მახინჯი, ფეხგაჩაჩხული კურკა, რომელსაც ყველა დასცინის, აჯავრებს და ქუჩის მასხარადა ჰხდის; საცოდავი, ბეჩავი ადამიანი, რომლის მთელი აზროვნება და მისწრაფება თხილის ნაჭუჭში დაეტივა.

ეს კურკა ხომ ჩანჩურას ახლობელია, მისი სისხლი და ხორცია! ჩანჩურას ყველა დასცინის, თავში ურტყამს, მაგრამ ის ყველას

უთმენს, ყოველივეს იტანს და ჩუმად ურიგდება თავის ხვედრს, თითქოს ყოველივე ეს ისეც უნდა იყოს.

აღლეთ უპატრონო, — ჩუმად იტანს ის ყოველგვარ დამცირებას და უსიტყვოდ ემორჩილება თავის მწარე ხვედრს.

ბატონი აუპატიურებს მას, უპატრონო ნებდება ჩუმად და ბედს არ ეწინააღმდეგება; ათხოვებენ, ჩუმად მიჰყვება; მონაა, მორჩილად თავისი ხვედრის, თითქოს აუცილებელი იყოს ყოველივე ის, რაც მას უნდა გადაჰხდეს.

იგივეა კურკაც. პატარა კაცუნაა, ბეჩავი, უნებო, ყოვლად გლახა, საცოდავი, ადამიანებში გამოსხლეტილი, მაგრამ მის გულში ბოროტება არ არის და ამით ეს ბევრ ადამიანზე მაღლა სდგას.

როგორც ჩანჩურა, კურკაც ბრბოს გასართობი საგანია და ლაჩრის თვინიერებით იტანს ყოველგვარს.

მაგრამ აბა შეხედეთ ამ დიდთავა და მახინჯ კურკას, როდესაც ის ახალ ტანისამოსში არის გამოწყობილი და ცოლის შერთვას განიზრახავს: როგორ მედრდურად სდგას ტროტუარზე და ამაყად მიჩერება გამვლელ-გამომვლელს!

— ვა, ერთი ამას დახე, და! — უკვირს ყველას.

ხოლო „კურკა გუნებაში ილიმებოდა. მაგრამ ამ სიამოვნებას არავის აჩვენებდა და ისე გულგრილად ეჭირა თავი, თითქო ასეთი ძვირფასი და ახალი ტანისამოსი იმისათვის პირველი არ ყოფილიყო“.

აი შეხედება კურკა მაშოს. ერთი შეხედეთ, როგორ გამოიკვლება, როგორ თავაზიანია ეს ბეჩავი. ყოვლად განუვითარებელი ადამიანი, რომელიც თვითონ შვდა მანეთის გულისათვის თვრამეტი საათი დღეში ჯღანებს აკერებს.

მაშო აწვდის დასაკერებლად ჩუსტს და ეკითხება, რა ელირებაო.

— თქვენთვის არაფერი არ ელირება... ისე დავაკერებ... თავაზიანად უპასუხებს კურკა.

საუცხოოა ის ადგილი, სადაც შეყვარებული კურკა არა თუ თვითონ გამოიკვლება, მთელი ბუნებაც იცვლება მის თვალში: მზე უფრო ანათებს, ჰაერი უფრო გასუფთავდა, მტკვარი უფრო ადუღუნდა, ყველაფერი გამბიარულდა, არეშარეც განაზდა, გაფაქიზდა.

ეს ბეჩავი ადამიანი სულ სხვა თვალთ უყურებს ქვეყანას, ცხოვრებას: მღერის, სიამოვნების ცრემლებსა ჰღვრის და ლაპარაკს უმატებს.

ყოველივე ეს მეტად ბუნებრივად და ლამაზად არის შემოხაზული ავტორის კალმით.

როდესაც პირველად გაეცნობით კურკას, გეგონებათ, რომ მას

არა აქვს არავითარი შეგნება და რაიმე განცდა. ღრმა და ძლიერი მისთვის მიუწვდომელია.

მაგრამ გულის სიღრმეში ის თურმე იტანჯება.

რა არის ამ ტანჯვის მიზეზი?

შეგნება უპატრონობისა, ობლობისა.

— „მე უპატრონო კაცი ვარ. დღემდის ობოლი ვიყავი... ვინც არა მგონია, მე მიბრიყვებდა... ვინც არა მგონია, მე მცემდა, მაწვალებდა, მტანჯავდა“.

აი ნეტარების ეამს გულის სიღრმიდან ამოხეთქილი წრფელი სიტყვები.

მაგრამ ახლა კურკა ბედნიერია.

რატომ?

იმით რომ ის მარტო აღარ არის, ობოლი აღარ არის.

„— ძმებოჯან! ჩემო ძმებო... ჩემო ამხანაგებო! დღეის იქით მე უპატრონო აღარა ვარ... მე... მეც პატრონი გამიჩნდა. ჩემი მაშო აბიდას აღარავის მოაცემინებს!“ — გრძნობით წარმოსთქვამს კურკა და თავისი ბედნიერებით უნდა სხვებიც შესძრას, აატოკოს, ააღელვოს.

მისი გული სავსეა ნეტარებით და ყველასადმი სიყვარულით.

კურკას წინაშე აღიმართება საშინელი სინამდვილე: ის რწმუნდება, რომ მაშო ნამდვილად მისი კი არ არის, არამედ სხვისია, მაგრამ კურკა იმდენად უბედურია თავის ობლობასა და უპატრონობაში, რომ ყველაფერს ურიგდება, ყველაფერს იტანს, ოღონდ მაშო მასთან იყოს, ხანდახან მაინც იმის ოთახში სუნთქავდეს.

საუცხოოა სცენა, მაშო მიდის, კურკა კი ორივე ხელებით ფეხებზე შემოეხვევა და არ უშვებს.

ერთი მიბრძანეთ, რათ უნდა კურკას ქალი, რომელიც ეუბნება, არ მიყვარხარ, შენთან ცხოვრება არ შემძლიაო?

წასვლა უნდა?

გზა მშვიდობისა!

მაგრამ კურკას არ უნდა, არ შეუძლია ძველებურად, უპატრონოდ გრძნობდეს თავს. ეს ობლობა, უპატრონობა მისთვის უკვე საშინელებაა და გამწარებული. დაჩოქილი ეხვევა მაშოს ფეხებზე და ცდილობს არ გაუშვას, ეხვეწება, შესთხოვს, ემუდარება:

„— სად მიხვალ, მაშოჯან... შენი ჭირიმე, მაშო-ჯა-აან... ნუ მანებებ თავსა-ა-ა“...

თქვენს არსებაში მარტო სიბრაღული კი არ იღვიძებს ამ უბედური ადამიანისადმი, არამედ ერთგვარი თანაგრძნობა და პატივისცემა.

და თქვენ ისევ გეზიზღებათ, შეგძულდებათ ის ცხოვრება, სა-

დაც ერთის მხრით კურკაა, მეორე მხრით — დარჩო და მაშო, და გული მისწრაფის უკეთესი, ამალღებული და განწმენდილი ცხოვრებისაკენ.

პირველ მოთხრობაში მკითხველის ყურადღებას იპყრობს სხვათა შორის ბრბოს ფსიქოლოგიის სწორი დახასიათება.

ბრბოს ფსიქოლოგია რთულია და მრავალი ხვეული აქვს.

ამ ფსიქოლოგიის ერთი მხარე ჩვენ ვინილეთ „ჩანჩურაში“.

აქ აღებულია ბრბო მაშინ, როდესაც ის ერთობა, მხიარულობს, დროს ატარებს, ერთის სიტყვით — კარგ გუნებაზეა.

„ხალხის სამართალსა“ და „ეშმაკის ქვაში“ იგივე ფსიქოლოგია არის ბრბოსი.

განსაკუთრებით მკაფიოდ და ძლიერი სიცხადით არის გაშუქებული ბრბოს ფსიქოლოგია „ეშმაკის ქვაში“, როდესაც ბრბო გაცეცხლებულია და ამის გამო სასტიკი, უღმობელი.

თუ რამდენად გადამღებია ბრბოს განწყობილება, ეს საუცხოოდ არის გაშუქებული ამ მოთხრობაში.

აღამიანი განკერძოებულად, თავისთავად, და იგივე აღამიანი ბრბოში სხვადასხვა არის. — სხვადასხვაა ამიტომ მისი განწყობილება და მოქმედებაც.

ეს არის მთავარი დებულება.

ახალგაზრდა სოფიო სოფლის თვალია. ის ექიმიც არის. მოსამართლეც. ჭირისუფალიც, დამრიგებელიც. მანუგეშებელიც.

„— წავალ ჩვენ ანგელოზთან. ისევ ის თუ მიშველის. თორემ სხვა არავინ“.

„— ჩვენი ანგელოზი ცოცხალი იყოს, თორემ სხვა არაფერი გვიშავს-რა“.

„— ღმერთმა დიდხანს გვიცოცხლოს ჩვენი ანგელოზი, ის რომ არ ყოფილიყო, ვინ იცის, რა ღღე დაგვადგებოდა“.

აი სოფლის აზრი სოფიოს ხასიათსა, მოქმედებასა და ყოფაქცევაზე.

კაცის მკვლევები დაიჭირეს სოფელში.

ხალხი ასამართლებს მათ. ხალხი თუ სასტიკია, შეუბრალებელი, ზოგჯერ ის მეტად ღმობიერია და გულკეთილი.

და თანდათანობით შეცვლა ღმობიერებისა სისასტიკით ავტორს ბუნებრივად აქვს აღბეჭდილი, ხოლო სურათი ხალხის გულში შურისძიების გრძნობის მოზღვავეებისა და აფეთქებისა იშვიათი ძლიერებით არის აწერილი.

ხალხი გადაუწყვეტს ჩაქვავებას ერთ დამნაშავეს, და აი აქ ვხე-

დავთ საუცხოო მაგალითს, თუ როგორ იმორჩილებს ბრბოს ფსიქოლოგია კერძო პიროვნებას და როგორ ითქვიფება ხალხის აღშფოთებულ გრძნობათა ტალღებში კერძო ნება, ადამიანური გრძნობა, პიროვნება და გონება.

სოფიო — ეს სოფლის ანგელოზი — მოიჩქარის იმისათვის, რომ ჩასაქვავებელი როგორმე იხსნას. და ხალხის აღშფოთება, გაბრაზება და გამხეცება იმდენად გადაედება მას, რომ ქვას დაავლებს ხელს და თვითონაც მონაწილეობას იღებს ავაზაკის ჩაქოლვაში.

უკანასკნელი მოთხრობა „ტყის კაცი“ თავისი სიუჟეტით განირჩევა დანარჩენი მოთხრობებისაგან. აქ მოთხრობილია ერთი ოჯახის თავგადასავალი და ავტორი იძლევა მეტად ლამაზ სურათს ტყისას სხვადასხვა დროს: ტყე ზაფხულში, შემოდგომაზე, ზამთარში და გაზაფხულზე. თქვენ ჰხედავთ ტყის ფერებს. გესმით ტყის მუსიკა, ჰყნოსავთ ტყის სურნელებას და ტკბებით საერთოდ ტყის დიადი ბუნებით.

ავტორის დამახასიათებელი თვისებაა ბუნებრივობა და მხატვრული თავდაქერილობა, ზომიერება.

გადაკარბებული, გადამეტებული, გადახრილი — რაიმე მოსაზრებით ან მიზნით — ავტორს არა აქვს არც ერთი სიტყვა.

ის მძლავრია პატარა, უბრალო, უმნიშვნელო და საშუალო პირთა ფსიქოლოგიური ანალიზისა და ბრბოს დახასიათებაში.

სინამდვილე და მიუდგომლობა, — აი ხასიათი მისი წერისა.

თავისი სიდიხით, მიუკერძოებლობით და სრული ობიექტივობით ავტორი ეკუთვნის ფლობერის სკოლას.

თქვენს წინაშე არის ცხოვრების სურათები, სინამდვილე. სიმართლე, ხოლო ვერც ერთ სიტყვაში, ვერც ერთ სტრიქონში თვითონ ავტორს ვერ დაინახავთ.

ასეთი სიმშვიდე და სიდიხე მეტ შნოს აძლევს მის ნაწარმოებს.

ავტორის თვისებაა მოკლედ თქმა და ამავე დროს სრულად ამოწურვა სიუჟეტისა.

მის კალამს უხდება იუმორი, რაც მეტ სიხალისეს და მიმზიდველობას აძლევს ყოველ მოთხრობას.

ავტორი განზე დგას და ისეთივე მიუდგომელი მაყურებელია, როგორც თვით მკითხველი, — არც ერთი ყალბი სიტყვა.

ამავე დროს დიდ სამხატვრო ღირსებაში ჩაქსოვილია დიდი ზნეობრივი მნიშვნელობა მ. ადამაშვილის შემოქმედებისა.

## ნიკო გოცირიძე

(მისი იუბილეს გამო)

კარგა ხანია მას აქეთ.

აზიანის კომედიას თამაშობდნენ. ჩვენი დიდი ვასო იღებდა მონაწილეობას. პირველ მოქმედებაში ვასო თავის წასიათსა და ხალისზე არ იყო, — ეტყობოდა უღონოდ უნდა ყოფილიყო.

მეორე მოქმედება გათავდა. მაგრამ ვერ იქნა და ველარ ველირსეთ ფარდის ახდას: მეტად გრძელი ანტრაქტი იყო.

როგორც იქნა დაიწყეს მესამე მოქმედება და ვასო ველარ ვიცანით: თუ პირველ მოქმედებაში მას უღონობა ემჩნეოდა და ჩვეულებრივი სისპეტაკე, სიმახვილე და სიცოცხლე აკლდა, ახლა ჩვენ წინ იდგა ჩვენი ნამდვილი ვასო და თავისი მოელვარე ნიჭით გაგვიტაცა, დაგვაღვიწყებია საკუთარი ჭირვარაში, ყოველდღიურობა და დაუსრულებელი მზიარულებისა და სიხალისის ქსელში გაგვახვია.

გათავდა მეორე მოქმედება. ანტრაქტია. ხალხი ბუზივით ირევა.

— გეფიცები, ვასო არ არის, გოცირიძე ყოფილა!

— ერთი შენც, რას მელაპარაკები? აბაშიძეს ველარ ვიცნობ?

— პირველ მოქმედებაში ვასო იყო. მეორეში კი გოცირიძე, რადგანაც ვასო თურმე ავად გახდა.

— კარგი ერთი, არავინ გაგიგონოს!

არის ასეთი კამათი ერთ ალაგას.

— კაცო, გოცირიძე ყოფილა, ჩვენ კი აბაშიძე არ გვეგონა?!

— რის გოცირიძე, რას ლაპარაკობ? ვასოს ველარ ვიცნობ განა?

— მეც კი ეგრე შეგონა. მაგრამ ვასო ავად გამხდარა და გოცირიძე გამოუყვანიათ.

— ვასო იყო, ნამდვილი ვასო, აბა რაებს ლაპარაკობთ?

— აგერა სოსო. კულისებში იყო და იმას ყველაფერი ეცოდინება.

სოსოს გარშემო ხალხი შეჯგუფდა.



- გაგვაგებინე, სოსო, რაშია საქმე?
- მართლა გოცირიძე იყო, თუ ვასო?
- ვასო მართლა ავად გახდა?
- რა ნიძლევი, რო ვასო იყო?
- რა ნიძლევი, რო გოცირიძე იყო?

ცხარობდნენ ახალგაზრდები.

— პირველ მოქმედებაში ვერ ატყობდით განა, რომ ვასო ავად იყო? — დაიწყო სოსომ: — ანტრაქტი იმიტომ გააგრძელეს იმდენად, რომ ვასო ავად შეიქნა, წარმოდგენა უნდა გადადებულყო: მაგრამ როგორც იქნა, გოცირიძე გამონახეს, ჩააცვეს, გაუკეთეს გრიმი, გამოუშვეს და როგორი ბიჭი? ბევრმა ახლაც არ იცის, თუ მეორე მოქმედებაშიაც ვასო არ თამაშობდა.

— მერე არც მომზადება უნდოდა, არც რეპეტიცია?

— ეგ როლი რამდენჯერმე უთამაშნია სახალხო სახლში.

და ყოველივე ეს მართლა მოხდა, სინამდვილეა და არა ზღაპარი. დიდი ნიჭია საჭირო, რომ ერთმა მსახიობმა ასე სრულად მოაჩვენოს მაყურებელს მეორე მსახიობი და მერე ვინ? — ვასო აბაშიძე!

ამ დიდი ნიჭის პატრონია ნიკო გოცირიძე.

ვასო აბაშიძეს ჯერჯერობით მემკვიდრე არ გამოსჩენია. და თუ ვინმეს შეუძლია ამ მემკვიდრეობაზე თავისი უფლების წამოყენება, — ისევ ნიკო გოცირიძეს.

ნიკო გოცირიძე მშრომელი ხალხის წრიდან არის გამოსული და მშრომელ ხალხთან არასოდეს შეუწყვეტია კავშირი. მას ღრმად აქვს გასული, გადგმული ფესვები მშრომელი ხალხის გულში და იქიდანა ჰკრებს ძალასა და ცეცხლს თავისი შემოქმედებისათვის.

ნიკო გოცირიძე მშრომელი ხალხის სცენის სახალხო თეატრის ერთი უდიდესი მნათობია და მთელი თავისი ნიჭი, ცეცხლი გათვითცნობიერების, აღდგენის, განთავისუფლებისა და ამბოღებისათვის შეუწირავს.

ნიკო გოცირიძე ძველი თბილისის მომხიბლავი ზღაპარია, — არასოდეს არ მოგწყინდება. ძველი თბილისის მოქალაქემ ნიკო გოცირიძეში ჰპოვა თავისი იშვიათი მხატვარი.

ჩვენ ყველას გვეგონა, რომ ნიკო გოცირიძის ნიჭი თბილისით ამოიწურებოდა, თბილისს ვერ გასცდებოდა, საქართველოს გარეთ ვეღარ გასწვდებოდა.

იმისი ნიჭი. იმისი ინტელიგენტობა, ბუნებრივი დაკვირვება, გამჭრიახობა, გონებამახვილობა და გაქანება გაცილებით დიდი გამოდგა, აკადემიურ თეატრში ნიკო გოცირიძე საგრძნობლად გაიზარდა, და-

იხვეწა და „ინტერესთა თამაშში“, „გმირში“, „გააზნაურებულ მდაბიოში“ მან მოგვცა სრულებით ახალი მხარე და თვისებანი თავისი ნიჭისა; მსახიობის წინაშე გადაიშალა ახალი შესაძლებლობა და მან უკვე მოგვცა ბრწყინვალე მიღწევა.

თბილისის მოქალაქე აკოფიდან გააზნაურებულ მდაბიომდე მეტად დიდი მანძილია და ეს მანძილი ჯადოსნური სისწრაფით, სიმარდით და სიმკვირცხლით გადალახა ნიკო გოცირიძემ.

ნიკო გოცირიძეში ქართველი ერის ნიჭი და სიხარული სჩქეფს. მისი ლაღობა და შეუჩერებელი მისწრაფება წინ და სულ წინ.

ნიკო გოცირიძეში ქართველი ერის მტკიცე ნებაა, მისი გაუტეხელი და მაგარი კუნთები.

ნიკო გოცირიძე ახალი საქართველოა, საქართველო — მშრომელი ხალხისა.

ნიკო გოცირიძეში ქართველი ერის იუმორია, გულგაშლილი. გულმხიარული, სიკეთით სავსე და ბოროტების, ღვარძლისა და გესლისაგან გაწმენდილი.

ნიკო გოცირიძე მშვენებაა ჩვენი სცენისა, მისი კეთილშობილი რაინდი.

## სახალხო სცენის გოლიათი

როდესაც ვუყურებ ნიკო გოცირიძეს, მაგონდება გრიშაშვილის სიტყვები ტრიოლეტებიდან:

ამ ქუჩაბანდში მე მინახავს ძველი პამქარი,  
ხელში ღროშებით გადაქდობილ-გადანამწკრივი.  
უსტაბაშს ჰშვენის მოფარფარე მზის ყალამქარი.

სად — ლექსი და სად — ცოცხალი ადამიანი! სად — ნიკო გოცირიძე და სად — გრიშაშვილის „ტრიოლეტები“!

მაგრამ როდესაც ჩაუყვირდებით, დარწმუნდებით, რომ აქ დიდა მსგავსებაა, ერთი და იგივე სურათი. ერთი და იგივე სახე სხვადასხვა ხელოვნებაში.

გრიშაშვილის „ტრიოლეტებში“ ძველი თბილისია მოხაზული წარმტაცი, გასაოცარი სისწორით.

ნიკო გოცირიძეში განა იგივე ძველი თბილისი არ არის გასაოცარის სისწორით გამოსახული? იგივე უსტაბაში მოფარფარე მზის ყალამქართ?

როდესაც ჰკითხულობთ გრიშაშვილის „ტრიოლეტებს“, თვალთა წინაშე აღიმართება ძველი თბილისი დაბალი სახლებით, ბანებით, ძველი მოქალაქე, ყარაჩოღელი.

ნიკო გოცირიძეში სწორედ ეს ძველი თბილისი გვხვბლავს, ძველი მოქალაქე გვართობს და ყარაჩოღელი გვამხიარულებს.

თუ გრიშაშვილი სიტყვითა ჰხატავს ძველ თბილისს, ნიკო გოცირიძე აღადგენს ძველ თბილისს მიმიკით, მიხვრა-მოხვრით, გარეგნობით, ლაპარაკით, კილოთი.

ნიკო გოცირიძის თამაშში ძველი თბილისის მარტო გარეგნული ასახვა კი არ არის, მისი შინაგანი არსებაა, მისი სული, ძველი თბილისის მოქალაქის სული თავისი ყოველდღიურობით, ჭირვარებით, სიბარტივითა და სივიწროით.

ძველი თბილისის გრძნეული მოქანდაკე ვასო აბაშიძეა; რომელმაც შეუდარებელი, გაუმეორებელი სიციხადითა და სიციხოველით მოგვცა ყოველი ხაზი, ყოველი ნაკვთი თბილისის მოქალაქისა, ქართლის სიგანე, იმერეთის ფერადები და კახეთის სიღიადე.

ქართლის სიბრძნე, იმერეთის იუმორი და კახეთის სილაღე, — აი ვასო აბაშიძე.

როდესაც თქვენ შეუძღვებით ჩვენი სასცენო ხელოვნების გაღერებაში ძველი თბილისის მოქალაქეს, ის რა თქმა უნდა უმალ ვასოს მოეხვევა, გადაჰკოცნის და ღიმილით შესძახებს: — ვასოჯან, ეს შენა ხარ, თუ მე ვარო.

შემდეგ უსათუოდ ნიკოს მოჰხვევს ხელს.

და მართლაც ნიკო გოცირიძე განა ორეული არ არის თბილისის მოქალაქისა?

ამ დარგში ვასო აბაშიძე უბადლოა.

ხოლო თუ ვისმე ძალუძს იყოს მისი ბადალი თბილისის მოქალაქის ასახვაში, — ისევ ნიკო გოცირიძეს.

ნიკო გოცირიძეს ვერავინ ვერაფერს დაამადლის, — ეს მშრომელი ხალხის კალოდან არის მოვარდნილი და საკუთარი ნიჭით, შრომით, სიყვარულითა და უნარიანობით შეუქმნია ყველაფერი.

მოთმინება, შრომა, სიხალისე, გაუტეხელობა, სიღინჯე და გულმხიარულობა. — აი რა აქვს მას მემკვიდრეობით წამოღებული მშრომელი ხალხის სალაროდან.

ვის შეუძლია გვადინოს მხიარულებისა და უდარდელი სიცილის ცრემლები?

ნიკო, გოცირიძეს.

ვინ გვაძლევს სრულ ესთეტიურ სიამოვნებას თავისი დაკვირვებული, წინდახედული და გაზომილი თამაშით?

ნიკო გოცირიძე.

იმიტომ რომ მას აქვს თანდაყოლილი ნიჭი, ესთეტიური ზომიერება და ბუნებრივი ინტელიგენტობა, რომლითაც ის ერევა ამ ბოლო დროს ფრიად მძიმე და პასუხსაგებ როლებს.

ნიკო გოცირიძე სახალხო სცენის ტარიელია.

მშრომელი ხალხის შვილმა მშრომელი ხალხის სახლში დაანთო ლამპარი და მთელის თავისი სიყვარულითა და გატაცებით იზიდავდა მას უკეთესი მომავლისაკენ, განათლებისაკენ, განახლებისაკენ. აღდგენისა და თავისუფლებისაკენ.

და როდესაც დღიური შრომისაგან მოქანცული მუშა მიდიოდა

სახალხო სახლში, ნიკო გოცირიძე აძლევდა მას სიმხნევეს, სიხალისეს. სიმტკიცეს და იმედს.

გადახალისებული და გულგამხიარულებული მუშა უკან ბრუნდებოდა მარტო ახალი შრომისათვის კი არა, ახალი ბრძოლისათვისაც.

თუ ამ ბრძოლამ თვითმპყრობელობის ტახტი გაანადგურა, აქ უთუოდ ურევია ნიკო გოცირიძის გამამხნევებელი, იმედიანი და ძალღონის მომგვრელი კიჟინა.

ყოველი ნიჭის გაქანებას აქვს თავისი საზღვარი.

გვეგონა, რომ ნიკო გოცირიძე უკვე მისული იყო უკანასკნელ საზღვართან.

მაგრამ იმისმა გამოსვლამ რუსთაველის თეატრში ნათელჰყო, რომ მოლიერიც გულდამშვიდებით ჩააბარებს მას თავის გმირებს.

ნიკო გოცირიძემ აქ გაიძრო ქართული ყოფა-ცხოვრების ყურთმაჯებიანი კაბა და მოგვევლინა ისეთს ტანსაცმელში, რომლის ტარებასაც ნიჭიც უნდა, შნოც, ინტელიგენტობაც.

აქამდე ნიკო გოცირიძე იყო ნიჭიერი ამსახველი ქართული ყოფა-ცხოვრებისა.

დღეს ის დიდი მსახიობია. რომელსაც შესწევს ძალღონე ღრმად ჩაიხედოს ევროპის ცხოვრებაში და ხელოვნებით, მხატვრულის ზომიერებითა და სისწორით გამოსახოს მისი გმირები.

აქამდე ნიკო გოცირიძე იყო საყვარელი სტუმარი ქართულ სუფრაზე.

დღეს კი მას ევროპულ სუფრაზედაც ამაყად, ღირსეულად და მოხდენილად უჭირავს თავი.

ნიკო გოცირიძეში ძლიერია ტრადიცია ქართული თეატრისა, რომელიც ქართველი ადამიანისათვის წმინდა ადგილია.

და ამის გამო ის ღირსეული მსახიობიც არის, ღირსეული ადამიანიც.

სიყვარული და პატივისცემა ქართველი საზოგადოებისა მან სრულიად დაიმსახურა.

## გრიშაშვილის პროზილი

ტანმორჩილი და მკვიდრად შეკრული, სანდომიანი და მარილიანი.

მშვიდი და წყნარი, თავმდაბალი და უწყინარი.

თავდაქერილი და თავაზიანი, დარბაისელი და ზრდილი. ენატკბილი და ენაგესლიანი.

მიხვრა-მოხვრაში უბრალო და წყნარად მოსიარულე, მუდამ თავის შიგნით მზირალი.

პირველი შეხედვით თითქოს ცივი, ანგარიშიანი. მაგრამ მუდამ შინაგანი ცეცხლით აგიზგიზებული და წმინდა სიგიჟემდე გატაცებული.

ტკბილად მოსაუბრე და ცეცხლის მფრქვეველი, ნაზი და ტლანჭი. ევროპელი და აზიელი. მუდამ კი თბილისზე შეყვარებული.

ქართული სიტყვის მხატვარი და ხუროთმოძღვარი, — აი გრიშაშვილი.

ქართულ სიტყვაში მან აღმოაჩინა ახალ-ახალი სილამაზე. გამოჰკვერა, გამოჰკვეთა და მორთო ფერად სამკაულებში.

გრიშაშვილის სიტყვა ხან სევდიანია, ხან მხიარული. ხან გულჩათხრობილი, ხან უდარდელი, ხან ტკბილი. ხან შხამიანი. ხან თვინიერი, ზოგჯერ კი გიჟი. მუდამ კი სიყვარულის ცეცხლით აგუგუნებული და სისპეტაკით თვალის მომკრეღი.

სიყვარულს სამშობლო არ გააჩნია; ის ყველგან არის, ყველასთან, — საკაცობრიო გრძნობაა.

სიყვარულის ტახტზედ დადაფნილი გრიშაშვილი კი უაღრესად ეროვნული მგოსანია:

იმის ყოველ სტრიქონში. ყოველ სიტყვაში ქართული სურნელებაა, გრიშაშვილი ქართული სიყვარულის ტარიელია.

გრიშაშვილს უყვარს ასეთი დისონანსები: უნაზეს გრძნობათა გვერდით ბებუთი და სისხლი.

იმიტომ რომ ამგვარია თვითონ თბილისი: ინით შეღებილი თითები და მანიკიური, პარიზის მოდა და ჩადრი, ოპერა და შახსეი-ვახსეი.

გრიშაშვილი ხომ თბილისის პირწავარდნილი შვილია:

მიყვარს ტფილისი! ირაკლივით მუღამ მშფოთვარი!  
და მსურს, აჟ მოვეკდე, რომ მისი მზე სწვაედეს ჩემს კუბოს!

გრიშაშვილმა იცის ევროპის ფასი, მაგრამ თავის თბილისს ის არავის დაანებებს. ევროპა მასში თბილისს ვერ ჰკლავს; თბილისიც არ ავიწყებს მას ევროპას.

ევროპა თბილისში — აი მისი სურვილი:

მსურს ევროპა გარდაეჰქნა მე ტფილისის უბნებად.

ზოგჯერ გრიშაშვილი გაუგებარია: მისი ლექსის ევროპული სურნელება მიგიზიდავთ და უცებ თავს წაადგებით აზიელს ბებუთით ხელში. იმიტომ, რომ გრიშაშვილში გაორებულია პიროვნება:

ჩემში ორი გრძნობაა, ორი ენამკვერობა, —  
სინაზე და სიტლანქე, ტფილისი და ევროპა.

გრიშაშვილი ძველი თბილისის რომანტიკოსია, ერეკლეს თბილისისა.

შეითანბაზარი, ნარიყალა, შუშაბანდები, ვიწრო ქუჩები. ყარაჩოღელები, კინტო — აჩრდილებივით ამოდინან გრიშაშვილის სტრიქონებში; ძველი ჰამქარი გამოჩნდება ქუჩაბანდში და წინ მიუძღვის უსტაბაში მოფარფატე მზის ყალამქართ. ისმის ზურნა; დილა აა-რი.

გრიშაშვილს „არ ასვენებს საქართველოს დარდი და ბოღმა“ (ტ. II, გვ. 103) და ფიქრი წამოშლის ხოლმე იმის ოცნებაში წარსულის სურათებს.

მაგრამ მარტო ამის გამო არ უყვარს გრიშაშვილს ძველი თბილისი; იმის ბუნებაში არის ყარაჩოღული თავისებურება, დარდიმანდობა, ლამაზი სიტლანქე. აზიელია გრიშაშვილი გრძნობით, ბუნებით, მაგრამ მისი გონება ევროპისაყენ იხედება:

მიყვარს ლექსის სიციხარე — თემა აღმოსავლური —  
მაგრამ მუღამ მალეღევს მე ევროპა სწავლული.

გრიშაშვილი რითმის თავადია. მას ერთობ ეადვილება რითმებთან თამაშიც, მათი ხმალში გამოწვევაც და ყოველთვის გამარჯვებული რჩება.

რითმების წალკოტში არა ერთი და ორი საუცხოო ყვავილი და-  
ურგავს და კიდეც ბევრს დარგავს.

რითმათა თავისებურსა და თავისუფალ ფერხულში გრიშაშვი-  
ლი იშვიათია. მისი რითმა ხან ქალივით ნაზია, ხან ვაჟივით ძარღვმა-  
გარი, ხან მშვიდი და ხალისიანი, ხან კი მქუხარე და ცეცხლის მფრქვე-  
ველი, მაგრამ მუდამ ელვის სხივებში დაფერილი და ქალწულის  
რძით ტანაყრილი.

გრიშაშვილი შეუდარებელი რაინდია სიყვარულისა:

ერთი უჩნდეს სამიჯნურო,  
ერთსა ვისმე აშიკობდეს,  
ყოვლსა მისთვის ჰხელოვნებდეს,  
მას აქებდეს, მას ამკობდეს,  
მისგან კიდე ნურა უნდა,  
მისთვის ენაშუსიკობდეს.

გრიშაშვილის სტიქიონი — სიყვარულის ზღვა ხან დაწყნარე-  
ბულია, ხან მღელვარე და აზვირთებული, მაგრამ ერთფეროვანი არ  
არის, რადგანაც მისი სიყვარულის ზღვა უძირთა და მისი ფერადები  
უთვალავი.

სიყვარულის ზღვამ გრიშაშვილში ჰპოვა თავისი ღირსეული  
მხატვარი, რომლის ყოველი ნახაზი ჩვენი გულის უნაზეს სიმებს  
ტკბილად არხევს და ათრთოლებს.

მე ტფილისმა შემამკო, მე ტფილისმა შემზარდა, —

გრიშაშვილი უთბილისოდ შეუძლებელია, ისე როგორც თბილისი  
წარმოუდგენელია ამას იქით უგრიშაშვილოდ.

გრიშაშვილი ფაფარაყრილი გატაცების, ყოვლად კეთილშობი-  
ლი ახალგაზრდობის მგოსანია, გარედან მშვიდი. შიგნით კი მუდამ  
მოუსვენარი, გარედან წყნარი, შიგნით კი მუდამ მღელვარე.

სადაც ახალგაზრდობაა თავისი ცეცხლით, გატაცებით, სიყვა-  
რულით, სიგიჟით და წმინდა სევდით, იქ გრიშაშვილი მუდამ იქნება  
სანატრელი თამადა.

გრიშაშვილის პოეზია ხან შუადღის ვნებიანი სიცხეა, ხან მთვა-  
რიანი ღამის ოცნება, მუდამ კი თავისებურია, გრიშაშვილური.



## ორი იანვარი და ჩვენი თეატრი

რა დანიშნულება აქვს თეატრს?

არის ზოგჯერ ასეთი კითხვა კამათის დროს, გაზეთში, ჟურნალში.

ასეთი კითხვა თავისთავად შეცდომაა.

თეატრისათვის არ არსებობს ერთხელ და სამუდამოდ ჩამოყალიბებული მიზანი და დანიშნულება.

რატომ?

პირველი იმიტომ, რომ მარადიული ამ ქვეყანაზე არაფერია.

მეორე იმიტომ, რომ თეატრი არის ცოცხალი ნაწილი ცხოვრებისა და თუ ცხოვრებას უკან ჩამორჩა, უსათუოდ მოკვდება.

ცხოვრება მუდამ მოძრავია. ის წინ მიდის ზოგჯერ ნელის ნაბიჯით, ზოგჯერ გაჩქარებით. ზოგჯერ მიექანება, მიჰქრის.

მას თან მისდევს ადამიანის ფიქრი და გრძნობა. იცვლება ცხოვრება — იცვლება ადამიანიც. — ეს დღეს საანბანო ქეშმარიტებაა.

ამიტომ ის, რაც შეეფერებოდა ძველ ელინს ან რომაელს, დღევანდელ ევროპელს აღარ დააკმაყოფილებს.

სხვადასხვა დროს სხვადასხვა არის ადამიანის შეხედულება, გემოვნება, — სხვადასხვა არის და უნდა იყოს ამიტომ თეატრიც.

ის ზოგჯერ სკოლაა, ზოგჯერ ტრიბუნა, ზოგჯერ დამრიგებელი, აღმზრდელი. ზოგჯერ მებრძოლი; ზოგჯერ კი მშვენიერი სანახაობა. ესთეტიური გასართობი.

როდესაც საზოგადოება დაყოფილია სხვადასხვა კლასებად. თეატრმა რომ ერთი სახე ატაროს, შეუძლებელია.

კლასობრივი დაყოფა, შეგნება, გემოვნება, იდეალი თეატრსაც ანაწილებს.

თეატრი ჩაისახა ჩვენში მაშინ, როდესაც ქართველი ერი დაუძღვრებულნი იყო ეკონომიურად, სოციალურად და პოლიტიკურად ხომ — მკვდარი.

აუცილებელი იყო ერის აღდგენა, გამოცოცხლება.

ეს როლი იკისრა ჩვენმა ნორჩმა თეატრმა.

რა იყო მიზეზი ერის დაქვეითებისა, დასნეულებისა?

მიზეზი გარეშე, მიზეზი შინაგანი.

თავდაპირველად აუცილებელი იყო შინაგანი მიზეზის მოშორება, შინაგანი გაჯანსაღება ქართველი ერისა.

ამისათვის კი საჭირო იყო გაშუქება, გამომზეურება ყველა იმ ნაკლისა, რაც ერის სხეულს სწამლავდა.

ჩვენმა თეატრმა ეს საქმე იკისრა.

ქართველ ადამიანს ერთი დიდი ღირსება აქვს: მას შეუძლია საკუთარ თავს განზე გაუდგეს, შორიდან შემოკხედოს და მისი ნაკლი დამცინავი სიცილის ანეკსზე წამოაგოს.

ეს ღირსება თან დაჰყვა ჩვენს თეატრს: იმან საჯაროდ სცენაზე გამოიტანა ჩვენი ეროვნული ნაკლი და დამცინავი სიცილი დააყარა მას.

მას აქეთ მოვდივართ და დავცინით ჩვენს საკუთარ თავს, დავცინით და ვიცინით.

დავცინით ერთადერთი მიზნით — რომ გავსწორდეთ, ავმალღდეთ.

სიცილი კი თავდება ამაღლებისა.

ამ სიცილში ზოგჯერ ცრემლებია, მწარე სევდა. ზოგჯერ — მადიანი ხითხითი, უღარდებლობა. ხოლო ის ყოველთვის კეთილშობილია, იმედიანი.

ორ იანვარს დღესასწაულია ქართული თეატრის, ამ საუკეთესო ტაძრის ჩვენი ერის გაწმენდისა და ამაღლებისათვის.

ორ იანვარს ჩვენ უნდა გავიხედოთ უკან და მადლიერებით მოვიგონოთ ყველა ის ხუროთმოძღვარი, რომელთაც ააგეს ეს ტაძარი. — ყველა ის ქურუმნი. რომელნიც ამ ტაძარში „დავლენდნენ ლოცვასა წმინდას“ ჩვენი ერის საკეთილდღეოდ.

შეგნებული ერისათვის წარსული. აწმყო და მომავალი ერთი მთლიანი და განუყოფელი მოვლენაა.

ჩვენ ისე უნდა ვცხოვრობდეთ წარსულში, როგორც აწმყოში და წარსულიც ჩვენს მეხსიერებაში უნდა სცოცხლობდეს.

ამაშია სიყვარული და პატივისცემა ერის წარსულისა.

ვისაც ეს არ გააჩნია, მას მომავალიც არა აქვს.

როდესაც ჩვენ აღვადგენთ მეხსიერებაში ჩვენი თეატრის წარსულს, ჩვენს წინაშე აღიმართებიან ერისთავი და ანტონოვი. უფრო ახლოს კი ცაგარელი.

ეს სამი პიროვნება — ჩვენთვის საკმაოდ დიდი — ბურჯია ჩვენი თეატრისა.

მათ დაანახვეს ქართველ საზოგადოებას მისი სახე — სახე მრუდე, ზღმურდლიანი; საზოგადოებამ დაინახა საკუთარი თავი, წასკდა სიცილი; ეს სიცილი იყო თავდები მისი გამოსწორებისა და ამაღლებისა.

ძირს ძველი დრომოჭმული ცხოვრება, წინ — განახლებისაკენ! — აი რა გაისმოდა ამ სამების საყვირიდან.

ნაკლი ჩვენი საზოგადოებისა, შეუგნებლობა, წოდებრივი ყოყოჩობა, ცრუმორწმუნეობა მათმა ნიჟმამ გამოამზეურა მოურიდებლად. პიროვნება დაჩაგრული წოდებისა, გლენობისა ამათ აიყვანეს ღირსეულ და საპატიო სიმადლეზე და ამით ერის აღდგენას, გაჯანსაღებასა და გაერთიანებას საძირკველი ჩაუყარეს.

განსაკუთრებულის სიცხოველით უნდა ვგრძნობდეთ გლუხარჩის, ზურაბის და ასიკოს ღვაწლს დღევანდელ დღეს და მათდამი განსაკუთრებული პატივისცემით ივსებოდეს ჩვენი გული.

1924

## ოვანეს თუმანიანი

ი. გრიშაშვილის თარგმანი.

რუსთველის პროსპექტზე რომ გაივლიდით, ხანდახან შეხვდებოდით ერთ მოხუცს, რომელიც უნებლიეთ იპყრობდა თქვენს ყურადღებას.

შეუძლებელი იყო, გვერდზე ჩაგვევლოთ და მისთვის არ შეგეხებოდათ: მთელი მისი გარეგნობა. ფაქიზად აყრილი ტანი, სახის გამომეტყველება მეტად მიმზიდველი იყო თავისი კეთილშობილებით.

დარბაისელი, ზრდილი, სპეტაკი, ყველასადმი სიყვარულითა და კეთილშობილებით სავსე, — აი რას წაიკითხავდით იმის თვალებში. აი რას ჰმოწმობდა ყოველი ნაკვთი მისი სახისა.

დღეს რუსთველის პროსპექტი დაობლებულია, მას აღარ ამშვენებს კეთილი და კეთილშობილი, დიდებული მოხუცი და ჩვენ ყველა ვგრძნობთ ამ ობლობას, ამ დიდ დანაკლისს.

ვინ იყო ეს მოხუცი?

ოვანეს თუმანიანი.

პოეტი იყო თავისი მშობელი ერის ჭირისუფალი, მისი გულის შესაიღუმლე, იმის ზრახვათა მომღერალი, იმისი სევდის დამაამებელი და, ამავდროს, ის იყო არა ნაკლებ საყვარელი ჩვენთვის. რადგანაც თვითონ მან საქართველო შეიყვარა, როგორც თავისი მეორე სამშობლო. საქართველოს მზე, სილამაზე და გრძნობათა სიჭარბე ჩაქსოვილია იმის პოეზიაში:

დავრჩეთ, ქურუმნო,

ძმად და მეგობრად,

შევქმნათ ოჯახი ამხანაგური! —

ეს იყო ოვანეს თუმანიანის ოცნება. ქართველები და სომხები, საქართველო და სომხეთი მისთვის ორივე ძვირფასი იყო, მას უნდოდა ამ ორ ერთა შორის ძმური ოჯახის შექმნა და ამისათვის იყო თავ-

გამოდებული, გულწრფელი მქადაგებელი ძმობისა, ერთობისა და ეროვნული სოლიდარობისა.

ჩემი სიმდიდრე  
სიკეთეა და სიყვარული,  
პოეზიისთვის შევიყვარე  
ყველა ქვეყნები, —

ეს სიტყვები სარკე არის ოვანეს თუმანიანის ბუნებისა და ამავე დროს გასაღები მთელი მისი შემოქმედებისა.

პოეტი შვილი იყო ხალხისა. მშრომელი ხალხის გულიდან გამო-სული და მას არა თუ არ გაუწყვეტია კავშირი ხალხთან, არამედ მისი შემოქმედება. მთელი მისი აღმაფრენა მშრომელი ხალხის ბედობა-ბაღს ევლებოდა თავს:

მე მდიდარი ვარ, ხალხს შევწირე ლხენა და გლოვა.

სიყვარულითა და სიკეთით აღსავსე ადამიანისათვის დაუშრეტე-ლი წყარო შემოქმედებისა და, ამავე დროს, ყველაზე უფრო მიმზიდ-ველი არის ტანჯული ხალხის ბედი.

ოვანეს თუმანიანის ძლიერებასაც სწორედ ის შეადგენს, რომ პოეტი მუდამ ტანჯულ ხალხთან არის. მუდამ მშრომელი ხალხის საგალობელს აწყობს და თვით შემოქმედებაც იმისი მკიდროდ არის დაკავშირებული მშრომელი ხალხის შემოქმედებასთან.

ოვანეს თუმანიანი განთიადის მახარობელია, მშრომელი ხალხის ბრწყინვალე დილის ტარიელი, მთელი თავისი არსებით ის შესტრფის და უგალობს ამ ბრწყინვალე დილას, რადგანაც აღფრთოვანებული მქადაგებელია მშრომელი ხალხის გათავისუფლებისა.

ოვანეს თუმანიანის პოეზია დალამბულია ნაზი, ტკბილი, ცრემ-ლებში დაფერილი სევდით, მაგრამ შიგ გადაშლილია საუცხოო თა-იგული იმედისა და ბრწყინვალე განთიადისა.

პოეტი ორივე ფეხით მიწაზე არის დაბჯენილი და მიწა ჰკვებავეს მას თავისი სავსე ძუძუებით.

ქალაქი მისი რთული და ფენაჩქარებული ცხოვრებით, მისი შე-უსვენებელი, დაუცხრომელი მოძრაობით ოვანეს თუმანიანს ნაკლე-ბად იზიდავს.

სოფელი, სოფლის ბუნება, სოფლის ცხოვრება, სოფლის მუ-შა — აი პოეტის ბედისწერა. და ამ დარგში ოვანეს თუმანიანი მარ-თლაც ლამაზია, მომხიბლავი, თვალის მომჭრელი, ბუნებრივი და ძლიერი.

ოვანეს თუმანიანი უდიდესი ესთეტია: სილამაზე უწინარეს

ყოვლისა. პატარა ლექსს აიღებთ. ლეგენდას, პომას თუ მოთხრობას, — სილამაზე გატკობთ და გხიბლავთ.

ოვანეს თუმანიანი დიდი რეალისტია: სინამდვილე უწინარეს ყოვლისა. მისი უმთავრესი თემები ცხოვრების სინამდვილიდან არის ამოღებული. სოფლის გლეხი და იმის კისერზე წურბელა მევახშე, სილატაკე და სიმდიდრე, გაყვლეფილი და მყვლეფელი. ძალმომრეობა და უსამართლობა — აი ფერადები მისი მხატვრობისა.

საუცხოოა ოვანეს თუმანიანის მოთხრობები, რომლებიც წარმოადგენს სარკეს ნამდვილი ცხოვრებისას. მხატვრული ზომიერება, სიცხველე და სიციხადე, საუცხოო სურათები და სპეტაკი, კეთილშობილი მისწრაფება პოეტისა — ყველა ეს ერთად სტოვებს ძლიერ უშუალო შთაბეჭდილებას.

ოვანეს თუმანიანის შემოქმედების გვირგვინს წარმოადგენს პოემა „ანუშ“. აქ მოცემულია იშვიათ ფერებში და საუცხოოდ შესრულებული სოფლის მთელი ცხოვრება და ბუნება, მისი ღზინი, ჭირვარამი, ადათი, ზნე და ჩვეულება.

„ანუშ“ წარმოადგენს იშვიათ სიმფონიას. რომელიც თავისი სილამაზით სულსა ჰხიბლავს და გულს ატკობს.

პოეტი გრიშაშვილი ოვანეს თუმანიანის პირწავარდნილი ორეულია. მისი თარგმანი თარგმანი კი არ არის, იგივე ორიგინალია. როდესაც თქვენ ჰკითხულობთ გრიშაშვილის თარგმანს, თქვენ წინაშეა მხოლოდ ოვანეს თუმანიანი ქართულად მომღერალი და დარწმუნებული ხართ, რომ აქ არავითარი თარგმანი არ არის, არამედ თვითონ ოვანეს თუმანიანი სწერს ამას ქართულად.

გრიშაშვილის ლექსიკონი მეტად მდიდარია, სიტყვა მას მეტად ემორჩილება და რითმა საუცხოოდ აქვს დაგეშილი. გრიშაშვილი დიდი მგოსანია და მისი „ოვანეს თუმანიანი“ — დიდი გამარჯვებაა.

## ტასო აბაშიძე

ქართველი ერის ისტორია მუდამ საშინელების მწვერვალებზე ტრიალებდა. ქართველ ადამიანს ჯერ ვერ გამოეტირებია ერთი უბედურება, რომ მეორისათვის უნდა მიეშვირა მკერდი. ერთადერთი, რაც ამართლებდა ასეთ პირობებში იმის არსებობას, რაც აძლევდა მას სიმტკიცეს და სიხალისეს, ეს იყო ხელოვნება.

ტანჯვა და არსებობა ხელოვნებისათვის — აი ქართველი ადამიანის ბედისწერა.

ისტორიის საშინელ ფურცლებზე ხელოვნება იყო უდიდესი ნუგეში ერისა, და ხელოვნების ტაძარი გულის დამატკობელი თავშესაფარი იყო ყოველგვარი უბედურების დროს.

გვგონებ ხელოვნების საკუთრთხვეველში არც ერთ ერს არ შეეძლოს ისეთი უანგარო მსხვერპლის შეწირვა, როგორც ქართველებს. მშვენიერების ცეცხლში არავის შეუძლია ისე თავდავიწყებით წვა სრულ დაფერფლვამდე, როგორც ქართველ ადამიანს.

ხელოვნების სამსახური და ერის სამსახური ამიტომაც ჩვენში ერთი და იგივეა. ხელოვნების კოცონზე მიტანილი მსხვერპლი ერის კეთილდღეობისათვის გაღებული მსხვერპლია.

ერთი უდიდესი სამსხვერპლო ჩვენი ხელოვნებისა თეატრი არის. მას არა აქვს დიდი ისტორია, მაგრამ ის სავსეა ბრწყინვალე სახელებით, რომლებიც მთელ თავის არსებობას, შინაგან წვას, გატაცებასა და სიყვარულს ერს და ხელოვნებას აძლევდნენ, თავისათვის კი არაფერს არ იტოვებდნენ, არაფერს არ ითხოვდნენ, გარდა ტანჯვის გვირგვინისა.

ერთი ასეთი ბრწყინვალე სახელია ტასო აბაშიძე.

ამ წლის იანვარი იშვიათი დღესასწაულია ჩვენი ხელოვნებისა.

სწორედ ამ დროს ოცდა ხუთი წლის წინათ ტასო შემოცქრიალდა ჩვენს სცენაზე და თან მოიტანა სიცოცხლე, სიცილი, მხიარულება.

გაიღვიძეთ, უკუაგდეთ სევდა! ჩემთან ერთად მოახტით იმედის რაშებს და სიცილით და მხიარულებით გასწით წინ ახალი ცხოვრებისაკენ! — აი რას ეუბნებოდა ქართველ საზოგადოებას ყოველი მისი გამოსვლა იმ ოცდახუთი წლის განმავლობაში.

ქართული ბუნების სიმკვირცხლემ, სიხალისემ, ნიჰმა და ცეცხლმა ტასო აბაშიძეში ჰპოვა საუცხოო განსახიერება.

ოცდახუთი წელი გვზიბლავს ის იშვიათის თამაშით. გვაოცებს გრძნეული ნიჰით, გვალეღვებს წრფელის გრძნობით, გვაკაჟებს თავისი ტემპერამენტით, გულს გვივსებს ხალისით, თავისი ცოცხალი მხიარულებით, და რა სევდაც უნდა გვაწვეს, უკუაგდებთ და მუდამ აღტაცებული, აღფრთოვანებული ვხვდებით მას, რადგანაც ვიცით, რომ აქვს ჯადოსნური მალამო ჩვენი სევდის გასაქარვებლად.

ჩვენ გვიყვარს, ჩვენ მოგვწონს ჩვენი მხიარული, ბალისიანი, ცელქი ტასო და სრული საბუთიცა გვაქვს ამისი:

რადგან ავთანდილ შენა,  
სხვა რად ვინ მოგვწონებს.

ჩვენს ხალხს რიცხვი სამი მისტიურის გრძნობითა და სიწმინდით უყვარს; როგორც თავის იმედებს და გატაცებას, ისე თავის ანგარიშს, აღრიცხვას ამ რიცხვით გამოხატავს.

ჩვენი ხელოვნებისათვის ეს რიცხვი გადაიქცა სათაყვანებელ სამებად მას შემდეგ, რაც ტასო აბაშიძე სიხარულის და კისკისის სხივებით შემოსილი შემოიჭრა ჩვენს სცენაზე.

ტასო — ეს ცელქი, ცქრიალა, სიცოცხლითა და სიხალისით სავსე ნიჰი აბაშიძეების დიდი სამხატვრო ოჯახისა, — მთელი ისტორიაა ჩვენი თეატრისა 25 წლის განმავლობაში.

ქართულ სცენას ჰყავს ისეთი სამება, რომლის ბადალს ვერც ერთი სცენა ვერ წამოგვიყენებს ვგონებ.

ტასო აბაშიძე ქართველი ერის კეთილი ანგელოზია, ჰირსა და ლხინში მუდამ მასთან მყოფი. მისი გამამზნევებელი, მისი იმედი, მისი წყლულების მალამო, მისი ოცნების ამშლელი, მისი დამატკობელი, მისი გადამხალისებელი, განუყრელი დარაჯი მისი სულის სიმშვიდისა და სიმტკიცისა, მის თვალებზე მხიარულების ცრემლებად გადამქცევი მწუხარების ცრემლების.

ტასო აბაშიძე საუცხოო ყვავილია ჩვენს სცენაზე დარგული, მუდამ გაშლილი. მუდამ მზის სხივებით აფერადებული და ახალისებული, სიხარულის ნაპერწკლებით მოთამაშე, მარად ცინცხალი და უჰკნობი.



ტასოს ცალ ხელში სიცილის დაპენტილი ქულა უპყრია, მეორეში მზის სხივთა კონა და ოცდახუთი წლის მანძილზე სიცილში ახშობს და აქარწყლებს ქართველი ერის სევდას, მზის სხივებში ანავადებს ჩვენს იმედებს.

ტასო აბაშიძის სახელთან შეერთებულია მთელი ერის განცდანი, უნაზესი გრძნობანი, იმედით აღსავსე სიცილი და სიხალისე.

ერის სევდის უკუმყრელი, ერის გულში მზის სხივების ჩამქსოვი — აი ტასო აბაშიძე.

ოცდახუთი წლის განმავლობაში არა ყოფილა ქართველი ერის ცხოვრებაში არც ერთი დღე ნისლით დაბურული, რომ შიგ იმედის სხივებით არ შემოცქრიანებულიყოს ტასო აბაშიძე, არ ყოფილა არც ერთი დღე სიხარულისა, რომ შიგ არ ჩაქსოვილიყოს ტასო აბაშიძის მხიარული კისკისი.

ერის სიყვარული და ერის სიხარული, ქართული სცენის სიცოცხლე და მშვენიება, სიამაყე და სიხალისე — აი ტასო აბაშიძე.

ოცდახუთი წლის განმავლობაში არ გაწყვეტილა მათ შორის გაბმული სიყვარულის არც ერთი ძაფი.

ქართველი საზოგადოება მოვალეა ახლა თვითონ ამოუდგეს გვერდში მის საყვარელ მსახიობს, მისი გულის ციციანათელას, მისი ჭირისა და ლხინის თანამოზიარეს და გაუფინოს სიყვარულის ყვავილები.

ტასომ დაიმსახურა პოეტის სიტყვები:

სად ხარ, იმ არეს  
მოპყენ სიამეს, —  
უშენოდ მოსცდეს მხიარულება!  
შენის ენითა,  
სავსე ლხენითა  
ვინ არა იგრძნოს გულკეთილობა!

ჩვენ ყველა მოვალე ვართ, განსაკუთრებით ვიგრძნოთ გულკეთილობა და ამდენი სიკეთის მთესველს — ჩვენს ტასოს — სიკეთითავე მივუზღაოთ.

## ვაშა ტასოს!

„ნეტავ იმას, ვისაც ესმის აღმაფრენი მზის სიცილი!“

ჩვენი სამშობლოა საქართველო, რომელსაც ეს სიცილი ესმის, რომელიც ამ სიცილში ჰპოვებდა დაუშრეტელ ენერგიას, ნუგეშსა და სიხალისეს.

შეთა დროთა ვერ შესცვალეს მის გული ანდამატისა.

განა ცოტა შეგმა დრომ გადაიარა იმის თავზე? მაგრამ მზე არის მისი რაინდი, მისი მიჯნური და მასზედ შეყვარებული.

საქართველო — მზის საყვარელი!

ამ სიყვარულს ბევრი კეთილშობილი ქართველი წარმოუშვია. ბევრსაც წარმოშობს კიდევ, ჯერ ბლომად შესწევს საამისო სინოყივრე ჩვენს სამშობლოს.

ტასო აბაშიძეც ამ სიყვარულის შვილია — მზისა და საქართველოსი.

განა იმისი სიხალისე მზის შუქის ელვარება არ არის? იმისი ცქრიალი ხომ მზის სხივების ნავარდობაა? იმისი სიცილი განა მზის სიმხურვალის ციმციმი არ არის? ტასოს სიცელქე ხომ თამაშია მზის სხივებისა ვარდის ფურცლებზე დაკიდებულ ცვარის წვეთებში?

დეე თუნდაც წარღვნა დატრიალდეს ჩვენს თავზე! — არად ჩავაგდებთ. სანამ ჩვენი ტასო ჩვენთან არის და ჩვენ მასთან. სიცილის ნავს მოგვიწნავს ჩვენი ტასო და გადავცურავთ იმის გაშმაგებულ ტალღებზე.

დეე უდიდესი უბედურება მოგვადგეს კარს! — არად ჩავაგდებთ, როდესაც ტასოა ჩვენთან. სიცილის გუნდებს მივაყრით და ისე გავისტუმრებთ.

დეე საშინელმა სევდამ დაისადგუროს ჩვენს გულში. ვერ გავტეხავს, ჩვენ გავტეხავთ მას, სანამ ტასო გვერდით გვეყოლება.

რა განსაცდელშიაღც უნდა ჩავგაყენოს ბედის ტრიალმა, სასო-

წარკვეთილებამდე ვერ მიგვიყვანს, სანამ ჩვენს სცენაზე ტასოს ვუმზერთ.

ტასო თვალის მატყვევებელი მარგალიტია აბაშიძიანთ სამხატვრო ოჯახისა.

შეჯიბრებაშიაც არავისთან უკან არ დავიხევთ.

ოცდახუთი წელიწადი ანათებს ჩვენს სცენას ჩვენი ციციანათელა, ჩვენი ცქრიალა, ჩვენი, ჩვენი... ევხ, მე მინდა ისეთი სიტყვა, რომ არავის არ გაეგონოს და ყველას კი ესმოდეს.

რა უცებ გაიბრინა ამ ოცდახუთმა წელმა! იმიტომ რომ ტასოს თამაშმა გაჰლია, შეამოკლა ის.

ტასოს მზერაში შემოგვადნა ოცდახუთი წელი და მიინც ვერ გავძებნით მისი მზერით.

ასეთიან ძალა ჰქმნარიტი ნიჭისა, დიდი ნიჭისა.

რა არ უთამაშნია ამ ხნის განმავლობაში ჩვენს კოპწია ტასოს, ვისი სახე არ აღუდგენია ჩვენს წინ! ხუთასზე მეტი სხვადასხვა როლი! განა ეს შესაძლებელია?!!

ვასო, მაკო, ტასო! ქუდები ძირს ხელოვნების ბრწყინვალე ქურუმებისა და დიდი ქართველების წინაშე!

ჩვენი მზე ჯერ კიდევ ბრწყინავს და დიდხანს იბრწყინებს!

ჩვენი კობტა, კოპწია, პატარა ტასო და ხუთასი როლი.

ღმერთი არ არის?

ჰაი, ჰაი, რომ არის და ყველაფერიც შეუძლია: ეს გახლავთ ჩვენი ტასოს ანკარა, დაუშრეტელი. ამოუწურავი, ყოვლის შემძლებელი ნიჭი!

დღევანდელი დღე მარტო ტასოს დღესასწაული კი არ არის — ეს ჩვენი დღესასწაულია, მთელი ქართველი ერის ზეიმი.

დღევანდელი დღე მარტო ტასოს გამარჯვება კი არ არის — ჩვენი გამარჯვებაა, მთელი ქართველი ერის ძლევა მოსილებათა.

ვაშა ტასოს!

დღევანდელი დღე მარტო ტასოს სიამაყე კი არ არის — ჩვენი სიამაყეა, მთელი ქართველი ერის ეშხიანობა.

შაბაშ სიტყვა, შაბაშ კაცი,  
შაბაშ საქმე. მისგან ქმნილი!

შაბაშ ტასო!

## ჩვენი თეატრის გარშემო

ძველი რომაული თქმულებაა: წიგნებს თავისი ბედი აქვთო. ხელოვნებასაც თავისი შინაგანი ბედი აქვს.

სიტყვა სულ ხშირად არის მარტივად, უბრალოდ გამოსახვა მრავალი საგნის და მოვლენის სხვადასხვა თვისებისა. მაგრამ ჩაკვირვებულმა გონებამ ამ საგნებსა და მათს თვისებებს უნდა მიაქციოს მთავარი ყურადღება და არა მარტო სიტყვას.

ასე გახლავთ ხელოვნებაც: ამ ერთ სიტყვაში შეჭგუფებულია არა თუ მრავალი ცნება, მრავალი დასრულებული და დამთავრებული რკალი. ხელოვნება ცხოვრების შვილია, ცხოვრება კი მუდამ მოძრავია და სხვადასხვა საფეხურზე მას სხვადასხვა მხატვრული გემოვნება და მოთხოვნილება აქვს. ხელოვნება ვითარდება ერთგვარი მხატვრული შეხედულების რკალში და როდესაც სრულებით ამოსწურავს ამ დარგში თავის თავს, მას აღარა აქვს გასაქანი; ამიტომ უნდა გაარღვიოს თავისი რკალი და მოსძებნოს ახალი გზები, ახალი ხაზები, ახალი სიტყვა, ახალი ასახვა და გამოსახვა, ერთი სიტყვით, უნდა შემოავლოს ახალი რკალი; ეს არის ევოლუცია, განვითარება, რომელსაც ვერ ასცდება ვერც ერთი დარგი ხელოვნებისა.

ჩვენი თეატრი თავიდანვე ვითარდებოდა ქართული ყოფა-ცხოვრების რკალში. ჩვენმა შემოქმედებამ ამოსწურა აქ თავისი შესაძლებლობა და მოგვცა უკვდავი სახელები, რომელთა ხსოვნაც მარად სათაყვანებელი იქნება ყოველი შეგნებული ქართველისათვის. ჩვენი ძველი თეატრი შეადგენს ჩვენს სიამაყეს, ჩვენს ეროვნულ სიწმინდეს, მაგრამ დრომ გაუხსწრო მას და სასცენო ხელოვნებას ახალი რკალი, ახალი გზები ესაჭიროება.

ძველი რკალი სასცენო ხელოვნებისა გაარღვია კოტე მარჯანიშვილმა და ავლებს ახალს. ამით მან გაუწია უდიდესი სამსახური ქართულ თეატრს, ქართულ ხელოვნებას. ხელოვნება არის უდიდე-

სი ეროვნული საქმე და დიდი რეფორმატორი ჯმ დარგში არის ამავე დროს დიდი მოაზავე თავისი ერისა.

მარჯანიშვილს აქვს დიდი ნიჭი, ძიება, მძლავრი გაქანება, არტიტული გემოვნება, დიდი ინტუიცია, უდიდესი გამოცდილება და სამხატვრო განვითარება. მან ჩვენი სცენა სრულებით გარდაქმნა. წინათ ჩვენს სცენაზე იყო დიდი ნიჭი და სრულებით უვიცი უმრავლესობა. დღეს კოტე მარჯანიშვილმა სულ მოკლე ხანში მოგვცა მომზადებული და კულტურული მსახიობი, გაწვრთნილი თანამედროვე მიმდინარეობათა გამოსახვისათვის.

ვიმეორებ, კოტე მარჯანიშვილის დამსახურება ჩვენი ხელოვნების წინაშე მეტად დიდია და თავისი სახელი მან უკვე ჩასწერა ქართული ხელოვნების განახლების ისტორიაში.

კოტე მარჯანიშვილმა გადაშალა ახალი შესაძლებლობა, ახალი პერსპექტივები და ვინ უნდა გაეტაცა, ვინ უნდა აენთო ყოველივე ამას წმინდა სიგიჟის ცეცხლით, თუ არა ახალგაზრდობა?

ახალგაზრდა მსახიობთა საფეთქელიც სხვანაირად ამუშავდა. გული სხვა გრძნობით აძგერდა, ოცნებამ ფრთები აისხა და ბრძოლის ყიჟინით გაექანა წინ. ვინ ებრძოდა განა, ვინ ელობებოდა წინ, ვინ უშლიდა ხელს? ვკითხულობთ ჩვენ.

რა თქმა უნდა, არავინ.

მაგრამ ასეთია ბუნება ახალგაზრდული აგზნებისა და გატაცებისა; როდესაც მასში დაგროვილი ენერჯია ძალად იქცევა, ის წინ მიექანება და იბრძვის, თუნდაც არავინ არ უხდებოდეს, ასეთი გაქანების დროს გაზომვა ყოვლად შეუძლებელია და თავისი მოქნეული ვერც ახალგაზრდა მსახიობებმა მოზომეს იანვრის 29-ს გამოსვლის დროს. მანიფესტი ჩვენთვის სრულებით მიუღებელია. სხვაგან. სხვა პირობებში, შესაძლებელია, არავითარ განგაშს არ გამოიწვევდა ასეთი რამ. ჩვენ ქართველები ვართ, პატარა ერი, თვითმპყრობელობის ხელში მეფის მთავრობის მიერ მრავალი დამცირების, შევიწროების, ეროვნული ღირსების შებლაღვისა და შელახვის გადაშტანი.

ჩვენთვის თეატრი უდიდესი ეროვნული საქმე იყო, წმინდა ტაძარი, სადაც ჩვენ ვღვრიდით გულის სიღრმიდან ამონახეთქ ცრემლებს და ვზრდიდით იმელებს.

ამიტომაც ჩვენი სმენა ვერ ეგუება ვერავითარ უხეშ გამოთქმას ჩვენი თეატრისაკენ მიმართულს.

დამშვიდდება ნერვები. დაყუჩდება აღელვებული გრძნობა და ყველა დაეინახავთ, რომ ახალი გაიკვლევს გზას, შემოავლებს ახალ რკალს, დაიწყებს შემოქმედებას, გაშლის ფრთებს და მაშინ ენაც

დაბილდება და სამუდამოდ დავიწყებას მიეცემა ისეთი გამოთქმა, რომელსაც ჩვენი მგრძნობიარე გული არ მიიღებს.

ჩვენი თეატრი განსაკუთრებული სიმწვავეთა და გრძნობიარეობით ეკიყვარს და ამიტომაც მანიფესტი უსათუოდ აგვიძრავს ეჭვებს და გამოიწვევს ჩვენს გულის წყრომას, მაგრამ ახალგაზრდობის დუღილს მოვაცილოთ ეს უსუფთაო ქაფი და მივიღებთ ძლიერ წყურვილს სამშობლო სცენის განახლებისა და აყვავებისას.

ვინ გამოვა ჩვენგანი და ვინ იტყვის, რომ ჩვენს ახალგაზრდა მსახიობებს შორის, განურჩევლად ჯგუფებისა, ბევრს არა ჰქონდეთ ძლიერი ნიჭი, ცეცხლი და მაგარი კუნთები. რაც თავდება ჩვენი თეატრის განახლებისა და გაბრწყინებისა? მე აშკარად ვხედავ, რომ ბედი უკვე არჩევს ჩვენი სცენის ახალგაზრდათა რიგებიდან სახელებს უკვდავების დაფაზე დასაწერად.

ქართველ საზოგადოებას უყვარს თავისი თეატრი განსაკუთრებული გრძნობით, მაგრამ მას უნდა უყვარდეს მისი მომავალიც. ეს მომავალი კი მხოლოდ ახალგაზრდა მსახიობებშია მთელი თავისი შესაძლებლობით.

1924

## იონა ვაკელი

რევოლუციამ წარმოშვა ჩვენში პოეტები, რომლებსაც პროლეტარულ პოეტებს უწოდებენ და თითქოს ამით იმისი თქმა უნდათ. რომ ჩვენში რევოლუციამდე პროლეტარული პოეტები არ არსებობდნენ.

ეს სიმართლე არ არის.

პროლეტარული მგოსნის დამახასიათებელი ის არის. რომ პროლეტარულ წრეს ეკუთვნის და ამ კლასის მისწრაფებათა და განცდათა ამსახავია.

პირველი პროლეტარული მგოსანი იოსებ დავითაშვილია (1850-67 წ.). ის განივიდა მუშათა წრიდან და მთელი თავისი მისწრაფებით. იდეალებით და პოეტური შემოქმედებით მუშათა კლასს ეკუთვნოდა:

მუშა ვარ და კიდევ ვიცი  
მუშის გულის პასუხები.

როდესაც დავითაშვილი სამწერლო ასპარეზზე გამოვიდა, პროლეტარიატი ჩვენში მაშინ არა ყოფილა გარკვეული სახისა და. რა თქმა უნდა, დღეს დავითაშვილი პროლეტარულ შემოქმედებას ვერ მოსწევდება. მაგრამ ყოველი ადამიანი უნდა დაფასდეს მხოლოდ ისტორიულ პირობებში.

თავისი დროის შესაფერისად დავითაშვილს შეთვისებული ჰქონდა პროლეტარული შეხედულება ცხოვრებაზე:

მე გულსა მწვავს ეს სოფელი,  
ორწიარად გაყოფილი.  
ბედით ჩაგრულს უღვთოდ სჩაგრავს  
თავის ბედით კმაყოფილი.

დავითაშვილის შემდეგ იწყება ჩვენს პროლეტარულ პოეზიაში ინტერვალი და პროლეტარულ პანგებს ისევ აწყობს თავის ჩანგზე ევლოშვილი.

ჩვენი პროლეტარიატი ვერასოდეს ვერ დაივიწყებს იმის ლექსს:

მეგობრებო, წინ, წინ გასწით!  
ნუ შედრკება თქვენი გულ.  
დე, შუბლს ოფლის დალი აჩნდეს  
და მკერდს — სისხლის ნაკადული!

მაგრამ ევდომვილი არ იყო წმინდა მიმართულების პროლეტარული მგოსანი.

პროლეტარულმა პოეზიამ იფეთქა ჩვენში პირველი რევოლუციის ხანაში და შემდეგ რეაქციის დროს.

აქ პირველობა ეკუთვნის ვარლამ რუხაძეს. მან გაბედულად ჩამოჰკრა პროლეტარულ გრძნობებს და პროლეტარული ბრძოლის ზარს.

ვარლამ რუხაძე გამოვიდა მშრომელი ხალხის წრიდან და მაშინდელ პირობებთან შედარებით მედგრად აავიზგიზა პოეზიაში რევოლუციის ცეცხლი.

ვარლამ რუხაძეს მოჰყვენენ ნოე ჩხიკვაძე, ქუჩიშვილი, ობოლო მუშა, რომლებმაც პროლეტარული ბრძოლის ქურას მძლავრად შეუთთეს ცეცხლი.

ჩხიკვაძეც, ქუჩიშვილიც მშრომელი ხალხის შვილები არიან და მთელი თავისი პოეტური გზნებით პროლეტარიატს ეკუთვნიან.

დიდმა რევოლუციამ გადაშალა დიდი პერსპექტივები და შეიტანა ახალი ტალღები ჩვენს პროლეტარულ პოეზიაში, მაგრამ თუ ჩავუკვირდებით ამ ტალღებს, შიგ დავინახავთ იმავე დუდილს. იმავე მუსიკას, რაც ახასიათებს საერთოდ ჩვენს პროლეტარულ შემოქმედებას.

თქმა არ უნდა, ეს დუდილიც, ეს მუსიკაც უფრო მძლავრია, უფრო გაქანებული და მოვარდნილი, რადგანაც თვითონ რევოლუციის ბუნებაც ასეთია.



ახალ პროლეტარულ პოეზიაში საკატიო ადგილი უჭირავს იონა ვაკელს. რომლის „შარავანდელი“ ლამაზი და ცეცხლიანი დასაწყისია მისი ფაფარაყრილი შემოქმედებისა.

ფორმა იონა ვაკელს საკმაოდ დამორჩილებული აქვს და მისი პოეზია განირჩევა თავისი მუსიკალობითა და ჰარმონიით შინაარსისა და ფორმას შორის.

იმის პირველ ნაბიჯებს გავლენა ემჩნევა სხვა პოეტების და ხშირად კბაძავს გალაქტიონ ტაბიძეს. განსაკუთრებით იმის „ლურჯა ცხენებს“.



35-ე გვერდზე „თუჯის ლანგარში“ რითმები: თარეში—სიმხურ-  
ვალეში — ტაბიძეს ეკუთვნის; აგრეთვე 51-ე გვერდზე „შრომის  
ოკეანეში“ რითმები: მხარეში.— თარეში.

36-ე გვერდზე „ჩვენი ბრძოლის ხალისში“ არის აბაშელის რით-  
მა: გაუგონარი — დაუღონარი (აბაშელის „შორეული ნაპირი“).

64-ე გვერდზე „მეზარეში“ ქუჩიშვილის მეტრი და რიტმია.

მაგრამ ახალგაზრდა მგოსნისათვის შეუძლებელია, რომ მთელ  
წიგნში სხვისი რითმაც არ შეეპაროს. მგოსანმა უნდა მიაქციოს დი-  
დი ყურადღება ენას.

სიტყვა მას საკმაოდ დამორჩილებული ჰყავს, მაგრამ ალაგ-ალაგ  
მაინც მოიპოვება ცუდი ქართული. რამდენიმე ალაგას არის „სისხლ-  
მა გაღება“; ვამბობთ — სისხლმა შეღება. „მათი შედარება არ გვინ-  
და სხვაზე“ (გვ. 44) ცუდი ქართულია. „ვულკანის ლავა“ სრულე-  
ბით არ არის ქართული. „სისხლი ღებს დროშებს“ საშინელი ქარ-  
თულია. აგრეთვე — „ტყვია თოვდება“.

„ქალაქი უშვებს შფოთსა“ მიუღებელია პოეზიაში კი არა, პრო-  
ზაშიაც.

როდესაც იონა ვაკელის პოეზია დაიხვეწება და გაიწმინდება ასე-  
თი შეცდომებისაგან, ჩვენ ნივილებთ საუცხოო ყვავილს, პროლე-  
ტარული პოეზიის ბაღში დარგულს ჰეშმარიტი ხელოვანის ხე-  
ლით.

პროლეტარული პოეტები საზოგადოდ რეალურ მოვლენათა  
მბატვარნი არიან. რეალიზმს ჩვენში ჰქონდა შემუშავებული საკუ-  
თარი ფორმა და სტილი. მოსალოდნელი იყო, რომ ახალგაზრდა  
პროლეტარული მგოსნები ძველ ფორმაში მოათავსებდნენ ახალ  
შინაარსს.

მაგრამ იონა ვაკელი აღარ კმაყოფილდება ძველი ფორმებით და  
რმის პოეზიაში შექრილია სიმბოლიზმი თავისი სტილით, ასონანსე-  
ბით, კონსონანსებითა და ალაგ-ალაგ თავისუფალი მეტრით.

ეს გამარჯვებაა ჩვენი სიმბოლიზმის და ამავე დროს ღირსება  
იონა ვაკელის პოეზიისა.

ჯატაცების, წმინდა სიგიჟის, ბრძოლისა და ცეცხლის პოეზია  
სიმბოლიზმის ფორმებში უფრო ვითარდება და შლის ფრთებს.

ეს უტყუარი ღირსებაა ქართული სიმბოლიზმისა და მისი ძმო-  
ბის — ცისფერ ყანწლებსა, რომლებმაც ჩვენი პოეზია გამოიყვა-  
ნეს ძველი ჩიხიდან და მისცეს მას ახალი გასაქანი, ახალი მიღწევა-  
ნი. მათი გაღერება თავისმკვლევებისა, კლექიანებისა, შეშლილე-  
ბისა, ლოთებისა და აშორდიებისა პროლეტარულ პოეზიაში სრუ-

ლებით მიუღებელია, ხოლო მათი სტილი და ფორმა უკვე გამარჯვებას დღესასწაულობს.

იონა ვაკელს აქვს მოზდენილი ასონანსები: პოეტი — სიმარტოეთი, ბივრიტი — ღვრიდი. მოდენის — მოდელი. თალი — ზამბანი, და მრავალი სხვა; შიგადაშიგ ურევია ლამაზი კონსონანსი, როგორც: დემოსი — შემოსე. არის თავისუფალი მეტრიც და ურითმო პოეზიაც, მაგრამ თავისუფალი მეტრი და ურითმობა ერთგვარი სცილა და ხარიბდა არის პოეტისათვის.

რითმა და რიტმიული მეტრი მუსიკაა ლექსისა. ერთგვარი აკომპანიმენტი. როდესაც მომღერალი აკომპანიმენტს უარპყოფს, მას მეტად დიდი იმედი უნდა ჰქონდეს თავისი ხმისა.

აგრეთვე როდესაც პოეტი ლექსში მუსიკას თავიდან იშორებდა. მას დიდი იმედი უნდა ჰქონდეს ლექსის შინაგანი ძლიერებისა. თუ ეს არ არის. ჩვენ მივიღებთ პოეზიის მაგიერ უხეირო პროზას.

„შრომის ოკეანეში“, „საოცნებო დილაში“ და ზოგიერთ სხვა ლექსშიაც ავტორს აქვს შინაგანი რითმა. ბესიკს უყვარს შინაგანი რითმა, რაც მეტ სილამაზესა და მუსიკალობას აძლევს ლექსს. შემდეგ და შემდეგ შინაგანი რითმა გაქრა ჩვენს პოეზიაში.

მწლავრად გამონათა შინაგანმა რითმამ ვალაქტიონ ტაბიძის პოეზიაში. მისი „ატმის ყვავილები“ შესანიშნავია ამ მხრივ. შინაგანი რითმა ეადვილება იონა ვაკელს და საუცხოოა მისი ლექსები შინაგანი რითმით.

პოეტი ჰქმნის ახალ სიტყვებსაც, რაც მეტად დიდი ღირსებაა. მაგალითად, სიტყვა „სიმარტოეთი“ სხვაგან მე არ მახსოვს, არც — აქორქობება.

საუცხოონი არიან „შრომის ოკეანეში“ და „ჩვენი მაისი“. აქ არის გატაცება, თავდავიწყება. სიხალისე, აღმაფრენა, მოზღვავებული გრძნობა და შეურყეველი რწმენა. დიდი სიწრფელე და ნამღვილი პოეტური გზნება.

ალაგ-ალაგ არის პესიმიზმი, როგორც, მაგალითად, „თავდავიწყების წუთებში“:

და ასე ვიბრძვით ცოდვილ წუთებით,  
ტანჯული სულის აღმოხლომადი.

პესიმიზმი უძლურთა და სნეულთა აზროვნებაა. პროლეტარულ პოეზიაში კი ძალა და ჯანსაღობა უნდა სჩქედდეს და ცეცხლს აფრქვედეს. ამიტომაც ყოველგვარი პესიმიზმი უნდა განიდევნოს პროლეტარული პოეზიიდან.

„საოცნებო დილა“ დიდი მიღწევია ყოვლის მხრივ ახალგაზრდა

პოეტისათვის. აქ არის იშვიათი განცდა, სისპეტაკე, სიხალისე, იმედი, საუცხოო რითმა და დამათრობელი მელოდია.

„აკინძულ რგოლებში“ იშვიათი ასახვაა ცეცხლის გმირებისა და რევოლუციის; ხოლო ლექსის პატარა ნაკლს შეადგენს დაუსრულებელი გაცემების ო დიო! მართალია, გრძელი ლექსია, მაგრამ შიგ ჩვიდმეტჯერ არის გამეორებული ო!

პოემებში არის ცეცხლი. გატაცება, გაქანება და შესაფერი განწყობილება.

„დილის ზეიმის“ აფერადებულ ხალიჩას და ცეცხლის ალებს საუცხოოდ შეეხამება თავისუფალი მეტრი და დაუდევარი, გულმავიწყი რითმა.

რევოლუციის ქარცეცხლი და სიმკაცრე სისწორითაა აქ გამოსახული.

იონა ვაკელი სუსტია იქ, სადაც ცდილობს ქარხნისა და მანქანების გრილის გადატანას პოეზიის სიმებზე.

აშკარაა, პოეტის გამოცდილება და დაკვირვება ჯერ ვერა სწვდება ამ დარგში იმის მიზანს.

გიუვარს გრიგალი და ქარიშხალი.  
და მოულოდნელ გამბედაობის  
ღეთიური ნიჭით აკაშკაშება.  
ვუმღერით უროს,  
ვუმღერით ჩაქუჩს,  
ქუჩებს და ქარხნებს!

ამ სიტყვებში დახასიათებაა იონა ვაკელის მთელი შემოქმედების.

როგორც ახალგაზრდა მგოსანს, მას თან ახლავს ბევრი ნაკლი, რომლის გამოსწორება ადვილია.

ხოლო მას აქვს ტემპერამენტი, პოეტური ცეცხლი, სიხალისე, გაქანება, მხატვრული ინტუიცია, რითმის უნოსვა.

ყოველივე ეს სრულ იმედს გვაძლევს, რომ პროლეტარულ პოეზიას ქეშმარიტი ნიჭი ემატება.

## ინეპ ჩვენი თეატრისათვის

ქართული ცხოვრების რა საკითხსაც უნდა შევეხოთ, წარსულ საუკუნეს ვერ ავცდებით, რადგანაც მაშინ მოხდა ძლიერი გარდატენა როგორც ჩვენს ცხოვრებაში, ისე ჩვენს აზროვნებაში.

ქართველი ერის წინაშე წამოიჭრა ძლიერი საფრთხე რუსული თვითმპყრობელობის სახით; ერის არა თუ მომავალი, თვით არსებობაც განსაცდელში ჩავარდა და ამან იქონია ძლიერი გავლენა მთელს ჩვენს შემოქმედებაზე.

არისტოკრატიული ნაწილი ჩვენი პოეტებისა შეიპყრო წარსულზე გოდებამ. მაგრამ დაჰბერა მესამოცე წლების ლიბერალურმა მიმდინარეობამ და ჩვენს საზოგადოებაში გაისმა ძლიერი ხმა ილია ჭავჭავაძისა: უნდა აღვადგინოთ ჩვენი დაცემული ვინაობაო.

მართალია. დიდი გაუგებრობა, გაურკვეველობა და არევ-დარევა არსებობდა მთავარ საკითხში, თუ რა გზით შეიძლებოდა ჩვენი დაცემული ვინაობის აღდგენა. მაგრამ მუშაობა დიდი იყო და დიდი ნაყოფიც მოიტანა. მწერლობამ, პოეზიამ, თეატრმა — ყველამ მიზნად დაისახა ერის აღდგენა და გაჯანსაღება; საქართველო და ქართველი ერი — აი რა იყო არა თუ მთავარი, ხშირად ერთადერთი თემა. შეშინებული ბავშვი რომ დედას ეკვრის და არა სცილდება, ასე მოგვდიოდა ჩვენც.

პოეზიაში ჩამოყალიბდა ერთგვარი თემა და ფორმა, სასცენო ხელოვნებაში გამეფდა ქართული ყოფა-ცხოვრება და მთელი ჩვენი ვინაობა და მდგომარეობა მოექცა კრიტიკის სასწორზე.

ეს იყო აუცილებელი და მეტად საჭირო გზა ჩვენი შემოქმედებისა: ვისაც საკუთარი თავის მიუდგომლად გაზომვა შეუძლია, მას დიდი განახლების უნარიც შესწევს.

რაც უნდა დიდი იყოს სამშობლოს ფარგლები, ხელოვნებას მაინც უფრო ფართო და განიერი ასპარეზი ესაჭიროება.

ეროვნული შემოქმედება და ხელოვნება მაინც არას ნიშნავს.

რომ ნიადაგ საკუთარ თავზე სწერო და საკუთარ კერას უტრიალო გარშემო.

ეროვნული შემოქმედება უწინარეს ყოვლისა არის ეროვნული ტემპერამენტი. ეროვნული მაჭა.

პოეზიამ მოგვცა დიდი ცეცხლი. დიდი მიღწევა, მაგრამ ბოლოს ის მიაღვა შაბლონს და ერთფეროვანი, გამოფიტული და მოსაწყენი შეიქნა.

საჭირო იყო გადახალისება, ახალი ნაკადული. ამ გზაზე გამოვიდა სხვადასხვა დროს სხვადასხვა მგოსანი და გაჩნდნენ ჩვენში პროლეტარული რევოლუციის პოეტები ვარლამ რუხაძის მეთაურობით.

ამ მიმართულებამ გამოიწვია დიდი მოძრაობა ჩვენს პოეზიასა და ცხოვრებაში. ევდოშვილმა. რუხაძემ. ქუჩიშვილმა, ნოე ჩხიკვაძემ დიდი წვლილი შეიტანეს ჩვენი პოეზიის განახლებაში, მაგრამ ახალი ღვინო მათ ჩაასხეს ძველ ტიკებში, ძველი ფორმა, ძველი სტილი, მთელი ძველი პოეტიკა უცვლელად დასტოვეს. მათ იზიდავდა სიახლე მოტივისა და არა ფორმისა.

ახალი მოტივი კი ყოველთვის ახალ ფორმას ითხოვს. თავმოქმონე ადამიანი წვეულებაში ნათხოვარი ტანისამოსით არ წავა.

გრიშაშვილმა და აბაშელმა დაიწყეს ახალი ფორმების ძიება, მაგრამ მათი ნოვატორობა ამ დარგში იყო პიროვნული, თუმცა მეტად ნაყოფიერი.

საერთო ნებითა და ხელიხელჩაკიდებულნი გამოვიდნენ ახალ გზაზე ცისფერყანწელები და მე მახსოვს კარგად ის განგაში და აურზაური, რაც მათმა პირველმა ნაბიჯებმა გამოიწვია.

მე თვითონ ვწერდი პაროდებს მათ წინააღმდეგ ამავე უურნალის ფურცლებზე.

რატიონ?

იმიტომ, რომ ძლიერ გაქანებაში ისინი გადასცილდნენ ზომას და მოინდომეს ზოგიერთი ისეთი სახელების გადაქლევა, რომლებსაც ჩვენ ვერავის დაუფთმობთ.

გაიარა დრომ და რასა ვხედავთ დღეს?

ცისფერყანწელებმა განდევნეს ძველი სტილი, ძველი მეტრი, რითმა და დაამყარეს ახალი პოეტიკა.

დღეს ყველა მათი შეურიგებელი მოწინააღმდეგეც კი სწერს ცისფერყანწელების პოეტიკით და ძველი პოეტებიც ნელ-ნელა ითვისებენ ცისფერყანწელების სტილს. ასონანებს და კონსონანსებს.

უნდა აშკარად ვთქვათ, ეს არის გამარჯვება ცისფერყანწელები-

სა. ბევრ დებულებას მათი ესთეტიკისას მე არ ვიზიარებ, ამაზე ბევრჯერ გვექნება ალბათ ლაპარაკი. — მაგრამ მათი პოეტიკა დღეს ყველასათვის სავალდებულო გახდა.

სწორედ იგივე მეორდება დღეს ჩვენი სასცენო ხელოვნების დარგშიაც.

ჩვენი თეატრს დიდი და ბრწყინვალე წარსული აქვს. მან აღზარდა მთელი თაობანი, შეიტანა დიდი განძი ჩვენი კულტურის სალაროში, მაგრამ დღეს უკვე სხვა დრო არის. უნდა ვთქვათ ხმამაღლა და გაბედულად: დღეს თემაც სხვანაირი გვინდა, თამაშიც სხვაგვარი, მსახიობიც სხვანაირი და სცენაც სხვა.

ასე ვითარდება ხელოვნება. სხვა გზა მას არა აქვს და ეს არ არის უარყოფა ან შეურაცხყოფა წარსულისა. ეს არის მხოლოდ აუცილებელი საფეხურები ხელოვნების რკალში.

ახალგაზრდა მსახიობები, რომელთა მანიფესტმაც ერთი მითქმამოთქმა გამოიწვია, სწორედ ამ მიზნით არიან გატაცებული. მათ სწყურიათ განახლების შეტანა სასცენო ხელოვნებაში, მათ უნდათ ამ განახლების შეტანა, მათ შესწევთ საამისო ნიჭი და სიმტკიცე.

ახალგაზრდულ გატაცებას ყოველთვის სჩვევია გადაჭარბება.

აი ასეთს გადაჭარბებას ჰქონდა ადგილი იანვრის ოცდაცხრასაც. მანიფესტები საჭიროა. თანამედროვე მოთხოვნილებამ წარმოშვა ისინი, მაგრამ ზოგიერთი ადგილი აღნიშნული მანიფესტისა მიუღებელია.

არტისტი დიდაც უნდა იყოს ცეცხლოვანი, რიხიანი, ფაფარაყრილ რაშზე. უნდა იყოს იმიტომ. რომ ასეთია ჩვენი დრო და ეს დრო კარგია სწორედ იმიტომ, რომ ის რიხიანია, ცეცხლოვანი და ფაფარაყრილ რაშზე გაქანებული.

ვინ იტყვის, რომ აღნიშნული ჯგუფის მანიფესტში არ იყოს ჭეშმარიტი ნიჭი, დიდი ცეცხლი. დიდი გაქანება და დიდი შესაძლებლობა?

რა თქმა უნდა, ეს არ აძლევს მათ უფლებას უკადრისად მოიხსენიონ ის, რაც შეადგენს საფუძველს ჩვენი ახლობელი კულტურისას, მაგრამ არც ვისმე ჩვენგანსა აქვს უფლება მომავალს ზურგი შეაქციოს და ყბად აიღოს ყოველივე. რაც განახლებისა და ამალღებისაკენ მიისწრაფის.

გალმერთება არ ვარგა არაფრის. რაც უნდა დიდებული იყოს ია. ჩვენს თეატრს ბრწყინვალე წარსული აქვს, იქითკენ ქვას არავინ ვასროლინებთ.

მაგრამ ჩვენ კიდევ უკეთესი გვინდა. რადგანაც გვწამს ჩვენი მომავალი.

ვინ უნდა შექმნას ეს უკეთესი?

იმათ, ვისაც ძარღვებში სისხლი უღუღს, საფეთქელი მდგრად უცემს და გულში ცეცხლი უგიზგიზებს.

საჭიროა სიღინჯე, სიფხიზლე და საქმეში ჩახედვა.

ყოველ დარგს ჩვენი ცხოვრებისას განახლება ესაჭიროება, განახლება ესაჭიროება ხელოვნებასაც.

განახლების გზაზე შეცდომა, გადაჭარბება, წაბორძიკება, უკიდურესობა, გაუგებრობა, ზოგჯერ გადაჩეხვაც აუცილებელია. უამისოდ მეორე ნაპირს გასვლა შეუძლებელია.

1924

## „ჯაქოს ხინეზი“ და ჩვენი ცხოვრება

მისწრაფება მშვენიერებისაკენ, სილამაზისაკენ მარტო ადამიანს კი არ ახასიათებს, არამედ ყოველ ცოცხალ არსებას, მთელ ბუნებას.

ყოველი ადამიანის მისწრაფება ყალიბდება და ფრთებს ისხამს კლასობრივ პირობებში. ამიტომაც ცხოვრებაში ჩვენ გვაქვს საქმე კლასობრივ მისწრაფებასთან.

თავის მისწრაფებას მშვენიერებისაკენ ყოველი კლასი თავისებურად ნატავს, თავისებურად ანხორციელებს.

ამიტომაც არის კლასობრივი მშვენიერება.

აკილოთ, მაგალითად. ენა. ის არის საერთო ერის ყოველი კლასისათვის. გერმანიაში ბურჟუას და პროლეტარს, მემამულესა და მიწის მუშას ყველას ერთი საერთო ენა აქვთ. იგივეა საფრანგეთში, ინგლისში, იტალიაში და სხვ.

მაგრამ ამ საერთო ენის გარეგან ერთნაირ გამოხატულებაში ჩაქსოვილია სრულებით სხვადასხვა აზრი, სხვადასხვა ფიქრი. სხვადასხვა მისწრაფება, სხვადასხვა გრძნობა.

იგივეა ხელოვნებაც. ხელოვნების ზოგადი. გარეგნული ხაზები ბევრჯერ საერთოა სხვადასხვა წყობილებაში. მაგრამ ამ საერთო ხაზებში მოთავსებულია სრულებით სხვადასხვა შინაარსი.

ყოველ კლასსა აქვს საკუთარი ხელოვნება. რომელიც იმის გულის ნაღებს გამოჰხატავს.

შეიძლება და ბევრჯერ საქიროც არის, რომ ერთმა კლასმა ისარგებლოს მეორე კლასის ხელოვნების ხაზებით, ფორმით. მაგრამ ამ ფორმაში ის მოათავსებს საკუთარ შინაარსს.

დღემდე გამეფებული იყო ბურჟუაზიული და არისტოკრატიული ხელოვნება.

დღეს სცენაზე გამოდის პროლეტარიატი. ის ჰქმნის და ადრე თუ გვიან შექმნის საკუთარ ხელოვნებას; მაგრამ ამ გზაზე მას შეუძლია დროებით ისარგებლოს ძველი ხელოვნების ფორმებით.



რომანი შექმნა ფეოდალურმა არისტოკრატამ.

ის ჩაისახა და განვითარდა დიდი ფეოდალების ოჯახებში და შემდეგ გადავიდა ხელოვნებაში.

ხელოვნების ამ დარგის ფორმით ისარგებლა ბურჟუაზიამ და შექმნა საკუთარი რომანი.

პროლეტარული ხელოვნებისათვის მისაღებია თუ არა რომანი?

რა თქმა უნდა, მისაღებია, ხოლო ამ რომანში უნდა იყოს სულ სხვა შინაარსი და სხვა ფორმაც.

მაგრამ სანამ შინაარსი ახალ ფორმებში ჩამოყალიბდებოდეს, ძველი ფორმები გამოსადეგია.

მიხ. ჯავახიშვილის „ჯაყოს ხიზნები“ წარმოადგენს ახლის ძიებას თუ ფორმით არა, შინაარსით მაინც.

ამ რომანში ავტორმა ფარდა აჰხადა ჩვენი ცხოვრების ერთ კუთხეს, ერთ მხარეს და სისწორით გააშუქა ის.

„ჯაყოს ხიზნები“ თავისი შინაარსით თვალსაჩინო ლიტერატურული მოვლენაა.

მიხ. ჯავახიშვილი არის ანატომი, რომელიც ჰკვეთავს ქართველი ერის სხეულს, რადგანაც ეს სხეული განვითარების დუღილშია; ადამაშვილი მტკიცედ, სასტიკად, გაბედულად და შეუბრალებლად ჰჭრის და აცლის ამ სხეულს ყოველივეს, რაც იმის განვითარებას ხელს უშლის, წინ ეღობება.

ვინ არიან უმთავრესი გმირები რომანისა? ორი ადამიანი — ძველი თავადი თეიმურაზ ხევისთავი და მისი გლეხი ჯაყო ჯივაშვილი.

მთელი რომანის სივრცეზე არის დაპირისპირება ამ ორი ადამიანისა.

ყოველი განვითარებული ერის ინტელიგენცია არ წარმოადგენს ერთფეროვან კრებულს, ის დაყოფილია თავისი მისწრაფებისა და საზოგადოებრივი მიზნების მიხედვით. არის ინტელიგენცია თავადაზნაურული, ბურჟუაზიული, თავადაზნაურულ-ბურჟუაზიული, წვრილბურჟუაზიული, სოციალისტური, პროლეტარული.

რევოლუციამდე ჩვენი ცხოვრების ასპარეზზე გაბატონებული იყო თავადაზნაურობა. ამიტომაც პირველობა ეკუთვნოდა თავადაზნაურულ ინტელიგენციას.

რადგანაც თავადაზნაურობას ესაჭიროებოდა მსხვილი ბურჟუაზიის ჩიბე, ბურჟუაზიას კი ბატონობა უნდოდა, ამის გამო ბატონობის ნაწილს თავადაზნაურობა უთმობდა მსხვილ ბურჟუაზიას, სამაგიეროდ სარგებლობდა მისი ჩიბით, ამრიგად ორივე ფეკქენიდა მუშებსა და გლეხებს და ნადავლს ერთიმეორეს უზიარებდა.

ამის გამო თავადაზნაურული ინტელიგენცია მუდამ ორ სკამ-

ზე იჭდა: ის გამოჰხატავდა თავადების იდეალებს, მაგრამ მსხვილბურჟუაზიასაც ვერ ივიწყებდა: მისი თავადაზნაურული სულისკვეთება შეზავებული იყო მსხვილბურჟუაზიული ოცნებით.

სწორედ ამ ინტელიგენციის წარმომადგენელია ძველი თავადი თეიმურაზ ხევისთავი. ის არის დიდი ბატონი და დიდი მემამულე.

საზღვრები თავისი ადგილ-მამულისა, ან სად რა აქვს, თვითონაც არ იცის, მას აინტერესებს მხოლოდ შემოსავალი და ამას განაგებს მისი მოურავი. თვითონ კი მუდამ გართულია საქართველოზე ფიქრსა და ოცნებაში: ზედმიწევნით იცის საქართველოს ისტორიული საზღვრები. სამშობლოს წარსული დიდება მას მოსვენებას უკარგავს.

საზოგადო საქმეში იმდენად ჩაფლულია, რომ დღე და ღამე მოსვენება არა აქვს: კრებები, სხდომები, წერა, ლაპარაკი.

დიდი საზოგადო მოღვაწე — აი თეიმურაზ ხევისთავი.

ენის კულტურული ქაეილი და ლაყბობის მუნი — აი რა ახასიათებს უწინარეს ყოვლისა თეიმურაზ ხევისთავს.

თეიმურაზი პირმშო შვილია ძველი ცხოვრების, მას საპატიო ადგილი უჭირავს საზოგადოებაში, დამსახურებული მოღვაწეა, ნიკიერი, უნგარო, პატიოსანი, უმწიკვლო და კეთილშობილი ადამიანის სახელი აქვს მოხვეჭილი.

ის ოცნებობს მომავალზე, ძმობაზე, ერთობაზე, თავისუფლებაზე. ხოლო ყოველივე ეს იმის არსებაში გადახარშული და გათვალისწინებული კი არ არის. არამედ ლაშაზი სამკაულია, რომელიც საჭიროა ყოველი გახათლებული და მოწინავე ინტელიგენციისათვის.

მოხდა რევოლუცია, დაინგრა ძველი ცხოვრება და თეიმურაზ ხევისთავს ნიადაგი გამოეცალა. აი აქ გამოაშკარავდა მისი სრული უბადრუტობა.

ეს ყოველმხრივ კულტუროსანი და განათლებული, ცოდნით. პატიოსნებით, მრავალი სურვილებით აღჭურვილი ადამიანი ახალს ცხოვრებაში აღმოჩნდა სუსტი და უნებო კაცუნა, რომელსაც გულის მაგივრად ჩვარი ედო.

„ჭიანჭამი, გამოხრილი, დაფუტუროვებული, ძვალდაღრღნილი და ხერხემალმოშლილი, უძვლო და უკუნთო, ცივი და ლორწოიანი“; — აი რას წარმოადგენს თეიმურაზი ახალს ცხოვრებაში.

ახალი ცხოვრება აღულებული რკინის ცეცხლმქმინავ ტალღებზე მოექანება.

ასეთი ცხოვრება სამოქმედოდ იწვევს და ფაფარაშლილ რაშს აწვდის ყველას — მტერსაც და მოყვარესაც; ბრძოლა მასთან ერ-

თად ან მის წინააღმდეგ — სხვა გზა, სხვა სურვილი, სხვაგვარი მოქმედება არ არსებობს.

თეიმურაზი კი ლოდზე შუბდაბჯენილი განზე გამდგარა და მოქმედების მაგიერ მუდამ თავის თავს ეკითხებოდა: რა არის ჭეშმარიტება? სად არის სამართალი? რა არს ცხოვრება ესე?

როდესაც ახალგაზრდა თეიმურაზი სამოქმედო ასპარეზზე გამოვიდა. მას ცხოვრების აწყობილი და მოწყობილი მექანიზმი დახვდა.

ეს შეადგენდა მისი მდგომარეობის სიმტკიცეს და ის კი დარწმუნებული იყო, რომ თვითონ, თავისი ძალღონით და შემოქმედებით აშენებდა ცხოვრებას.

როდესაც მართლა საჭირო შეიქნა საკუთარი ძალღონით გზის გაკაფვა და ცხოვრების შენება, თეიმურაზ ხევისთავს — ამ ტიპიურ ინტელიგენტს ძველი ცხოვრებისა და ძველი წყობილების საზოგადო მოღვაწეს — არ აღმოაჩნდა არც შესაფერისი გული, არც საჭირო სიმტკიცე, ხასიათი და ნებისყოფა.

ახალმა ცხოვრებამ ნიღაბი ჩამოაძრო მას და დიდი მოღვაწის ალაგას ჩვენა ვხედავთ რბილ, ლორწოიან ჭიაყელას, რომელსაც არაფერი შეუძლია. გარდა ცარიელი ბოლვისა.

ის არის აღჭურვილი ცოდნით, განათლებით. მიეცით, რა საკითხიც გნებავთ — მთელ ლექციას წაგიკითხავთ, გამოკვლევას დაგიწერთ: ახალი ცხოვრებისათვის კი ამავე დროს ის სრულებით მოუმზადებელია, სრულებით გარიყული და ზედმეტი ადამიანი.

მთელი ტრალიზში თეიმურაზისა იმაში მდგომარეობს, რომ ის თვითონ გრძნობს ყოველივე ამას, ჰხედავს და ამავე დროს ვერავითარი გამოსავალი ვერ მოუნახავს. მას არ შესწევს იმდენი სიმტკიცე, რომ თვითრწვე მოუღოს ბოლო თავის ცხოვრებას.

მართალია. ის წყალში გადავარდება, მაგრამ სწორედ აქ მყლავნდება მთელი მისი სილაჩრე და სიბადრულე.

ის ოცნებობს, მზად არის იბრძოლოს, გზა გაიკაფოს, მაგრამ მისი მოღუნებული მკლავები, მიღუული სული, გატეხილი ხერხემალი სრულებით აღარ შეეფერება დღევანდელი ცხოვრების ქარიშხალს, რომლის ტალღებშიაც თეიმურაზი მხოლოდ დამცირებას და საკუთარი პიროვნების ადამიანური ღირსებისა და თავმოყვარეობის ფეხქვეშ გათელვასა ჰკრეფავს.

ძველ ცხოვრებასთან ერთად თეიმურაზისათვის ყოველივე გათავდა. მართალია, ის ოცნებობდა ახალზე, ის თვითონა სჭრიდა იმ ხეს. რომელზედაც იჯდა, მაგრამ ეს იყო მხოლოდ მწიგნობარი ადა-

მიანის ბოდვა: ახალ ცხოვრებას თეიმურაზისათვის არაფერი არ აღმოაჩნდა.

„— შენა გაილვიძებდე! გაიგებდე, რომა ზაკონის დრო აღარ არის! წინათ თქვენა სწერდებოდეთ ზაკონსა. ეხლა კი მორჩებოდით და ჩაძალდებოდით!“ — ამ სიტყვებით მომართავს თეიმურაზს ჭაყო.

უნდა ჩაძალდე, სხვა გზა არ არის, — აი საშინელი სიტყვები, რომლებსაც ახალი ცხოვრება უცხადებს თეიმურაზს ჭაყოს პირით. „ჩაძალდითო!“

უკეთესი სიტყვის გამონახვა თეიმურაზის მდგომარეობის გამო-სახატავად მართლაც შეუძლებელია.

თეიმურაზი საკუთარი თვლით რწმუნდება, აშკარად ჰხედავს, რომ მისი ცოლი ჭაყოს საყვარელია, ხასა; მიუხედავად ამისა მას არ შესწევს იმდენი სიმტკიცე ხასათისა და თავმოყვარეობა. რომ გან-შორდეს იმ ოჯახს, სადაც ის სრულებით მეტია და ჭაყოს ნოქრის თანამდებობას კისრულობს პატარა დუქანში, ოღონდ კი უცქიროს იმ ქალს. რომელსაც აღარაფერი აქვს მასთან საერთო, რომელსაც თეიმურაზი ეჭავრება და ეზიზღება.

რა დარჩენია ყოველივე ამის შემდეგ თეიმურაზს?

ერთადერთი საქმე:

ძველი კიდობნიდან ამოიღოს ძველისძველი ხატი, დაასვენოს კუთხეში. დაუნთოს სანთელი, პირქვე დაემხოს მის წინაშე და მეტა-წიით. ცრემლითა და სასოებით ილოცოს: უფალო ძლიერო, ყოვლილ შემძლევე და სათნოიანო! მოგვეც ჩვენ დავრდომილთა და უღირსთა ძეთა შენთა მოთმინება უღვეველი, მშვიდობა უსაზღვრო და რწმენა უძირო სიმართლისა შენისათაო.

აქ იშვიათის მხატვრობით არის ამოწურული სულისკვეთება ჩვენი ძველი ინტელიგენციის ნაწილისა. რომელმაც სრულებით ვერ აუღო ალლო ახალ ცხოვრებას, გზა-კვალი დაჰკარგა. სიონში ეძებნ ნუგეშსა და რწმენას და გაფაციცებით თვალყურს ადევნებს, კათალი-კოსის წირვა არ გამომეპაროსო.

დასკვნა?

მხოლოდ ერთადერთია:

თეიმურაზ ხევისტავს არავითარი ადგილი აღარა აქვს ახალს საქართველოში.

„ითარაანთ ქვრივში“ თავადი არჩილი ეუბნება კესოს: „ჩვენ რაცა ვართ. გაკეთებულნი ვართ. ისინი კი — შექმნილნი, ჩვენ დაბ-ლანდულნი ვართ, ისინი კი — გვირისტით შეკერილნი. იმ გვირისტით.

რომელიც მარტო ბუნებამ იცის და ბუნება — ხომ იცი, რა ოსტა-  
ტია. ისინი ჩაკირულნი არიან, ჩვენ დონდლონი, ღუნენი...

იქა ჰდულს ძარღვებში მოარული სისხლი, იქა სცემს თვითონ  
სიცოცხლის ძარღვიცა“.

ამის შემდეგ არჩილი მოიგონებს გიორგის და დაუმატებს: მა-  
გისტანა პური მარტო გლეხების თორნეში ცხვება, ჩვენს თორნე-  
ში კი მხოლოდ კუტი პურიო.

ასე უყურებდა ილია ჭავჭავაძე თავადურ ინტელიგენციასა და  
გლეხობას.

იგივე შეხედულება, იგივე განწყობილებაა „ჩაყოს ხიზნებში“,  
ხოლო აქ ვრცლად არის გადაშლილი და გაშუქებული ცხოვრების  
ფურცლებზე ამ ინტელიგენციის მთელი უმწეობა, უბადრუკობა,  
კუტ-პურობა

ილია ჭავჭავაძის დროს ყოველივე ეს არ იყო აშკარა, რადგა-  
ნაც მაშინ არსებული წყობილება ამაგრებდა ამ ინტელიგენციას,  
მაგრამ ილიამ თავისი დიდი ნიჭით მაინც სისწორით დააფასა და  
დაახასიათა ის დონდლო — რბილი, მოდუნებული, სისხლგაციებული,  
კუტი პური.

სწორედ ასეთია თეიმურაზ ხევისთავი, უძველესი არისტოკრა-  
ტიული გვარის წარმომადგენელი და სამაგალითო ინტელიგენტი.

ადამაშვილის თეიმურაზი იგივე არჩილია ილია ჭავჭავაძისა. ხო-  
ლო თუ არჩილი არ გვეჩვენება ისე უბადრუკად, დონდლოდ, ამი-  
ტომ, რომ ის დამკვიდრებულია მეფის წყობილებაზე, თავდაზნაუ-  
რობის ბატონობა იმის საფუძველს შეადგენს და ამიტომ ისიც ბა-  
ტონია.

თეიმურაზს კი ეს საფუძველი გამოაცალა რევოლუციამ და  
ამიტომ გამოაშკარავდა მისი უბადრუკობა, სიმჩვარე.

ილია ჭავჭავაძე თავისებურ გზას ეძებდა, მას უნდოდა წო-  
ღებათა შეთანხმება, მორიგება, ჩატეხილი ხიდის გამთელება. რო-  
გორი გზით, რა საშუალებით?

— ცრემლიანი ცოდნით, — გვიპასუხებს მისი არჩილი.

ამ ცრემლიან ცოდნაში ილია ჭავჭავაძე ჰგულისხმობს თავადო-  
ბის შეგნებასა და სინდისს.

ამაში ჰხედავდა პოეტი ქართველი ერის ხსნასა და მომავლის  
საწინდარს.

სულ სხვაგვარად სწყევტს საკითხს მიხეილ ადამაშვილი. მის-  
თვის რევოლუცია არის ცხოვრების კანონი და ფაქტი.

რევოლუცია ანადგურებს თეიმურაზსაც, იმის თეორიებსაც, იმის

ცრემლიან ცოდნასაც, და აი, უკვე განადგურებულ კაცს ჭაყო ეუბნება: „ახლა კი მორჩებოდით და ჩაძაღვდებოდით“.

მკვახედ, ტლანქად არის ნათქვამი, მეტად უგულოდ და მკაცრად, მაგრამ ასეთმა კაცმა სხვა ენა არ იცის: თეიმურაზისათვის ყველაფერი გათავებულია და ის კი არ უნდა მოკვდეს ისე, როგორც მისი წინაპრები კვდებოდნენ, არა — უნდა ჩაძაღვდეს.

და მართლაც მთელი მისი ცხოვრების ბოლო ხანა განა ჩაძაღვლება არ არის?

რომანში ავტორი თეიმურაზ ხევისთავს უპირდაპირებს ჭაყო ჭივაშვილს.

ვინ არის ჭაყო?

უვიცი, გაუნათლებელი, ხეპრე, მოუხეშავი.

ჭაყო არის მტკიცე, ჩაკირული, მთლიანი, გაუზნარავი, ურყევი, მკლავშაგარი, ხერხემალმტკიცე, რკინის კუნთებიანი. იმის ძარღვებში დაგროვილია აუარებელი ენერგია, მასა აქვს ძლიერი ნებისყოფა, უნარი და ფხა ცხოვრებისა.

საითაც უნდა გადააგდოთ ჭაყო, რა პირობებშიაც უნდა ჩააყენოთ, ის არ შედრკება, არ დაეცემა სულით, ქალაჩუნად არ გადაიქცევა და გამოსავალს მონახავს.

მისი შეხედულება მოქნილია, როდის როგორ უნდა მოიქცეს, მან იცის და არ დაიბნევა, ცხოვრების ტალღებში გზა-კვალი არ აეოვება.

მისი ერთადერთი მიზანია პირადი კეთილდღეობა. ამ მიზანს ემსახურებოდა ის ძველ წყობილებაში, ამასვე ემსახურება ის დღესაც, რევოლუციის ხანაში. მაგრამ მან საუცხოოდ იცის, რომ ახალი დრო სხვაგვარ მოქმედებას მოითხოვს ადამიანისაგან და ამის გამო ის სოფელსაც ვითომ ეხმარება, რომ ხალხის ნდობით ზურგი გაიმაგროს და უკეთ მიაღწიოს თავის მიზანს.

ყოყმანი მისთვის არ არსებობს: ის მთლად მოქმედებაა და რასაც გადასწყვეტს, უსათუოდ უნდა მოიყვანოს სისრულეში.

თეიმურაზის მთელ ქონებას ის ჩაიგდებს ხელში, შემდეგ განიზრახავს თეიმურაზის ცოლის შერთვას და მტკიცედ მოჰყავს სისრულეში თავისი განზრახვა.

გაბედული, შეუპოვარი, შეუღრეკელი — აი ჭაყო. მერყეობა, ბედის წინაშე ქედის მოხრა მისთვის უცნობია. ის იბრძვის და გააქვს ლელო.

ხოლო მთელი მისი უბედურება იმაში მდგომარეობს, რომ მისი ბრძოლა, აუარებელი ენერგია ხმარდება საპირადო საქმეს და პი-

რადი კეთილდღეობის მოსაპოვებლად ის არ ერიდება არავითარ საშუალებას, არა ჰზოგავს არავის.

ჯაყო კეთილშობილებისა და პატიოსნების გარეშე სდგას. ზნეობრივი საზომი მისთვის არ არსებობს: მისთვის კარგი, მისაღები და დასაშვებია ყველაფერი, რაც კი მას პირად კეთილდღეობას შეჰმატებს.

როდესაც ჯაყოს დააყენებთ თეიმურაზის გვერდით, უპირატესობა პირველისა მეტისმეტად აშკარაა.

თეიმურაზია ლორწო, დამდგარ წყალში დამბალი მჩვარი, ჯაყო კი რკინა და ცეცხლია, მასა აქვს ბასრი კლანჭები და ფოლადის ობილები, დროის შესაფერი კუნთები.

მიუხედავად ყველა ამ ღირსებისა, ჯაყო არის უარყოფითი პიროვნება და თეიმურაზი სისწორით ახასიათებს მას:

„— ჯაყო, დაანებე თავი რევოლუციას! თქვენ ერთმანეთს არც კი იცნობთ, რევოლუცია შენთვის მღვრიე წყალია, ხელსაყრელი ნიღაბია, მეწველი ფურია. შენ კი, შენ რევოლუციის მუნი ხარ, მისი წურბელა ხარ, მისი ტკიპი, მისი ბალღინჯო და ტილი“.

ჯაყოს იმდენად სწამს რევოლუცია, რამდენადაც ხელს უწყობს ეს რევოლუცია იმის პირად კეთილდღეობას.

რევოლუციის მღვრიე წყალში ჯაყო თევზს იჭერს დროებით და მთელი საშინელება სწორედ ამაში მდგომარეობს მათთვის, ვისაც საქმე აქვს ჯაყოსთან, ვინც მას მაგარ ბრჭყალებში ჩაუვარდება.

მტკიცე და ამავე დროს თავხედი, ბოროტი — აი ჯაყო. სახალხო, საზოგადო მისთვის არ არსებობს, მისი გონება და მისწრაფება საპირადოს ვერ გასცილებია. ამ საპირადო გზაზე ის ფეხქვეშ სთელავს ყველას და ყოველივეს. ჯაყო გრძნობს, რომ თეიმურაზი უმწუროა და კიდეც სარგებლობს ამით.

„— ეხლა მე გწერ კანონებსა შენა! ჯაყო გწერს კანონსა, ჯაყო! მაშ, მაშა! გაიგებდეს ამასაც, გაიგებდეს!“ — ამაყად ეუბნება ჯაყო თეიმურაზს.

განა მართლა ჯაყო სწერს კანონებს?

რა თქმა უნდა, არა.

ჯაყოსთანა პირები ყოველთვის ბლომად არიან, მაგრამ ხშირად არა სჩანან, ფრთებს ვერა შლიან. ხოლო რევოლუციის ქარცეცხლში, როდესაც ძველი ყოველივე ინგრევა და ახალი კი ჯერ საკმაოდ არ განმტკიცებულა, ჯაყოსთანა პირები ხშირად სარგებლობენ გარემოებით და მართლაც სწერენ თავისებურ კანონებს, ე. ი. სრულ თავისუფლებას აძლევენ თავის ძალმომრეობას, უკანონობასა და აღვირ-

ახსნილობას, ვიდრე რევოლუციის სამართალი შეამჩნევდეს მას და სტაცებდეს ხელს.

ასეთია ჭაყო. მასში არის დიდი ძალა, „ვარ უმაგრესი რვალი-სა“, თამამად შეუძლია გაიმეოროს ტარიელის სიტყვები, მაგრამ ეს ამოდენა ძალა ხმარდება ბოროტს და არა კეთილს. მიეცით ჭაყოს შეგნება, გააშუქეთ მისი გონება და მაშინ ჭაყო მართლაც გახდება ადამიანი.

პირველის შეხედვით გაუგებარია, როგორ გაჰყვა ასეთ ადამიანს თეიმურაზის მეუღლე მარგო?

მაგრამ როდესაც ჩაუკვირდებით მარგოს და თეიმურაზის ბუნებას და გაითვალისწინებთ იმ პირობებს, რომელშიაც ცოლ-ქმარი მოექცა, დარწმუნდებით, რომ ავტორი მართალია.

თუ კი სასახლის ქალები და თვით დედოფალი ფეხქვეშ ეგებოდნენ ტლანქსა და უხეშ რასპუტინს, განა გასაკვირალია, რომ მარგო ჭაყოს დამორჩილებოდა?

ისეთ პირობებში ჩაუვარდა მარგო ხელთ ჭაყოს. რომ არავითარ გამოსავალი არა ჰქონდა.

ეთქვა ქმრისათვის?

რა გამოვიდოდა! მან ძალიან კარგად იცოდა, რომ თეიმურაზი სრულებით უძლური და უმწეო იყო.

თვითონ მარგოს გადაედგა რაიმე ნაბიჯი შექმნილი მდგომარეობის დასაძლევად?

არ უნდა დაევიწყოთ, რომ მარგო იმავე წრიდან არის გამოსული, საიდანაც თეიმურაზი, უნებო ქალს რევოლუციამ სულ გამოაცალა ნიადაგი და თეიმურაზსავეით დააბეჩავა, უმწეოდ აქცია.

ამავე დროს მარგო ქალია, ჯერ კიდევ ახალგაზრდა და მისმა ქალურმა ბუნებამ ჭაყოსთან ერთ ღამეს განიცადა ის, რაც არ გახუცდია თეიმურაზთან მთელი ათი წლის განმავლობაში.

ეს მომენტი ავტორს ზედმეტის სინამდვილითა აქვს აწერილი, ვნებიანი ღმერთი სრულებით არ იყო საჭირო.

მე ვამჯობინებდი კნუტ ჰამსუნის ხერხს — ის წერტილს დასვამს იქ, სადაც ყოველი სიტყვა უკვე ტლანქია.

მაგრამ ფსიქოლოგიურად ავტორი მართალია. ამის შემდეგ მარგო მიენდო ბედს და ბედმა ის გადააქცია ჭაყოს ხასად.

ამის შემდეგ რაღა უნდა ექნა? სამუდამოდ მიაფლართხა იმ ქიას. რომელსაც თეიმურაზი წარმოადგენდა და ჭაყოს ხსობას ისევ ცოლად გაყოლა ამჯობინა.

თეიმურაზ ხევისთავი მეტად რბილი, უნებო პიროვნებაა. მაგრამ ფსიქოლოგია მისი საკმაოდ რთულია, მისი ტრადედია საშინელი და



პისი ტანჯვა მეტად ძლიერი. ფსიქოლოგიის გაშუქებაში მიხ. ჯაფ-  
ხიშვილი დიდი ხელოვანი და იშვიათი ოსტატია. ასეთი ანალიზი ჩვე-  
ნი ინტელიგენციის ერთი ნაწილის სულიერი ავადმყოფობისა ჯერ  
არავის მოუცია ჩვენს სიტყვაკაზმულ მწერლობაში.

„ჯაყოს ხიზნები“ არის სატირა ჩვენი თავადაზნაურული ინტე-  
ლიგენციისა, სატირა უღმობელი, სასტიკი და დაუნდობელი. მაგრამ  
ამავე დროს მიხ. ჯაფახიშვილი მიუდგომელი და სრულიად ობიექ-  
ტურია.

თავხედი, ხეპრე, მტკიცე და შეუდრეკელი, ფოლადივით მაგა-  
რი ჯაყო მეტად ცოცხლად აქვს ავტორს დახატული.

ცოტა უფრო მკრთალია მარგოს სურათი.

ალაგ-ალაგ არის გადაჭარბებული მსჯელობა, მაგრამ საერთოდ  
„ჯაყოს ხიზნები“ დიდი შემატებაა ჩვენს სიტყვაკაზმულ მწერლო-  
ბაში.

1925

## იონა ვაკელი. ახალი პოემა „მკროპა“

ყოველ საღ ადამიანს ახასიათებს მისწრაფება, სურვილები. ადამიანი თავისი მისწრაფებით განკერძოებულად კი არა სდგას, არამედ უერთდება ამა თუ იმ ჯგუფს, კლასს, წოდებას. ამის გამო პირად მისწრაფებასა და სურვილებშიაც კი კლასის, წოდების ზრახვანი გამოსჭვდევან.

პოეზია არის ანარეკლი კლასობრივი სულისკვეთებისა, კლასობრივ ზრახვათა.

რადგანაც ცხოვრებაში გაბატონებული და ძალაუფლებით აღჭურვილი კლასი თავის მიზნებს უმორჩილებს ყველაფერს, ამიტომაც ყოველ განსაზღვრულ დროს პოეზია ემსახურება გაბატონებული კლასის მიზნებს და გამოსახავს ამ კლასის რთულ მეობას.

აიღეთ პოეზია ფეოდალური ხანისა და პოეზია ბურჟუაზიისა, — სულ სხვადასხვა არის მართო ფორმით კი არა, შინაარსითაც.

ის აზრი, თითქოს იცვლებოდეს მხოლოდ ფორმა და არა შინაარსი, სრულებით შემცდარია: ყოველ კლასს აქვს თავისი ფორმა და თავისი შინაარსი.

აიღეთ სასიყვარულო მოტივი ფეოდალური პოეზიისა და ბურჟუაზიულისა. განა აქ ერთი და იგივე შინაარსია? რა ვუყოთ. რომ იქაც სიყვარულია და აქაც.

საქმე იმაშია, რომ სულ სხვა არის ფეოდალური პოეზიის სიყვარული, სულ სხვაა სიყვარული ბურჟუაზიული პოეზიისა.

დღეს ძალაუფლება პროლეტარიატის ხელშია. ცხოვრებაში ის გაბატონდა. ცხადია, მან უნდა დაუმორჩილოს თავის მიზნებს პოეზიაც; პოეზია უნდა შეიქნეს პროლეტარიატის ზრახვათა და მისწრაფებათა გამომსახველი. ეს უნდა მოხდეს და მოხდება კიდევ სრულიად ბუნებრივად და არა ძალდატანებით, როგორც ბევრსა ჰგონია ჩვენში.

ერთბაშად. დაკვირის წესით პროლეტარული პოეზიის შექმნა

შეუძლებელია, — ამას უნდა დრო და პროლეტარიატის გონებრივად ამაღლება და დაწინაურება.

ხელოვნების შესაქმნელად საჭიროა მძაფრი გარდატეხა მოხდეს კულტურის სფეროშიც.

დღევანდელი დრო წარმოადგენს გარდამავალ ხანას. ასეთს ხანაში დიდი მიღწევები ხელოვნების ახალ გზებზე შეუძლებელია; ასეთს ხანას ახასიათებს მხოლოდ ძიება და ამგვარი ძიება ახალი შინაარსისა და ახალი ფორმისა ჩვენში საკმაოდ მძლავრად სჩქეფს.

ძველი ფორმების უარყოფა ჩვენში ხშირად პოეზიის უარყოფას უდრის. ხშირად შეხვედებით ისეთს ფორმას, სადაც არ მოიპოვება არავითარი ნასახი მშვენიერებისა და უხეიროდ აკიბული კორესპონდენცია ახალი ძიების პოეზიად საღდება.

რუსეთში განსაკუთრებით ორიგინალურია პოეტი მაიაკოვსკი ახალი ფორმისა და შინაარსის ძიებაში. იმის უკანასკნელ ლექსებში სრულებით უარყოფილია ძველი ფორმები, იმისი ლექსები რევოლუციისა სრული განადგურებაა ძველი ლექსთა წყობის კანონებისა; მაგრამ შიგ დატულია ერთი რამ — მშვენიერება; იქ არის რიტმი ცეცხლისა და ქარიშხლის მელოდია, უაღრესი დინამიურობა და შინაგანი სილამაზე.

ასეთს გზას უნდა დაადგენ ჩვენი პროლეტარული მგოსნებიც. მე არ ვიზიარებ იმ დებულებას, რომ ძველი ფორმები მაინცა და მაინც სრულებით უნდა განიდევნოს: სანამ არ არის მონახული უკეთესი, ძველი ფორმებიც გამოსადეგია; ხოლო ახლის მაძიებელს არ უნდა ავიწყდებოდეს, რომ ამ ახალში მშვენიერება და ჩვენი დროის ტემპი, დინამიურობა, გრიგალისნაირი რღვევა ჩაქსოვილი უნდა იყოს ერთ-ჰანეთში.

უკანასკნელ დროს ჩვენში ბევრჯერ შეხვედებით ისეთს ლექსებსა და პოემებს, სადაც არის ძიება ახლისა, მაგრამ არავითარი პოეზია არ არის შიგ.

იონა ვაკელის „ევროპა“ ამ მხრივ გამონაკლისს წარმოადგენს. ავტორი ეძებს ახალ ფორმას, ახალ შინაარსს. მაგრამ ამ ძიების დროს მას ხელთ უპყრია მშვენიერების ყავარჯენი და არსად არ ავიწყდება, რომ ყოველივე ახალი იმდენად არის მისაღები, რამდენადაც შიგ პოეზია არის.

იონა ვაკელი ეკუთვნის პროლეტარული პოეტების წრეს. მისი ჰიზანი პროლეტარიატის მიზანია, მისი მისწრაფება — პროლეტარიატის მისწრაფება.

ახალს ქვეყანაში მას უნდა შევიდეს ახალი სიტყვით, ახალი ფორმით; ის სულ ახალგაზრდა მგოსანია, რევოლუციის ტალღებში

წარმოშობილი, მაგრამ მტკიცედ, გაბედულად და იმედიანად მიდის წინ. როდესაც შეადარებთ იმის ახალ პოემასა და ძველ ნაწერებს, დარწმუნდებით, რომ იონა ვაკელი გაიზარდა, ბევრი ნაკლი, რომელიც წინათ ემჩნეოდა, მოიშორა; ლექსი უფრო გამართულია და დაწმენდილი, სიტყვა დახვეწილი და სუფთა.

ახალს პოემაში პოეტი ცდილობს მოგვეცეს თანამედროვე ევროპის სურათი. თემა მეტისმეტად რთულია და ძნელი; ჯერჯერობით ისეთი ახალგაზრდა მგოსანი, როგორც იონა ვაკელია, ასეთს თემას ვერ დაპრევეს ხელს და ვერ დასძლევს.

მგონია ვირგილიუსს ეკუთვნის შემდეგი სიტყვები: თუ ძაღლონე არ გასწვდა, სურვილი მაინც საქებარიაო.

იონა ვაკელის განზრახვაც საქებარია, რადგანაც მისი პოემის ზოგიერთი ადგილი ამტკიცებს, რომ პოეტში არის შესაძლებლობა დიდი ტვირთის ზიდვისა, თუ კი ამ შესაძლებლობას ის ხელს შეუწყობს და განაწივთარებს.

პარიზის კომუნის დასურათება ცოტა მკრთალი გამოვიდა, ხოლო კარგია ბანკირის ცოლი, რომლის

გული სევდებით  
გაბასრულია,  
რომ ეს ქვეყანა  
რჩება სრულიად  
ბრბოს შავსისხლიანს,  
ჩაუანგულ მონებს.

საუცხოოდაა დახატული ევროპის კოლონიური პოლიტიკა და ბურჟუაზიის სურათი.

ევროპის ბურჟუაზია წურბელასავით სისხლსა სწოვს ახალშენებს, მონობის მუხრუჭებს უჭერს იქაურ ერებს და ამავე დროს თანასწორობა და ხალხთა ერთობა აკერია ენაზე.

ავტორი განსაკუთრებით გამარჯვებულია იქ, სადაც დაპირისპირებულია ფუფუნებაში ჩაფლული ბურჟუაზია და მშვიერი ქუჩა.

გარეგნულ უდარდელობასა და საქმიანობაში გამოსკვივის შიში და უიმედობა, რაც ავტორს სისწოროთა აქვს ასახული:

ტრიალებს ირგვლივ  
საერთო შიში,  
ყველა უცნაურ  
დალუპვას ელის,  
გადაგვარება  
მოდგმის და ჯიშის,

ყოფნა უმწეო  
და საკვირველი.

—

ევროპას სტანჯავს  
უიმედობა.  
მას ეშინია  
შურისმგებელის. —  
რომელსაც მოაქვს  
ცეცხლი და წვიმა,  
რომელსაც მოაქვს  
მეხი და ქარი.

ავტორის რწმენაა შემდეგი: ბურჟუაზიული ევროპა ჩიხში მო-  
ექცა; მისი დაღუპვა აუცილებელია და ბურჟუაზიის ალაგს დაიკა-  
ვებს მშრომელი ხალხი.

ალაგ-ალაგ ავტორს შეჰპარვია მაინც ცუდი ქართული: გვ. 7—  
„ბედუინები სწყევლის, აგინებს“; გვ. 12 — „გმირები — ენთება“;  
გვ. 15 — „ესენი ადგენს ჩვენ ქვეყნის გეგმებს“; გვ. 48 — „მუშებს  
ნე შენს უფრო ვიცავ“; გვ. 54 — „აი მაქ გლია“.

1925

## ჩვენი თეატრი

უსახლკარო, უბინაო, ღარიბი, ლატაკი ქუჩა-ქუჩა დადიოდა ანთებული ჩირალდნით ხელში.

შინ არავინ უშვებდა, ყველა სდევნიდა; მხოლოდ თითო-ორლა გულშემატკივარი თუ გაუღებდა კარს და თავს შეაფარებინებდა.

შიმშილი, წყურვილი, სიშიშველე, სიცივე მისთვის არაფერი იყო; გაჭირვებას გმირულად უხვდებოდა და მოთმინებით იტანდა; მისი ერთადერთი საზრუნავი იყო, ანთებული ჩირალდანი ჩაენერგა ხალხის გულში და გაებრწყინებია მისი გონება.

ხალხის მტრები უკან დასდევდნენ და მოსვენებას არ აძლევდნენ მას, სდევნიდნენ, ცდილობდნენ იმის ხელში ანთებული ჩირალდნის ჩაქრობას. იშვიათის სიყვარულითა და თავგანწირვით უვლიდა ის თავის ჩირალდანს.

დადიოდა ქალაქიდან ქალაქად, სოფლიდან სოფლად, ეძებდა თანამგობნობს, მეგობარს.

ყბად იღებდნენ მას, დასცინოდნენ, მაგრამ ვერავინ გასტეხა, ვერაფერმა სძლია.

გაიარა ათეულმა წლებმა და აბა შეხედეთ: ის ამაყადა სდგას შვილებითა და შვილიშვილებით გარშემორტყმული.

მთელ ხალხს მოუყრია იმის გარშემო თავი. მეგობართა და მოკეთეთა რიცხვი უამრავია.

ყველას ანთებული ჩირალდანი უბყრია ხელში.

ჩირალდნებით არის განათებული ქალაქები, დაბები, სოფლები, სინათლის შუქი ეფინება ყველგან.

— ჩირალდანი, მოგვეციტ ჩირალდანი! — გაისმის დღეს მიყრუებულ სოფლებიდანაც კი.

ვინ არის ის გაუტეხელი და გამარჯვებული?

ქართული თეატრი. არარაობიდან იშვა. უბინაო იყო, ყოველგვარი დაბრკოლება ეღობებოდა წინ, მსახიობ ქალს ვერა შოულობდა.

რადგანაც ეს სათაკილო ხელობად ითვლებოდა; კერძო ბინაზე იმართებოდა წარმოდგენა ხშირად ურეპეტიციოდ.

მაგრამ თეატრმა სძლია ყოველგვარი დაბრკოლება, გადალახა ყოველგვარი მტერი და ანთებული ჩირაღდანი ხელიდან არ გააგდო, მისი შუქი არავის ჩააქრობინა და ხალხის გულში შეიტანა.

თეატრი ჩვენში მარტო ხელოვნება კი არ იყო, ის იყო სკოლა, ტრიბუნა, რომელიც გრძნობას აღვიძებდა, გონებას აფხიზლებდა, გულში ცეცხლს ანთებდა და მომავლის იმედებს ზრდიდა.

თვითმპყრობელობის მუხრუჭებში სულშეხუთულ ქართულ თეატრში გვესმოდა ზოგჯერ გადაკრული, ზოგჯერ ორაზროვანი, ზოგჯერ თავისუფალი სიტყვა და თავისუფლებას მოწყურებულნი ვეტანებოდით მას.

ქართული თეატრი იყო უდიდესი ტაძარი, რომელშიაც ხელოვნება ბევრჯერ სუსტი იყო, მაგრამ მუდამ ერთო ცეცხლი მშრომელი ხალხის სიყვარულისა.

და ჩვენც მივდიოდით იქ, როგორც ტაძარში, იშვიათის აღფრთოვანებით და გატაცებით ვცემდით თაყვანს იმის პირველ ქურუმებს.

დღეს, როდესაც მშრომელმა ხალხმა გაიმარჯვა და თვითმპყრობელობის ნანგრევებზე აღმართა თავისი დროშა, ეს გამარჯვება ამავე დროს ქართული თეატრის გამარჯვებაც არის: ის აღვიძებდა და უყიოდა მშრომელ ხალხს, ის ანთებდა ბრძოლის ცეცხლს და აკვანს ურწევდა თავისუფლების სიყვარულს.

დიდება და გამარჯვება ქართულ თეატრს!

## მუშათა კლასის მწერალი

ყოველი ჩვენგანი დღეს მოწმეა უდიდესი საზოგადოებრივი მოვლენებისა. ისტორიის პატარა მანძილსაც კი რომ გადავავლოთ თვალი, ისეთს რასმე დავინახავთ, რომ დასაჭერებლადაც კი ძნელია.

განა დიდმა დრომ განვლო მას აქეთ, როდესაც ვეებერთელა რუსეთის იმპერიას ნიკოლოზი, ერთი მუქა თავადები და ბურჟუები განაგებდნენ, მუშათა კლასი კი დევნილი იყო, გაყვლეფილი და დამონებული?

დღეს კი ყოველივე ეს გაჰქრა, ვითა სიზმარი ღამისა. თითქოს არცკი ჰყოფილიყოს და ყოველივე ამის ნაცვლად მუშათა კლასის დიქტატურაა. სამოქალაქო ომში აშლილი გრძნობა თანდათან დაშოშმინდა, აზრმა, გონებამ მოიწმინდა, ნათლად გამოისახა ახალი ქვეყანა, ახალი ცხოვრება და დღეს ყველა ცდილობს პირი იბრუნოს ან ახლისაკენ, ემსახუროს მუშათა კლასის ინტერესებსა და მომავალს. მაგრამ ასე არ იყო გუშინ, როდესაც ნიკოლოზის რეჟიმი პარპაშობდა: ბატონებს ემსახურებოდა ყოველივე — მწერლობაც, ხელოვნებაც. მუშათა კლასის სამსახური დღეს საპატიო ხელობაა. გუშინ კი ეს იყო აღიარებული უდიდეს ბოროტებად, მემბოხეობად, ღალატად, რისთვისაც სდევნიდნენ და სასტიკად სჯიდნენ.

ძნელი იყო, მეტად ძნელი ეს საქმე: ის ითხოვდა უდიდეს მსხვერპლს, მაგრამ იყვნენ ისეთი ფანტიკოსები, რომლებიც არავითარ მსხვერპლს არ ერიდებოდნენ მუშათა საქმის გამარჯვების გზაზე:

გულათ სიგიჟეს ვეშლერ დიდებას!

ამ ფანტიკოსებმა მოუპოვეს მუშათა კლასს გამარჯვება და ააფრიალეს თვითმპყრობელობის ნანგრევებზე პროლეტარიატის წითელი დროშა.

მათ გუნდს ეკუთვნის ირეთელიც, ის იბრძოდა პროლეტარიატის წითელი დროშის ქვეშ. პროლეტარიატის საერთო მიზნის გამა-



რჯვებისათვის, იბრძოდა საქმით, იბრძოდა კალმით და დღეს, როდესაც მუშათა კლასი ჩვენში გამარჯვებულია, ეს გამარჯვება არის ამავე დროს ირეთელის გამარჯვებაც; ამ გამარჯვებისათვის ის იტანჯა, განიცადა დევნა. ციხე, ციმბირი და მუშათა კლასის ბედის გამოსაქვედ ქურაზედ თვითონაც მიიტანა ერთი ნაკვერჩხალი.

ბურჟუაზიული და არისტოკრატიული ნაწილი ჩვენი საზოგადოებისა ირეთელს ნაკლებად იცნობს ან უფრო არა სცნობს. ეს ასეც უნდა ჰყოფილიყო: ირეთელს მასთან არა აქვს საქმე, მისთვის არა სცალია, იმის ზრახვათა და მისწრაფებათა გამომსახველი არ არის, —

სხვაგან ჰქრის მისი გონება.

სამაგიეროდ დაეკითხეთ ნაძალადევს, მუშათა უბანს. იცნობენ თუ არა იქ ირეთელს და მთელი მუშები ერთხმად იგრიალებენ: ჩვენი ირეთელი, ჩვენი ირეთელიო.

რატომ?

იმიტომ, რომ ირეთელი მუშების საყვარელი მწერალია, მუშების საბოლოო მიზნისთვის თავდადებული, მუშების მომავლის მოტრფიალე. სულ ზერელედაც რომ გადაავლოთ თვალი ირეთელის ცხოვრებასა და თავგადასავალს, დარწმუნდებით, რომ მან მთელის თავისი არსებით შეიყვარა მუშათა კლასი და იმის ბედს გადააჯაჭვა საკუთარი ბედი.

დაიბადა ირეთელი გურიის სოფელ ხიდისთავში 1876 წელს. პირველდაწყებითი სწავლა მიიღო ბასილეთის სოფლის სკოლაში. აქედან ის გადადის ოზურგეთის სასულიერო სასწავლებელში და შემდეგ თბილისის სასულიერო სემინარიაში. 1893 წელს სემინარიაში მოხდა არეულობა. ირეთელი არეულობაში ლებულობს მხურვალე მონაწილეობას და ამის გამო სემინარიიდან ითხოვენ. 1895 წელს ისევ იღებენ სემინარიაში, მაგრამ ერთი წლის შემდეგ კვლავ ითხოვენ არეულობაში მონაწილეობის მიღებისათვის. ამის შემდეგ ირეთელი უბრუნდება სოფელს და სოფლის მუშებში შეაქვს ცოდნა, შეგნება და განვითარება. 1899 წელს ირეთელი გადმოდის თბილისში და მთელი თავისი ახალგაზრდული გატაცებით ებმება მუშათა მოძრაობაში. ირეთელს უკან დასდევენ ჯამუშები, მაგრამ ის მაინც ახერხებს გაძრომას, კვალის წაშლას და მუშაობის გაგრძელებას. 1901 წელს მას იჭკრენ და ირეთელი წელიწადნახევარს ზის ციხეში. შემდეგ ანთავისუფლებენ. ირეთელს თავისუფლება მხოლოდ იმისთვის უნდა, რომ ერთხელვე არჩეული სახიფათო გზა განაგრძოს.

ირეთელს ასეთი მოღვაწეობისათვის ისევ მალე აპატიმრებენ და სამის წლით ასახლებენ აღმოსავლეთ ციმბირში. ციმბირიდან

ირეთელი ბრუნდება თბილისში 1905 წელს და მტკიცედ ჰკიდებს კალამს ხელს. ხან ჩხრეკენ იმის ბინას, ხან აპატიმრებენ, ხან იმალება, ბევრჯერ მთელი წლობით სცხოვრობს სხვისი პასპორტით. ასეთს მდგომარეობაში უსწრებს მას რუსეთის დიდი რევოლუცია, რომელიც ანიჭებს თავისუფლებას როგორც მუშათა კლასს, ისე მისი ბედის თანამოზიარე მწერალს.

რატომ სდევნიდა ნიკოლოზის მთავრობა ასე ირეთელს?

იმიტომ რომ ირეთელს თავისი სიტყვით, კალმითა და მოქმედებით შეჰქონდა შეგნება. თვითცნობიერება მუშათა კლასში.

მუშა ხალხში რაიმე შეგნებისა და გათვითცნობიერების გაღვივება შეუძლებელია ისე, თუ არ გააშუქეთ, არ აპხადეთ ფარდა კლასთა ბრძოლას, ასეთს გათვითცნობიერებას კი მუშათა კლასი აუცილებლად მიჰყავს რევოლუციისაკენ.

ირეთელი თავისი კალმით პროლეტარულ რევოლუციას ემსახურებოდა.

ჩვენს დროშიაც კი იმართება კამათი იმის შესახებ, არის თუ არა ხელოვნება კლასობრივი თუ ზეკლასიური. განსაზღვრული დროის ხელოვნებაში სხვადასხვა კლასს აქვს საერთო რამე — ფერადები, ტონები, სტილი და სხვ., მაგრამ ხელოვნება, როგორც გამომხატველი ადამიანის ზრახვათა და მისწრაფებათა, კლასობრივი მოვლენაა. ხელოვნება ემსახურება კლასს, გამოჰხატავს ამა თუ იმ კლასის მისწრაფებას. მიზანს, იმედებს, ოცნებას, კმუნვას, სევდას, გატაცებას.

ირეთელმა შეიტანა მარქსისტული თვალსაზრისი ხელოვნებაში და თავის მიზნად დაისახა კლასთა ბრძოლის გაშუქება, გაღვივება და მით მშრომელი ხალხის გადაქცევა ერთ დიდ დარაზმულ და შეკავშირებულ მებრძოლ ჯარად.

ლიტერატურული მოღვაწეობა ირეთელისა მრავალმხრივია, იმის კალამს ეკუთვნის მოთხრობები, სცენები, სატირები, პიესები. მაგრამ ეს მრავალფეროვანი ლიტერატურული მოღვაწეობა აკინძულია ერთ მთავარ ძარღვზე: ეს გახლავთ კლასთა ბრძოლის გაშუქება და მშრომელი ხალხისათვის თვალის ახელა.

ასეთს მოღვაწეობას მე ვუწოდებდი სარევოლუციო სამზადისს. სხვებთან ერთად ირეთელი თავისი კალმით რევოლუციის ცეცხლს აღვივებდა. წაიკითხეთ ირეთელის მოთხრობები, სცენები, პიესები — სხვადასხვა თემა, სხვადასხვა სიუჟეტი, სხვადასხვა შინაარსი, მაგრამ ამ სხვადასხვაობაში არის ერთი რამ საერთო: მშრომელი ხალხის ინტერესის დაცვა და დაჩაგრულის სიყვარული.

თავისი მიმართულებით ირეთელი არის რეალისტი. ის იღებს

ცხოვრებას. როგორც არის ნამდვილად, ფარდასა ჰხდის მას და ააშ-  
კარავებს სოციალურ უსამართლობასა და კლასთა ბრძოლის აუცი-  
ლებლობას. მისი მოთხრობების შინაარსი ალებულია უმთავრესად  
მშრომელი ხალხის ცხოვრებიდან. ბრძოლა, დამარცხება, ტანჯვა, წა-  
მება და კვლავ ბრძოლა — აი საერთო დედააზრი მისი მოთხრობე-  
ბისა. ცხოვრების ანალიზით ირეთელი უსურათებს მუშათა კლასს,  
რომ გარეშე ბრძოლისა მისთვის არ არსებობს არავითარი გზა. ბრძო-  
ლის გზა ეკლებით არის მოფენილი, ტანჯვა, მსხვერპლი, დამარცხება  
აუცილებელია; მაგრამ ყოველივე ეს ბოლოს და ბოლოს წარმოშობა  
სრულ გამარჯვებას და ამ საბოლოო გამარჯვების სრული რწმენით  
არის ჩაიკრული ირეთელის მთელი შემოქმედება.

„რაკი ერთხელ შევდგი ფეხი ამ საბედისწერო გზაზე, უკან და-  
ხვეა შეუძლებელია. უნდა გავსწიო წინ! წინ! ან სიკვდილი, ან გამარ-  
ჯება!“ — ასე აცხადებს ირეთელის ერთი მოთხრობის გმირი (სანდრო  
ქარვაძე. „საბედისწერო გზით“). ის იღუპება, მაგრამ დარწმუნებუ-  
ლია, რომ მომავალი მაინც მუშათა კლასს ეკუთვნის.

ირეთელის მოთხრობებში დასურათებულია მთელი რიგი მუშა-  
თა კლასის თავისუფლებისათვის მებრძოლებისა, რომლებიც გმირუ-  
ლად იღუპებიან დიადი საქმისათვის და ამ გმირობას ჰპოვებენ იმ შე-  
უდრეკელ რწმენაში, რომ ჯალათებისა და მტარვალების დღე დათვ-  
ლილია და მშრომელი კლასის გამარჯვება უზრუნველყოფილი. ირე-  
თელს განსაკუთრებით უყვარს ნინოშვილი და ბევრგან ემჩნევა ამ  
ბელეტრისტის გავლენა. ირეთელის აღმასხან და თარხან ფინთიხი-  
ძეები საკმაოდ ენათესავენ იან ნინოშვილის დროიძეებს.

ირეთელს უფრო იცნობენ, როგორც დრამატურგს. იმის კალამს  
ეკუთვნის შემდეგი პიესები: „დამარცხებულნი“, „ქრისტიანი“, „სოფ-  
ლის გმირები“, „ნიაღვარი“, „პირველი ზარი“, „ბედნიერი დღე“.  
„ორშაბათი“ (ერთმოქმედებიანი ვოდევილი) და „კალმისათვის წამე-  
ბული“ (ერთმოქმედებიანი კომედია).

პიესებშიაც ირეთელი ისევე რეალისტია, როგორც მოთხრობებ-  
ში; საერთო დედააზრიც იგივეა, რაც მოთხრობებში: კლასთა ბრძო-  
ლის გაშუქება და მუშათა კლასის ინტერესების დაცვა.

განსაკუთრებით ცნობილია მუშათა წრეებში ის პიესები, რომ-  
ლებიც ირეთელს გადმოუკეთებია ნინოშვილის მოთხრობებიდან. ნი-  
ნოშვილთან აერთებს ირეთელს საერთო მიზანი, საერთო მისწრაფება,  
საერთო შეხედულება, ერთნაირი მსოფლმხედველობა და ამიტომაც  
ირეთელს განსაკუთრებით ემარჯვება პიესების შექმნა ნინოშვილის  
მოთხრობებიდან. ირეთელის პიესებში ჩვენი ცხოვრების სინამდვილე  
ხელოვნებითაა ასახული, ავტორს ახასიათებს ბუნებრივი ზომიერე-

ბა; მას არ უყვარს ყალბი ეფექტები შთაბეჭდილებისათვის; ცხოვრება გადმოტანილია სცენაზე და სცენა თვით ცხოვრებაა.

ირეთელის ნიჭს ახასიათებს სხვათა შორის სატირა და იუმორი. მისი სატირა ხშირად მწარეა, მაგრამ ამავე დროს ლაღი.

ირეთელის ენა და სტილი არის მშრომელი ხალხის ენა და სტილი. ირეთელი ღრმად ჩასწვდა მშრომელ ხალხს გულში, გაიზიარა მისი ბედი და მისი ვარამი, ამოუდგა გვერდში, არ დაერიდა არავითარ დევნასა და მსხვერპლს და ეს მძიმე, მაგრამ მეტად საპატიო და სასახელო ტვირთი მან ღირსეულად ჰზიდა ოცდახუთი წელიწადი, ისე რომ ერთხელაც არ გახრილა მისი კალამი, ერთხელაც არ გადაუხვევია. ერთხელაც არ დავიწყებია მუშათა კლასი და მისი მიზანი.

გაუმარჯოს მუშათა კლასს! ვაშა მუშათა კლასის მწერალს ირეთელს!

## „ჰამლეტი“ ჩვენს სცენაზე

არა მარტო როგორც ტრადედია, არამედ როგორც ლიტერატურული ნაწარმოები „ჰამლეტი“ უდიდესი შემოქმედებაა. რა მხრივაც უნდა გაზომოთ ის, გამოიტანთ ერთსა და იმავე დასკვნას: „ჰამლეტი“ ადამიანის გონების გასაოცარი ნაყოფია. ყოველ სტრიქონში, ყოველ სიტყვაში უდიდესი ცოდნა ცხოვრებისა, ადამიანის ბუნებისა, სიბრძნე, სიმახვილე, უაღრესი სილამაზე. აქ გადალახულია ყოველგვარი სიძნელე, მიღწეულია ყოველგვარი შესაძლებლობა. ამიტომაც „ჰამლეტი“ უკვდავი საგანძურია ლიტერატურის სალაროში.

„ჰამლეტი“ მთელი ეპოქაა, მთელი კულტურა. დანიის სევდიანი პრინცის სახით აქ მოცემულია გასაოცარის ინტუიციით მთელი ევროპა რამდენიმე საუკუნის მანძილზე. შექსპირი „ჰამლეტში“ მარტო შემოქმედი კი არ არის, — ის არის წინასწარმეტყველი, რომელიც საუკუნეებს გადაჰლახავს და გვაძლევს უტყუარ სურათს დღევანდელი ევროპის ინტელიგენციისას: სიბრძნე და დიდი განვითარება -- ერთის მხრივ, წასიათის დაუძღურება და დეკადანსი — მეორეს მხრივ.

ამიტომაც „ჰამლეტის“ დადგმა — განსაკუთრებით ჩვენს დროში — მეტისმეტად ძნელ საქმეს წარმოადგენს: გადასალახავია არა ერთი და ორი, არამედ მრავალი სიძნელე.

არის კიდევ ერთი სიძნელე — თანამედროვე მაყურებელი.

ჩვენი დრო არ მიმდინარეობს მდორედ, როგორც შექსპირის დრო, როდესაც ადამიანმა არ იცოდა, როგორ მოეკლა დრო. ჩვენი დრო მიჰქრის ჰაეროპლანებით და რადიოთი; ჩვენი პლანეტა პატარა ბურთად გადიქცა, ჩვენი სიცოცხლე — ერთ წამად. თანამედროვე ადამიანი დატვირთულია ფიქრით, საქმით, საზრუნავით, მისწრაფებით. შექსპირის ტრადედიისათვის მას აღარა სცალია. როგორ გინდათ გააჩეროთ ის თეატრში ოთხი-ხუთი საათი, როდესაც მას სრულებით არა აქვს დრო და დიდის ვაჭირვებით გაიმეტებს ერთ საათს

მხოლოდ იმ პირობით, რომ ამ ერთ საათში ყოველისფერი მისცეთ, ყოველივე აჩვენოთ. მოატაროთ ამერიკა, აფრიკა, გაამხიარულოთ და დროზედ გაუშვათ შინ!

მეტად გამბედავი უნდა იყოს რეჟისორი, მეტად მტკიცედ უნდა იყოს დაყრდნობილი საკუთარ ძალღონეზე, რომ ასეთს პირობებში „ჰამლეტის“ დადგმა გადასწყვიტოს.

მარჯანიშვილმა დაიქადა: „ჰამლეტს“ დავდგამო. მაგრამ შეეძლო განა მას გაემეორებია ფრიდონის სიტყვები, „ძალი შემწევს ქაღალისაო“?.

გულის ძგერით მოველოდი ფარდის ახლას, რადგანაც ვშიშობდი: ჩვენი თეატრი არ დაცემულიყო.

მერე რა ვიხილე? გასაოცარი სანახაობა: ჩვენი თეატრის ამალღება და როგორი ამალღება! როგორიც იშვიათია ჩვენი კი არა, საზოგადოდ თეატრის ისტორიაში.

თამამად შემიძლია ვთქვა, რომ მარჯანიშვილმა გადააცილა ჩვენი თეატრი ხელოვნების უმაღლეს მწვერვალებს და ქართული სცენა გადააქცია მსოფლიო სცენად. თავისი ფორმით „ჰამლეტის“ დადგმა არის სრულებით ახალი, ახალი მიზანსცენები, ახალი ფერები, ახალი საერთოდ მთელი ფორმის გაგება და გამოსახვა, ფერებში მოცემულია მთელი შინაარსი სურათისა და აქ განცვიფრებაში მოჰყავს მაყურებელი მხატვარს.

ახალ ფორმას დადგმისას მდიდარ შინაარსს აძლევს ახალი გაგება „ჰამლეტისა“. სამი საუკუნის წარსულიდან „ჰამლეტი“ გადმოტანილია ჩვენს თანამედროვეობაში, დაახლოებულია. ჩვენთან და თითქოს საკუთარ გულის თრთოლვასა და კმუნვას ვუშვართ.

ამ სიახლის ავტორი არის ალ. ახმეტელი.

ამ ტრიომ — მარჯანიშვილმა, ახმეტელმა და გამრეკელმა — შეასრულეს უდიდესი ეროვნული საქმე: ქართული თეატრი აიყვანეს ხელოვნების მწვერვალებზე.

„ჰამლეტი“ ისეთი ტრადედიიაა, სადაც დიდი და პატარა როლი არ არსებობს: ყველა როლი დიდია იმ მნიშვნელობით, რომ მხოლოდ დიდი თამაში ყოველი როლისა უწყობს ხელს მთავარი ფიგურის ღირსეულად გაშლას.

ამ მხრივ თამაშს ბევრი ნაკლი აქვს: ეთნოგრაფიის შეტანა, იმერელი შესაფლავე ჩემთვის სრულებით გაუგებარი და მიუღებელია.

ყოველი პიესა უნდა ითამაშებოდეს მხოლოდ იმ ენაზე, რომელზედაც არის დაწერილი. მართლაც სადაურია, როდესაც დანიის პრინცი და მეფე-დედოფალი ქართულად ლაპარაკობენ. მაგრამ ეს

ასეთი აუცილებელი დარღვევაა ხელოვნებისა, რომელსაც არაფერა შემოვლება.

მაგრამ ეს კიდევ იმას არ ნიშნავს, რომ შექსპირის გმირები იმერლებად და კახელებად გადავაქციოთ. შექსპირის დროს იმერელ მესაფლავეს დანიაში რა უნდა?

სისუსტე ყველას ეტყობოდა, ზოგს ცოტა, ზოგს კი ერთობ ბევრი.

ჰამლეტის როლის მოთამაშემ უშანგი ჩხეიძემ დაგვიმტკიცა, რომ მასში არის დიდი ნიჭი, დიდი ენერჯია, დიდი სიყვარული საქმისა, დიდი შესაძლებლობა. მისი თამაში იყო მეტად მოთქმებული და ამიტომაც შინაგანი ტანჯვა ჰამლეტისა მან კარგად გადაგვიშალა. ალაგ-ალაგ ის შეუღარებელი იყო.

მაგრამ საერთოდ მისი ჰამლეტი ავადმყოფია, ნევრასტენიკი. ასეთი სახე ჰამლეტისა შეცდომით კი არ მოუცია მსახიობს, — ასეთია მისი გაგება.

ასეთს გაგებას ბევრი იზიარებს, ბევრი გამოჩენილი მსახიობი და რეჟისორი ასე უყურებს ჰამლეტს.

ეს არის ჰამლეტის გამარტივება. შექსპირის ჰამლეტი კი გაცილებით უფრო რთული და ღრმა არის. მასში მთელი ეპოქაა, მთელი კულტურა. მის პიროვნებაში საუკუნეები ლაპარაკობენ.

ძველი კულტურა მოცემულია ორესტში, ახალი — ჰამლეტში. ჩემთვის ჰამლეტი არც ავადმყოფია, არც ნევრასტენიკი, — მისი სკეპტიციზმი ხასიათია, მთელი გონებრივი მიმართულება, მთელი ეპოქის დამახასიათებელი თვისება.

დიდი, მეტად დიდი ინტელექტი, უაღრესი კეთილშობილება და არისტოკრატიზმი, მუდმივი ყოყმანი და სუსტი ნება, მახვილი, მკვეთრი, ბრწყინვალე მსჯელობა და უძღურება მოქმედებაში, — აი ჰამლეტი. გამოსახვა ჰამლეტში მთელი ეპოქისა უდიდეს სიძნელეს წარმოადგენს მსახიობისათვის. ეს სიძნელე ვერ გადასჭრა უშანგი ჩხეიძემ, მას მხოლოდ გვერდი აუხვია.

საუცხოო იყო მეფე — ვასაძე. ბევრს მისი გრიმი არ მოსწონს. გრიმი კი სწორედ ჩინებულია, რადგანაც ზედ აღბეჭდილია დეგენერატი მეფის მთელი ბუნება. მისი თამაში დაკვირვებულთა, ფრთხილი, გაზომილი.

გოცირიძე საკმაოდ ვერ ჩასწვდა პოლონიუსის ბუნებას და ამიტომ ეს ცბიერი და მოჭნილი, ხოლო ყოველთვის ჭკვიანი კაცი მსახიობის თამაშში მკრთალი გამოვიდა.

ოფელიას როლში ვერიკო ანჯაფარიძე შეუღარებელი იყო. შემ-

ლილი ოფელის განსახიერებაში მან მოგვცა უდიდესი მიღწევა თავისი მიმიკით, თავისი გულით, თავისი გამოთქმით და ინტონაციით.

ვერიკო დიდი, დიდი მსახიობია, დიდი ხელოვანი.

წარმოდგენის შემდეგ მარტო კმაყოფილებას კი არა გრძნობთ, არამედ სიამაყეს და გიჟადებათ რწმენა ჩვენი მომავლისა.

და ყოველივე ამისათვის დიდი მადლობა მსახიობებს.

1926



## ალიო მათაშვილი

წარმოიდგინეთ ქარიშხალი, აბობოქრებული, გაგიჟებული ზღვა და შიგ მენავე. გაშმაგებული ებრძვის აწყვეტილ ტალღებს, უახლოვდება ნაპირს და ცდილობს ზედ დამაგრდეს; აი ფეხი უკვე ხმელეთზე დადგა, მაგრამ შემოკბერავს ტალღა და მოაცილებს ნაპირს, გადაისერის შორს.

ასეთ მენავეს წარმოადგენს მათაშვილი მისი ლექსების პირველ ტომში.

მათაშვილი-პოეტი თანამედროვე ცხოვრების ქაფში იშვა. ამიტომ ის ატარებს როგორც დუღილს ამ ცხოვრებისას, ისე ყველა ნიშანს გარდამავალი ხანისას.

ძლიერმა ქარიშხალმა მათაშვილი ამოისროლა ძველი ყოფის ნანგრევებიდან. ის მთელი თავისი არსებით მიისწრაფვის წინ, კომუნიზმისაკენ. მაგრამ ბურჟუაზიული აზროვნების ქსელი ფეხზე ეხვევა და არ აძლევს საშუალებას, მტკიცედ ჩასკიდოს ორივე ხელი ახალს.

მან გასწყვიტა ყოველგვარი კავშირი წარსულთან, დაასამარა ძველი და სწყურია სულ მალლა, მალლა ასწიოს კომუნიზმის დროშა; ამავე დროს მას იტაცებს ილიას იდეები, აკაკის პატრიოტიზმი, ვაჟას სევდა, ტანმოგრეხილი ხმალი კახისა და სხვ.

პროლეტარულ პოეტს მართო პროლეტარიატის საბოლოო მიზნის გაზიარება კი არ ახასიათებს, არამედ კოლექტიურ განცდათა გადაშლა, კოლექტიური ნებისყოფის ამოძრავება, კოლექტიური გრძნობის, მისწრაფებისა და მოქმედების დასურათება.

მათაშვილის შემოქმედებას კი ორი სახე აქვს: ერთი კოლექტიური, მეორე — ინდივიდუალური; მისი ლირიკა უმთავრესად პირადი განცდის პრიზმაშია გატარებული.

ყოველივე ეს აიხსნება მხოლოდ იმით, რომ პოეტი პირმშო შვილია გარდამავალი ხანისა, იწვის და სდუღს ამ ხანასთან ერთად და

სხვადასხვა ლიტერატურულ მიმართულებათა ძლიერ ზეგავლენას განიცდის.

პროლეტარიატის საბოლოო მიზანი პოეტს გადააქვს თავის პოეზიაში და მთელი მისი შემოქმედება კომუნისზმის წითელი ღროშით არის აელვარებული.

მაშაშვილის პოეზიაში დიდი დუდილია, დიდი ცეცხლი, გატაცება, თავდავიწყება; შიგ ჩქეფს დიდი ტემპერამენტი, დინამიურობა, მუსიკალური სილამაზე.

დიახ, ჩემს ფიქრს მოუსვენარს,  
ცეცხლის ტალღა ჰქვია.  
ცეცხლში ლექსს ვრთავ,  
ცეცხლში — რითმას,  
ცეცხლში — სილამაზეს.

თანამედროვე ცხოვრების თავისებური ტემპი, გაქანება კარგად არის ასახული მაშაშვილის პოეზიაში, აქ არის სინამდვილის დუდილი, სრბოლა, ნერვიულობა, სიმკაცრე და ჭიდილი.

მაგრამ მიზანი ჯერ კიდევ შორს არის; მანძილი ჯერ კიდევ დიდია გასავლელი.

ო, ცხოვრებაში მე რაც მინდა,  
მე რასაც ვებრძვი,  
ასეთი ფერი ჯერ არ არის, ჯერ არ არსებობს!

მტერი არა სცხრება; ის ახალ-ახალ იერიშებს ამზადებს.

აუცილებელია ბრძოლის ცეცხლი შეუბრალებელი, მედგარი. მაშაშვილიც ბრძოლის პოეტია, სამოქალაქო ომის.

პროლეტარულ პოეზიაში ბრძოლის ცეცხლის სიმზურვალე არავის აუსახავს, არ განუცდია ისე მძლავრად, როგორც ეს მაშაშვილმა განიცადა და ასახა.

მებრძოლის მარჯვენა ხელი იარაღია, ის იარაღზეა შეყვარებული. ასეთია მაშაშვილიც.

აკაკიმ იწამა ხანჯალი, შეიყვარა ის და გალესა მტრის გულის გასაგმირავად.

მაშაშვილს უყვარს თოფი, ბომბა, ზარბაზანი, თოფის ტუჩი მისთვის სიყვარულის ბაგეა:

მან გავამხნევა და შეგვასწავლა  
მთელი ამბორი თოფის ბაგეზე.

ან:

და ზარბად ვკოცნი გაციებულ თოფის ბაგეებს.

სამოქალაქო ომს მოსდევს სისხლის ღვრა. სისხლი არის აუცილებელი, — არც მეტი, არც ნაკლები.

აკაკისა აქვს ერთ ლექსში შემდეგი სიტყვები-

არ ვნატრობ მეტს აღარას,  
რომ სამშობლოს მტრის სისხლით  
ვიღებავდე კალარას.

საშინელი სიტყვებია, პოეზიაში დაუშვებელი; მაგრამ აქ მხოლოდ შურისძიება, უკიდურესი ბრძოლაა პატარა ერისა თავისი არსებობის დასაცავად.

მაშაშვილმა იცის შურისძიება, შურისძიება სასტიკი, უღმობელი. შეუბრალებელი:

ლამით ჩვენ გვინდა რომ ცეცხლს ვაჩენდეთ,  
რომ ცეცხლს ვაჩენდეთ შურისძიებით.

მაშაშვილის სტიქია არ არის სიყვარული, ეს მან სხვას დაუთმო; მას სხვებზე უფრო ეხერხება რევოლუციის ნამდვილი სახის განცდა და დასურათება.

ღმერთების ცა დიდი ხანია დაინგრა, ყოველ შემთხვევაში მუშათა კლასისათვის აღარ არსებობს და არც უნდა არსებობდეს, მაგრამ განა ეს იმას ნიშნავს, რომ მან პოეზიისათვის უნდა იარსებოს? არა.

ჩვენ ღმერთი იმიტომ გადმოვადგეთ ციდან, რომ იქ გავაბატონოთ ხელოვნება და საერთოდ ყოველივე, რაც მშრომელ ხალხს ასწევს მაღლა, გაასპეტაკებს გონებით, გააფაქიზებს გულით და გააქანებს სულ მაღლა და მაღლა, უკეთესი მომავლისაკენ.

ჩვენი ოცნება, ჩვენი იმედები, ჩვენი მისწრაფება, ჩვენი გაქანება სცილდება ყოველდღიურობას და მიჰქროლავს ლამაზი მომავლისაკენ, რომელსაც ჩვენ სოციალიზმს ვუწოდებთ. სოციალიზმი მართო იმისათვის კი არ გვინდა, რომ მუშა გაძლეს; სოციალიზმი ჩვენ გვინდა თავისუფლებისათვის, ერთობისათვის, თანასწორობისათვის, უდიდესი სამართლიანობისათვის.

სოციალიზმი მისთვის გვინდა, რომ განთავისუფლებულმა, ქონებრივად უზრუნველყოფილმა მუშათა კლასმა გონების ფრთები გაშალოს და შეჰქმნას პროლეტარული კულტურა.

ამიტომაც ცა, როგორც გაქანება წინ, როგორც წყურვილი, მისწრაფება უდიდესი და უმაღლესი კულტურის, პროლეტარული კულტურის შექმნისაკენ, პროლეტარულ პოეზიას უსათუოდ ესაჭიროება.

ეს არის ერთგვარი ზედნაშენი, რომელიც მიწის პირობებში იზრდება და ამავე დროს ამ პირობების გარდაქმნას ემსახურება.

მაშაშვილი კი ამას ხანდახან უარყოფს.

ყოველი ადამიანი, ყოველი მოღვაწე, ყოველი პოეტი უნდა დაფასდეს ისტორიულ პირობებში და შეუძლებელია, ბარათაშვილს ვუსაყვედუროთ, რატომ არ გაღელვებდა ჩვენი დროის კითხვებით:

რა იქნებოდა, ცხოვრების თვალში  
შენც ბოქულაძე რომ დაგენახა?

ბოქულაძე დაინახა გრიგოლ ორბელიანი და ნუთუ მაშაშვილს ჰკონია, რომ ბოქულაძის ავტორი უფრო ახლო არის ხალხთან, ვიდრე ბარათაშვილი?

თუმცა პოეტი უარყოფს ცასაც, ბარათაშვილსაც, მაგრამ მალე თვითონვე ჰლაღატობს თავის თავსაც და თავაშვებული ოცნება მიაქანებს ცისაკენ.

აიღეთ „წარღვნა“; თავში ჰკითხულობთ: „დაწერილია დროს და სივრცის გარეშე“.

აეალთ „ნებტუნზე“,  
ხალხის ლოდინი  
და აღტაცება...  
მისასალმებელ ხმებს  
მივანდობთ ცეცხლის არწივებს.

და სხვა და სხვა.

სივრცეში ძიებას რომ მაშაშვილი არ გაურბის და აფასებს კიდევ ასეთ ძიებას, ამას მოწმობს მისი სტრიქონები:

მაგრამ ამავე დროს რაღაც მომელის;  
ალბათ ძიება ჩემი მტკიცეა;  
სივრცეში ძებნა მიუწვდომელის  
გენიალებმა მხოლოდ იციან.

თავისი გენიალობა კი პოეტს სწამს:

მეც დამაყადეთ ამ ვრიგალში  
ამ ზღვაზე გასვლა  
და მაშინ ნახავთ: ვარ თუ არა ლექსში გენია!

მაშ რაღას ერჩის ბარათაშვილს? რატომ ჰკონია, რომ მისი მერანი მხოლოდ ჩალანდრის ცხენად გამოადგება? „წარღვნაში“ პოეტის ოცნება მარტო პლანეტამდე აღის, მაგრამ ლექსში „ქარში“ მისი ოცნება პლანეტების საზღვარსაც გადალახავს:

ჩემი შეშლილი სახე და „ტანგო“  
ისე მალეღვებს და მასასტიკებს,  
რომ ფიქრთა კარავს მსურს დავეტაკო  
და გადაეფრინდე პლანეტებს იქით!

გაიხსენეთ ამის შემდეგ ბარათაშვილის სტრიქონები, როდესაც ის მიმართავს ცას:

მე, შენსა მკერეტელს, მაინწყდების საწუთროება,  
გულისთქმა ჩემი შენს იქითა ეძიებს სადგურს.

ერთი მიბრძანეთ, რა განსხვავებაა აქ? ბარათაშვილი ცას იქით  
ეძიებს სადგურს, მაშაშვილი კი პლანეტებს იქით უნდა გაფრინდეს.

რა თქმა უნდა, მიზანი ორივესი სხვადასხვა არის, აზრი კი ერთი  
და იგივეა, მხოლოდ სხვადასხვანაირად გამოთქმული.

მარტო ბრძოლა და სამოქალაქო ომი არ არის საკმარისი პროლე-  
ტარული კულტურის შესაქმნელად — საჭიროა შრომა.

ეს კარგად იცის მაშაშვილმა, და ამიტომ ის უმღერის მედვარე,  
ყოვლის შემძლებელ შრომას:

სისხლის წვეთები იქცევა ოფლად...  
ოფლი — შრომის რულ და ჩანჩქერება!

სარდაფის კვალში ყველა გადავალთ.  
ბორბლების ტრიალს ვნებით გავყვებით.

პოეტი დარწმუნებულია, რომ შრომის გამეფება ცხოვრებას  
ააყვავებს და გარდაჰქმნის:

დინამო ცაში გააფრენს ურემს.

ის განავითარებს მარტო მატერიალურ კულტურას კი არა, არა-  
მედ ხელოვნებასაც.

და პოეზია უმხურვალესი  
შეჰქმნის კვლავ შრავალ ბაირონს, შექსპირს!

პოეტის თვალში ყოველგვარ შრომას არა აქვს ისეთი ძლევა მო-  
სილება, არამედ მხოლოდ კოლექტიურ შრომას.

რადგანაც კოლექტიური შრომის კერა არის ქალაქი, ამიტომ მა-  
შაშვილი არის ქალაქის მგოსანი:

ქალაქი ცხელი და მოტივტივე,  
ქალაქი, ბუდე ცეცხლის ჩიტების,  
მე შემეყვარდა, ქუჩებს მივიკვი  
და მგონი დამეს შევეპიდე.

პოეტს აქვს ორი ლექსი — „ქალაქი“ და „ქალაქი ღამით“. ორი-  
ვე ლექსი ერთად ჰქმნის კარგ სურათს მოძრავი, შფოთიანი ქალაქი-  
სას, სადაც

ბატონობს შრომა, ოფლი დგება ოკიანებად  
და შიგ ცხოვრება იკვერება რკალით და რკინით.

პოეტი ბრძოლის, პოეტი სამოქალაქო ომის, ძლევა მოსილი კო-  
ლექტიური შრომისა, სოფელს გაუბრძის; მას სძულს სოფელი, სო-  
ფელი აღრჩობს მას:

დედა, ნუ შელი, ბავშვობიდან მძულდა სოფელი.

მეც სოფელს ვძულვარ... ყელზე მიკერს რკინის მარწუხებს.

მთელი პოეზია მაშაშვილისა ავარჯარებულია ბრძოლის ცეცხლით. ეს არის კლასობრივი ბრძოლა. მისი შემოქმედება იბადება ბრძოლის ქარცეცხლში, როდესაც დრო სწრაფია და ხანგრძლივი მოფიქრების საშუალებას არ გაძლევს.

ამიტომ მაშაშვილის პოეზიაში არის ნახტომები, წინააღმდეგობანი, შეუსაბამობა, მაგრამ მთელი თავისი ძალღონით ის პროლეტარიატის რიგებში იბრძვის კომუნისტური გაგებით, მას უნდა კომუნისმის სამეფოში შესვლა საკუთარი, ქართული სახით. ქართული მეობით:

მაგრამ იცოდეთ, ამ ქართულ მიწას  
სხვის ნაფიქრალში ნულარ დავმალავთ  
საკუთარ სახეს ვინც კი დაიცივს,  
ის მსოფლიოში შევა თამამად.

ლექსი „ზოგიერთ პროლეტარულ პოეტებს“ მეტად დამახასიათებელია, გაბედულია, თამამი და პირდაპირი.

პოეტისათვის ოქტომბერი სრულებით არ არის უარყოფა სამშობლოსი და მისი წარსულისა:

შევწირავ იმედს და თავდადებას  
ოქტომბრის დროშას ცეცხლად ახრისა,  
კვლავ რაინდულად ამოვარდება  
ტანმოგრებილი ხმალი კახისა.

კახის ხმალში პოეტი გულისხმობს სამშობლოს წარსულ დიდებას და თავისუფლებას. ოქტომბრის დროშამ, მისი რწმენით, ეს დიდება და თავისუფლება უნდა აღადგინოს, გაზარდოს და განამტკიცოს. პოეტის კრებულის წინასიტყვაობაში სხვათა შორის ვკითხულობთ: „ქართულ მწერლობაში მას არ მოეპოვება მწერალი, ან კლასიკი, რომელსაც ან ფორმით ან განწყობილებით აგრძელებდეს ან ბაძავდეს მაშაშვილი... ამ მხრივ იგი უწინაპროა“.

ეს, რა თქმა უნდა, არ შეეფერება სინამდვილეს. მაშაშვილი მეტად ახალგაზრდაა, ის ციდან არ ჩამოვარდნილა, წინაპრებიცა ჰყავს, ფორმითაც ჰბაძავს მათ და ზოგჯერ განწყობილებითაც. თქვენ მის ლექსებში იცნობთ გალაქტიონ ტაბიძის გავლენას, პოეტის მთელი ლექსები ასონანსებით არის დაწერილი და ბევრი ასონანსი მეტად ლამაზია და ორიგინალური:

წვიმაში — წინ მაშინ

და სხვ.

ბევრგან პოეტს აშკარად ეტყობა სიმბოლისტური ყაიდა წერისა:

ცხოვრება მყარი და ნაშანიკირი...  
ცოდვილი მიწა იყო ორსული.

ან კიდეც:

ო, დამპალ ღამეს  
მოსდის ბალღამი,  
ტვინის ანთებით  
საშინლად ჰკივის.  
კლექიან თვალით  
დაჰყურებს ქალაქს.

ყოველივე ეს სრულიად ბუნებრივია. თვითეული მწერალი განიცდის ამა თუ იმ გავლენას თავისი შემოქმედების პირველ ხანებში. მაშაშვილიც არ შეადგენს გამონაკლისს. სამაგიეროდ მას აქვს უტყუარი ნიჭი და თუ ეს ნიჭი განავითარა, საკუთარ ფეხზე დადგომასაც შესძლებს როგორც შინაარსში, აგრეთვე ფორმაშიაც.

პოეტს აქვს ბევრი ახალი სიტყვა და ღამაზი თქმა, ღამაზი შედარებანი; მაგრამ ალაგ-ალაგ იმის ქართულს ვერ მივიღებთ: დავღალდი, განურია, განსაცდელობა, ზველავს და სხვ., არ ვარგა აგრეთვე

ღმერთო, უშველე ამდენ პოეტებს...

...ავალთ ჯვარზე წამებით

და კვირა დილას ქრისტესავით ავღებო მიკვდრეთით.

ყოველივე ამის მსგავსს პროლეტარულ პოეზიაში არ უნდა ჰქონდეს ადგილი.

1927

## სანდრო ეული

ბურჟუაზიული მსოფლმხედველობის შუაგულში მოთავსებულია „მე“ ანუ პიროვნება, კერძო: პირადი თაოსნობა, პირადი საქმიანობა, პირადი მისწრაფება, კერძო საკუთრება, პირადი განცდა, პირადი შემოქმედება, ერთი სიტყვით, ყველგან და ყველაფერში პიროვნება არის წინ.

სულ სხვა არის, სრულიად სხვა პროლეტარული მსოფლმხედველობა; აქ შუაგულში მოთავსებულია არა „მე“, არამედ „ჩვენ“: საერთო ანუ კოლექტიური საქმიანობა, კოლექტიური ნებისყოფა, კოლექტიური საკუთრება, კოლექტიური განცდა, ერთი სიტყვით ყველგან და ყველაფერში კოლექტიურია წინ.

როგორიღა უნდა იყოს პროლეტარული პოეზია?

უწინარეს ყოვლისა, ის არ უნდა იყოს იმგვარი, როგორიც არის ბურჟუაზიული პოეზია.

ბურჟუაზიული პოეზია გვაძლევს პირად გრძნობას, პირად განცდებს, პირად ასახვას; ყოველივე მეობის სხივებით არის გაშუქებული.

წინააღმდეგ ამისა, პროლეტარულმა პოეზიამ უნდა მოგვცეს კოლექტიური გრძნობა, კოლექტიური განცდა, კოლექტიური გაგება და ასახვა; აქ ყოველივე ჩვენობის შუქით უნდა იყოს განათებული.

საქმე იმაში არ არის, რომ პოეტი უგალობდეს ოქტომბერსა და წითელ დროშას.

პოეტმა უნდა გადაგვიშალოს კოლექტიური გული და მოგვასმენინოს კოლექტიური გალობა ოქტომბრისა და წითელი დროშისა.

ეს არის მთავარი.

ეს მთავარი კი ჩვენს პროლეტარულ პოეზიაში არ არის, ან მეტად მკრთალად.

პროლეტარულ პოეზიაში უნდა ჰგუგუნებდეს: ჩვენ.



ქართულ პროლეტარულ პოეზიაში კი ჭერ უფრო მძლავრად-  
ისმის: მე.

სანდრო ეული ამ მხრივ გამონაკლისს წარმოადგენს; იმის პო-  
ეზიაში უფრო მძლავრად არის მოცემული კოლექტიური განცდა,  
კოლექტიური ნებისყოფა, ვიდრე პიროვნული.

1917 წლამდე ეულის პოეზიაში პროლეტარული პოეტი არა-  
სჩანს,—აქ არის მხოლოდ მებრძოლი პოეტი. ის ჰხედავს ტანჯული  
ხალხის ცხოვრებას, ცრემლებს, ასეთს ცხოვრებას ვერ ურიგდება და  
თავის არსებაში გრძნობს მებრძოლის ძალასა და ღონეს.

1917 წლიდან კი მისი პოეზია უფრო გარკვეულ სახესღებუ-  
ლობს. აქ ჩვენს წინაშე დგას უკვე ჩამოყალიბებული პოეტი, რომელ-  
მაც იცის, თუ რისთვის და ვისთვის იბრძვის.

ამ ორ ხანას თავისი შემოქმედებისას თვითონ პოეტი ახასია-  
თებს მოკლედ და მკაფიოდ:

შობილი ცეცხლში მოვინათლე მე ოქტომბერში.

სანდრო ეულის პოეზია გაიშალა მებრძოლი კომუნიზმის ხა-  
ნაში. ამიტომ პოეტის შემოქმედებაშიაც ბრძოლასა და ცეცხლს-  
ღიდი ადგილი აქვს დათმობილი:

და მეც, ეული,  
ცეცხლად ქცეული,  
ცეცხლის რაშით ვარ  
გატაცებული.

ბრძოლის მგოსანი ეულის პოეზიაში ბარიკადებზეა და თან  
იბრძვის, თან ბრძოლის ჰანგებსა თხზავს:

ბარიკადებში თხზავს სიმღერებს.  
ბრძოლის ჰანგებზე.

სანდრო ეულის პოეზიაში არის სევდა, მაგრამ არ არის გოდება  
და უიმედობა; მას ახასიათებს სრული სიმშვიდე, სიღინჯე, შეურ-  
ყვეელი რწმენა და ერთგვარი მზიურობა:

ბრძოლის ქარცეცხლში მზიურობა მას ანეტარებს.

მებრძოლი კომუნიზმი ცეცხლის რაშებით მოვარდნილი გრიგა-  
ლი და მეხია. პოეზიაში მისი ასახვა მეტად ძნელია; ჩვენში ჭერ ეს  
ვერც ერთმა პოეტმა ვერ შესძლო; ვერ მოერია ამ თემასაც სანდრო  
ეული. ამიტომ მისი სტრიქონი:

თავისთავად ლამაზად გამოთქმულია, მაგრამ პინამდილეჲს კი არ შეეფერება. ამ სიტყვებში მეტად დიდი შინაარსია, დიდი ქადილი, სანდრო ეულს კი საამისო ძალა არ შესწევს.

პოეტს უყვარს კოლექტიური შრომა, რადგანაც ასეთ შრომაში აქედება პროლეტარული შეგნება და რწმენა.

ამიტომ ეულის პოეზიაში ბრძოლის სიძლიერეს სცვლის შრომის პიმნი.

და რადგანაც კოლექტიური შრომის ასპარეზი ქარხანა არის, სანდრო ეულის შემოქმედების მეორე საფეხურს ქარხნის სიმღერა ახასიათებს.

ქარხნის პანგები განსაკუთრებული სიყვარულით არის გამოთბარი. აქ არის სევდაც, ოფლიც, მძიმე ხვედრიც, ბრძოლა, ტანჯვა და ყოველივე ამის გვერდით პროლეტარული ერთიანობა, სულის გაკაყება, ბრძოლა და შეურყეველი რწმენა,

რომ მსოფლიოს ბედს

აქვე გამოვქედო.

მანქანის ხმაურში პოეტი ისმენს თავისებურ სიმფონიას, რომლის ათვისება და შეგნება მხოლოდ იმას შეუძლია, ვინც მანქანების ხმაურს შეეთვისა და ქარხანას ეშვილა. ქარხნის პანგებში გამოირჩევა მკედლის სიმღერა და ქარხნის კონცერტი, პირველი—თავისი დასრულებული, ლამაზად გამოკვეთილი სურათით, მეორე — თავისი ორიგინალობით: ქარხანა წარმოადგენს ორკესტრს, მანქანების ხმაური კი სიმფონიის შესრულებას.

ზოგიერთ პოეტს ჰგონია, თითქოს სიტყვების რახარუხით შესაძლებელი იყოს თანამედროვე ცხოვრების გამოხატვა. არის გახურებული სიტყვების კორიანტელი, შინაარსი კი — გულდაფშუტა.

სანდრო ეულს ეს ნაკლი არა აქვს; ის რეველუციის ქარცეცხლშიაც კი ზომიერია, დინჯი, თავდაპერილი და წრფელი.

„კომუნისტური მანიფესტის“ სიტყვებში — პროლეტარებს სამშობლო არ გააჩნდათო, ბევრმა სამშობლოს სრული უარყოფა დაინახა.

ეს არ არის მართალი.

სამშობლო ბურჟუაზიული გაგებით მიუღებელია, მაგრამ პროლეტარიატი ყველგან ჰქმნის საკუთარ სამშობლოს და მისი მიზანია, მთელი მსოფლიო გადააქციოს მხოლოდ პროლეტარიატის სამშობლოდ.

დიდი რუსეთის ტერიტორია წარმოადგენდა თავადების, ბურ-  
ეუების, ბიუროკრატების, ეპისკოპოსების სამშობლოს.

პროლეტარიატმა განდევნა ყველა ეს მუქთახორა და ახლა  
თვითონ აშენებს ამ ტერიტორიაზე საკუთარ სამშობლოს.

სანდრო ეულს ახასიათებს ასეთი გაგება პროლეტარული სამ-  
შობლოსი; ეს კი მეტად იშვიათი მოვლენაა პროლეტარულ პოეზი-  
აში.

ყური დაუვგდოთ თვით პოეტს:

მშობელი მხარე ჩემზე ძლიერ ვის ეყვარება?  
ფარჩის კაბაში არ მოვრთავდი, ვით დედოფალსა,  
არ შევფიცავდი ერთგულებას მის მთას და ბარსა,  
რომ მას არ სურდეს თვის კალთებში ჩემი ტარება.  
თუ უღრანი ტყე, მთები, კლდენი გადავიარე  
და ოკეანე მხარულითა გადამიცურავს,  
რომ მზე შენახა, თავიც ტანჯვის ღრუბლით მიბურავს,  
ოღონდ იშვებდეს მზიურობით მშობელი მხარე!  
და დღეის იქით ჩემი სულიც  
• მისთვის სულობდეს!

ჩემი სამშობლო მუდამ უნდა გაზაფხულობდეს  
და ცისმარე დღეს მზიურ სიტყვით მას ვეუბნები:  
უნდა აყვავდეს დასისხლული შენი უბნები.

აი აქ არის პროლეტარული შეთავსება სამშობლოსი და ინტერ-  
ნაციონალისა.

სანდრო ეულის პოეზიის ფორმა ბევრში წააგავს ვალერიან გაფ-  
რინდაშვილის ფორმას.

უკანასკნელს უყვარს წმინდა, შარტივი ასონანსი: პროფილით —  
დალბობილი, ჩინგისხანები — მრისხანებით, ჩირალი — ბაირალები-  
და სხვა.

პოეტის ლექსებში შეხვდებით ზოგიერთ მცნებას, რაც პროლე-  
ტარულ პოეზიაში დაუშვებელია:

გწამდეთ ღმერთად; მიზანი ჩვენი, ვისახეთ ღმერთად; ერთად  
მივადგეთ სამოთხის კარებს; კოშკს ვაშენებ, კოშკს ტაძრიანს; ლოც-  
ვა ჩვენი სივრცეს ბზარავს; სწორი ვარ ღმერთთან; ვიცოდეთ ყვე-  
ლამ: სული ორია, და სხვა.

მართალია, პოეტი ჩვეულებრივი გაგებით არ იღებს ამ სიტ-  
ყვებს, მაგრამ მაინც არ უნდა ჰქონდეს ადგილი პროლეტარულ  
პოეზიაში არც ღმერთს, არც ტაძარს, არც ლოცვას, არც სამოთხესა  
და არც სულს.

## მაქსიმ გოგოშის ცხოვრება და შემოქმედება

### შესავალი

ბატონყმობის გადავარდნამ რუსეთში ფართოდ გაუღო კარი ვაჭრულ-ჩარჩული კაპიტალის განვითარებას.

ვაჭრული კაპიტალი ათეული წლების განმავლობაში ნიადაგს უმზადებდა ნამდვილი კაპიტალისტური წარმოების აღორძინებას, ხოლო მას არ შეეძლო რაიმე შეგნება ან განვითარება შეეტანა სოფელში და ქალაქში.

მისი მიზანი იყო ფულის დაგროვება მეევანშეობით. ფული გაბატონდა, ფულმა გაიტაცა ყველა, თვითეული ჩაიკეტა საკუთარი კეთილდღეობის ფარგლებში და „სხვისი კირი—ღობეს ჩხირით“.

ასეთს პირობებში შეუფენებლობა, გაუნათლებლობა, უკულტურობა, საშინელი უვიცობა და სიბნელე ძველებურად დარჩა ხალხში. სილატაკემ კი იმატა.

სოფელში გადატაკებული და ულუკმაპუროდ დარჩენილი ნაწილი ქალაქებს მოაწყდა სამუშაოს საშოვნელად, მაგრამ რადგანაც წარმოება არ იყო განვითარებული და მუშახელი არავის ეჭირვებოდა, დღიური სამუშაოს საძებნელად ეს ხალხი ერთი ქალაქიდან მეორეში გადადიოდა, ხან მშვიერი იყო, ხან მაძლარი, ხან საქმე ჰქონდა, ხან უსაქმოდ დაყიალობდა.

ამგვარად წარმოიშენენ ეგრეთწოდებული ბოსიაკები.

ესენი პირშო შვილნი არიან რუსეთის ვაჭრულ ჩარჩული ყოფა-ცხოვრებისა.

მოწინავე ინტელიგენცია ჰხედავდა, რომ ასე ცხოვრება აღარ შეიძლებოდა, და თანდათან თავი იჩინა სარევიოლუციო მოძრაობამ.

გაჩნდნენ თავგანწირული პირები ინტელიგენციის რიგებში. შეადგინეს ფარული საზოგადოება, მაგრამ გლეხობა უვიცი იყო და გაფხინტული, პროლეტარიატი არ არსებობდა; ამიტომ ამ საზოგადოების სარევიოლუციო მუშაობა ვიწრო ინტელიგენტურ წრეს არ გასცილებია.

როდესაც რევოლუციონერებმა ალექსანდრე მეორე სიკვდილით დასაჯეს, თვითმპყრობელობამ ისარგებლა ამ შემთხვევით და უმაგალითო რეაქციამ ქვეშე მოიტანა მთელი მოაზროვნე რუსეთი.

მოწინავე ინტელიგენცია გაანადგურეს—ზოგი დახოცეს, ზოგი კატორღაში დაგზავნეს, სხვები ციმბირში გაუასახლეს.

სამარე დამყარდა რუსეთში. ინტელიგენცია დაიქსაქსა, მოიცვა სასოწარკვეთილებამ და უიმედობამ, ცხოვრება შეიქმნა უფერული, მდარე, უიდეალო.

ამ ხანის საუკეთესო გამომხატველია მწერლობაში ანტონ ჩეხოვი.

ვინ არიან ჩეხოვის გმირები?

უნებო, უხასიათო ინტელიგენტები, რომლებიც ერთ ალაგს ტკეპნიან, ოხრავენ, ხენეშიან, რაღაც უნდათ, სადღაც მიისწრაფვიან, მაგრამ ვერაფერი მოუხერხებიათ, გამოსავალი ვერ უნახავთ, იმედი არაფრისა აქვთ და სრულებით გამოუსადეგარნი არიან, ცხოვრებაში ზედმეტ ბარგს წარმოადგენენ.

საჭირო იყო ახალი სიტყვა, სიტყვა ცეცხლისა და იმედის მფრქვეველი.

საჭირო იყო ახალი სიტყვა, რომელიც სასოწარკვეთილებას გაჰფანტავდა და მომავლის გზას გაანათებდა.

საჭირო იყო სიტყვა ახალი, ფოლადივით მტკიცე, ბასრი და მკრელი.

საჭირო იყო სიტყვა მამხილებელი, მეხის დამცემი.

საჭირო იყო ახალი სიტყვა, ყუმბარებით დატენილი.

და ეს ახალი სიტყვა გაისმა,—მისი მთქმელია მაქსიმ გორკი.

ვინ არის მაქსიმ გორკი?

დიდი ქარიშხლის —რევოლუციის წინამორბედი.

გორკის წინათგარძნობა რევოლუციისა გასაოცარია.

ის აღფრთოვანებით, გატაცებით, თავდავიწყებით უმღერის მომავალ ქარიშხალს, რომელიც მოუტანს ხალხს თავისუფლებას, კეთილდღეობას, ნამდვილ ადამიანურ ცხოვრებას.

ვინ არის მაქსიმ გორკი?

დიდი ოქტომბრის წინამორბედი: ის უმღერის მხოლოდ ისეთ რევოლუციას, რომელიც მშრომელ ხალხს მიანიჭებს სრულ თავისუფლებას და ბატონობას.

ვინ არის მაქსიმ გორკი?

სოციალიზმისა და პროლეტარიატის მებრძოლი.

მაქსიმ გორკი შვილია მშრომელი ხალხის და მთელი თავისი ნი-

კი მან მოახმარა მშრომელი ხალხის გამოფხიზლებას, განთავისუფლებას და კეთილდღეობას.

მისი სიტყვა, სიტყვა მეხისნატეხი და ელვაში დაფერილი, მომხიბლავი სიმღერაა მშრომელი ხალხის სიყვარულისა.

ის ჰხიბლავს სმენას, ატეობს გულს და მიაქანებს გონებას სულ წინ და წინ, იქ, სადაც ბატონობს კოლექტიური შრომა, კოლექტიური ნება და მისი გამომხატველი — თავისუფალი და საკუთარი ყოფაცხოვრების ბატონ-პატრონი მშრომელი ხალხი.

ვინ არის მაქსიმ გორკის მშრომელი ხალხი?

მუშა და გლეხი.

მაქსიმ გორკი მუშისა და გლეხის მგოსანია.

მისი მნიშვნელობა არ განისაზღვრება მარტო რუსეთით, არამედ მთელი მსოფლიოთი.

რუსეთის სინამდვილიდან ის მთელი მსოფლიოს მუშებსა და გლეხებს მოუხმობს: დაჰკათ, გაანადგურეთ ძველი ცხოვრება და ააგეთ ახალი, თქვენი საკუთარიო.

### მაქსიმ გორკის ბიოგრაფია

ყოველი მწერლის შემოქმედება ნაყოფია აღზრდისა და იმ წრისა, რომელშიაც ეს მწერალი ტრიალებს.

ამიტომ საჭირო არის გავეცნოთ მაქსიმ გორკის თავგადასავალს.

მაქსიმ გორკი დაიბადა ნიჟნი-ნოვგოროდში 16 მარტს, 1868 წელს. მამამისი იყო ხელოსანი, დედა—ვაჟრის ქალიშვილი. ბაბუა მამის მხრით მეტად მკაცრი ხასიათისა ყოფილა და ამის გამო გორკის მამა პატარაობისას ბევრჯერ გაქეუულა სახლიდან.

ბოლოს სრულებით გაცლია მამას, ფეხით ჩასულა ტობოლსკიდან ნიჟნი-ნოვგოროდში და შეგირდად მიჰბარებია ერთ ხელოსანს; შეუსწავლია ხელობაც, წერა-კითხვაც.

ერთ ხანს ის ცხოვრობდა თავისი ხელობით, შემდეგ ასტრახანში მიუღია კარგი თანამდებობა ერთ-ერთ სავაჭრო კანტორაში.

ასტრახანში მას შეურთავს ცოლი და მალე გასჩენია ვაჟი, რომლისთვისაც დაურქმევიათ ალექსი.

აი ეს ალექსი გახლავთ მომავალი მაქსიმ გორკი, რომლის ნამდვილი სახელი და გვარი არის ალექსი პეშკოვი.

მაქსიმ გორკად მომავალი სახელოვანი მედროშე პროლეტარია-

ტისა აქ, თბილისში მოინათლა, მაგრამ ამის შესახებ შემდეგ ვილაპარაკოთ.

1873 წელს პატარა ალექსის შეხვდა ხოლერა; თვითონ კი გადიტანა, მაგრამ მისგან ეს სენი გადაედო მამამისს და ეს უკანასკნელი იმსხვერპლა კიდევ.

„ბებიანიჲმისაგან ივაიფონია, — ამბობს თავის ავტობიოგრაფიაში გორკი:—მამაშენი კეთილი, ჭკვიანი და მეტად მხიარული კაცი იყო“.

ამ უბედურების შემდეგ დედამ შვილი აითვალწუნა: შენა ხარ მიზეზი მამიშენის სიკვდილისაო; მალე გათხოვდა და პატარა ალექსი დარჩა ბაბუასთან დედის მხრით.

ეს ბაბუა მეტად ღვთისმოსავი ყოფილა, მკაცრი, მტარვალი და მეტად ძუნწი, თუმცა ვაჭარი იყო და შეძლებაც ჰქონდა.

პატარა ალექსის პირველი მასწავლებელი იყო მისი ბაბუა, რომელმაც ასწავლა მას ანბანი და შემდეგ მისცა ხელში ფსალმუნი.

პატარა ალექსის ჰყავდა ლოთი ბიძები, რომლებიც დათვრებოდნენ და შემდეგ დაუწყებდნენ ცემა-ტყეპას თავიანთ ცოლებს. ალექსისაც ბევრჯერ მოჰხვედრია მათი ხელი.

ერთადერთი სპეტაკი ადამიანი იყო მთელ ოჯახში ბებია, რომელსაც ალექსი ძალიან უყვარდა, ეფერებოდა და ხშირად უყვებოდა ზღაპრებს, თქმულებებს, ლეგენდებს და სხვადასხვა ამბებს.

როდესაც ალექსის შვიდი წელი შეუსრულდა, სკოლაში მიაბარეს, მაგრამ სკოლაში გამეფებული რეჟიმი ბავშვსა სძულდა, არც ამხანაგები უყვარდა.

სკოლაში მან სულ ხუთი თვე დაჰყო და ყვავილი შეხვდა. შემდეგ ჯედა გარდაეცვალა ტლექით, ბაბუა გაკოტრდა და ბავშვი სკოლიდან გამოიყვანეს.

რვა წლის ალექსი ფენსაცმლის მაღაზიაში მიაბარეს ბიჭად; აქ მან დაჰყო მხოლოდ ორი თვე: ხორცის ცხელ წვენიში ხელები დაიფუჭა და გააგდეს: გასწი, დაიკარგე, შენისთანა უხეირო ბიჭი ჩვენ რად გვინდაო.

როდესაც ალექსის ხელები მოუტრია, მხატვარს მიაბარეს შეგირდად. მაგრამ ოსტატი იმდენად მკაცრი და სასტიკი გამოდგა, რომ ალექსიმ მასთან ვერ გაძლო, გაიქცა და ერთ გემზე მზარეულს მიეზარა შეგირდად.

მზარეული მიხეილ სმური მეტად ღონიერი, უხეში იყო, მაგრამ კითხვა უყვარდა ძალიან.

ამ მზარეულმა მეტად დიდი გავლენა იქონია მომავალ გორკიზე.

თავისუფალ დროს მზარეული კითხვაში ატარებდა და თავის შეგირდსაც აძლევდა წიგნებს: იკითხე, ჭკუას ისწავლიო.

„წიგნი და დაბეჭდილი ქაღალდი მანამდე ჭირივით მძულდა“ — წერს თავის ავტობიოგრაფიაში მაქსიმ გორკი.

მისი მასწავლებელი მზარეული ამან ვერ შეაშინა; ჯერ სცადა, მოფერებით ჯა ტკბილი სიტყვით შეეყვარებია ალექსისათვის წიგნის კითხვა, მაგრამ როდესაც ამან ვერ გასჭრა, მიმართა უფრო მტკიცე ზომას—მუშტს.

მუშტი კი სმურის მეტად მაგარი ჰქონდა.

ალექსიმ გადაწყვიტა თავის გულში, ჩემი გვერდები ამის მუშტს ვერ გაუძლებენო, და ნელ-ნელა შეეჩვია კითხვას.

ამგვარად ალექსის ჯიუტობა და წიგნის სიძულვილი ისევ მზარეულის მუშტმა გასტეხა და დასძლია.

„ამბავი იმისა, თუ როგორ გადაარჩინა სალდათმა პეტრე დიდი“ პირველი წიგნი იყო, რომელიც პატარა ალექსიმ წაიკითხა მზარეულთან.

წიგნი ალექსის ძალიან მოეწონა და ამის შემდეგ საშინლად შეუყვარდა კითხვა.

მზარეულს მთელი დიდი სკივრი ჰქონდა, სრულებით სხვადასხვანაირი შინაარსის წიგნებით სავსე. აქ იყო ეკარტაუზენი, ნეკრასოვი, ან რადკლიფი, „სოვრემენიკისა“ და „ისკრის“ ნომრები, „ქვესარწმუნოებისა“, სხვადასხვა თავგადასავლისა და ზღაპრების წიგნები.

„ჩემი ცხოვრების ამ დღიდან მე დავიწყე კითხვა ყველაფრის, რაც კი ხელში ჩამივარდებოდა; ათი წლისა ვიყავი, როდესაც დღიური დავიწყე და შიგა ვწერდი წიგნებიდან და ცხოვრებიდან მიღებულ შთაბეჭდილებებს“, — წერს გორკი თავის ავტობიოგრაფიაში.

ამის შემდეგ იწყება ალექსის რთული და მეტად ჭრელი ცხოვრება: რა არ გამოსცადა, სად და ვისთან არ იყო!

თავის მასწავლებელ სმურის დაანება თავი და ისევ მხატვარს მიებარა; შემდეგ მსახურებდა საშაქარლამოში, აცხოვდა კრენდლებსა და ბულკებს.

როცა ყოველივე ეს მოსწყინდა, დადგა ჯარაჯად ცარიცინის რკინის გზაზე. ამასაც მიანება თავი და, როცა ულუკმაპუროდ დარჩა, ხან შეშასა ჰხერხავდა, ხან ბარგსა ზიდავდა სადგურზე და ამით ირჩენდა თავს.

ერთხანად ვაჭრობასაც მიჰყო ხელი, ჰყიდდა ვაშლს, ქათმებს; შემდეგ თავი ამოჰყო საეკლესიო ხორაში. ბოლოს დადგა ნიჟნი-



ნოვგოროდში გადაშერლად ვეჟილ ლანინთან, რომელმაც მომავალ გორკიზე დიდი გავლენა იქონია. ლანინმა შენიშნა, რომ ალექსის არაჩვეულებრივი ნიჭი ჰქონდა, ამიტომ ხელი მიჰყო იმის თვითგანვითარებას, უხსნიდა, რა და რა შინაარსის წიგნები უნდა ეკითხა და თვითონ აძლევდა წიგნებს.

1888 წელს ალექსი დაუახლოვდა ყაზანში სტუდენტობას და თვითგანვითარების წრეებში იღებდა მონაწილეობას.

ამგვარად მან დაიწყო ცხოვრების ძირიდან, ჯურღმულიდან და ვეჟილ ლანინისა და სტუდენტების საშუალებით თანდათან გაეცნო ინტელიგენტურ წრეებს, ინტელიგენციის სულისკვეთებას.

ალექსის ბუნება დაუდგრომელი იყო, მაძიებელი; შინაგანი ძალა, წყურვილი გაცნობისა, სხვადასხვა შთაბეჭდილებისა მას არ აყენებდა ერთ ალაგს; 1890 წელს დაიბიჯა ჯონი, მოიგდო ზურგზე ჩანთა და გაუდგა გზას ნოვგოროდიდან ცარიცინისაკენ, შემოიარა დონის ოლქი, უკრაინა, ბესარაბია, ყირიმი, ყუბანი და ამოჰყო თავი თბილისში.

თბილისში სცხოვრობდა კალიუჟენისთან, რომელმაც გზა გაუკაფა მწერლობისაკენ და მიაგნებინა თავისი ნამდვილი მოწოდება.

თბილისიდან გადავიდა ისევ წიგნი-ნოვგოროდში და დაუახლოვდა მწერალ კოროლენკოს, რომელმაც გზა გაუკაფა დიდი მწერლის ასპარეზისაკენ. „პირველი ჩემი მასწავლებელი იყო სალდათი მზარეული სმური, მეორე — ვეჟილი ლანინი, მესამე — კალიუჟენი, კაცი „საზოგადოების გარეშე“, მეოთხე — კოროლენკო“. — ასე ათავებს გორკი თავის ავტობიოგრაფიას.

თბილისის განსაკუთრებული მნიშვნელობა აქვს გორკის ცხოვრებაში. ამიტომ უფრო ვრცლად უნდა შევეხოთ გორკას ცხოვრებას თბილისში.

## მაქსიმ გორკი თბილისში

მ. გორკის სამართლიანად შეუძლია წარმოსთქვას ხოლმე:

მე თბილისმა დამბადა.

თბილისსაც შეუძლია, ამაყადა სთქვას:

მაქსიმ გორკი ჩემი შვილიაო.

რისთვის, რა საბუთით?

თბილისამდე გორკი იყო სრულიად უცნობი ახალგაზრდა ალექსი პეშკოვი.

თბილისის ცამ, კლდეებმა, თავისებურობამ, ნარიყალამ აღაფ-

რთოვანეს ახალგაზრდის ბუნება; თბილისის მზემ ცეცხლი ააგიზგი-  
ზა იმის გულში და ამ ცეცხლიდან იშენენ პირველი მოთხრობა „მა-  
კარ ჩუღრა“ და მაქსიმ გორკი.

ის, როგორც დიდი მწერალი, მთელი მსოფლიოს პროლეტარი-  
ატს ეკუთვნის, განსაკუთრებით კი თბილისის მუშა ხალხს, თბილისის  
პროლეტარიატს, რადგანაც მომავალ მწერალს პირველად თბილის-  
მა დაურწია ხელოვანის აკვანი, თბილისმა ამოადგმევინა პირველად  
სამხატვრო ენა.

როდესაც თავისი მოგზაურობის დროს ალექსი ბესარაბიას ეს-  
ტუმრა, ის მიიზიდა ზღვამ და დიდმა ნავსადგურმა. ზღვა თავისი  
სივრცით იტაცებდა იმის მეოცნებე ბუნებას და გადაჰყავდა სადღაც  
შორს, შორს, სადაც ცხოვრება სულ სხვანაირი იყო, აღამიანიც სხვა.

დიდ ნავსადგურში კიდევ თავს იყრიდნენ აუარებელი ბოსიაკე-  
ბი, რომლებსაც ალექსი განსაკუთრებულ ყურადღებას აქცევდა.

ბოსიაკების ხასიათსა და ყოფა-ცხოვრებაში იყო ზოგიერთი  
რამ, რაც ალექსის მოსწონდა. ამიტომაც მან მიაშურა ოდესას, რო-  
მელიც იმის წყურვილს ყოველმხრივ აკმაყოფილებდა.

ოდესის ნავსადგური მართლაც სავსე იყო ბოსიაკებით. ისინი  
აქ ერთად მუშაობდნენ, ერთად ატარებდნენ დროს, ერთად ლაზღან-  
დარობდნენ, ხან ჩხუბობდნენ, ხან იგინებოდნენ, ხან ლოთობდნენ,  
ხან მშვირები იყვნენ, ხან მადღარნი; ხოლო თუ რასმე იშოვიდნენ,  
ერთმანეთს უზიარებდნენ.

აი ეს ერთობა, ეს ამხანაგობა, ერთგვარი მსგავსება კოლექტი-  
ური ცხოვრებისა ალექსის ჰზიბლავდა; სხვაგან, სხვა წრეებში, არა-  
ფერი ამის მსგავსი არ იყო.

ყველგან გამეფებული იყო ერთმანეთის გაუტანლობა, ყველა  
მონა იყო ფულის, თვითნებური საკუთარი ცხოვრებითა სცხოვრობ-  
და, აღამიანი აღამიანისათვის მგელი იყო.

ასეთ სურათს წარმოადგენდა ვაჭრულ-თავადური წყობილება  
მაშინდელი რუსეთისა.

ყოველივე ეს ალექსის ეჭავრებოდა, ეზიზღებოდა.

გამონაკლისს წარმოადგენდნენ ბოსიაკები. მართალია, ისინი  
დაღუპული ხალხი იყვნენ, ნაძირალები, მაგრამ მათი ყოცა-ცხოვრე-  
ბის ზოგიერთი თვისება ალექსის იზიდავდა.

ოდესის ნავსადგურში კარგა ზანს დაჰყო. ალექსიმ, აქ ის ეზი-  
ღებოდა ბარგს, ტრიალებდა ბოსიაკებში, სჭამდა მათთან პურს და  
უკვირდებოდა მათს ყოფა-ცხოვრებას.

ყოველივე ამან მეტად დიდი სამსახური გაუწია გორკის, რო-

გორც ქვემოთ ღავენახავთ. ბოსიაცები მან გამოიყენა სასტიკი პროტესტისათვის არსებული საზოგადოებრივ-პოლიტიკური წყობილების წინააღმდეგ.

ალექსი თავისი ბუნებით შთაბეჭდილებათა მაძიებელი იყო, როდესაც ის ამ მხრივ ამოსწურავდა ერთ ადგილს, მისი გული იქ ველარა სძლებდა და ეძებდა სხვა ალაცს, ახალ შთაბეჭდილებებს.

ყირიმი, კავკასია, სამხედრო გზა—აი რა ეხატებოდა ახალგაზრდა ალექსის თვალწინ.

ნავსადგურში მან გაიცნო ერთი ქართველი, რომელსაც სამშობლოში დაბრუნება უნდოდა, მაგრამ ფული არა ჰქონდა. ალექსი ჩვეული იყო უფულოდ მოგზაურობას; ისარგებლა ამ ნაცნობობით და ორივემ ერთად გამოსწია კავკასიისაკენ.

გზად გაიარეს ყირიმი, შავი ზღვის სანაპირო ქალაქები, ესტუმრნენ კავკასს და აქედან დაეშვნენ სამხედრო გზაზე.

ღარილის სიღიადემ ალტაცებაში მოიყვანა ახალგაზრდა ალექსი; ხშირად შეისვენებდა, ჩამოჯდებოდა ქვაზე ან წამოწვებოდა ბალახზე და ტკებოდა უჩვეულო სურათებით და გასაოცარი სანახაობით.

იმის ფანტაზიაში ერთმანეთს გადაეხლართნენ თვალგადაუწვდენელი ზღვა, უსაზღვრო ველები, ცამდე აზილული მედიდური მთები და შექქმნეს ის მომხიბლავი, იშვიათი სილამაზის სურათები ბუნებისა, რაც ასე უხვად არის გაბნეული დიდებული მწერლის შემოქმედებაში.

ღარილით დამთვრალმა ალექსიმ შეუმჩნევლად მოატანა მცხეთას: კიდევე პატარა მანძილი და—

„ჯერ კიდევე შორიდან, ხუთი ვერსის დაშორებით, მე დავინახე სატახტო ქალაქი კავკასიისა, ორ მათათა შუა ჩაქედილი.

გაილია გზა. მე მახარებდა რალაცა“,—წერს გორკი.

1891 წლის შემოდგომაზე ალექსიმ და მისმა თანამგზავრმა თავი ამოჰყვეს თბილისში.

თანამგზავრმა ის გააჩერა ვერის დაღმართთან: აქ მომიცადე, მალე დავბრუნდები და წაგიყვან ჩემთანო.

ალექსიმ უცადა, მაგრამ ამაოდ: თანამგზავრი გაშპა!

ამ ღროს ქუჩაში შეიქნა ჩოჩქოლი, ყვირილი, მიწვევ-მოწვევა, გაიმართა ჩხუბი, გაჩაღდა დაკა-დაკა და ალექსი ჩაერია შიგ გასაშველებლად.

გაჩნდნენ პოლიციელები და როგორც მოჩხუბარნი, ისე გამშველებელიც წააბრძანეს პოლიციაში.

პოლიციაში დაიწყო ჩვეულებრივი ჯაკითხვა და ოქმის შედგენა.

როდესაც პოლიციელმა ალექსის ახედ-დახედა, მისი გარეგნობა, ტანისამოსი როგორც არ მოეწონა, ჩვეულებრივ მაწანწალად მიიღო და შეეკითხა:

— ვინ გიცნობს აქ?

იღბლად ალექსის მოაგონდა, რომ მისი ნაცნობი ნაჩალოვი თბილისში მსახურობდა რკინის გზაზე და დაუსახელა.

ალექსის მაინც არ ენდვნენ და გააყოლეს პოლიციელი ნაჩალოვთან მისი ვინაობის გამოსარკვევად.

ნაჩალოვმა მართლაც იცნო ალექსი, დაადასტურა მისი ვინაობა. თორემ მას მოელოდა გადასახლება ჯა ეტაპი, როგორც მაწანწალას.

ნაჩალოვმა ალექსი მოათავსა თავისთან და ექამ ნიკოლოზ ხუდადოვის დახმარებით უშოვნა რკინის გზაზე კანტორის მოხელის ადგილი.

ეს ხუდადოვი რევოლუციური მიმართულების ინტელიგენტი იყო და მეფის შავრაზმელებმა ამის გამო ვერაგულად მოჰკლეს პირველი რევოლუციის დროს. ალექსიმ მალე გაიცნო თავისი ტოლები — აფანასიევი და როხლინი და 1891 წლის დეკემბერში სამივე ერთად დასახლდა კვირაცხოვლის ქუჩაზე № 3, დაბლა სართულში.

მათთან თავს იყრიდნენ მოსწავლე ახალგაზრდობა, მოწინავე მუშები, ანდრია ლეჟავა, შიო ჩიტაძე და სხვები.

იმართებოდა სალამოები. კითხულობდნენ წიგნებს, არჩევდნენ, კამათობდნენ.

ამგვარად სამთა ბინა კვირაცხოვლის ქუჩაზე მალე გადაიქცა პატარა კომუნად, რომლის გარშემოც თავი მოიყარეს საუკეთესო ახალგაზრდობამ, მოწინავე მუშებმა.

იმ ხანებში პოლიტიკური აზროვნება და მისწრაფებანი ნელ-ნელა ვრცელდებოდნენ ინტელიგენციის ზოგიერთ ფენაში და ამიტომ კომუნაშიაც იყო ხოლმე ბაასი სოციალურსა და პოლიტიკურ თემებზე, მაგრამ მისი მთავარი საქმიანობა იყო თვითგანვითარება.

თბილისში ამ დროს დაარსებული იყო სამკითხველო ოლია კაიდანოვის თაოსნობით.

ახალგაზრდა ალექსი მუდმივი სტუმარი იყო ამ სამკითხველოსი.

სამკითხველო მდიდარი იყო შინაარსიანი წიგნებით ჯა ალექსი გატაცებით ჰყლაპავდა წიგნებს. წიგნი მას შეუყვარდა ისე, როგორც

აღფრთოვანებულ ახალგაზრდას ქალი, და ეს სიყვარული გაუღვიძა მზარეულმა სმურიმ.

კითხვამ ძალიან განავითარა ალექსი; წანაკითხი და საკუთარის თვალთ ნახული, ცხოვრების სურათები და შთაბეჭდილებანი, თავგადასავალი და გამოცდილება ყველა ერთად ჰბორგავდა იმის მოუსვენარ გონებაში და ეძებდა გამოსავალს.

როდესაც კომუნაში საღამო გაიმართებოდა და თავს მოიყრიდა ახალგაზრდობა, ალექსი გაიმართებოდა, შეარხევდა ბეჭებს და მოჰყვებოდა სხედასხვა ამბავს.

იმის თხრობაში იყო სიცოცხლე, სილამაზე, გატაცება, სიყვარული, წყურვილი, იმედი, შეურყეველი რწმენა—ერთი სიტყვით ყოველივე ის, რამაც უკვდავების გვირგვინი დაუწნა იმის შემოქმედებას.

ახალგაზრდობა გატაცებით უსმენდა მას და მოითხოვდა მისგან სულ ახალ-ახალ ამბავს.

ალექსიც დაუზარებელი იყო, ცხოვრებიდან დაუშრეტელი მასალა ჰქონდა ამოკრეფილი და მისი ოცნება თავისუფლად შლიდა ფრთებს.

მას ამ დროს არც უფიქრია და არც უცდია თავისი ნაამბობი ჩაეწერა. ის უფრო გატაცებული იყო პოეზიით და რამდენიმე რვეული ჰქონდა საკუთარი ლექსებით სავსე.

ეს ლექსები შემდეგ არსად გამოუქვეყნებია გორკის, მაგრამ პოეზიაშიც რომ ნიჭიერი იყო, ამას ჰმოწმობენ მისი მოთხრობები. იქ ბევრგან არის ჩაქსოვილი გორკის საკუთარი ლექსები და ეს აძლევს განსაკუთრებულ სილამაზესა და მუსიკალურ სიტკბობას იმის პატარა მოთხრობებს.

დადგა 1892 წლის ზაფხული. მოსწავლე ახალგაზრდობა დაიფანტა, ზოგმა სწავლა დაამთავრა, სხვებმა სოფლებს მიაშურეს და კომუნა კვირაცხოვლის ქუჩაზე დაცალიერდა. როხლინი გადავიდა, აფნასიევიც აპირებდა გადასვლას, ალექსისაც უნდა მოეძებნა სხვა ბინა.

თბილისში ალექსიმ გაიცნო კალიუენი, ყოფილი პოლიტიკური კატორღელი. პოლიტიკური მოღვაწეობისათვის კალიუენიმ ექვსი წელაწადი გაატარა კატორღაში და შემდეგ ფადმოასახლეს თბილისში. ეს იყო 1890 წელს, ალექსის ჩამოსვლამდე ადრე ერთი წლით.

კალიუენი მსახურობდა სტატისტიკოსად თბილისის რკინის გზის სამმართველოში.

ალექსისა და კალიუენის შორის თავიდანვე კარგი განწყობილება დამყარდა.

როდესაც სამთა კომუნა დაიშალა, კალიუენიმ წინადადება მისცა ალექსის: ჩემთან გამოდიო.

ალექსი სიამოვნებით დასთანხმდა და დაბინავდა კალიუენისთან ელისაბედის ქუჩაზე № 146.

ეს ორი ადამიანი მალე ისე დაუმეგობრდა ერთმანეთს და ისე შეიყვარეს ერთიმეორე, რომ ეს: სიყვარული და მეგობრობა დღემდე გრძელდება.

ახალ ბინაზე დაიწყო ალექსისათვის მშვიდი, წყნარი, მოსვენებული ცხოვრება, სამსახური მას არ ართმევდა დიდ დროს. კალიუენის კარგი ბიბლიოთეკა ჰქონდა და გორკი ჩაუჯდა კითხვას; ზოგჯერ კი მოუყვებოდა კალიუენის სხვადასხვა ამბავს და ისმენდა მის შენიშვნებს.

ალექსიმ ამ ხანებში გადასწყვიტა სისტემატიური მეცადინეობა და გიმნაზიის კურსის გავლა; თავისი განზრახვა გაუზიარა კალიუენის.

ამ უკანასკნელმა ძალიან შორს დაიკავა:

— დაანებე მაგას თავი, არ არის შენი საქმე.

— მაშ რა ვქნა?

— რა ჰქენი და სწერე!

— რა ვწერო?

— აი ის, რასაც მე მომიტხრობ ხოლმე.

ალექსის თითქოს თვითონაც სურდა ქაღალდზე გადაეტანა ის სახეები, რომლებსაც აღმაფრენა უხატავდა იმის ოცნებას, მაგრამ როგორღაც ვერა ბედავდა.

აი ერთხელ საღამოს ის და კალიუენი ერთად სხედან ოთახში.

— აბა ერთი მომიყევი რამე შენებურად, — მიმართავს კალიუენი.

ალექსი გატაცებით მოუთხრობს მას თავის ბოიკოს და რადას.

როდესაც ის გაათავებს თავის ამბავს, კალიუენი სახეგაბრწყინებულ მიმართავს:

— უსათუოდ დასწერე ეს ამბავი, გესმის, უსათუოდ!

კალიუენის გამხნეებამ გასტეხა ალექსის გაუბედაობა, ჩაიკეტა კარი, მიუჯდა მაგიდას და დასწერა:

„მაკარ ჩუდრა“.

ეს იყო მისი პირველი მოთხრობა. სრულებით უცნობი, უსახელო მწერლისათვის ძალიან ძნელია თავისი პირველი ნაწარმოების

დაბეჭდვა. მიიტანს რომელიმე რედაქციში, თუ იქ ნაცნობი არა ჰყავს, უგულოდ მიიღებენ, ეჭვის თვალით შეჰხედავენ, ცივად გამოართმევენ ნაწერს და მიაგდებენ, არკი წაიკითხავენ და, თუ წაიკითხეს, ვინ იცის, როდის.

რედაქცია ამ შემთხვევაში არ არის გასამტყუნარი: ; უვარგისი მასალის, მოთხრობებისა და ლექსების კითხვით ყველას თავი აქვს ვაბეზრებული. ალექსის აქაც ბედი სწყალობდა: კალიუენი იცნობდა კარგად „კავკაზის“ ერთ მსხვილ თანამშრომელს ცვეტნიცკის და მას გადასცა ეს მოთხრობა. ცვეტნიცკიმ წაიკითხა, მოეწონა და 1892 წელს 12 სექტემბერს „კავკაზის“ № 242-ში დაიბეჭდა „მაკარ ჩუდრა“, რომელსაც ქვეშ ეწერა მ. გორკი.

აი ამ დღიდან ალექსი პეშკოვი გადაიქცა მაქსიმ გორკად. თბილისმა მოამწიფა მისი ნიჭი, თბილისმა აჰხანდა ფარდა იმის შემოქმედებას. თბილისმა იწამა ის პირველად, თბილისმა მიიღო მისი პირველი მოთხრობა; უცნობი, უსახელო ალექსი პეშკოვი ფეხით მოადგა თბილისს და იშვა აქ მაქსიმ გორკად, რომლის სახელს დღეს მთელი მსოფლიო იმეორებს.

იმ დღიდან თბილისი და მაქსიმ გორკი განუყოფელია, განუყრელი.

მ. გორკიმ პირველი მოთხრობითვე გაითქვა სახელი; ყველა ულოცავდა; მეგობრები შეჰხაროდნენ, განსაკუთრებით კალიუენი, რადგანაც მან პირველმა დაინახა მომავალ მწერალში დიდი ნიჭი და პირველმა გააბედვინა მოთხრობის დაწერა.

თვითონ მ. გორკი მეტად მადლიერია კალიუენის, დღესაც განაგრძობს მასთან მიწერ-მოწერას და თავის წერილებში უწოდებს მას ძველ მეგობარსა და საყვარელ მასწავლებელს.

თბილისიდან მ. გორკი გადავიდა ისევ ნიჟნი-ნოვგოროდში და ადგილობრივ გაზეთში ათავსებდა თავის მოთხრობებს. აქ ის დაუახლოვდა კოროლენკოს და მისი რჩევით დაიწყო თანამშრომლობა მოსკოვის დიდ ლიბერალურ გაზეთში — „Русские Известности“.

მისი სახელი სწრაფად გაიზარდა და მეტად პოპულარული გახდა განსაკუთრებით ახალგაზრდობასა და მუშებში.

ასეც უნდა ყოფილიყო.

ახალგაზრდობა აღსავსეა გატაცებით, ენერგიით.

გორკის შემოქმედებაც იყო გატაცება და ძლიერი გაქანება წინ, ახალი ცხოვრებისაკენ.

მუშები მაშინ ირაზმებოდნენ და ძალღონეს იკრებდნენ სასტიკი, შეუბრალებელი და დიადი ბრძოლისათვის.

გორკის შემოქმედება ხომ ძლიერი მოწოდება იყო ბრძოლისაკენ:

მამაცთა სიგიჟეს  
გუმლერი დიდებას.

აი დადგა 1898 წელი. გორკის მოთხოვნებისა უკვე მეოთხე ტომი გამოვიდა. გორკის კითხულობს და იცნობს მთელი რუსეთი.

სწორედ ამ დროს ნიენი-ნოვგოროდის ეანდარმთა სამმართველოს თბილისის ეანდარმთა სამმართველოდან მოუდის შემდეგი შინაარსის ქაღალდი: ნიეგოროდის მოქალაქე ალექსი პეშკოვი გაჩხრიკეთ, დააპატიმრეთ და თბილისში გადმოგზავნეთ.

7 მაისს 1898 წელს ნოვგოროდის ეანდარმერიიდან თბილისის ეანდარმერია ლებულობს შემდეგი შინაარსის შიფრთან ტელეგრამას: „პეშკოვი გაჩხრიკილია და დაპატიმრებული. დღეს რკინის გზით ვაგზავნი თბილისს. პოლკოვნიკი ევეციკი“.

თორმეტ მაისს გორკი ჩამოიყვანეს თბილისში და მოათავსეს მეტეხში.

ეს გახლდათ გორკის მეორედ ჩამოსვლა თბილისში.

რამ გამოიწვია გორკის დაპატიმრება?

ჩვენ უკვე მოვიხსენიეთ, რომ კვირაცხოვლის ქუჩაზე სამთა კომუნის ერთი წევრი იყო ახალგაზრდა აფანასიევი.

კომუნის დაშლის შემდეგ ის მსახურობდა მექანიკოსად თბილისში, ნეილინგერის საკერავი მანქანების მაღაზიაში.

როდესაც თბილისის პროლეტარიატში სარევიოლუციო მუშაობა გაჩაღდა, აფანასიევი გატაცებით ჩაება ამ მუშაობაში.

აფანასიევი დაასმინა ერთმა მისმა თანამოსამსახურემ, გაჩხრიკეს, დააპატიმრეს, შეჭმნეს დიდი პოლიტიკური საქმე, ვითომ აღმოაჩინეს კრამოლა და დიდი შეთქმულება, გამოარკვიეს, რომ აფანასიევი და პეშკოვი ერთად ცხოვრობდნენ თბილისში და აი ეს იყო საბაზი გორკის დაპატიმრებისა.

ეანდარმებს კოვზი ნაცარში ჩაუვარდათ: გორკის ვერაფერი დაუმტკიცეს; ამავე დროს, გორკის გულისათვის მთელმა მოწინავე რუსეთმა გამოიღო თავი და იძულებული გახდნენ. მალე გაენთავისუფლებიათ.

მესამედ გორკი ესტუმრა თბილისს 1901 წელს ზაფხულზე. მასთან ჩამოჰყვნენ ჩეხოვი და მხატვარი ვასნეცოვი. რომელსაც აინტერესებდა მცხეთის ტაძრის ფრესკები.

მეოთხედ ჩამოვიდა გორკი თბილისში 1903 წელს. ყოველივე ეს



ცხადად ამტკიცებს, რომ გორკის გული უნაზესი სიბეებით არის შე-  
კავშირებული თბილისთან.

გორკის ჰიბლავედა საქართველოს ბუნება, სამხედრო გზა, მაგ-  
რამ მას უფრო იზიდავდა აქეთკენ დედამშვილური სიყვარული:

საქართველოს ძველისძველმა, მაგრამ მუდამ ახალგაზრდა დე-  
დაქალაქმა მიიღო ალექსი პეშკოვი და წარმოშვა მაქსიმ გორკი.

## მაქსიმ გორკის შემოქმედება

ყოველი მწერალი თავის შემოქმედებაში გამოჰხატავს საკუთარ  
აზრს, საკუთარ შეხედულებას, საკუთარ მისწრაფებასა და მრწამსს.

ყოველივე ეს თანდაყოლილი აქვს მას დაბადებიდან, თუ არა?

თანდაყოლილი აზრი და მისწრაფებანი არ არსებობენ. ბავშვის  
ტვინი არის თეთრი ქალაღი, რომელზედაც ცხოვრება სწერს ყო-  
ველივეს, რაც ბავშვის ტვინში შთაბეჭდილების სახით შეიჭრება. ამ  
შთაბეჭდილებათა შეერთება და სხვადასხვანაირი გადაჯგუფება წარ-  
მოადგენს შინაარსს ჩვენი გონებრივი ცხოვრებისას.

ნიჭი არის თვისება ტვინის და მას შეუძლია მარტო ათვისება და  
გარდაქმნა იმისი, რასაც გარეშე ცხოვრება უგზავნის ტვინს შთაბეჭ-  
დილებათა სახით.

ამიტომ თუ გვინდა ავხსნათ მწერლის შემოქმედება, უნდა ვი-  
ცოდეთ ის წრე, ის არე, რომელშიც იზრდება, ვითარდება და ტრი-  
ალებს მწერალი.

საზოგადოებრივი წყობილება მასალებია მწერლის შემოქმედე-  
ზისა; ყოველი საზოგადოებრივი წყობილება განსაზღვრულ ხანაში  
დაფუძნებულია შესაფერ ეკონომიურ საფუძველზე. ეკონომიურ სა-  
ფუძველს კი წარმოების ესა თუ ის სახე შეადგენს.

როგორც არის წარმოება, ისეთია საზოგადოებრივი წყობილე-  
ბაც. მონურ წარმოებას შეეფერება ძველი, ანტიური საზოგადოებ-  
რივი წყობილება; ბატონყმურს — ფეოდალური; კაპიტალის-  
ტურს — ბურჟუაზიული; კოლექტიურს — სოციალისტური.

ამიტომ ყოველი მწერლის შემოქმედებას მჭიდრო კავშირი აქვს  
ეკონომიურ პირობებთან — წარმოების ხასიათთან. როდესაც საზო-  
გადოება დაყოფილია სხვადასხვა მობირდაბირე კლასებად და წოდე-  
ბებად, ყოველ კლასს, აგრეთვე ყოველ წოდებას ჰყავს თავისი საკუ-  
თარი მწერალი.

რატომ?

მწერალი იზრდება ამა თუ იმ კლასის წრეში, მისი გონება, აზ-

როვნება, ნიჭი იშლება ყალიბდება ამ კლასის ზეგაყლენით, ამიტომაც მისი შემოქმედება ატარებს დაღს კლასობრივი ზეგავლენისას.

ნათქვამიდან ერთადერთი დასკვნაა: ყოველი მწერლის შემოქმედება, ყოველი ხელოვნება კლასობრივია.

ამ დებულების საუცხოო გაშუქებას იძლევა მაქსიმ გორკი. გორკი გამოვიდა დაბალი წრიდან, დაიბადა და აღიზარდა ღარიბ ოჯახში. თუმცა ბაბუამისი შეძლებული ვაჭარი იყო, მაგრამ მალე გაკოტრდა და გორკი მუდამ სიღარიბეში იზრდებოდა.

ის იყო ხელზე მოსამსახურე, პურის მცხოველი, შეშის მხერბავი, ბარგის გადამშიდველი, მზარეულის შეგირდი, მუშა; ტრიალებდა ბოსიაკებში, გლეხებში, მუშებში.

რა გავლენას მოახდენდა ასეთი წრე მწერლის შემოქმედებაზე? მას უნდა დაეგმო ის წყობილება, რომელიც იძლევა ბოსიაკებს, სულსა ჰხუთავს მუშებსა და გლეხებს, და ამოდგომოდა გვერდში ამ უკანასკნელებს, გაეღო მათთვის კარი მათი საკუთარი მომავლისა და შეეყვარებია მათთვის ბრძოლა ამ მომავლის მოსაპოვებლად.

და მართლაც მთელი შემოქმედება გორკისა განა ასეთი არ არის?

ჩვენ აქ ვუშხერთ სასტიკ იერიშს საზოგადოებრივი წყობილების წინააღმდეგ. ჩვენ აქ გვხიბლავს და გვატკობხ ალფროთოვანებულ სიმღერა ბრძოლისა ამ წყობილების დასამხობლად.

იბადება საკითხი და ეს საკითხი წამოიჭრება გორკის წინაშე: ვინ, ვინ უნდა დაამხოს ეს წყობილება, ვის შეუძლია ეს? პასუხი უნდა გასცეს თვითონ ცხოვრებამ. და აი გორკიც ამიტომ გადაგვიშლის თვალწინ თანამედროვე რუსეთს მთელი მისი ყოფა-ცხოვრებით. თქვენ აქ ხედავთ ვაჭრულ ურთიერთობას, მეშჩანურს, კაპიტალისტურს; აი პერსონაჟები ბოსიაკებიდან, ვაჭრებიდან, კაპიტალისტებიდან, ინტელიგენციიდან, გლეხებიდან, მუშებიდან. დაუკვირდით კარგად ყველას და მერე თქვით: ვის შეუძლია ძველი პოლიციური რუსეთის დანგრევა და ახლის აშენება? სად არის ეს ყოვლისშემძლე ახალი ძალა?

მხოლოდ მუშები და გლეხები, მხოლოდ მუშებისა და გლეხების მჭიდრო კავშირი წარმოადგენს ამ დიად ახალ ძალას! — იტყვიოთ თქვენ გორკისთან ერთად. და ასეთი დასკვნა გამოჰყავს გორკის არა სიტყვიერი მსჯელობით, არამედ მხატვრული სახეებით. ამაში არის მისი შემოქმედების თავისებურება, ძალა და მნიშვნელობა.

მ. გორკიში პუბლიცისტი და ხელოვანი ერთიმეორეს ეჯიბრება.

ხელოვანი მასში ძლიერია, მტკიცე პუბლიცისტი კი ხშირად სუსტი, მერყევი, მაგრამ მისი საბოლოო განცხადება: „საბჭოთა წყობილება არის ერთადერთი წყობილება, რომლის გარეშე გლენების და მუშების კეთილდღეობა შეუძლებელია“, წარმოადგენს ლოდიკურ დასკვნას მისი შემოქმედებისას.

მ. გორკი მარტო მხატვრული სახეებით არ აშუქებდა პროლეტარიატის გზას, ის ჩაბმული იყო ყოველდღიურ პრაქტიკულ პარტიულ მუშაობაში, მუშაობდა ხშირად არალეგალურ ბოლშევიკურ პარტიაში ლენინის ხელმძღვანელობით და ამის გამო რამდენჯერმე იყო დაპატიმრებული მეფის მთავრობის მიერ. მსოფლიო ომის წინ მთელი წლები ცხოვრობდა იტალიაში კუნძულ კაპრიზე, რადგან სამშობლოში დაბრუნების უფლება არა ჰქონდა.

ყოველივე ეს საუკეთესოდ ამტკიცებს, რომ როგორც ყოველი მწერლის, ისე გორკის შემოქმედება არის ნაყოფი საზოგადოებრივი წყობილებისა.

თუ გორკიმ თავისი შემოქმედება და თავისი სახელი მჭიდროდ დაუკავშირა პროლეტარიატის ბედსა და მიზანს, თუ გორკი და პროლეტარიატი გადაჯაჭვული არიან, მიუხედავად გორკის ბევრი შეცდომისა, იმიტომ რომ ასეთი იყო დრო და საზოგადოებრივ-პოლიტიკური პირობები.

სხვა დროსა და სხვაგვარ პირობებში გორკის შემოქმედებაც სხვანაირი იქნებოდა.

გორკის ახასიათებს დაკვირვების ძლიერი ნიჭი, ყოველი საგნისა და მოვლენის მთავარი მხარეების სწრაფი ათვისება და გასაოცარი მეხსიერება. მას ფეხით შემოუვლია მთელი რუსეთი, ძალიან ბევრი რამ უნახავს და იმიტომ მისი შემოქმედება არის რუსეთის სინამდვილე, მწერლის ოცნებაში გარდაქმნილი.

მ. გორკის შემოქმედება, თემების მიხედვით, შეგვიძლია დავყოთ რამდენიმე ხანად. ყოველი ხანა შეეფერება განსაზღვრულ სახეს მისი თანამედროვე საზოგადოებრივი ურთიერთობისას.

მისი შემოქმედების პირველი ხანა არის ბოსიაკური;

მეორე ხანა — ვაკრული;

მესამე — წმინდა კაპიტალისტური ანუ ინდუსტრიული;

მეოთხე — ინტელიგენტური;

მეხუთე — პროლეტარული ან სოციალისტური.

გადავაგლოთ თვალი თვითეულ ხანას ცალ-ცალკე..

გორკის აქვს რამდენიმე ნაწარმოები, სადაც აწერილია მომავალი მწერლის ბავშვობისა და ყრმობის თავგადასავალი. ასეთი: „ბავშვობა“, „მოჯამაგირეობაში“ და „ჩემი უნივერსიტეტი“.

აქ საინტერესოა ის ურთიერთობა ადამიანთა შორის, რაც პატარა გორკის თვალწინ იშლებოდა.

ბაბუა არიგებდა: ჩვენი ერთადერთი მეგობარი უფალია, ადამიანი კი ადამიანის მოსისხლე მტერიაო.

ბავშვი უკვირდებოდა ყოველივეს და ყველგან ეს მტრობა ეჩხირებოდა თვალში — შინ, გარეთაც. ლოთობა, შეუგნებლობა, ლანძღვა, გინება, ცემა, შური, მტრობა, გაუტანლობა, შეუბრალებლობა, — აი რა იყო ყველგან გამეფებული. თვითონ პატარა გორკი ერთხელ ისე გალახეს ხის ნაპობებით, რომ საავადმყოფოში წაიყვანეს და იქ ექიმმა ოცდათექვსმეტი ხიწვი ამოაცალა ზურგიდან.

„არ არის არც ერთი მამაძალდი. რომ შეგიბრალოს“, — ეუბნება მას ერთი მომქმედი პირი.

რა ახასიათებს ადამიანს ყრმა გორკის წარმოდგენაში? სიყვარული, სიბრალული, თანაგრძნობა. ამას კი ის ვერსად ჰხედავდა. ერთი სრულებით უცხო, გარეული, ვიგინდარა იყო მეორისათვის.

ამავე დროს უფროსის წინაშე ყველა თავჩაქინდრული იყო, სამარცხვინოდ წყნარი და მოთმინებით ამტანი ყოველგვარი შეურაცყოფისა.

აიღეთ გორკის მოთხრობა „ღოსტები“.

ყური დაუგდეთ დიალოგს მსასოებელსა და იცეკვეფხოს შორის. (თარგ. გიუნაშვილისა, 1902 წ.).

„— შე ხომ მეცოდება?

— ვინ? რა?

— ვინ! კაცი!

— კაცი? — გააგრძელა იცეკვეფხომ: — აჰა, დაიჭია, უსუნეთ და გადააგდეთ! ეჰ, შე კეთილო სულო, ფრჩხილის ოდენა ჭკუა არა გაქვს! მერე რა არის შენი ადამიანი? გესმის შენ ეგა? ის აი წაგავლებს ხელს საყულოში და... რწყილივით ფრჩხილით გაგსრესავს! იმდროს შენ ის შეიციოდე. ხო! მაშინ შენ მას შენი სისულელე გამოუაშკარავე... ის შენი სიბრალულის სამაგიეროდ... შეიდგვარ ტანჯვას მოგაყენებს... შენს წელეებს ყველას ხელეებზე დაიხვევს... თითო გოჯს თითო საათობით დაგაძრობს ძარღვებს... ეჰ, შე... სიბრალული! შენ ღმერთს ევედრე, რომ სრულიად შეუბრალებლოე მიგბეგვონ და მორჩა! ეჰ, შენ! შე წვიმით დასასველებლო! ჰმ, სიბრალული... თფუ!“

ეს ამონაწერი დასურათებაა მხოლოდ იმისი, რასაც გორკი ცხოვრებაში ჰხედავდა.

ბავშვობიდან მომწიფებამდე ერთი და იგივე: ადამიანი ადამიანის მოსისხლე მტერი.

წამოიზარდა, დაჰვმო ასეთი ცხოვრება, ასეთი ურთიერთობა, ამგვარი ადამიანი და თავის ოცნებაში გამოჰყვეთა სრულებით სხვა სახე ადამიანისა.

როგორია ის?

ყური დავუგდოთ გორკის „ადამიანს“:

„სიტყვა „ადამიანის“ გაგონებაზე ჩემს გულში თითქოს მზე ინთება. მე ვხედავ იმის ამაყ სახეს, იმის ღრმა, მშვიდ თვალებს. სამყაროს უდაბნოში გადაკარგული მამაცურად მოძრაობს ის წინ და ზევით ცისკენ მიმავალ გზაზე, მიწისა და ცის ყველა საიდუმლოებათა მადლა, მიღის თავისი ნანატრი მიზნისაკენ უთვალავ დაბრკოლებათა შორის და ამაყად ამბობს:

— მე ვარ შექმნილი იმისათვის, რომ დავანგრიო ყოველივე ძველი, წვრილმანი და ბორბოტი, და შევქმნა ახალი, იფონებით გამოჰქედნილი თავისუფლების, სილამაზის და ადამიანისადმი პატივისცემის ურყველ საფუძვლებზე“.

აქ მოცემულია იშვიათი სურათი ახალი ადამიანისა, რომელიც ანგრევს ყოველივე ძველს და ჰქმნის სრულებით ახალს ცხოვრებას.

აი ასეთი სურათით შეიქრა ახალგაზრდა გორკი ცხოვრებაში და რა იხილა მან?

ამის პასუხს მოგვცემს „მკითხველი“ (თარგმ. გიუნაშვილისა): „ცხოვრებას თავს დასტრიალებს სიღამპლის სუნი; შიში, მონობა ასაზრდოებს გულთა, ზარმაცობას რბილი ბორკილებით შეუკრავს ჰკუა და ხელები. რა შეგაქვთ თქვენ ამ საძაგლობის ქაოსში? რა დაკნინებულნი ხართ ყველანი, რა საბრალონი ხართ, რა ბევრნი ხართ!“

გორკის წინ გადაიშალა საზოგადოებრივი ცხოვრება, საესე ცოცხალი მკვდრებით.

ეს იყო თვითმპყრობელობის საშინელი რეაქცია.

სამრეწველო კაპიტალი არ იყო ჯერ განვითარებული, ამიტომ პროლეტარიატიც არა ყოფილა ბრძოლის ასპარეზზე გამოსული: უპროლეტარიატოდ კი რა რევოლუცია მოხერხდებოდა რუსეთში! რევოლუციურად განწყობილი ინტელიგენცია თავს იყრიდა „ნაროდნაია ვოლია“-ში, რომელიც მეფის ჯალათებმა გასრისეს.

დარჩენილი ინტელიგენცია იმ დასკვნამდე მივიდა, თვითმპყრობელობა უძლეველიაო, და ყველა გაინაბა, ყველა წიშმა მოიცვა. მოიხარა ყველამ ქედი, შემოიფარგლა პირადი ინტერესებით და ამგვარად გაჩნდნენ გორკის ცოცხალი მკედრები.

საჭირო იყო ერთი მხრივ მკაცრი, სასტიკი მხილება, მეორე მხრივ — იმედის გაღვივება და ბრძოლის ცეცხლის დანთება.

ამ დიად მიზანს ემსახურება გორკის მწერლობის ბოსიაკური ხანა.

ბატონყმობის გადავარდნას შემდეგ გლეხობის დიდი ნაწილს უმიწაწყლოდ დარჩა. მიწა იყო თავადების, მემამულეების ხელში და ამ მიწით ისე სარგებლობდნენ, როგორც მოეპრიანებოდათ.

სოფელში შეიჭრა ვაჭრული კაპიტალი, გაჩნდა ჩარჩი, მევახშე, კულაკი, გალატაკებულ გლეხს გამოსწოვეს უკანასკნელი სისხლი და გააგდეს შარაგზაზე.

მრეწველობა ჯერ განუვითარებელი იყო და იმანაც დაიწყო ხეტიალი ლუქმა პურის საშოვნელად ერთი ქალაქიდან მეორეში.

აი ამგვარ პირობებში წარმოიშვა ბოსიაკობა.

ერთი მხრივ მემამულეების ბატონობა და ვაჭრულ-ჩარჩული კაპიტალი, მეორე მხრივ სამრეწველო კაპიტალის განუვითარებლობა, — აი ნიადაგი ბოსიაკებისა.

გორკიმ ისარგებლა საზოგადოების მიღმა მდგარი ბოსიაკებით, რომელთა ცხოვრებასაც ძალიან კარგად იცნობდა და გამოიყენა ისინი თავისი პროტესტისა და ბრძოლის უკვდავი სიმღერისათვის. „სირცხვილი თქვენ! გაიღვიძეთ! იგემეთ სიტკბოება ბრძოლისა! ბრძოლა სრულ გამარჯვებამდე! მაჰაცთა სიგიჟეს ვუმღეროთ დიდება!“

ამგვარი, ჯერ არავისაგან თქმული და არავისაგან გაგონილი, სიტყვები ყუმიბარასავით გასკდნენ საზოგადოებაში და იწყო გაფურჩქვნა იმედმა.

გორკიმ მხოლოდ ამ მიზნით მიმართა ბოსიაკებს, ეს იყო ერთგვარი მხატვრული ხერხი, თორემ მწერალს აზრადაც არ მოსვლია ბოსიაკები დაესახა ახალ ადამიანებად, ან მათზე დაემყარებია ცხოვრების განახლების იმედები.

ერთია მართალი: გორკის ბოსიაკები არ არიან ისეთები, როგორც თვით ცხოვრებაში იყვნენ. გორკიმ ისინი საკმაოდ შეალამაზა და ამიტომ მწერლის შემოქმედების ამ ხანას ატყუია რომანტიზმის ძლიერი დალი. პროლეტარიატის მწერლისათვის კი რომანტიზმი მოლიპული გზა არის.

გორკის მოღვაწეობის პირველმა ხანამ მძლავრად შეარხია საზოგადოებრივი ცხოვრება; მან გაიმარჯვა და მოიპოვა მეტად დიდი პოპულარობა.

ამის შემდეგ მწერლის წინაშე წამოიჭრა შემდეგი საკითხი: ვის, საზოგადოების რომელ ნაწილს შეუძლია ყოველივე ძველის დანგრევა და ახლის აგება თავისუფლებისა და სიყვარულის შეუწყველ საფუძველზე?

ამ საკითხის გადაჭრა მხატვრულ ქარგაზე მეტისმეტად ძნელი იყო და ეს ძნელი საქმე იშვიათი ოსტატობით შეასრულა გორკიმ.

მაშინდელ რუსეთში საკმაოდ მძლავრი და გავლენიანი იყო ვაჭართა კლასი. შესაძლებელია, ეს კლასი იყო მოწოდებული რუსეთის ცხოვრების განსაახლებლად?

— აი ვაჭართა კლასი და მისი ყოფა-ცხოვრება! ინებეთ, დაუკვირდით! — მიმართა გორკიმ მკათხველ საზოგადოებას და გადაუშალა „თომა გორდეევი“, „სამნი“, „ქალაქი ოკუროვი“, „მათე კოემაკინი“.

თქვენს წინაშე გამოჭიმული არიან რუსეთის სახელოვანი ვაჭრების წარმომადგენლები. ისინი ფუსფუსებენ, საქმეს აკეთებენ. ოცნებობენ, მაგრამ რა უძევს მათს საქმეს საჩხულად?

მხოლოდ პირადი ბედნიერება, გამდიდრება.

აი ამ გამდიდრების გულისათვის ისინი მზად არიან ერთიმეორეს კისერი მოსტეხონ, ყელი გამოსჭრან, დაკლუპონ და მოიშორონ გზიდან.

ვაჭარი მაიაკინი თომა გორდეევს არიგებს: „როდესაც ადამიანთან მიდიხარ, მარცხენა ხელში თაფლი გეჭიროს, მარჯვენაში დანა“.

„ვაჭარი, აი ვინა ჰქმნის ცხოვრებაში ყველაფერს!“ — ასეთია ბევრი მათგანის შეხედულება. მათ უნდათ ცხოვრებაში სრული გაბატონება, ამისათვის კი საჭიროა უფლება, და ამ უფლებას მოითხოვენ ხმამაღლა.

მერე რისთვის უნდათ ეს უფლება? ხალხის გასაბედნიერებლად? საერთო, საზოგადო კეთილდღეობისათვის?

არა, საკუთარი ჯიბის გასქელებისათვის.

თუ ამისათვის საჭირო შეიქნა სხვების დაღუპვა, უკან არ დაიხევნ.

როგორი ცხოვრება შექმნეს მათ?

ვაჭართა წვეულებაზე თომა გორდეევი, მათი სისხლი და ხორცი, მოთმინებლად გამოვა და მიახლის ყველას:

„არაშხადებო, ყაჩაღებო! თქვენ ცხოვრება კი არა, ციხე შექმენით. წესრიგი კი არ დაამყარეთ, ბორკილები გამოსქვდეთ ადამიანისათვის! სულის შემშუთავი სიციწროვეა, იღუპება ადამიანი!“

აი როგორ ახასიათებს ვაჭართა წოდების საუკეთესო წარმომადგენელი მათ მიერ დამყარებულ წყობილებას და ცხოვრებას.

გორკი წინ გვიშლის საუცხოო სურათებს ვაჭართა ყველა ფენებისას. აქ არიან წარმომადგენლები მსხვილი სავაჭრო კაპიტალია, საშუალოსი, წვრილისა.

სურათი ყველგან ერთი და იგივეა: ზრუნვა მხოლოდ საკუთარ კეთილდღეობაზე, უფერული, მოსაწყენი ცხოვრება, მოკლებული კეთილშობილებას და მალალ მისწრაფებებს.

მეშინაური იდეალი, — აი უმრავლესობის ოცნება.

როდესაც ეს იდეალი მიღწეულია, უმეტესი მათგან სრულ კმაყოფილებას განიცდის. საუკეთესო მათგანის ნამდვილი ტრადედია კი სწორედ აქ იწყება. ასეთები არიან სხვათაშორის თომა გორდეევი და ილია ლუნევი („სამნი“-დან).

გორდეევს არაფერი აკლია, ყველაფერი აქვს, გარდა შინაგანი კმაყოფილებისა და ბედნიერებისა. მისი გონება ასეთს ცხოვრებას ვერ შერიგებია. მისი გული უფრო მგრძნობიარეა, ფიჭრი უფრო მწველი. უკვირდება ცხოვრებაში განვლილ გზას და ჰხედავს, რომ ყოველივე ის, რაც მას შეუქმნია, ან სხვები ჰქმნიან მის გარშემო, სრული არააობაა, წვრალმანი.

აქედან მას შემდეგი დასკვნა გამოჰყავს: უსარგებლო, ზედმეტი ადამიანი ვარ, მეტი ბარგი, და ჩემი სიცოცხლე არავისათვის არის საჭირო და გამოსადეგიო.

ლუნეევმა მოსამსახურეობიდან დაიწყო, ჰკუთით, შრომით, ენერგიით თანდათან გაიმართა წელში, ცხოვრება შეიძინა და შეუერთდა ვაჭართა წრეს.

მან მიაღწია მიზანს, მოაწყო წყნარი, მშვიდი, სრულებით უზრუნველი ცხოვრება. მამ ახლა უნდა დაჯდეს და დატკბეს, იხაროს, იბედნიეროს.

სწორედ აქ იწყება მისი ტრადედიაც. გადაჰხედავს ცხოვრებას და რწმუნდება, რომ მისი არსებობა ფუჭია. უსარგებლო.

მას უნდა გაექცეს ასეთ ცხოვრებას, იცხოვროს სულ სხვანაირად, მაგრამ სად წავიდეს, რა გზას დაადგეს, ვერ გაურკვევია.

ამგვარი ფიჭრი ღრღნის მის არსებას და არ აძლევს მოსვენებას. აი ის სტუმრად არის; არიან სხვებიც — ვაჭრები, მოქალაქეები, ყველგან, ყველაფერში სიყალბე, სიფლიდე, უპინდისობა.



მოთმინების ფიალა აიჭება და ლუნევი გორდევევით მიმართავს სტუმრებს:

„ჩხეტქავთ, სვამთ, ატყუებთ ერთმანეთს... არავინ გიყვართ... რა გინდათ! მე ვეძებდი რიგიან ცხოვრებას, სუფთას... არსად არის! ისევ მე წავხდი... კარგ ადამიანს თქვენთან არ ეცხოვრება — დალპება. კარგ ადამიანებს თქვენ საფლავის კარამდე მიიყვანთ. აი მე — ავი ვარ, ღონიერი, თქვენ შორის კი ისე ვარ, როგორც სუსტი კატა ათას ვირთხათა შორის ბნელ სარდაფში. თქვენ ყველგანა ხართ... ასამართლებთ, ბჭობთ, კანონებს ამკვიდრებთ... საქაგლები კი ხართ!“

შემდეგ დასძენს: „აი რომ შემეძლოს, სულ მთლად ყველას მოგსპობთ!“

რას გვეუბნება ყოველივე ეს? ვაჭართა წოდება რუსეთში ძალიან დიდ როლს თამაშობდა, მაგრამ მის მიერ შექმნილი ყოფაცხოვრება ნამდვილი საპყრობილე იყო, რომელწავეც საუკეთესო მათგანსაც სული ეხუთებოდა.

მან შეასრულა თავისი ისტორიული მოწოდება და ახლა გადაგვარების გზაზე იყო დაქანებული. „თომა გორდევევი“ ვაჭარი შჩუროვი დაღონებული წარმოსთქვამს: „კვდება ვაჭარი“.

გორდევევისა და ლუნევის ტრალედია იმისი მაჩვენებელია, რომ ვაჭართა წოდება გამოიფიტა. აღარავითარი შემოქმედება მასში აღარ არის და ისტორიული განვითარების გზაზე მას წალეკავს სხვა, უფრო ღონიერი.

დასკვნა აშკარაა: ვაჭართა წოდებას ყოველივე ძველის მოსპობა და ახალი ცხოვრების დამყარება არ შეუძლია. ის თვითონ განწირულია და ისპობა.

### კავიტალიზტური ხანა

ოთხმოციანსა და ოთხმოცდაათიან წლებში რუსეთის ცხოვრება იყო ვაჭრულ-მეშჩანური.

სოფელში გაბატონებული იყვნენ მემამულე და მეევანშე. ორივე გლენხს სწოვდა სისხლს.

ქალაქი იყო ვაჭრის ხელში, ის ყველას აძრობდა ტყავს, ყოველივე ამას ზევიდან ედო პოლიციის ტორი და სათავეში წამოსკუბებული იყო თვითმპყრობელი.

ცხოვრება წარმოადგენდა ნამდვილ აშმორებულ ჭაობს, რომლის მყუდროებაც დაირღვა ოთხმოცდაათიანი წლებიდან.

რამ დაარღვია?

წამოიჭრა მსხვილი საწარმოო კაპიტალი და გაჩნდა პროლეტარიატი.

ამ გარემოებამ წარმოათქმევინა „თომა გორდევის“ შჩუროვს: კვდება ვაჭარიო.

ვაჭარი კი არ მომკვდარა, მაგრამ ცხოვრებაში უპირატესობა მას თანდათან წაართვა მსხვილმა ბურჟუაზიამ და საზოგადოებრივი ურთიერთობაც შეიცვალა:

გაჩაღდა მსხვილი წარმოება, გამრავლდა, გათვითცნობიერდა და დაიარაღმა პროლეტარიატი, გაჩნდნენ ფაბრიკები, ქარხნები, საწარმოო ცენტრები, გამოვიდა ასპარეზზე ლიბერალური ინტელიგენცია, გართულდა, გამოცოცხლდა მწერლობა, პრესა და სხვ. და სხვ.

ერთი სიტყვით ვაჭრულ-მეშხანური ყოფა-ცხოვრება შეიცვალა კაპიტალისტურით. ახალი ნაკადის შემოჭრა რუსეთის ცხოვრებაში გორკიმ აღნიშნა ჯერ კიდევ „თომა გორდევში“. ჩვენ აქ ვხედავთ ახალგაზრდა კაპიტალისტებს სმოლინსა და მაიაკინს, რომლებსაც ევროპა შემოუვლიათ და რუსეთის სინამდვილეში უნდათ დიდი მრეწველობის შემოტანა.

იქნება ეს მსხვილი ინდუსტრიული ბურჟუაზიაა სწორედ ის ძალა, რომლის ისტორიული მოწოდება რუსეთის ცხოვრების სრული გარდაქმნაა?

ასეთი კითხვა აღიმართა მართლაც საზოგადოების წინაშე. ამ კითხვის გადაჭრა გორკიმ იკიარა და ამ მიზნით შექმნა „არტამონოვების საქმე“ და „ბარბაროსები“.

„ბარბაროსებში“ გორკიმ მოგვცა ამერიკული ტიპის მსხვილი მწარმოებლები, რომლებიც ეტრფიან დიდ ქალაქს, ელექტრონს. მათ უნდათ დაამტკრიონ, მოსპონ ყოველივე ოკუროვის მსგავსი და შექმნან ახალი, დიდი, დიადი.

გარეგნულად მათ თითქოს მიაღწიეს მიზანს, ბევრი ტექნიკური ცვლილება და გაუმჯობესება შეიტანეს ცხოვრებაში, მაგრამ შინაარსი ამ ცხოვრებისა ისევ ძველი დარჩა; ვაჭრული ურთიერთობის ხე ინდუსტრიის რკინამ შესცვალა, ცხოვრებაში კი იგივე წვრილმანობა, სიცალიერე, უმიზნობა, ერთმანეთის გაუტანლობა, ექსპლოატაცია და შიშველი ეგოიზმი დარჩა.

„არტამონოვების საქმე“ არის მეტად გრძელი ისტორია ძველი და დიდი ვაჭრის ოჯახისა; მოქმედება გრძელდება ნახევარი საუკუნის მანძილზე და საუცხოოდ არის დასურათებული სამი თაობა ამ ოჯახისა. ოჯახი არის წარმომადგენელი მსხვილი ინდუსტრიული კაპიტალისა. ერთი თაობა ზრდის კაპიტალს და უტოვებს მეორეს,

მეორე — მესამეს, და აი მეორე თაობის ერთი წარმომადგენელი პეტრე არტამონოვი თანდათან რწმუნდება, რომ მთელი ამოდენა შრომა, საქმე ფუჟია, არარაობაა.

ასეთს განწყობილებაში მოუსწრებს მას რევოლუცია, რომელიც ყოველივეს ართმევს. პეტრე არტამონოვი ფიქრშია ჩაძირული, მისი ეზოს კაცი ტიხონი იქვე დგას და ეუბნება:

„სულელი ვარ, სიძარტლე კი ყველაზე უმალ შევიგნე. აი როგორ მოტრიალდა, ვამბობდი: ყველას კატორღა-მეთქი, აი ასრულდა... ასეა, პეტრე ილიას ძეგ, დიახ, ეშმაკი აშენებდა — შენ კი ეხმარებოდი. რასთვის? სკოლაველა — ანგარიში აქვს ცოდვებს!“

რასაც ტიხონი ეუბნება არტამონოვს, იმას თვითონ არტამონოვი ამბობდა ჩუმად, თავის გულში.

დასკვნა ერთადერთია: მსხვილი ბურჟუაზიის საქმიანობა ეშმაკის ნამოქმედარია, მუშა ხალხის ყვლეფაა. უკეთეს შემთხვევაში მას შეუძლია ტექნიკური გაუმჯობესების შეტანა წარმოებაში, ხოლო ცხოვრების შექმნა კი არა.

მამ სად არის ხანა და საშველი?

— ინტელიგენციაში! — მოესმა გორკის და აქედან იწყება მეოთხე ხანა მისი მოღვაწეობისა.

### ინტელიგენტური ხანა

მსხვილი ბურჟუაზიის ზრდასთან ერთად გაიზარდა ლიბერალური ინტელიგენცია. როდესაც პროლეტარიატი გამოვიდა პოლიტიკურ ასპარეზზე და თვითმპყრობელობის საფუძველმა რყევა დაიწყო, ლიბერალურმა ინტელიგენციამ ამაყად წამოაპყო თავი და წარმოიდგინა: მე ვარ, რაც ვარ, ჩემზეა ყოველივე დამოკიდებული.

ეს იყო პირველი რევოლუციის წინა წლებში. შეუძლია თუ არა ინტელიგენციას ახალი ცხოვრების დამყარება? აი ამ კითხვის გადასაჭრელად გორკი წერს რამდენიმე თხზულებას, რომელთა შორისაც განსაკუთრებული მნიშვნელობა აქვს პიესას: „მოაგარაკენი“.

ეს იყო 1904 წლის 11 დეკემბერს. პეტერბურგში კომისარჟევსკაიას თეატრში პირველად მიდიოდა გორკის პიესა „მოაგარაკენი“.

მთელი თეატრი გატენილი იყო ინტელიგენციის საუკეთესო წარმომადგენლებით. ჩამოეშვა თუ არა ფარდა პირველი მოქმედების შემდეგ, აატყდა დარბაზში საშინელი სტვენა: ინტელიგენცია უსტვენდა გორკის.

რა იყო, რა მოხდა?

„მოაგარაკენი“ წარმოადგენენ სასტიკ, შეუბრალებელ კრიტიკას არისტოკრატიული, ბურჟუაზიული და დემოკრატიული ინტელიგენციისას. ერთი ნაწილი ინტელიგენციისა თბილ ადგილებზეა მოკალათებული, გამძღარი და მეტს არაფერს დაეძებს; მეორე ნაწილი თითქოს რაღაცას აკეთებს, დაფუსფუსებს, მაგრამ ისე, სხვების დასახსავად: შემომხედეთ, რა ბიჭი ვართ; მესამე ნაწილი არაფერს აკეთებს, მხოლოდ ლაპარაკობს და ლაპარაკობს.

მთელ ინტელიგენციას პიესაში ახასიათებს ლექსში ერთი მოქმედი პირი:

პატარა, მოსაწყენი ადამიანები  
დადიან ჩემი მამულის მიწაზე,  
დადიან და დაღვრემილი დაეძებენ ადგილს,  
სადაც შეეძლებათ ცხოვრებას დაემალონ.

ყველას უნდა იაფი ბედნიერება,  
მამღრობა, სიხალვათე და სიჩუბე.  
დადიან და ყველა ჩივის, კენესის, —  
უფერული მხდალები და ცრუები.

პატარა ნაქურდალი აზრები...  
ლაშაზი, ახალმოდის სიტყვები...  
დალოდავენ ნელა ცხოვრების ნაპირზე  
ჩრდილივით დაბურული კაცუნები.

გორკი ზურგს შეაქცევს ლიბერალურ-ბურჟუაზიულსა და არისტოკრატიულ ინტელიგენციას. ის მიმართავს იმ ინტელიგენციას, რომელიც დაბალი ხალხის წრიდან გამოვიდა. რას უნდა აკეთებდეს ეს ინტელიგენცია? წინ უნდა მიუძღოდეს მშრომელ ხალხს და გზას უჩვენებდეს უკეთესი მომავლისაკენ, ამის ნაცვლად კი ის მოსწყვეტია თავის მშრომელ ხალხს და ნელა დალოდავს ცხოვრების ნაპირზე.

ასეთი ინტელიგენცია ახალ ცხოვრებას ვერ დააწყარებს.

მაშ 'აღ არის ხსნა? — ეკითხება გორკი თავის თავს.

— ჩვენში! — ესმის ძლიერი გუგუნის პროლეტარიატის რიგებიდან.

აქედან იწყება შემდეგი და უკანასკნელი ხანა გორკის შემოქმედებისა.

#### პროლეტარული ხანა

ოთხმოცდაათიანი წლებიდან რუსეთში იწყება ზრდა საწარმოო კაპიტალისა და ამას მოჰყვა პროლეტარიატის ზრდა. გაჩაღდა პარ-

ტიული მუშაობა, პროლეტარიატი დაირაზმა სოციალ-დემოკრატიული პარტიის რიგებში და დაიწყო ნელ-ნელა პოლიტიკური ბრძოლის იერიშები — ჭერ ნელი და სუსტი, მერე თანდათან ძლიერი და მედგარი.

გორკი შედის სოციალ-დემოკრატიულ პარტიაში, უკვირდება მუშების ერთობას, მოძრაობას, განწყობილებას და სწერს პიესას „მტრები“, რომანს — „დედა“, მოთხრობებს — „ზაფხული“ და „ალსარება“.

გორკის წინანდელ ნაწერებში შეხვდებით პროლეტარიატის წარმომადგენლებს, მაგრამ მათ ახასიათებთ გაუბედაობა და მორჩილება.

ეს აიხსნება პროლეტარიატის შეუგნებლობით, როდესაც მას თავისი კლასობრივი გზა და მოწოდება ჭერ არა ჰქონდა გათვალისწინებული და გაპონებისა და ზუბატოვებისა სჯეროდა.

გაიზარდა პროლეტარიატი, გაიზარდა და ჩამოყალიბდა მისი შეგნება და ყოველივე ამან ჰპოვა საუცხოო მხატვრული განსახიერება გორკის იმ ნაწერებში, რომლებიც პროლეტარულ ხანას ეკუთვნის.

ჯერ კიდევ პიესაში „Меишаге“ გორკის გამოყვანილი ჰყავს მუშა ნილი, რომელიც ჰხედავს, რომ ცხოვრება არ არის მოწყობილი, ქურდები და ღორები მბრძანებლობენ და სხვ. ცხოვრებას გარდაქმნა უნდა და ეს მეტად ძნელი საქმეა, კარგად იცის ნილმა, მაგრამ არაფერია, ჩვენი გაიტანსო, ამბობს ის.

როგორ გაიტანს, რანაირად, მას არა აქვს კარგად და ნათლად წარმოდგენილი.

„მტრების“ გმირებს კი ყოველივე ეს კარგად აქვთ გამორკვეული. აქ უკვე დაპირისპირებულია ორი ძალა: ბურჟუაზია და პროლეტარიატი. თუ ბურჟუაზიული ყოფა-ცხოვრების აღწერაში ყველგან ვხედავთ პირად საქმიანობას, პირად „მე“-ს, ყველაფერში მხოლოდ პიროვნულს, — პროლეტარიატის დასურათებაში ყოველივე ეს ჰქრება და ჩვენს წინაშე პიროვნულის, ინდივიდუალურის ნაცვლად წამოჭრილია საზოგადო, კოლექტიური.

გორკის შემოქმედების მეორე და მესამე ხანაში, სადაც ვაჭრული და ინდუსტრიული ურთიერთობაა განსახიერებული, თვითეულ მოქმედ პირს ამოძრავებს პირადი ინტერესი; ამის გარეშე მისთვის არაფერი არსებობს. „ქალაქ ოკუროვში“ ერთი ეუბნება მეორეს: წყალდიდობა მოგველის, მდინარეებს ნაპირები გადმოუხეთქიანო, მეორე გულდამშვიდებით უპასუხებს: მე მალლობზე ვდგევარ. წყალი ჩემამდე ვერ მოატანსო. სხვები რომ დაბლა დგანან და შესაძ-

ლებელია, წყალმა წალეკოს და გაანადგუროს ისინი, ეს ფეხებზე: ჰკიდია მას.

სულ სხვა სურათია „მტრებში“. აქ მთავარი მამოძრავებელი ძალა არის საზოგადო, საერთო. ყოველივე პირადი, კერძო, თვით სიცოცხლეც კი საზოგადო კეთილდღეობას ეწირება მსხვერპლად.

გორკის შემოქმედების გაქრულ-კაპიტალისტურ ხანაში ფულია ყველას ოცნება. თვითეული მიისწრაფვის გამდიდრებისაკენ. ოცნებობს გამდიდრებაზე და ამ მიზნის მისაღწევად არაფერს ერიდება.

აი მიზანი უკვე მიღწეულია, მაგრამ სწორედ ამ დროს სინიღისი ამხილებს: არა გრცხვენია? განა ღირდა ამისათვის ცხოვრება და ამდენი სისაძაგლის ჩადენაო.

აქედან იბადება გულგატეხილობა, სასოწარკვეთილება და შინაგანი ტრადედია.

გორკის მოღვაწეობის სოციალისტურ ხანაში კი ვერაფერს ამის მსგავსს ვერა ნახავთ: საერთო საქმის სიყვარულს, იმედსა და გამარჯვების სრულ რწმენას ერთად შეუდღულებია ყველა — ეს „ყველა“ ისე მოქმედებს, როგორც ერთი ადამიანი.

ვინ არიან მაიაკინი, გორდევი, ლუნევი, არტამონოვი?

წარმომადგენლები კლასისა, რომელიც უკვე დაღუპვისაკენ მიეჭანება.

სოციალისტური შემოქმედების ხანაში კი თქვენს წინაშე ამართულია ახალი კლასი, რომელიც რკანის ნებით, გაკაჟებული გულითა და მტკიცე გადაწყვეტილებით მიისწრაფის წინ, ახალი ცხოვრებისაკენ.

აიღეთ ასეთი მაგალითი. აუცილებელია კაპიტალისტი სკრობოტოვის თავიდან მოცილება და მუშები მას ჰკლავენ. მთავრობამ რომ ამის გამო მუშების ორგანიზაცია გაანადგუროს და საუკეთესო მუშები დაღუპოს, ამით საერთო პროლეტარული საქმე ძალიან დაზიანდება. ახალგაზრდა მუშა რიაცოვი გამოვა და მკვლელობას თავის თავზე იღებს: მე ერთი ვარ, ისევ მე დავიღუპოო.

განა ამის მსგავსი რამ შესაძლებელია მაიაკინებისა და არტამონოვების სამფლობელოში? ის ახალი, ამაყი და შეუპოვარი ადამიანი, რომელიც ყოველგვარ დაბრკოლებას ანადგურებს, რათა აავსოს ახალი ცხოვრება თავისუფლების, სიყვარულისა და სოლიდარობის საფუძვლებზე, გორკიმ პროლეტარიატის რიგებში აღმოაჩინა.

სოციალისტური ხანის ნაწერებში გორკის გამოყვანილი ჰყავს. ზოგან ისეთი მუშები, რომლებიც გარდამავალ ტიპს წარმოადგენენ. მათში შემოჭრილია ახალი აზროვნება, ახალი შეხედულებანი, ახალი

ვაგება და შეფუძება მოვლენათა; მაგრამ ყოველივე ამასთან ერთად დარჩენილია ზოგი რამ ძველიც, ზოგიერთს კარგად ვერ გაურკვევია კავშირი ეკონომიურსა და პოლიტიკურ ბრძოლას შორის. რომანში „დედა“ ჩვენს წინაშე უკვე უფრო მოწინავე მუშები არიან. მათ ძალიან კარგად იციან, რომ პოლიტიკა და ეკონომიკა მკიდროდ არიან ერთმანეთთან დაკავშირებული და პოლიტიკის გარეშე ეკონომიური მიზნების განხორციელება შეუძლებელია. აი მუშები ნახოდ-კა, რიბინი, ვლასოვი, რომლებიც ფარული ორგანიზაციის წევრები არიან და პოლიტიკური ბრძოლისათვის ემზადებიან. „დედა“ საუცხოო დასურათებაა პროლეტარიატის დიდი ოჯახისა და მისი ზრახვებისა, მისი ყოფა-ცხოვრებისა.

„დედა“ არის ერთგვარი დაპირისპირება „ქალაქ ოკუროვისა“. იქ — ბურჟუაზია და მისი ყოფა-ცხოვრება, აქ — პროლეტარიატი და მისი ყოფა-ცხოვრება. იქ — ცხოვრება ფუჭი, უშინაარსო, უფერული.

რატომ?

იმიტომ რომ ადამიანი ადამიანისათვის მგელია და ყველა თავის საკუთარ თავზე ჰფიქრობს.

აქ კი ცხოვრება წარმტაცი, მდიდარი შინაარსით, გატაცებით, მისწრაფებით.

რატომ?

იმიტომ რომ მუშები საერთო ნებით მიისწრაფვიან ახალი ცხოვრებისაკენ და მათ არ აშინებთ არავითარი დაბრკოლება, არავითარი საფრთხე, არავითარი მსხვერპლი. „ზაფხულში“ მაქსიმ გორკის დასურათებული აქვს ახალი სოფელი, რომელიც ძველს აღარა ჰგავს. წინანდელ სოფელში სუფევდა უგუნურება, შეუგნებლობა. დაბეჩავება, მორჩილება, ლოთობა, ჩხუბი, გაუტანლობა.

სულ სხვა არის ახალი სოფელი: ხალხი შეგნებულია, გათვითცნობიერებული.

აიღეთ გლეხი ეგორ დოსეკინი. ძველ სოფელთან მას ყოველგვარი კავშირი აქვს გაწყვეტილი და თავისი განწყობილებით, ზრახვებით, მისწრაფებით მოწინავე მუშებს უახლოვდება.

დოსეკინი ერთგვარი კავშირია მოწინავე გლეხებსა და მუშებს შორის.

საუცხოო სურათია მოცემული სოფლის მდიდრებისა, რომლებსაც სოფლის გამოფხიზლება მოსვენებას უკარგავს.

სოფელი ერთგვროვანი და ერთაზროვანი აღარ არის, სოფელი ირღვევა, იშლება: მდიდრები ცალკე ჯგუფდებიან, ღარიბები ცალ-

კე. ღარიბს მიწა უნდა, მაგრამ ის უკვე გრძნობს, რომ „უბუნტოდ“ ამ მიწას ვერ მიიღებს.

როდესაც წაიკითხავთ მოთხრობას, თქვენთვის აშკარა ხდება შემდეგი:

სოფელი მზად არის ამ „ბუნტისათვის“, ე. ი. პოლიტიკური ბრძოლისათვის, მაგრამ მას უნდა მეთაური. სოფელში დაგროვილია ცეცხლი, ანაფეთქებელი მასალა. მაგრამ დამოუკიდებლად არაფერი შეუძლიათ. საჭიროა მეთაური, რომელიც ამ მასალას შესაფერისად გამოიყენებს.

ვის შეუძლია ასეთი მეთაურობა? ამის პასუხს გვაძლევს „ალსარება“.

გლეხი მათე პატარაობიდან აღიზარდა სოფელში, ისწავლა წერა-კითხვა, კითხულობდა საეკლესიო წიგნებს. გაიძვეკვალა ძლიერი რწმენით და ამავე დროს ხედავდა, რომ ცხოვრებაში ყველა ბოროტია, ერთიმეორის მტერი, არ არის სიყვარული, დანდობა, გატანა.

ცოდვა და ბოროტება — აი რა არის გაჟეფებული ყველგან. მათე ახალგაზრდა დაქვრივდა და მწუხარებაში მყოფი გაუღდა გზას, რომ საღმე ენახა უკეთესი ცხოვრება, გაეგო აზრი ადამიანის არსებობისა. მიადგა მღვდელს, ანგარების მეტი ვერა ნახა რა.

მივიდა ბლალაჩინთან; პოლიციით დაემუქრა: შენ თავს დავაქვრივებო. შეხვდება მეძვე ქალს და ისევ იმის გულში ჰპოვებს ადამიანურ თანაგრძნობას.

შედის მონასტერში, რომ აქ იხილოს ცხოვრება სხვაანირი, ახალი. მონასტრის ყოფა-ცხოვრება გორკის მეტად ვრცელად აქვს აწერილი.

რას ჰხედავს მათე? მონასტერში იგივეა, რაც მონასტრის გარეთ: ლოთობა, გარყვნილება, გაუტანლობა, გინება, ფლიდობა, ფულის გაღმერთება. მონასტერი ვაჭრობს, გლეხებს ტყავს აძრობს. აქაც ყველაფერი ფულზეა აგებული.

დაანებებს მონასტერს თავს და ბევრი მოგზაურობის შემდეგ მიადგება ერთ ქარხანას. ეცნობა აქ მუშების საერთო ცხოვრებას, მათი ბავშვების აღზრდას და გული სიხარულით ევსება. აქ არის თანხმობა, თანაგრძნობა, სიყვარული, ერთობა.

საერთო საქმის დასაცავად ყველა ისე გამოდის, როგორც ერთი კაცი. ლაპარაკობს ყველა თავისას, სახეც სხვაანირი აქვთ, კამათობენ, ბევრჯერ იგინებიან კიდევ, მაგრამ „რწმენა ყველას ერთი აქვს, განზრახვაც ერთი, აუჩქარებლად, თანხმობით და გულმოდგინედ აშენებენ ისინი რაღაცას“.



ალტაცებული მათე აცხადებს: „მოვა დრო, ხალხის მთელი ნება ისევ თავს მოიყრის ერთ წერტილში“.

მაშინ დამყარდება ქვეყანაზე ახალი ცხოვრება.

მათემ იწამა ეს და პპოვა სრული შინაგანი ბედნიერება.

რისი თქმა უნდოდა ამ მოთხრობაში გორკის?

ახალი ცხოვრების შექმნა არის მოწოდება და საქმე მხოლოდ პროლეტარიატისა.

ვინ არის მათე?

რუსეთის გლეხობა.

გლეხობამ უნდა იწამოს პროლეტარიატის ძალა და მიზანი და მივიდეს მასთან, აი დედა აზრი „აღსარებისა“. გორკიმ თავის შემოქმედებაში ერთმანეთს დაუპირისპირა ორი ქვეყანა: ბურჟუაზიული და სოციალისტური.

ამისათვის მან მხატვრულ სახეებში გადაგვიშალა წინ მთელი თანამედროვე რუსეთის ყოფა-ცხოვრება. ის შეეხო ყველა წრეს, ყველა წოდებას, ყველა კლასს, გააშიშვლა ვაჭრულ-კაპიტალისტური ურთიერთობა და გამოააშკარავა მხატვრულ სახეებში მისი ბოროტება და სისაძაგლე. გაუტანლობა, მტრობა. სიძულვილი, გაყვლეფა, ექსპლოატაცია, უმრავლესობის უბედურებით მოპოვებული კმაყოფილება პატარა უმცირესობისა, — აი ბურჟუაზიული ყოფა-ცხოვრება.

სოციალისტურ წყობილებაში ყოველივე ეს გამქრალა — იქ გამეფებულა საერთო, კოლექტიური შრომა. თანხმობა, სოლიდარობა, ერთობა. სიყვარული და საერთო ნება ჰქმნიან ისეთს ცხოვრებას, რომელიც სავსეა თავისუფლებით, სილამაზითა და კეთილშობილებით.

ბურჟუაზიულ წყობილებაში ადამიანი უბედურია, სიბოროტით, მტრობით, სიძულვილით სავსე, მონა გროშისა. სოციალისტური წყობილება კი ჰქმნის ახალს, თავისუფალ ადამიანს, რომელიც ამაყად მიდის წინ საერთო ბედნიერებისაკენ.

ვინ შექმნის ასეთს ახალ ცხოვრებას?

პროლეტარიატი, რომელსაც გვერდში უნდა ამოუდგეს მთელი გლეხობა.

გორკის მოთხრობები და რომანები გვიმტკიცებენ, რომ მუშებში შეგნება თავისთავად კი არ მოდის, არამედ საჭირო არის ხელმძღვანელი, მეთაური, გზის მაჩვენებელი.

ვის შეუძლია მუშებისა და გლეხების მეთაურად ყოფნა?

ამის პასუხს გვაძლევს მ. გორკის პოლიტიკური მოღვაწეობა.

## პოლიტიკური მოღვაწეობა

მ. გორკი მარტო კალმით კი არ იბრძოდა, როგორც ხელოვანი, ბურჟუაზიული წყობილების დასამხობად და სოციალიზმის დასამყარებლად, ის სიტყვითაც და საქმითაც იყო დაუძინებელი მტერი თვითმპყრობელობისა და მტკიცე დარაჯი პროლეტარიატის კეთილდღეობისა.

მ. გორკიმ ერთის დაკვრით მოიპოვა დიდი სახელი და დიდი გავლენა.

მას შეეძლო დამკდარიყო და ფუფუნებაში ეცხოვრა. მაგრამ ასეთი არ არის ეს მოუხვენარი ადამიანი, რომლის გულშიაც პროლეტარული რისხვა ბობოქრობს და პროლეტარული ცეცხლი გიზგიზებს.

ის არა ერთხელ ჩავარდნილა ჟანდარმების ხელში, არა ერთხელ მკდარა ციხეში, მაგრამ იქიდან განთავისუფლებული უფრო მედგრად დასჯახებია თვითმპყრობელობის სიმაგრეებს. ეწეოდა ფარულ მუშაობას, წერდა პროკლამაციებს და საზღვარგარეთ გამოდიოდა საჯარო მოხსენებებით თვითმპყრობელობის წინააღმდეგ.

ბევრჯერ იჯდა ციხეში დიდი ხნით და 1906 წლიდან 1914 წლამდე იძულებულია საზღვარგარეთ იცხოვროს, რადგანაც რუსეთში დაბრუნება აკრძალული აქვს.

საზღვარგარეთ ის აარსებს (იტალიაში, კაპრის კუნძულზე) სკოლას რუსეთის ემიგრანტი მუშებრივად მცოდნე პროპაგანდისტების მოსამზადებლად და თვითონვე უკითხავს მათ ლექციებს.

ჯერ კიდევ 1901 წელს გორკი შედის ს.-დ. პარტიაში და 1907 წელს პარტიულ ყრილობაზე მიდის ლონდონში დელეგატად. როდესაც პარტია ორად გაიყო, მ. გორკი ბოლშევიკებთან გადავიდა და მუშაობდა ლენინის ხელმძღვანელობით.

ყოველივე ეს ნათლად ამტკიცებს, თუ ვის მხარეზე იყო და არის გორკი, ვის ანდობს ის რევოლუციისა და მშრომელი ხალხის ბედს. ტაქტიკურ საკითხებში გორკი ხშირად იყო მერყევი. ეს მერყეობა ემჩნეოდა წინათაც, როდესაც პირველი რევოლუციის დამარცხების შემდეგ ბოგდანოვისაკენ გადაიხარა.

მერყეობა გამოიჩინა მან ოქტომბრის რევოლუციის გამარჯვების დროსაც, მაგრამ ყოველივე ეს შეეხებოდა მხოლოდ და მხოლოდ ტაქტიკურ საკითხებს.

აი ერთი ადგილი გორკის წერილიდან, რომელიც „Накануне“-ში დასტამბა: „ხმებს ავრცელებენ, თითქოს მე შემეცვალოს ჩემი დამოკიდებულება საბჭოთა ხელისუფლებასთან. საჭიროდ მიმაჩნია

განვაცხადო შემდეგი: საბჭოთა ხელისუფლება ჩემთვის წარმოადგენს ერთადერთ ძალას, რომელსაც შეუძლია დასძლიოს რუსის ხალხის ინერცია და აღძრას მისი ენერჯია ცხოვრების უფრო სამართლიანი და უფრო გონიერი ფორმების შესაქმნელად“.

ამ ამონაწერს განმარტება აღარ ესაჭიროება.

გორკი მთელი თავისი დიდი შემოქმედებითი ნიჭით ანგრევს ძველს, ბურჟუაზიულ ყოფა-ცხოვრებასა და ურთიერთობას და მიისწრაფვის ახლისაკენ. საბჭოთა წყობილებასა და ხელისუფლებაში ის ჰხედავს ერთადერთ ძალას, რომელსაც შეუძლია მისი ოცნება სინამდვილედ აქციოს.

## ლენინი და გორკი

ლენინი და გორკი ბოლომდე გულითადი მეგობრები იყვნენ. ლენინი არა თუ პატივსა სცემდა დიდ მწერალს, მას უყვარდა გორკი. ასეთი გრძნობებით იყო გამსჭვალული გორკიც ლენინისადმი. რომელშიაც ის ჰხედავდა უდიდეს ადამიანს, უდიდეს რევოლუციონერსა და მსოფლიო პროლეტარიატის უდიდეს ბელადს.

ოქტომბრის რევოლუციის გორკის შეხედულებით მარტო რუსეთის ფარგლებით კი არ განისაზღვრება, იმას აქვს უდიდესი და უაღრესი მნიშვნელობა მთელი მსოფლიო პროლეტარიატისათვის.

საზღვარგარეთ ცხოვრების დროს ლენინი ხშირად ეწვეოდა ზოლმე გორკის და გეგმებს აწყობდნენ გაზეთის და საერთოდ პოლიტიკური მუშაობის შესახებ.

გორკის აზრსა და შეხედულებას განსაკუთრებით ხელოვნების საკითხებში ლენინი დიდად აფასებდა და წერილში ხშირად სწერდა: შემატყობინეთ, რა აზრისა ხართ, ან მოკლედ მაცნობეთ, ამას ნუ დაბეჭდავთ და სხვ.

თუ გორკის ნაწერებში რამე არ მოეწონებოდა ლენინს, დაუფარავად მიუთითებდა თავის წერილებში და გააშიშვლებდა იმის შეცდომებსა და ყალბ, არაპროლეტარულ გადახრებს.

ამგვარად ლენინი მარტო მეგობარი კი არ იყო გორკისა, არამედ მასწავლებელიც.

ლენინი სთვლიდა გორკის დიდ ავტორიტეტად, რომელსაც მოჰქონდა პროლეტარიატისათვის აუარებელი სარგებლობა.

„თავისი დიდი მხატვრული ნაწარმოებებით ამხანაგმა გორკიმ მეტად მკიდროდ დაუკავშირა თავისი თავი რუსეთისა და მთელ

მსოფლიოს მუშათა მოძრაობას“, — წერდა ლენინი ჯერ კიდევ 1909 წელს.

ლენინის წერილები გორკისადმი წარმოადგენს მთელ წიგნს, რომლიდანაც საინიმუშოდ მოვიყვან რაბღენიმეს.

#### ა. მ. გორკის

2. 11. 08. -

ძვირფასო ა. მ.!

გწერთ ორ საქმეზე.

ჯერ-1, სემაშკოს საქმეზე. თუ მას პირადად არ იცნობთ, არ ღირს ჩაერიოთ ქვემომოყვანილი გარემოების გამო. თუ იცნობთ, ღირს.

ლ. მარტოვმა ბერნის ს.-ღ. გაზეთში მოათაესა „განცხადება“, სადაც ამბობს, რომ სემაშკო შტუტგარტის კონგრესზე იყო არა როგორც დელეგატი, არამედ მხოლოდ როგორც ჟურნალისტი. ერთ სიტყვასაც არ ამბობს, რომ იგი ს.-ღ. პარტიას ეკუთვნის. ეს არის მენშევიკის საზიზღარი გამოხდომა ბოლშევიკის წინააღმდეგ, რომელიც საპყრობილეში მოხვდა. მე, როგორც რსდმ პარტიის წარმომადგენელმა საერთაშორისო ბიუროში, უკვე გავგზავნე ჩემი ოფიციალური განცხადება: თუ სემაშკოს პირადად იცნობთ ან ნიჟნა იცნობდით, აუცილებლად მისწერეთ ამავე გაზეთს, რომ აღმფოთებუღი ხართ მარტოვის განცხადებით, რომ თქვენ პირადად იცნობთ სემაშკოს, როგორც ს.-ღ.-ს, რომ თქვენ დარწმუნებუღი ხართ, რომ მას კავშირი არა აქვს იმ საქმეებთან, რომლებსაც აზვიადებს საერთაშორისო პოღიღია. ქვემოთ მომყავს გაზეთის მისამართი და სრული ტექსტი მარტოვის განცხადებისა, რომელსაც მ. თ. გითარგმნით. რედაქციას თქვენ თეითონვე მისწერეთ რუსულად, ხოლო მ. თ.-ს სთხოვეთ დაურთოს გერმანული თარგმანი.

მეორე საქმე. ჩვენ ახლა აქ თავი მოვიყარეთ სამივემ, რომლებიც რუსეთიღან ვართ გამოგზავნიღი „პროღეტარის“ დასაარსებლად (ბოღდანოვმა, მე და ერთმა „პრაქტიკოსმა“). ყვეღაღური მოგვარებუღია, ამ დღეებში გაღოვეღუშეღებთ ანონსს. თანამშრომღად გაყენებთ თქვენ. მოგვეწერეთ ორიღდღე სიტყვა, შეგიღღღიღათ თუ არა მოგვეღღიღთ რამე პირვეღი ნოღპრებისათვის (იქნება ეს ისეღთიღე რამ, როგორც შენიშვნები მეშჩანოვის შესახებ, „ნოვაია ჟიზნი“ რომ იყო მოთავსებუღი, თუ ნაწყვეტები მოთხრობიღან, რომელსაც წერთ, და სხვ.).

მაგრად გართმევეთ ხელს. დიღი მოკითხვა მ. თ.-ს!

თქვენი ვ. უღღიღანოვი

16. IV. 08.

ძვირფასო ალ. შ.]

დღეს მივიღე თქვენი წერილი და ვიჩქარი გიპასუხობთ. ჩემი წამოსვლა უსარგებლო და საზიანოა: იმ ადამიანებთან, რომლებმაც რელიგიასთან მეცნიერული სოციალიზმის შეერთების ქადაგება დაიწყეს, ლაპარაკი მე არ შემიძლია და არც ვილაპარაკებ. რვეულების დრომ განვლო. დავა არ შეიძლება, ნერვების ამოდ მოშლა ზისულელეა. პარტიული (ფრაქციული) საქმეებისაგან უნდა გავცალკევოთ ფილოსოფია: ამას გვავალებს ბც-ის გადაწყვეტილებაც.

მე უკვე გავგზავნე დასაბეჭდად ომის უაღრესად ფორმალური გამოცხადება. დიპლომატიას აქ უკვე არა აქვს ადგილი, — მე, რა თქმა უნდა, დიპლომატიაზე ვლაპარაკობ არა ცუდი, არამედ კარგი აზრით.

თქვენი მხრივ, ძვირფასო ა. შ. (თუ თქვენც არ განიმსკვალეთ დმერთის რწმენით), „კარგი“ დიპლომატია ის იქნება, თუ ჩვენს საერთო (ე. ი. ჩემი ჩათვლითაც) საქმეებს განაცალკევებთ ფილოსოფიისაგან.

ფილოსოფიის გარდა სხვა საქმეებზე საუბარი ახლა არ გამოდგება: არაბუნებრივი გამოვა. თუმცა, ეს სხვა საქმეები, არა ფილოსოფიური საქმეები; არამედ, მაგალითად, „პროლეტარი“, თუ მართლა მოითხოვს საუბარს სწორედ ახლა, სწორედ თქვენთან, მე შემეძლო ჩამოვსულიყავი (არ ვიცი, ვიშოვნი ფულს თუ არა: სწორედ ახლა გაქირვება გვაქვს), მაგრამ ვიმეორებ: მხოლოდ იმ პირობით, რომ ფილოსოფიისა და რელიგიაზე მე არ ვლაპარაკობ.

თქვენთან კი აუცილებლად ვაპირებ სასაუბროდ ჩამოსვლას, როცა მუშაობას დაემათავრებ და თავისუფალი ვიქნები.

მაგრად გართმევთ ხელს.

თქვენი ლ ე ნ ი ნ ი

შ. თ.-ს დიდი მოკითხვა: ის, იმედია, ღვთის მომხრე არ არის, ჰა?

ა. შ. ზორაძის

25. VII. 1913.

ძვირფასო ა. შ.! სულ მინდოდა მომეწერა თქვენთვის, მაგრამ გადავდებდი ხოლმე ცოლის ოპერაციის გამო. გუშინწინ, როგორც

იქნა, ოპერაცია გაუკეთეს, და ახლა უკვე მომჭობინება ეტყობა. ოპერაცია საკმაოდ ძნელი აღმოჩნდა. ძალიან მოხარული ვარ, რომ მოხერხდა ოპერაციის გაკეთება კოხერთან.

ახლა საქმეზე. თქვენ იწერებოდით, რომ აგვისტოში ბერლინში იქნებიოთ. როდის აგვისტოში? დამდეგს თუ დამლეგს? ჩვენ აქედან წასვლას ვაპირებთ 4 აგვისტოს. ბილეთები გვაქვს ციურიხზე — მიუნხენზე — ვენაზე და ყველა ამ ქალაქში გავჩერდებით. (შესაძლებელია 4-ში ექიმმა კიდევ არ გაგვიშვას, — მაშინ კიდევ გადავლდებთ.).

ხომ არ შეიძლება ერთმანეთს შევხვდეთ სადმე? თქვენ ხომ ალბათ გზა ბერნზე ან ციურიხზე გაქვთ ან მიუნხენზე?

ძალიან საჭიროა შევხვდეთ ერთმანეთს. „პრავდის“ დახურვა საშინლად ძნელ მდგომარეობას ქმნის. იქნებ რამეს მოვიფიქრებდით. შემდეგ ბერლინში თქვენ შეძლებდით ძალიან ბევრი რამ გაგვეკეთებინათ ჩვენთვის, ე. ი. „პრავდისათვის“.

ამიტომ ძალიან გთხოვთ ახლამ მომწეროთ თუნდაც ორი სიტყვა იმაზე, შესაძლებელია თუ არა ჩვენი შეხვედრა აქ ან აღნიშნულ ქალაქებში აგვისტოს დამდეგს? თუ არ არის შესაძლებელი, მაშინ მე უფრო დაწვრილებით მოგწეროთ ყველა საქმეზე, კერძოდ სკოლის შესახებ (ორგანიზატორის ჩავარდნამ საშინლად დაგვაბრკოლა; ვეძებთ სხვას).

მაგრად გართმევთ ხელს და გისურვებთ ყოველივე კეთილს, ყველაზე მეტად კი ჯანმრთელობას მგზავრობისათვის. მამ ჭიპასუხეთ ახლავი!

თქვენი ლ ე ნ ი ნ ი.

მოყვანილი წერილები ნათლად ამტკიცებენ, თუ როგორ უყვარდა ლენინს გორკი, როგორ სცემდა მას პატივს, რამდენად აფასებდა მის აზრს და როგორ უზიარებდა მას თავის შეხედულებებს.

ლენინი დიდი პიროვნება იყო, დიდი ბუნების ადამიანი და გორკის წონა კარგად იცოდა.

ერთი იყო უდიდესი მოაზროვნე და წინამძღოლი მსოფლიო პროლეტარიატისა;

მეორე — უდიდესი ხელოვანი.

სხვადასხვა გზითა და სხვადასხვა საშუალებით ორივე მიდიოდა ერთი და იმავე მიზნისაკენ — სოციალიზმისაკენ.

დღეს, როდესაც დედამიწის მეექვსედზე პროლეტარიატი ამკვი-  
დრებს თავის გამარჯვებას, მ. გორკი კიდევ უფრო საყვარელია,  
როგორც წინამორბედი და მომლერალი ამ გამარჯვებისა.

შანაღთა სიგიჟეს  
ვუმლერთ დიდებას!

ერთი ამგვარი მამაცთაგანია მაქსიმ გორკი.  
ჰან დაიმსახურა სიმლერა დიდებისა!.

1928

## როლიონ ქორძია

წარმოდგინეთ ძველი ფეოდალური ცხოვრება. აუარებელი უშა და მოსამსახურე. სრული უზრუნველყოფა, დიდი შემოსავალი. უოველივე თითქოს თავისით მოდის, ფიქრი, ზრუნვა საჭირო არ არის. თუ რასმე მონიტრებს დიდი ბატონი, მყისვე გაჩნდება — პეტი რა საქმე აქვთ აუარებელ შინამოსამსახურეთ.

ამავე დროს სრული უსაქმობა, აუარებელი თავისუფალი დრო. უფოდალი ჰხარჯავს ამ დროს ქეიფსა, ლბინსა და დროსტარებაში, რადირობაში, მაგრამ მაინც ბევრი რჩება:

ერთფეროვანი დღეები, ზამთრის გრძელი დამეები.

აი, ასეთ პირობებში მისწრებაა გრძელი რომანბი.

ამიტომაც რომანი ფეოდალური წყობილების პირმშო შეილია. ძველი რომანები რომ აილოთ, ზოგი ჰათგანი რამდენიმე დიდი ნაწილისაგან შესდგება და ათას გვერდს აღემატება.

რა გინდ დიდი ღირსებისა იყოს ასეთი რომანი, დრო უხდა თუ არა, რომ გულდასმით გადაიკითხოთ?

რა თქმა უნდა, მისი წაკითხვა უფრო ისეთ ადამიანს შეუძლ... რომელსაც თავისუფალი დრო თავზე საყრელადა აქვს.

ასეთი გახლდათ ფეოდალური არისტოკრატია.

ბურჟუაზიულმა წყობილებამ შესცვალა ფეოდალების ბატონობა. ბურჟუაზიას, ფეოდალებთან შედარებით, ნაკლები დრო აქვს: მას სჭირდება ბევრი ფიქრი და ზრუნვა, რომ ფულს ფული გააგდებინოს.

მაგრამ ბურჟუაზიის გარშემო თავს იყრიან აუარებელი მუქთახორები, რომლებიც მუშა ხალხის ნაოფლართ ცხოვრობენ და თავისუფალი დრო კი ძალიან ბევრი აქვთ. ეს დრო იხარჯება ქეიფსა და დროსტარებაში. ბურჟუაზია ათენებს დამეებს მრავალჯვარ გარყვნილებაში, მაგრამ დრო მაინც ბევრი რჩება კიდევ. ამიტომ რომანს ბურჟუაზიულ წყობილებაშიაც ჰყავს ძალიან ბევრი მკითხველი.



ბურჟუაზიამ თითქმის უცვლელად გადმოიტანა ფეოდალური წყობილებიდან ძველი რომანის ფორმა, ჩასდო შიგ ახალი შინაარსი და ამრიგად ბაზარი გაივსო აუარებელი და სქელტანიანი ბურჟუაზიული რომანებით.

მათი უმთავრესი მკითხველები იყვნენ და არიან ბურჟუაზიის ქალები, რადგანაც მათ დრო ბევრი აქვთ რომანების საკითხავად, საქმე კი რავეითარი.

ჩვენში ფეოდალებისა და ბურჟუაზიის ბატონობა შეიცვალა პროლეტარიატის მბრძანებლობით. ცხადია, ძველი ხელოვნებაც უნდა შეიცვალოს. ამ გზას ვერ ასცდება ვერც რომანი.

ძველი რომანი არა თუ თავისი შინაარსით, თავისი ფორმითაც სრულებით აღარ შეეფერება ახალ ცხოვრებას.

პროლეტარიატი დატვირთული არის საქმით. მას რჩება თავისუფალი ყოველდღე მხოლოდ რამდენიმე საათი. ამიტომ მხატვრული ნაწარმოები, გადაკიმული რამდენიმე ას ფურცელზე, მისთვის მიუღებელია.

გრძელი სიტყვა მოკლედ ითქმის — აი აუცილებელი პირობა პროლეტარული ხელოვნების ყოველი ნაწარმოებისა.

სიტყვის უდიდესი ეკონომია და შინაარსის უაღრესად შეკუმშვა, აი მეტად ძნელი ამოცანა ახალი სიტყვაკაზმული ნაწარმოებისა დიდი მხატვრობა პატარა შინაარსში.

ნოველა, პატარა მოთხრობა, მოკლე რომანი — აი რა უნდა ახალ მკითხველს, მუშა-მკითხველს.

იქნება ეს ჩამოქვეითებაა ხელოვნებისა?

სრულებითაც არა, ეს არის მხოლოდ ახალი ნაკადი ხელოვნებისა.

მე რომ მკითხოთ, მოკლე შინაარსში დიდი მხატვრობის შეჯგუფება გაცილებით უფრო ძნელია, ვიდრე გრძელ შინაარსში მისი გამლა.

ახალი ხელოვნების შექმნა მეტად დიდი და ძნელი საქმეა; ის ითხოვს დიდ დროს, დიდსა და ხანგრძლივს კოლექტიურ შრომას. ამ ნიადაგზე ჩვენში დიდი მუშაობა სწარმოებს.

მე ვერ ვიტყვი, რომ აქ მუშაობას ჯერჯერობით დიდი და თვალსაჩინო ნაყოფი გამოედოს, ყოველდღე ეს, რაც ხელთა გვაქვს, არა მხოლოდ მასალა; მაგრამ ასეთი მასალის დაგროვების გარეშე ვერავითარი ნიჭი ვერ შექმნის ერთის დაკვრით დიდ ნაწარმოებს.

ახალი ძიების მწერალთა შორის ყურადღებას იპყრობს როდიონ ქორჭია. მისი მოთხრობების პირველი ტომი თავისი ფორმით სრულე-

ბით მისაღებია პროლეტარული მკითხველისათვის: სიტყვის მოკლედ მოჭრა, სხარტულად თქმა და ხშირად მხატვრულად თქმაც.

რაც შეეხება შინაარსს და დედა აზრს, ბევრი რამ არის ახალი ან ძიება ახლისა, ბევრი კი მოძველებული და მიუღებელია. თავისი წერის ხასიათით ავტორი ახლს: აქენ მიისწრაფვის, მაგრამ ძველი დალი ალაგ-ალაგ მაინც მძლავრად ემჩნევა.

„მზვიძეები ჩაბარდნენ ისტორიას. წურწუმიებმა ჩაიბარეს ისტორია. მონადირე წურწუმი და თავადი მხვიძე გაასწორა ისტორიამ“, — აი დედა-აზრი „ნარჩიტასი“, რომელიც საუკეთესო მოთხრობად უნდა ჩაითვალოს. განსაკუთრებით მხატვრულად არის წოდებული აქ მარულას აღწერა, ხოლო არის ფსიქოლოგიური სიყალბეც.

— „გოგუცა! დარჩი ჩემთან, შენ ცოლი და მე ქმარი.

— ხა, ხა, ხა, — გესლიანად გაიცინა ქალმა. — წურწუმი, გოგუცა წურწუმი... ხა, ხა, ხა!“

ეს ფსიქოლოგიურად სრული სიმართლეა: თავადის ქალი, თავადური აზროვნებით გაყდენთილი, მის ხ-ყმვე წურწუმის არ მიიღებს.

მაგრამ აი, ისინი დაშორდნენ ერთმანეთს. მოხდა რევოლუცია და გამოჩნდება თუ არა ეს წურწუმი, თავადის ქალი ნახად ტუჩებს გაუშვერს თავის ნაყმევს, რომელმაც ის უხეშად გააუპატიურა.

ეს უსათუოდ ყალბი ადგილია.

აიღეთ „შავადის ბედნიერება“. ლამაზად არის გაშუქებული და შეზავებული ადამიანის გულის ერთი კუნჭული, მაგრამ შუგ თითქმის სრულად არის აღწერილი სქესობრივი აქტი, როდესაც „ოთხთა ხელთა შეკრეს ორი ტანი მოჭრილ ძნებსაჯით“.

მერე?

ამ „მერეს“ ავტორი განგვიმარტავს შემდეგ მოთხრობაში: „უმუშევარი“.

დაწესებულების უფროსი გააუპატიურებს უმანკო სოფიოს. მაგრამ ყური დაუვუდლოთ თვით ავტორს:

„რალაც უცნაური ტკივილი იგრძნო სოფიკომ, თითქოს მახვლი გაუყარეს ტანში. შემდეგ ტკივილი მოულოდნელ და დაუპატრეებელ სიამოვნებად ეჩვენა. შემდეგ ესეც დაიკარგა და ბურუსმა მოიცვა უფროსიც და ისიც, რაც დაკარგა სოფიკომ დაუბრუნებელ გზაზე“.

მგონი ყველაფერია ნათქვამი იქ, სადაც ხელოვანმა ნახევარ სიტყვაზედვე უნდა ჩამოუშვას ფარდა.

ეს არის წმინდა წყლის ბურჯუაზიული ხასიათი წერისა, ბურჯუაზიის მოჩლუნგებული, მოცვეთილი ნერვების გაღიზიანება და თანამედროვე ხელოვნებიდან უსათუოდ უნდა განიდეგნოს.

ლამაზად არის დაწერილი „მერცხალა“, სადაც მოცემულია სურათი ახალი ცხოვრების წინამორბედი ქალისა. თქვენ უყურებთ ავტორის მიერ დახატულ მერცხალას და მყისვე რწმუნდებით, რომ მასში არის დიდი რწმენა, ძლიერი გაქანება და ნამდვილი საწინდარი ახალი სპეტაკი ცხოვრებისა.

თქვენ მზადა ხართ მიხვიდეთ მერცხალასთან და შესძახოთ მას: მერცხალა, მეც შენთან ერთად ახალი ცხოვრებისაეკნო.

ამაშია გამარჯვება ავტორის მხატვრული შემოქმედებისა.

ცოცხლად არის დაწერილი „დათვის კანონი“. ავტორს აქვს საკმაო იუმორი და ეხერხება სასაცილო მდგომარეობათა გამონასკვა, მაგრამ ზოგჯერ ის ჰკარგავს მხატვრულს ზომიერებას და ხელოვნებას სცდება, როგორც, მაგალითად, მოთხრობაში „ვის გაასამართლებენ“. აქ არ არის არც მხატვრობა, არც ხელოვნება.

ავტორს აქვს დაკვირვების ნიჭი და ცხოვრებიდან ამოღებული სახეები და სურათები მხატვრულადა აქვს მოხაზული.

ადამიანის გულის გადაშლა და იმის ფურცლებზე დაწერილი ამოკითხვა მეტად ძნელი საქმეა; ფსიქოლოგიური შინაარსის მოთხრობები გვიმტკიცებენ, რომ ავტორს შეუძლია ამ სიძნელის დაძლევა.

ვინ არიან ავტორის გმირები?

პატარა, სუსტი ადამიანები, რომლებსაც არც ნებისყოფა აქვთ, არც სიმტკიცე, ბრძოლა არ შეუძლიათ და ან იღუპებიან, ან სხეულის გაყიდვით აღწევენ პატარა მიზანს.

თვრამეტ მოთხრობაში შეგხვდებით მარტო თოლიგე, მერცხალა და იდა, სადაც თქვენ ხედავთ ძალას, ციციხლს, გატაცებას.

დანარჩენები? სუსტი, საბრალონი, განა არ შეიძლება სუსტი. საბრალო, უმწეო პიროვნება იყოს ხელოვნების საგანი?

შეიძლება, რატომაც არა, მაგრამ ყოველ დროს თავისი ხელოვნება აქვს, თავისი ესთეტიკური მოთხოვნილება და მისწრაფება.

უმწეო, საბრალო, უნებო და უილაჯო პერსონაჟები დღევანდელ დღეს უკვე აღარ შეეფერებიან, აღარა ჰღირს მათზე ნიჭის დაბანდება.

როდღონ ქორჭიას კი უსათუოდ აქვს ნიჭი.

## გრიშაშვილი. „ძველი თბილისის ლიტერატურული ბოჰემა“

ამ ქუჩაბანდში მე შინახავს ძველი კამქარი,  
ხელში დროშებით გადაქლობილ-გადანამწკრივი;  
უსტაბაშს შეენის მოფარფარე შხის ყალამქარი  
და ჰვალობს ზურნა დილის საარს ჰანგ-ღვთაებრივი.

აი, სურათი იშვიათი სილამაზით აღბეჭდილი და დიდის ხელოვნებით გამოტანილი ცხოვრების სინამდვილიდან. ყოველ ბგერაში სიყვარული სუნთქავს და ამავე დროს სევდის ლანდები იზმორებიან სტრიქონებში.

იმიტომ რომ გრიშაშვილი ძველი თბილისის ტარიელია და ძველი წიგნების მტვერში ცდილობს იმის აღდგენას, რაც სინამდვილეში გაპქრა, აღარ არსებობს:

და ხალა არის ყარაჩოღელთ ლხინი თუ კრვი?

აღარსად, ის დრო წავიდა, ისტორიის ჩარხის ტრიალმა გადაისროლა უკუხეთში, მაგრამ პოეტს დაუტოვა ძლიერი სიყვარული და ამ სიყვარულის ჩირაღდნით ხელში გრიშაშვილი ცდილობს აღადგინოს ძველი თბილისის სრული სურათი.

გრიშაშვილი დიდი ესთეტია, სიტყვის დიდი ხელოვანი, ამავე დროს ის არის იშვიათი მკვლევარი ძველი თბილისის ყოფა-ცხოვრებისა.

ეს დაგვიმტკიცა გრიშაშვილმა ჯერ „საიათნოვათი“ და ახლა „ძველი თბილისის ლიტერატურული ბოჰემით“.

ძველი თბილისი და ყარაჩოღელი განუყოფელია. როდესაც ძველ თბილისს ფარდას ახდით, თქვენს წინაშე აღიმართება ყარაჩოღელი.

ვინ არის ყარაჩოღელი?

ხელოსანი, დალალი, ბაყალი, მიკიტანი.

ყარაჩოღელი ძველი თბილისის მოქალაქეა.

ვინ არის ის ეროვნებით?

ქართველი, სომეხი, მაგრამ ორივე ძმები არიან, ტოლები, ამხანაგები ჭირსა და ლხინში.

შოვინიზმი, ვიწრო ნაციონალიზმი ყარაჩოღელმა არ იცის; სომეხი იყოს, ქართველი იყოს — მის თვალში განა სულ ერთი არ არის?

საიდან განვითარდა ყარაჩოღელში ასეთი ინტერნაციონალიზმი? იმდროინდელი ეკონომიური ურთიერთობიდან. ბატონობა ქართველი არისტოკრატიისა იყო, სომხის ბურჟუაზია მაინც და ძაინც მაგარზებრემლიანი არ ყოფილა. ქართველი ბურჟუაზია არ არსებობდა; ამიტომ არ იყო ჭიშპობა და ბრძოლა მუშტრისათვის, ბაზრისათვის ქართველ და სომეხ ბურჟუაზიას შორის; ამის გამო არც ეროვნულ შეუღლსა და ანტაგონიზმსა ჰქონია ადგილი.

როდესაც ქართველი ბურჟუაზია გაჩნდა და წამოიზარდა, მას დაინახა მძლავრი მეტოქე თავის გვერდით, სომხის ბურჟუაზიაში. და ამიტომ მორთო: საქართველოს ბაზარი მარტო მე მჭირდება, მარტო ჩემთვის უნდა იყოსო.

იმ დროს, როდესაც თბილისის პირველი მოქალაქე ყარაჩოღელი იყო, ასეთს მოვლენას არ ჰქონია ადგილი, ამიტომაც ქართველ და სომეხ ყარაჩოღელს ერთმანეთში ვერ გაარჩევდით. შენ ქართველი ხარ და მე სომეხი, ან კიდევ შენ სომეხი ხარ და მე ქართველიო, ისინი ერთიმეორეს არ ეტყოდნენ: ერთნაირი ცხოვრება, ერთნაირი ჩვეულებანი, ერთნაირი მისწრაფებანი, ერთნაირი დროსტარება ჰქმნიდა ერთგვარ ტიპს ყარაჩოღელისას, რომელი ეროვნებისაც უნდა ყოფილიყო ის.

თავისი მდგომარეობით ყარაჩოღელი იყო წვრილი ბურჟუა. ამიტომ მთელი მისი გონებრივი და ქონებრივი ცხოვრება წვრილბურჟუაზიულ რკალში ვითარდებოდა.

გრიშაშვილის შედარება ყარაჩოღელისა და კინტოსი საუცხოო არის. აქ ერთგვარი იდეალიზაციაა ყარაჩოღელისა: ძველი თბილისის მოტრფიალეს ყარაჩოღელი განსაკუთრებით მოსწონს.

რაინდული კეთილშობილება ახასიათებს ყარაჩოღელს, მაგრამ ეკონომიური და სოციალური ჩამორჩენილობის ხანა ყოველთვის ასეთია.

ველურებში ბევრგან არ იციან რა არის ქურდობა, მაგრამ განა ეს ველურის მაღალ ზნეობას ახასიათებს? ცხოვრება პრიმიტიულია, მოთხოვნილება სულ პატარა, ამიტომ ველურს არ სჭირდება ქურდობა, მისი შეგნებაც ვერ მისულა ამის გამო ქურდობამდე.

ყარაჩოღელის ცხოვრების პირობებიც მარტივი იყო: თავადი და ყმა, დანარჩენი სოციალური კლასები მათში არ არსებობდნენ.

ცხოვრება იყო მდორე, მოთხოვნილება ცოტა, მანეთი დიდი ფული, ყარაჩოღელიც ასეთ პირობებში კმაყოფილი იყო, ამაყი, მხიარული.

საში რამ მიყვარს ამ ქვეყნად:  
ღვინო, დუღუჯი, ქალები...

მიუბნატეთ ამას ყოჩების კიდაობა, ყეენობა და კრივი — აი ყარაჩოღელის მთელი ესთეტიური ავლა-დიდება.

მას უყვარდა დროს ტარება საკრავითა და სიმღერით, სიმღერისათვის კი საჭირო იყო სატრფიალო ლექსები.

რადგანაც ასეთი ლექსები აუცილებელი იყო მომღერლისათვის, ამიტომ ყარაჩოღელის პირველი პოეტები აშულები იყვნენ. აშულში შეერთებულნი არიან პოეტი, კომპოზიტორი და მომღერალი. საუკეთესო აშული ის იყო, ვინც ლექსსაც კარგს შეათზავდა, სასიმღერო ჰანგსაც კარგს გამოიგონებდა და ამავე დროს ხმაც კარგი ჰქონდა. ქალწულის მკობა, ქვრივისა, საერთოდ ქალისადმი ტრფიალის სხვადასხვანაირად შეტრიალება, სხვადასხვა განცდების შეფარდება — აი უმთავრესი შინაარსი ასეთი პოეზიისა.

რაც უფრო ვითარდებოდა საზოგადოებრივი ცხოვრება, ყარაჩოღელთა პოეზიის შინაარსიც იზრდებოდა და ამ შინაარსს მარტო აშულები ვეღარ იტევდნენ; გაჩნდნენ ყარაჩოღელთა ნამდვილი პოეტებიც, რომლებმაც პოეზიაში სატრფიალო მოტივების გარდა შეიტანეს საზოგადოებრივიც და პოლიტიკურიც.

ყარაჩოღელების მრავალ პოეტთა შორის განსაკუთრებული ნიჭით არიან დაჯილდოებული გივიშვილი, სკანდარ-ნოვა, ანტონ განჯისკარელი, ჰაზირა და იეთიმ გურჯი.

გრაშაშვილის წიგნი დახასიათება ამ პოეტების შემოქმედების და საუცხოო დახასიათებაც არის.

ამ პოეტებმა შეასრულეს თავისი მოვალეობა და დღეს უკვე დავიწყებულს უფსკრულში იძირებიან. საჭირო იყო გრიშაშვილის მადლიანი კალამი, რომ ისინი ამოეწიურებინა და შესაფერი ადგილი მიეკუთვნებია ჩვენი საზოგადოებრივი განვითარების ისტორიაში. გრიშაშვილივით ამ საქმეს ვერავინ შეასრულებდა, რადგანაც პოეტური ფეხის ადგმის პირველ დღეებში გრიშაშვილი განიცდიდა მათ გავლენას. სკანდარ-ნოვამ მალე შენიშნა ეს და გრიშაშვილში თავისი მეტოქე დაინახა; მეტოქე მას არ უყვარდა თავის აუდიტორიაში და ამიტომ გაილაშქრა გრიშაშვილის წინააღმდეგ.

სკანდარ-ნოვა თავის თავს სახალხო მწერალს უწოდებდა. შეიძლება ეს სახელწოდება მივაკუთვნოთ როგორც მას, ისე დანარჩენებს?

სახალხო ძალიან დიდი მცნებაა, მაგრამ გივიშვილი, სკანდარ-ნოვა, ჰაზირა თბილისის მდაბიო მოქალაქეებში მეტად პოპულარული იყვნენ; მდაბიო მოქალაქე ამათ უფრო იცნობდა, უფრო ჰკითხულობდა, და უფრო აფასებდა, ვიდრე სხვას.

თანამედროვე მკითხველს ვერც ერთი მათგანი ვეღარ დააკმაყოფილებს. თბილისის მდაბიო მოქალაქეც გაიზარდა და გამოიცივალა, რევოლუცია გახიციდა და სკანდარ-ნოვა, გივიშვილი და ჰაზირა მისგან ძალიან შორს დარჩნენ.

მაგრამ ამ პოეტებს აქვთ დიდი დამსახურება მდაბიო მოქალაქეთა წინაშე, რომელთაც მათ წერა-კითხვა ასწავლეს, გონების კარი გაუღეს, წიგნი შეაყვარეს, პოეზიას დაუახლოვეს, თავისი მდგომარეობა შეაგნებინეს და პოლიტიკური ბრძოლის ზარს — ოდნავადაც არის — ჩამოჰკრეს.

გივიშვილი და სკანდარ-ნოვა თუმცა აღნიშნავენ თავის პოეზიაში საზოგადოებრივ უსამართლობას, მაგრამ მათ არ ესმით კავშირი იმ უსამართლობასა და პოლიტიკურ წყობილებას შორის; ამიტომ პოლიტიკა მათ არ აინტერესებთ. სულ სხვაა განჯისკარელი და ჰაზირა.

ამათ კარგად ესმით, რომ საზოგადოებრივი უსამართლობის სათავე პოლიტიკური წყობილებაა და ამიტომ პოლიტიკური ბრძოლის ჰახებები მძლავრად გაისმის მათს პოეზიაში.

გივიშვილისა და სკანდარ-ნოვას ლექსებს აშუღები ავრცელებდნენ და არა თუ თბილისის მდაბიო მოქალაქე, საქართველოს ყველა დაბა-სოფლებში მღეროდნენ მათ.

აიღეთ გივიშვილის „ღვინოვ, კახურო, ვარ შენი მსმელი, გინდ იყავ თეთრი, გინდა წითელი“, ან „მითხარ, მითხარ, რას მემდური. შენი სულისა, აღარა მაქვს მოთმინება, მკვლელო გულისა“.

სკანდარ-ნოვას „ორთავ თვალის სიხათლევე, რაზედ მოგიწყენია“ ხომ აგერ ნახევარი საუკუნე ხდება, რაც გაბატონებულია თბილისის მდაბიო მოქალაქის რეპერტუარში.

გივიშვილი დინჯი ბუნების მგოსანია, მას იზიდავს ეპოსი, ზღაპარი.

სკანდარ-ნოვა თავისი ბუნებით იმერული ნიჭია, მკვირცხლი, მახვილი, გრძნობაჭარბი. მისი შემოქმედება უფრო ლირიკაში იშლება.

გრიშაშვილის გამოკვლევაში ძალიან დიდი ადგილი უჭირავს გივიშვილისა და სკანდარ-ნოვას საპაექრო ლექსებს. მართალია, მაშინდელ ბაზარს ეს პაექრობა მოსწონდა, მაგრამ დღეს მას აღარა აქვს არავითარი მნიშვნელობა. უძკობესი იყო, რომ გრიშაშვილს უფრო ვრცლად გამოეყვანა მათი ნიჭისა და შემოქმედების. დამახასიათებელი ლექსები.

გივიშვილი და სკანდარ-ნოვა უფრო ბაზრის მეგობრები არიან. თავის შემოქმედებაში ისინი დიდ ანგარიშს უწევენ ბაზარს.

ანტონ განჯისკარელი დემოკრატიის მეგობანია; მისი მიზანია დემოკრატიის გამოღვიძება და საბრძოლველად დარაზმვა. მისი ლექსი დახვეწილია, მუსიკალური, რითმა მოხდენილი, აზრით მდიდარი და გრძნობით სავსე:

შენც კაცი ხარ, ვით წესია,  
შემოგუკერავ მოძმე ყველა;  
რად არ ხედავ, ძარღვებიდან  
სისხლს ვინა გწოვს, ვით წურბელა?  
კაცად არც კი გაფასებენ,  
თითქოს იყო ჭიანჭველა,  
რალას სდუმხარ, შრომის შეილო,  
აწ თენდება, აღარ ბნელა.

საზოგადოებრივი ცხოვრების საჭირობოროტო საკითხები, დაჩაგრული მოძმის ბედი, მშრომელი ხალხის მდგომარეობა, — აი რა არის ზაგანი განჯისკარელის პოეზიისა.

ყოველივე ეს შეზავებული აქვს მოხდენილი იუმორით, რისი ნიმუშებიც საკმაოდ არის გრიშაშვილის ნაწარმოებში.

ჰაზირა საქართველოს ტარიელია, მას იმდენად უყვარს საქართველო, რომ სხვაგან ძვირფას სასახლეს საქართველოში საფლავი ურჩევნია. ამიტომაც იმის პოეზიას ახასიათებს პატრიოტიზმი:

მოდი, შეილო, ჩემთანა,  
გულში არ დამკრა დანა:  
საქართველოს შეილი ხარ,  
იციან შენი ქვეყანა,  
მამულისთვის კვდებოდე,  
მტრის პირდაპირ დგებოდე;  
განათლებულ ქვეყნებში  
კაცად იხსენებოდე.

თვითმპყრობელობასთან ბრძოლაში ჰაზირამ თავისი წვლილი შეიტანა და ის უსათუოდ იყო პოეტი — მებრძოლი მუშათა გამარჯვებისათვის, თუმცა მუშა ხალხის საბოლოო მიზანი მას არ ესმოდა. მ-



სი შესანიშნავი „მარტის თვე“ ხელიდან ხელში გადადიოდა და ალტა-  
ცებას იწვევდა მდებრიო მკათხველში.

ვის მხარეზე იყო ჰაზირა?

მუშა ხალხის მხარეზე.

აიღეთ მისი შესანიშნავი ლექსი:

სადაც არის გათენდება,  
აღსდევ, მუშავ, შენ,  
ლამაზი დღე დაგიდგება,  
ნუ გძინავს შენ,  
მუშავ, მუშავ, შენ!

თითქმის ყოველი ლექსი ჰაზირასი სასიმღეროა, რადგანაც ის  
თვითონ აშული იყო; ამიტომ მისი ლექსის წყობა შეხამებულია მის-  
სავე სასიმღერო კილოსთან.

ჰაზირა ერთობის მგოსანია და ამ ერთობის საჭიროებას უქადა-  
გებს მუშებს; ჰაზირა წითელი დროშის მგოსანია, რევოლუციის  
მოტრფიალე.

როგორ უმღერის ჰაზირა პირველ რევოლუციას?

რასაც საფლავეში ენატრობდო,  
აწ თვალთ დაეინახე.  
ქრელი ჩვრების ალაგას  
წითელი დროშა აღმართათ.

აი ასეთ აზრებს უნერგავდა ჰაზირა თბილისის მდებრიო მოქალა-  
ქეებს და მისი რევოლუციური ლექსები სასიმღერო ჰანგების საშუა-  
ლებით ხალხში ვრცელდებოდა. ყარაჩოლელების პოეტთა შორის  
ჰაზირას განსაკუთრებული ალაგი უჭირავს და თავისებური ფიგურა  
ამ აშული პოეტისა საუცხოოდ აქვს გრიშაშვილს გაშუქებული.

უკანასკნელი მოგიკანია იეთიმ გურჯი, რომლის შემოქმედება  
ძალიან წააგავს სკანდარ-ნოვასას — ამ უკანასკნელივით ენამახვილი,  
სიტყვამოსწრებული.

იეთიმ გურჯი თავისი ცხოვრებითაც მეტად მოგვაგონებს სკან-  
დარ-ნოვას: ორივე პირწავარდნილი ბოჰემაა.

იეთიმ გურჯი ქეიფის, დროსტარების მგოსანია; ამიტომ მისი  
წვრილი ლექსები თითქმის ყველა სასიმღეროა და მეტად გავრცელე-  
ბული თბილისის მდებრიო მოქალაქეებში. ქეიფს შვენიის სატრფიალო  
ჰანგები და ამ დარგში იეთიმ გურჯი ძლიერაა, მოხდენილი, ლამაზი  
და მდიდარი თავისებური თქმებით.

იეთიმ გურჯი ინტერნაციონალისტია თავისი რწმენით და თან-  
ხმობისა და სოლიდარობის მქადაგებელია.

თვითონ იეთიმ გურჯი საუკეთესოდ ახასიათებს თავის თავს:

სიყვარულის მგოსანი ვარ,  
ვალამაზებ დედა ენას,  
სიმღერების გამჩენი ვარ,  
მეჭლისებში ვფანტავ ლხენას;  
ერთა შუამავალი ვარ,  
ყველგან ვცდილობ ვარდის ფენას.

როდესაც პირველი რევოლუციის ქარიშხალმა დაჰბერა, იეთიმ  
გურჯმა შეუერთა თავისი ჰანგი მუშათა საერთო გუგუნს, რის გამო  
რეაქციის დროს მრავალი წელი გაატარა რუსეთის სხვადასხვა ცი-  
ხეში.

იეთიმ გურჯის შემოქმედება გრიშაშვილს საკმაოდ სრულადა  
აქვს დახასიათებული.

ყველა ამ პოეტებმა თავისი წვლილი შეიტანეს ქალაქის მდა-  
ბიო მოქალაქის შეგნებაში, პოეზია, მუსიკალური შემოქმედება და  
სიმღერა მათ ერთად შეჰკონეს და ამით მოიპოვეს თავის წრეში დიდი  
გავლენა.

ისინი დარჩენილი იყვნენ ლიტერატურის ისტორიის გარეშე,  
თუმცა ამ ისტორიაში მათ უსათუოდ ეკუთვნით თავისი ალაგი.

გრიშაშვილის წიგნი საუცხოოდ აესებს ამ ნაკლს და ამიტომ ეს  
ახალი ნაწარმოები პოეტისა მეტად სკირო, და სასარგებლო წიგნია.

## მამსიმ გორაკი

საშობლოს ცაბა ბნელად გაშლილი  
მწუხრის ზეწარი გადაეფარა —

პოეტის ეს სიტყვები ზედგამოჭრილია რუსეთის სინამდვილეზე 80-იან წლებში. ეს იყო ხანა შავრაზმული რეაქციის თავაშეებული მძვინვარებისა.

გლებობას კისერზე აჯდა და სისხლსა სწოვდა თავადი, მემამულე, ვაჭარი, ჩარჩი, მევახშე, პოლიცია, ადმინისტრაცია და სამლდვლოება.

ქალაქში გაბატონებული იყო იგივე ვაჭარი, ბიუროკრატია, სამლდვლოება, საწარმოო კაპიტალი არ იყო განვითარებული და ამიტომ ცხოვრების ასპარეზზე პროლეტარიატი ჯერ არა სჩანდა.

გლებობა მოკლებული იყო ყოველგვარ შეგნებას.

სურათი მეტად უნუგეშო, მდგომარეობა საშინელი.

მოწინავე ინტელიგენცია ხედავდა, რომ ქვეყანა ილუპებოდა. ასე ცხოვრება არ შეიძლებოდა და სარევიოლუციო განწყობილებით ირაზმებოდა, მაგრამ:

რა ჰქნას კარგმა მონარდმა,  
დროზე შაში თუ არ მოვა!

მარტო მოწინავე ინტელიგენცია იგივეა, რაც სარდალი უჯროდ.

ინტელიგენცია რას გააწყობდა თავისი რევიოლუციური განწყობილებით, როდესაც პროლეტარიატი არსად იყო!

რევიოლუციური ინტელიგენცია თავს იყრიდა „ნაროდნაია ვოლიას“ გარშემო და მოახერხა ალექსანდრე მეორის სიკვდილით დასჯა.

რეაქციამ ისარგებლა ამ შემთხვევით და მოწინავე ინტელიგენცია ერთის დაკვრით გასრისა.

დანარჩენი ნაწილი ინტელიგენციისა შიშმა მოიკცა-

თვითმპყრობელობა უძლეველია, ბრძოლა მასთან უაზრო, —  
ოსეთი აზრით გაიმსქვალა ყველა. იარაღი დაჰყარა ყველამ, ჩაჯდა სა-  
კუთარ ოჯახში, შემოიფარგლა თავი პირადი ინტერესებით, თბილი  
ადგილით და, საერთოდ, საზოგადო დავიწყების ჯურღმულში ჩაი-  
ძირა.

აშშორებული ჭაობი, — აი მაშინდელი საზოგადოებრივი ცხოვ-  
რება.

საჭირო იყო ახალი ადამიანი, რომელიც იტყოდა ახალ სიტყვას.  
საჭირო იყო ისეთი ახალი სიტყვა, რომელიც შენიგით გაეარდებოდა,  
შეარხევდა საზოგადოებას და იმედის ჩირაღდნებს დაანთებდა ყვე-  
ლას გულში.

საჭირო იყო მძლავრი მხილება, რომ ინტელიგენციას გახსენე-  
ბოდა თავისი ადამიანური მოვალეობა.

ასეთი ადამიანი აღმოჩნდა. მან სტყორცნა აშშორებულ ჭაობს  
საზოგადოებრივი ცხოვრებისას ახალი სიტყვა.

ეს სიტყვა გასკდა ყუმბარასავით და იმედის სხივები მოჰფიხა  
ყველგან.

მაშინ ყველამ იწამა, რომ აღსასრული თვითმპყრობელობისა არ  
იყო შორს და ახალი ცხოვრების მოახლოებას ველარაფერი შეაჩე-  
რებდა.

ეს ადამიანი იყო მაქსიმ გორკი. მისი ახალი სიტყვა მთელი მისი  
შემოქმედებაა. როდესაც მაქსიმ გორკი გამოვიდა სამწერლო ასპა-  
რეზზე, სხვებიც ცდილობდნენ ახალი სიტყვის თქმას, მაგრამ ეს  
სიტყვა არავის ესმოდა, იმედად და ნუგეშად არავის ევლინებოდა.

გორკის ახალი სიტყვა კი მთელი ეპოქაა.

რატომ?

იმიტომ, რომ გორკის სიტყვა მონაბერი იყო ახალი კლასის გავ-  
ლენით.

გორკის სიტყვაში ახალი კლასი მოსჩანდა.

გორკის სიტყვაში ახალი კლასის გუგუნე ისმოდა.

სხვების სიტყვაში კი არა.

ვინ იყო ეს ახალი კლასი?

რუსეთის პროლეტარიატი.

რუსეთის პროლეტარიატი არა სჩანდა, ის უცნობი იყო.

უცნობი იყო ალექსი პეშკოვიც.

90-იანი წლებიდან რუსეთში სწრაფად ვითარდება საწარმოო  
კაპიტალი. პროლეტარიატმა თავი მოიყარა დიდ ქალაქებში, საწარ-

მოო ცენტრებში; ნელ-ნელა შეკავშირდა, დაირაზმა და გამოვიდა ბრძოლის ასპარეზზე.

ალექსი ჰეშკოვმა სწორედ ამ დროს ჩამოიძრო ნიღაბი უცნობისა, მთლიანად დაეყრდნო პროლეტარიატის მარჯვენას და სტყორცნა ახალი სიტყვა,

სიტყვა — მეხის ნატეხი,

სიტყვა — ცეცხლის მფრქვეველი,

სიტყვა — რისხვითა და სიძულვილით გატენალი,

სიტყვა — ადამიანის სიყვარულით აელვარებული,

სიტყვა — იმედით აღფრთოვანებული,

სიტყვა — ახალი ცხოვრების მახარობელი,

სიტყვა — ბრძოლისა და გამარჯვებისა — პროლეტარული ბრძოლისა და პროლეტარული გამარჯვებისა.

აი, აქ არის ძალა და მნიშვნელობა მ. გორკის ახალი სიტყვისა.

გორკი პროლეტარიატის რიგებიდან გამოვიდა, ის იყო ხელზე მოსაქსახურეც, პურის მცობელიც, დარაჯაც, ბარგის მზიდველიც, მზარეულის თანამემწეც, მუშაც.

ამიტომ მან ადრე დაინახა ის, რაც სხვებმა გვიან შენიშნეს. მან იწაბა ახალი კლასი, თავისი დიდი ნიჭის წყალობით ადრე შეიცნო მისი ისტორიული მოწოდება და ანაწ შეასხა მის აღმაფრენას ფრთები. ამან ჩაჰბერა იმის სიტყვას ის ძალა და მნიშვნელობა, რამაც გორკი გადააქცია პროლეტარიატის უსაყვარლეს მწერლად.

რას წარმოადგენდა საზოგადოებრივი ცხოვრება 90-იან წლებში?

საპყრობილეს.

ყველა თავის თავზე ფაქრობდა, ყველა საკუთარი ინტერესებითა ცოცხლობდა და ნამდვილი ადამიანი, რომელიც მიისწრაფვის თავისუფლებისაკენ, სილამაზისაკენ, სპეტაკი ცხოვრებისაკენ, აღარსად იყო.

ასეთ პირობებში საჭირო იყო სასტიკი მხილება და გორკი გვევლინება, როგორც შეუბრალებელი ძაძვირებული.

გორკი გამოვიდა დაბალი წრიდან, აღიზარდა დაბალ წრეში, დაბალი წრის ყველა საფეხური გაიარა: იჯო, შეგირდი ხელოსნისა, მზარეულისა, ხელზე მოსაქსახურე, უბრალო მუშა, მხენხავი, მკებურე, დარაჯი და სხვ. უყვარდა ფეხით მოგზაურობა. შემოუვლია რუსეთის დიდი ნაწილი და ეს მოგზაურობა იყო მისთვის საუკეთესო სკოლა: ძალიან ბევრი რამ ნახა, ბევრი რამ შეისწავლა, გაიცნო მდებარე ხალხი და განსაკუთრებით შეისწავლა ბოსიაკების ყოფა-ცხოვრება.

ზოსიაკების ნამდვილი რუსული მოვლენაა, რუსეთის ვაჭრულ-ფეოდალური წყობილებიდან წარმოშობილი.

ბატონობის დროს გლეხი მიკრული იყო მაწაზე, ის მიწიანად შეადგენდა ბატონის საკუთრებას. ბატონის ნებადაურთველად გლეხს არსად შეეძლო წასვლა.

ბატონყმობის გადავარდნამ გლეხი უმიწაწყლოდ დატოვა, სამაგიეროდ მისცა გადასვლა-გადმოსვლის თავისუფლება. სოფლად ფეხი მოიმაგრა ვაჭარმა, ჩარჩმა, მევახშემ, კულაკმა.

ამდენმა მუქთახორამ გლეხობის გადატაკებას ძალიან შეუწყობ ხელი. უმიწაწყლოდ დარჩენილ გლეხს მეტი საშუალება არ ჰქონდა, უნდა დასდგომოდა გზაშარას და ეძია ლუკვა პური. მსხვლი წარმოება ჯერ არ იყო განვითარებული, ამიტომ მუშა ხელი არავის სჭირდებოდა: უმიწაწყლო გლეხები ნავთსადგურებში იყრანენ თავს სამუშაოს საძებნელად, ხან შოულობდნენ საქმეს, ხან ვერა; ხან მაქლარნი იყენენ, ხან მწიერნი და აი ან გზით წარმოიშენენ ბოსიაკები.

გორკი ძალიან კარგად იცნობდა მათს ცხოვრებას. თავისი მოგზაურობის დროს ბევრგან ხედებოდა მათ და ხშირად უცხოვრია მათთან ერთად.

საზოგადოების მხილებისათვის მან ისარგებლა საზოგადოების გარეშე მოქცეული ხალხით და იქიდან წარმოიშვა ბოსიაკური ხანა მისი შემოქმედებისა.

ბოსიაკების პირით მან სასტიკად გაჰკიცხა მაშინდელი საზოგადოება.

„ადამიანი სთვლემს და არავინ აღვიძებს მას. სთვლემს და პირუტყვდება. მას სჭირია მათრახი“ — წერს ერთ მოთხრობაში გორკი. მისი ბოსიაკური ხანის შემოქმედება მეტად მწვავე მათრახი იყო. გორკიმ გამოაღვიდა საზოგადოება და დაუსახა მას წინ ბედნიერება ბრძოლისა.

რისთვის, ვისთვის არის საჭირო ეს ბრძოლა?

ადამიანის განთავისუფლებისათვის.

ახალი ცხოვრების შესაქმნელად.

ვის შეუძლია ამ ახალი ცხოვრების შექმნა?

ამჟამათვის გორკიმ დაასურათა რუსეთის ვაჭრული საზოგადოება. „თომა გორდეევში“, „სამნში“, „ქალაქ ოკუროვში“, „მათე კოცემიაკინში“ მან მოგვცა საუცხოო სურათები.

რას წარმოადგენს ვაჭრული ყოფა-ცხოვრება?

საპყრობილეს, სადაც ერთი მეორესა სკამს, ერთი ბედნიერია

და ათასი უბედური. აქ არ არის სიყვარული, თანაგრძნობა, გატანა; ყველა გატაცებულია ფულით, ყველა მონაა ფულის.

ვაჭართა წოდების საუკეთესო წარმომადგენლები თვითონ გმობენ მათ მიერ შექმნილ ცხოვრებას, თვითონ გაურბიან ასეთ ცხოვრებას და ზოგი მათგანი თვითმკვლელობით ათავენს.

ვაჭრული ურთიერთობა განწირულია, მას არ შეუძლია წარმოშვას ახალი ადამიანები ახალი ცხოვრების შესაქმნელად — აი საერთო დასკვნა გორკის შემოქმედების მეორე, ვაჭრული ხანისა.

ვაჭართა წოდებიდან გამოდიან მსხვილი მრეწველები, რომელთა ოცნებაა რუსეთის გარდაქმნა ამერიკისა და ინგლისის მსგავსად.

შეიძლება მრეწველთა კლასია მოწოდებული ახალი ცხოვრების შესაქმნელად?

ამ კითხვის გადაჭრას გორკიმ მოანდომა მესამე ხანა თავისი შემოქმედებისა.

„არტამონოვების საქმე“, „ბარბაროსები“ წარმოადგენენ მსხვილი ინდუსტრიის წარმომადგენელთა დასურათებას.

მათ შეაქვთ წარმოებაში ტექნიკური გაუმჯობესება, ელექტრომანქანები; ცხოვრებაში კი ისევ ძველი პრინციპი რჩება: გაუტანლობა, ერთიმეორის მტრობა, გაყვლეფა, უმცირესობის ბედნიერება დიდი უმრავლესობის ხარჯზე და საშინელი ყვლეფა.

„ეშმაკი აშენებდა, შენ კი მას ეხმარებოდი“, — ეუბნება არტამონოვს მისი მსახური და ეს არის დახასიათება მრეწველთა კლასის მთელი საქმიანობისა.

დასკვნა ერთადერთია: მრეწველთა კლასი დაფუძნებულია სხვის გაყვლეფაზე და ახალი ცხოვრების შექმნა სამართლიანობისა და სილამაზის საფუძველზე მას არ შეუძლია.

გორკი მიმართავს ინტელიგენციის დასურათებას და აქედან იწყება მეოთხე ხანა მისი შემოქმედების.

„მოაგარაკენი“, „ბარბაროსები“ — აი უმთავრესად საღ არის ინტელიგენციის დასურათება.

რას წარმოადგენს გორკის ინტელიგენცია?

ერთი ნაწილი თბილ ალაგზეა მოკალათებული და სხვა ყველაფერი ფეხებზე ჰკიდია.

მეორე ნაწილი ფუსფუსებს და ძალიან ბევრს ლაპარაკობს.

მესამე გულხელდაკრეფილი განზე გამდგარა და ოცნებობს, ოცნებობს, მხოლოდ ოცნებობს.

ასეთი ხალხი ახალ ცხოვრებას ვერ შექმნის.

მაშ სად არის ხსნა?

ამ კითხვის გადასაჭრელად გორკი მიმართავს პროლეტარიატს და წერს „მტრებს“, „დედას“, „აღსარებას“, „ზაფხულს“.

აქ ის გვაძლევს მუშების ტიპებს და მუშათა ყოფა-ცხოვრებას.

აქ თქვენ ვერა ნახავთ ვაჭრულ-კაპიტალისტური ყოფა-ცხოვრების მსგავსებას.

ერთობა, სოლიდარობა, სიყვარული, მაღალი მისწრაფებანი, საერთო საქმისათვის თავგანწირვა, — აი რა ახასიათებს პროლეტარიატს.

დასკვნა ცხადია: ახალი ცხოვრების შესაქმნელად პროლეტარიატია მოწოდებული.

„აღსარებაში“ მთელი რუსეთის გლეხობა მათეს სახით შეიგნებს ამას და მიდის პროლეტარიატთან, რომ იწამოს მისი მიზანი და მასთან ერთად შეუდგეს ახალი ცხოვრების შენებას.

პროლეტარიატსა და გლეხობას ხელმძღვანელი უნდა.

ვის ირჩევს გორკი ხელმძღვანელად?

იმას, ვინც იყო გორკის ხელმძღვანელი და მასწავლებელი:

ლენინსა და იმის პარტიას.

„საბჭოთა ხელისუფლება წარმოადგენს ჩემთვის ერთადერთ ძალას, რომელსაც შეუძლია რუსეთის ბაღის ინერციის დაძლევა და მისი ენერგიის ამოძრავება ცხოვრების ახალი, უფრო სამართლიანი და გონივრული ფორმების ასაგებად“, — აი გორკის განცხადება.



## საშა წულუკიძე

(მოგონება)

საშა წულუკიძე მე გავიცანი მოსკოვში. მესამე კურსის სტუდენტი ვიყავი, როდესაც საშა ჩამოვიდა სწავლის გასაგრძელებლად. ადამიანი გარეგნობით არ დაფასდება, მაგრამ პირველ მთაბეჭდალებას ხომ გარეგნობა ახდენს. საშას გარეგნობა მეისვე იპყრობდა მნახველის ყურადღებას. არასოდეს არ დამავიწყდება საშას დიდრონი, მიმზიდველი, შავი თვალები, გრძნობით, აზრით აღსავსენი, მუდამ აღვზნებული, მოელვარე და ცეცხლის მფრქვეველნი, განსაკუთრებით მაშინ, როდესაც ის ეკამათებოდა ვისმეს. საკმაოდ მომზადებული იყო, ნაკითხი. მოსკოვში კადევ უფრო დაეწაფა თვითგანვითარებას და ქართულ სათვისტომოში მალე დაიკავა საპატიო ადგილი. სათვისტომოში საშამ სიცოცხლე შემოიტანა და თავისი რეფერატებით ყველას გაუღვიძა ინტერესი სოციალური კითხვებისადმი. მაშინ სტუდენტობა გატაცებული იყო პლენხანოვით და პ. სტრუვეთი. პირველის „Монистический взгляд на историю“ და მეორესი „Критические очерки“ ყველაზე საყვარელი წიგნები იყო ახალთაობისათვის. ქართულ სათვისტომოში სჭარბობდა ეროვნული და ლიბერალური მიმდინარეობა. საშამ თავისი რეფერატებით შემოიტანა ახალი შუქი და აზრთა შეჭახება. იმხანად „მოამბეში“ დაიბეჭდა ლალიონის მოთხრობა „ფირალი დავლაძე“. საშამ სათვისტომოში წაგვიკითხა მოხსენება ამ მოთხრობის გავო. მისი მხატვრული კრიტიკა დაფუძნებული იყო მარქსისტულ მსოფლმხედველობაზე და ჩემზედ პირადად დიდი მთაბეჭდილება დასტოვა. მისი ზეგავლენით მე დავწერე პირველი კრიტიკული წერილი მამია გურიელის პოეზიის შესახებ.

შემდეგ საშას კრიტიკული წერილი ფირალი დავლაძის შესახებ დაიბეჭდა და, რამდენადაც მახსოვს, ეს იყო პირველი ქართული მარქსისტული სიტყვაკაზმული კრიტიკა.

სწავლის დამთავრების შემდეგ საშა თბილისში დაბინავდა.

რამდენიმე ხნის შემდეგ მეც თბილისში დავბინავდი და „კვალში“ ვმუშაობდი. დამჭირდა გუბერნატორის ნაავა, საქირო შეიქნა სერთუკი, კრახმალისანი საყულო და ყელსახვევი. მე არც ერთი არ მქონდა, არც ჩემ ამბანაგებში აღმოაჩნდა არავის. თურქე საშას ჰქონდა. ჯავექანე მასთან; გამომაწყო თავის სერთუკში, შემომატრილა, გადაბრუნდა ლოგინზე და დაიწყო ხარხარი. საშა მაღალი იყო. ჩემი პატარა ტანი იმის გრძელ სერთუკში მეტად სასაცილო გამოვიდა. მაშინ მცირე თათბირის შემდეგ სერთუკი ტანისამოსზე ჩავიცვი, შევიკარი კარგად ქილეტი, დავმსხვილდი, მაგრამ არანაკლებად სასაცილო ვიყავი, სანამ საშა არ ამოვიდგა გვერდით, ხოლო როდესაც გვერდში ამოვიდგა, თავისი გრძელი კახერა და მაღალი წელი უფრო წაიგრძელა, ნამდვილი დონკიხოტი და სანჩო-პანჩო გამოვედით.

გადავწყვიტეთ, რომ უსერთუკოდ გუბერნატორთან მისვლას ისევ ასე სჯობდა და მეც წავედი.

საშა შემდეგ ბათუმში დაბინავდა. მეც დროებით დავტოვე თბილისი და ამგვარად ერთმანეთს დავშორდით.

1902 წელს მთელი ზაფხული და შემოდგომა ვმუშაობდი ყოველდღიურად „კვალის“ რედაქციაში ფ. მახარაძესთან, ნიკო ვლიასთან, ირ. ევდოშვილთან.

რედაქციის დავალებით აგვისტოში ჩველი ბათუმს, აქაურ ამბანაგებთან მოსალაპარაკებლად სარედაქციო საქმეებსა და საკითხებზე. ჩამოვხტი საშასთან. იქვე ვავმართეთ რამდენჯერმე ამბანაგური კრება.

ვატყობდი საშას, რომ მისი ჯანმრთელობა შერყეული იყო. წინანდელთან შედარებით გამხდარიყო. თვალებში ჩუმი საცხე გამოჰკრთოდა, ახველებდა; ვთხოვე. გაგსინჯავ-მეთქი, მაგრამ სიცილად არ ეყო. ავადმყოფური ფსიქოლოგია ავადმყოფობაზე უარესიაო. მიპასუხა.

— გეთანხმები, მაგრამ არც ის არის კარგი, როდესაც ადამიანი სრულებით არ ზრუნავს თავის ჯანმრთელობაზე, — მივუგე.

— ჩემო ვანო, ბევრი საკითხია, ძალიან ბევრი გაცილებით უფრო მნიშვნელოვანი და საინტერესო, ვიდრე პირადი ჯანმრთელობა, — იყო საშას პასუხი.

ზოგიერთი იმდენად შეპყრობილია შიშით, ვაი თუ იქნება რამ მჭირდესო, რომ ამჯობინებს, სრულებით არაფერი იცოდეს, ვიდრე იცოდეს, რომ მძიმე სენით არის შეპყრობილი.

ზოგი კი იმდენად გართულია საქმეებში, რომ საკუთარ ჯანმრთელობაზე ფიქრი და ზრუნვა სრულებით ავიწყდება, ან და დროც არა აქვს ამისათვის.

უკანასკნელთა რიცხვს ეკუთვნოდა საშაც. ის ჩაბმული იყო თეორიულსა და პრაქტიკულ მუშაობაში და ჯანმრთელობაზე ზრუნვისათვის არ ეცალა.

იმ ხანად მე მიმიწვიეს ჩიხაიში სამუშაოდ და იქ დავრჩი ორ წელიწადს. ამ ხნის განმავლობაში საშას ორი ბავშვი დაეხოცა. იმის მგრძნობიარე ბუნებას ჯა შერყეულ ჯანმრთელობას ამან უსათუოდ ჩასცა ლახვარი და ჭლექმა იჩინა თავი. საშა იძულებული შეიქნა სამსახურისა და ბათუმისათვის თავი დაენებებინა და გადმოსახლდა ქუთაისს. ქუთაისში გადმოვედი მეც, როდესაც საშა ვინახულე, ჭლექი უკვე მორეული ჰქონდა, მაგრამ ის სრულებით არ ზოგავდა თავის თავსა, ფარულ კრებებში იყო ჩაფლული. მუშებსა და ნოქრებში ეწეოდა პროპაგანდას, აგიტაციას და დაღლილი, მშინერი, დაქანცული და გაფითრებული ნაშუალამევის პირველსა ჯა ორსაათზე ბრუნდებოდა სახლში. ხშირად აუვარდებოდა ხოლმე სისხლის ხველება. მაშინ ჩავაწვენდით ლოგინში და ვმკურნალობდით მე და პარმენ ჭიჭინაძე, მაგრამ როგორც კი მოიკეთებდა, მაშინვე გავარდებოდა. ბევრჯერ დანიშნულ დროს მივსულვართ მე და ჭიჭინაძე საშასთან, ავადმყოფი კი სახლში აღარ დაგვხვევდრია!

როდესაც ჩავიგდებდით ხელში, ვუსაყვედურებდით, ვარიგებდით, მაგრამ ამოდ.

— მე ხომ ბავშვი არა ვარ. ჩემი არსებობის ერთადერთი მიზანი რევოლუციის მუშაობაა და თუ კი ის მომისპეთ, სიცოცხლე რისთვის მინდა? კვერცხები რომ ვყლაპო და რძე ვსვა? — გვიპასუხებდა და ჩავგაჩუმებდა.

მაშინ ქუთაისში განსაკუთრებით გაცხოველდა და გაძლიერდა სარევოლუციო მოძრაობა ჯა საშა მთელი თავისი არსებით ჩაება შიგ. მას დაავიწყდა ყველაფერი — ოჯახი, ცოლი, შვილი, საკუთარი ჯანმრთელობა, ჭამა. ახსოვდა ერთადერთი რევოლუცია. მისთვის არაფერი აღარ არსებობდა, გარდა რევოლუციისა. საშას ველარსად ვხედავდით, ის არსად სჩანდა; მთელი დღე და ღამე ატარებდა სარდაფებში და ეწეოდა სარევოლუციო მუშაობას მუშებში.

მუდამ ჰქონდა სიცხე 38—39 გრადუსი, მაგრამ ის იმდენად გატაცებით, ისეთი თავდავიწყებით ემსახურებოდა რევოლუციას, რომ სიცხე არ აწუხებდა, სიცხეს არა გრძნობდა — აწყობდა ფარულ კრებებს, რაზმავდა, ამზადებდა და ათვითცნობიერებდა პროლეტა-

რულ ელემენტებს. ასეთი გატაცებული, თავდავიწყებული მუშაობა, როგორსაც საშა ეწეოდა, მეტად იშვიათია.

ამ დასუსტებულ, ღონემიხდილ ადამიანს, რომლის ფილტვებშიაც ჰქონდა უკვე ქარიშხალივით ბობოქრობდა, პროლეტარიატის გამარჯვების შეურყეველი იმედი აძლევდა დაუშრეტელ ენერჯიას საარაკო მუშაობის გასაჩაღებლად.

რევოლუციის ქუჩაზე საშა იწოდა. მისი მეგობრები ვხედავდით ამას, მაგრამ არაფერი შეგვეძლო: არ იყო არავითარი ძალა, არავითარი რჩევა, არავითარი საბუთი, რომელიც საშას ააღებინებდა ხელს ასეთს მუშაობაზე.

მოქანცული, ღონემიხდილი დაბრუნდებოდა სახლში და მოსვენების ნაცვლად ლიტერატურულ მუშაობას შეუდგებოდა. საშა შეგნებულად ეწირებოდა მსხვერპლად მუშა ხალხის დიად საქმეს: აშკარა იყო, რომ ის სანთელივით დაიწვოდა და დაიფერფლებოდა მალე. ამიტომ მე და პარმენ ჰიჭინაძემ გადაწყვიტეთ, ფული გამოგველო და საშა აბასთუმანს გაგვესტუმრებია.

სამზადისში რომ ვიყავით. საშას მოულოდნელად აუვარდა თავის ტკივილი.

მალე გამოიკვია, რომ ეს იყო მენინგიტი (ტვინის ანთება) ჰქონდა ნიადაგზე. ჩვენ ვუმაღავდით, მაგრამ საშამ თვითონ გვითხრა: ტყუილად ცდილობთ ჩემს გამობრუნებას, ვიცი, ჩემი სნეულება მენინგიტია და დიდხანს არ გასტანს, მაგრამ რამდენს ვიცინებ, რომ თქვენი მოლოდინის წინააღმდეგ ორ თვეს ვიცოცხლებდეო.

ტუბერკულოზის ბუნება, მიმდინარეობა იმდენად საფუძვლიანად შესწავლილი ჰქონდა საშას, რომ ვერ შეეძელით მისთვის თვალეზი აგვეხვია. ნაძალადევად ვიცინოდით იმის სიტყვებზე, ექვიანს ვუწოდებდით, იმის თავის ტკივილს მოქანცულობას ვაწერდით და ვპირდებოდით: აი წახვალ აბასთუმანს, დაისვენებ კარგად, შემოდგომიდან გაათკეცებული ენერჯიით შეუდგები მუშაობასაო.

ერთი ამგვარი ლაპარაკის დროს საშამ თვალეზი მოგვაპყრო და გულდასმით გვისმენდა. მე გულში გამიელვა და ალბათ ექიმ ჰიჭინაძესაც: მგონი დაეაჭერეთო. როდესაც სიჩუმე ჩამოვარდა, საშამ ღიმილით მოგვემართა:

— საშინლად მებრალებით, საშინლად!

— რატომ?

— იმიტომ, რომ გლახა დიპლომატივით მუდამ სიცრუე უნდა ილაპარაკოთ, მაშინაც კი, როდესაც თქვენი აღარავის სჯერა.

ჩვენი ყოველგვარი მეცადინეობა ამაოდ დარჩა, ჩვენი იმედი

ჩაიშალა: საშამ იცოდა, რომ მას მენინგიტი ჰქონდა ტუბერკულოზის  
ხიდაგზე და მისი სიცოცხლე მალე დასრულდებოდა. უკანასკნელ  
დღემდე საშამ არ დაუკარგავს საღი აზროვნება. მხოლოდ უკანასკ-  
ნელ დღეს აზროვნება დაჰკარგა და მალე შეწყდა კიდევ ამ იშვიათი  
ადამიანის გულისცემა.

საშამ რომ სხვა ადამიანივით თავისი ჯანმრთელობისათვის მი-  
ეჭვია ყურადღება, თუ არ გამომრთელდებოდა, კიდევ იცოცხლებდა  
რამდენიმე წელიწადს მაინც. მაგრამ ის სრულებით არა ზოგავდა  
თავის თავს. ჯანმრთელობაზე ფიქრი და ზრუნვა ისეთს ხანაში გაუ-  
მართლებელ ბოროტმოქმედებად მიაჩნდა. ის დაუღალავად, შეუს-  
ვენებლად, თავდავიწყებით და თავგანწირულად შრომობდა სი-  
ტყვიით, კალმით, თეორიულად, პრაქტიკულად. მის გულში ეზიზღებ-  
და ცეცხლი ნამდვილი რევოლუციონერისა და მუშათა კლასის იშვი-  
ათი მებრძოლისა და ამ ცეცხლმა დასწვა ის უდროოდ.

მუშათა კლასს ელვის სისწრაფით მოედო საშამ გარდაცვალე-  
ბის აშბავი. გასვენებასა და დასაფლავებას აუარებელი ხალხი დაეს-  
წრო, მოვიდნენ მუშათა დელეგაციები სხვა და სხვა ქალაქიდან. სა-  
შა წაასვენეს ხონს.

რადგანაც მე თვითონ მშრალი პლევრიტით ვიყავი ავად, არ  
გავყოლივარ. შემდეგ გადმომცეს: ცხედარს გუბში კობა დახვდა და  
ისეთი სიტყვა წარმოსთქვა, რომ ნამდვილი ქექა-ქუხილი იყო რე-  
ვოლუციონაო.

1935

## ივანე გომართელი

ცხოვრება და მოღვაწეობა.

ჩვენი ახლო წარსულის გამოჩენილ მოღვაწეთა შორის, კერძოდ, ქართული ლიტერატურის ისტორიკოსთა და მკვლევართა შორის ივანე გომართელს ფრიად თვალსაჩინო ადგილი უჭირავს. მი-ი-საუკუნის ბოლო წლებიდან დაწყებული სიცოცხლის უკანასკნელ დღემდე მან არა ერთი შესანიშნავი ნაშრომით გააძლიერა ქართველი ხალხის სულიერი საგანძური.

ამავე დროს მას მეტად საინტერესო ბიოგრაფია ჰქონდა. თავისი ცხოვრების გზაზე ივანე გომართელი შეხვედრია არა ერთ გამოჩენილ ქართველ მოღვაწეს, ახლო ურთიერთობა ჰქონია მათთან და თვითონაც სათავეში სდგომია არა ერთ კულტურულ წამოწყებას:

ივანე გომართელი დაიბადა 1875 წლის 2 ოქტომბერს<sup>1</sup> (ძველი სტილით) ზემო იმერეთში, სოფ. გორისაში, ღარიბი აზნაურის გედეონ კაციას ძე გომართლის ოჯახში. დედა — სალომე სვიმონის ასული — კურცხალიას ქალი იყო.

პირველდაწყებითი განათლება ივ. გომართელმა ოჯახში მიიღო. როცა სასკოლო ასაკის გახდა, იგი მამამ თბილისში სასწავლებლად ჩამოიყვანა და სათავადაზნაურო სასწავლებელში მიაბარა. მშობლებსა და ახლობლებს დაშორებული პატარა ივანე ძლიერ განიცდიდა ოჯახიდან შორს ყოფნას. ცნობილ პედაგოგ და სახელოვან მამულიშვილზე, თავის მასწავლებელ ალექსი ჭიჭინაძეზე მოგონებაში ივ. გომართელი წერს: „როდესაც სათავადაზნაურო სასწავლებელში მიმაბარეს, ობლობის მთელი საშინელება მაშინ განვიცადე. მარტოობა მაშინ ვიგრძენი. დედა შორს იყო, შორს; მისი ალერსი,

<sup>1</sup> ივანე გომართლის დაბადების თარიღად ალ. ხახანაშვილს და სხვებს 1877 წელი აქვთ აღნიშნული, ზოგს 1876 წ., რაც არ არის სწორი, 1876 წლის 8 ოქტომბერი (ძვ. სტ.) მონათელის თარიღია.

მისი ხილვა, მისი ხმის გაგონება, მის კალთაში თავის ჩადება, მის უბეში ხელის შეყოფა მენატრებოდა, მწყუროდა.

ამხანაგებმა ეს სევდა ვერ შემომსუბუქეს, რადგანაც თავიდანვე ბავშვური. გულბრყვილო, უბოროტო დაცივნით შემხვდნენ: ღვიტიკელა. ხოხონიკაო. ზგონია, მე მაშინ პირველი იმერელი ვიყავი სასწავლებელში.

როდესაც ვავიგე, რომ სასწავლებლის მზარეული ივანე რაჭველი იყო, თუნდა ბიძაჩემი დამენახოს. ვიცოდი, რომ რაჭა ჩვენი სოფლიდან ახლოს იყო და ივანეს მივეკედლე. შემიყვარდა, იმასაც შევეყვარდი...

...სიყვარულმა გამათამამა. ობლობის და მარტოობის ტვირთი შემომსუბუქდა. თავისუფალ დროს ივანეს ხან ზურგზე მოვახტებოდი. ხან კისერზე ჩამოვეკიდებოდი...

...მე რომ სწავლა დავიწყე, პედაგოგიაში სიყვარულსა და პატივისცემას შიში სჭარბობდა, მასწავლებელთა უმრავლესობა უფრო შიშით მოქმედებდა ჩვენზე, ვიდრე სიყვარულით. ამის გამო სილა ყბაში დიდად იყო მიღებული, წკიპურტები და ყურების აწევა ხომ ლალობდნენ და ხარობდნენ...

...შემოდგა თუ არა ალექსიმ სასწავლებელში ფეხი, სილა, წკიპურტები, ყურების აწევა სადღაც გაიპარნენ...

სწორედ ხუთი წელიწადი იყო ალექსი ჩემ მასწავლებლად და ამ ხნის განმავლობაში მე არ მახსოვს, რომ ერთხელ ხმამალლა სიტყვა ეთქვას კლასში, ერთხელ გავეწყრომოდეს, ერთხელ აღელვებულყოფს, აჩქარებულყოფს გაკვეთილის დროს.

რუსულს ალექსი გვასწავლიდა ქართული ენის შემწეობით. უმეტეს დროს გაკვეთილს ახსნა-განმარტებას ანდომებდა და სახლში როდესაც ვბრუნდებოდით, გაკვეთილი თითქმის მზადა გვქონდა.

ალექსი მარტო მასწავლებელი არ ყოფილა. ის იყო მზრუნველი მამა, რომელიც საკუთარ შვილზე, შესაძლებელია, იმდენს არ ფიქრობდა. რამდენსაც ჩვენზე.

სათავადაზნაურო სასწავლებელში ჩემ დროს ოთხი კლასი იყო და მესამეში რომ გადავედი, მეოთხე დახურეს უსახსრობის გამო.

სასწავლებლის გათავების შემდეგ მოსწავლენი გზაკვალდაბნეული რჩებოდნენ: გიმნაზიაში შესვლა მაშინ იშვიათს თუ ელირსებოდა, დანარჩენები ან პატარა მოხელეებად შედიოდნენ სადმე, ან მუქთაყლაპიათა და გამოუსადეგარ ადამიანთა რიცხვს ემატებოდნენ.

მიუხედავად იმისა, რომ მეოთხე კლასი ჩვენი ცხვირის წინ მოსპეს უსახსრობის გამო, ალექსიმ იმდენი იმეცადინა, რომ ბანკის

ზარჩით მესამე კლასის გათავების შემდეგ სუყველა სურამში წაგვი-  
ყვანა გიმნაზიისათვის მოსამზადებლად.

უკ ჩვენ გვექონდა საკუთარი სადგომი და გვყავდა საკუთარი მზა-  
რეული.

ჩვენი მასწავლებლები იყვნენ ალექსი, ექვთიმე თაყაიშვილი და  
განსვენებული გრ. გრძელიშვილი...

...აგვისტოში, როდესაც გამოცდების დრო დადგა, ალექსიმ  
თვითონ წამოგვიყვანა თბილისს და დაგვაბინავა სასწავლებელში,  
რომ გამოცდების დროს უფრო ეგუო ჩვენთვის ყური.

გამოცდების ყველას ძალიან გვეშინოდა და განსაკუთრებით  
კი რუსულისა, რადგანაც გიმნაზიებში ისეთი წარმოდგენა ჰქონდათ  
ჩვენზე იქაურ მასწავლებლებს, თითქოს ჩვენ ტყიდან გამოვარდნი-  
ლი ვიყავით და რუსულისა იწი არა გვესმოდა რა.

ალექსი ყოველთვის გვამხნევებდა, თვითონ მოგვყვებოდა გა-  
მოცდებზე.

...რვა კაცს გვამზადებდა და ერთის გარდა სუყველამ ჩინებუ-  
ლად ჩავაბარეთ გამოცდა, ყველა მიგვიღეს გიმნაზიაში<sup>1</sup>.

გიმნაზიაში ყოფნისას ივანე ბეჯითად მეცადინეობდა, ბევრს  
კითხულობდა და საკმაო განათლებაც მიუღია. სასკოლო საგნებს  
დიდ მნიშვნელობას ანიჭებდა და ამიტომაც იყო, რომ მხოლოდ მან  
დაამთავრა 1894 წელს თბილისის მეორე გიმნაზია ოქროს მედლით.  
და ეს გარემოება მაშინდელმა გაზეთმა „ივერია“ ახალი ამბების  
რუბრიკაშიც აღნიშნა: „წელს მეორე კლასიკურ გიმნაზიაში ოცდა-  
ათმა მოსწავლემ დაამთავრა სწავლა. ამათში ოთხი ქართველია: ივანე  
გომართელი, გიორგი ყაზახაშვილი, თ. გიორგი მუხრანსკი და  
რ. გრძელიშვილი. ივანე გომართელი დაჯილდოვებუ-  
ლია ოქროს მედლით და სტიპენდიით (ხაზი  
ჩვენია. — ვ. წ.). ყველანი უმაღლეს სასწავლებელში აპირებენ შეს-  
ვლას“<sup>2</sup>.

გიმნაზიის დამთავრებისთანავე 19 წლის ივანე გომართელი მოს-  
კოვს გაემგზავრა სწავლის გასაგრძელებლად. წარმატებით ჩააბარა  
შისაღები გამოცდები და ჩაირიცხა მოსკოვის უნივერსიტეტში სამე-  
დიცინო ფაკულტეტზე.

ივანე გომართლის მოსკოვში სწავლის პერიოდში ქართველ  
სტუდენტობას მძიმე ეკონომიურ პირობებში უხდებოდა ცხოვრება.  
იმ დროის ქართულ პრესაში ღშირად შეხვდებით ცნობებს, თუ რო-

<sup>1</sup> ჟურნ. „თეატრი და ცხოვრება“, 1917 წ., № 6.

<sup>2</sup> გაზ. „ივერია“, 1894 წ., № 124.



გორ. მატერიალურ სივიწროვეს განიცდიდა რუსეთში მყოფი ქართველი მოსწავლე ახალგაზრდობა; ბევრი ხელმოკლეობის გამო სწავლას თავს ანებებდა და სამშობლოში ბრუნდებოდა, ზოგი კერძო გაკვეთილებით ჯა სხვადასხვა სამუშაოში აღებული ფულით აგრძელებდა სწავლას.

მართალია, ივანე გომართელი სტიპენდიას ღებულობდა, მაგრამ მაინც უჭირდა მატერიალურად, დახმარებას არავისაგან ელოდა; ამიტომ მშობლებთან ველარ ჩამოდიოდა, ერიდებოდა ზედმეტ ხარჯს, მოსკოვში რჩებოდა სამუშაოდ; იქ ერთმა მდიდარმა მემამულემ. თავისი შვილების რეპეტიტორად აიყვანა. ყოველ ზაფხულს მემამულის ბავშვებს ამეცადინებდა მოსკოვის მახლობლად აგარაკზე, სადაც უზრუნველყოფილი იყო უფასო ბინით და კვებით, თანაც გასამრჩელო ეძლეოდა. აღებულ ფულს სწავლის გასაგრძელებლად იზოგავდა.

ღარიბ ქართველ სტუდენტთა სასარგებლოდ სადამო-კონცერტები ეწყობოდა ხოლმე. მაშინ მოსკოვში ერთ ასეთ სადამოს, 1897 წლის 12 თებერვალს, ივანე გომართელიც დაესწრო. თბილისში გამოგზავნილ კორესპონდენციაში — „ქართული სადამო“ იგი წერდა: „როგორც სხვა ქალაქებში. ისე მოსკოვშიაც ქართველი სტუდენტები ძალიან ხელვიწროდ გახლავართ; ხელვიწროობა კი არამც და უცხო ქვეყანაში — უცხო ხალხში, შენს საკუთარ სამშობლოშიაც ძალიან შემაწუხებელია. ამიტომ ქართველი სტუდენტები მოსკოვში ღარიბი ამხანაგების სასარგებლოდ ყოველ წელს ვმართავთ „ქართულ სადამოს“ და შემოსავალი ფულით ერთმანეთს ხელს ვუმართავთ... ასე რომ არ მოვიქცეთ, შიმშილით დავიხრცებით. ჩვენი შეძლებული პირები იმდენად კაცთმოყვარე და გულკეთილი არ არიან ჯერ, რომ წელიწადში ერთი სადამო ქაღალდი არ ითამაშონ და იმ ფულის მცირეოდენი ნაწილი, რომელსაც წააგებენ იმ ერთ სადამოს, საქველმოქმედო საქმეს მოახმარონ“<sup>1</sup>.

ივ. გომართელი ბავშვობიდანვე გატაცებული იყო მხატვრული ლიტერატურით და ისტორიით, ბეჯის კითხულობდა, წერდა ლექსებსა და მოთხრობებს. უკვე მოსკოვის უნივერსიტეტის სამედიცინო ფაკულტეტის მეორე კურსის სტუდენტი აქტიურად ჩაება ლიტერატურულ და საზოგადოებრივ საქმიანობაში, გახდა ჟურნ. „ჯეჯილის“ უახლოესი თანამშრომელი: რეგულარულად აგზავნის ორიგინალურ თუ თარგმნილ ლექსებს, სამედიცინო-პოპულარულ სტატიებს, ახლომეგობრული ურთიერთობა აქვს ჟურნალის რედაქტორ-

<sup>1</sup> გაზ. „ცნობის ფურცელი“. 1897 წ., № 129, გვ. 3.

გამომცემელ ანასტასია თუმანიშვილ-წერეთელთან, რასაც ნათლად ადასტურებს მათი პირადი მიმოწერა. ეს სიახლოვე შეიძლება იპოვა იყო გამოწვეული, რომ ივ. გომართელი, როგორც ის თავის ზოგონებაში წერს, ანასტასიას მეუღლეა — გიორგი წერეთელს ძალიან კარგად იცნობდა, „ჩემი სოფლიდან იყო და მის ოჯახში ხშირად დავიარებოდი პატარაობიდანვე“, მეგობრობდა მის შვილებს — ელენეს, ირაკლისა (კაკი) და ლევანს. სწორედ მათი ასეთი სიახლოვე იყო მიზეზი, რომ საფრანგეთში გათხოვილმა ელენე წერეთელმა, ცნობილმა მწერალმა და მთარგმნელმა, ქუთაისიდან თბილისში ივ. გომართლის გადმოსვლა რომ გაიგო, 1907 წლის 23 ოქტომბერს ან. თუმანიშვილ-წერეთელს დიდად აღფრთოვანებულმა მოწერა: „...ვანო გომართლის თბილისში გადმოსვლამ და თქვენს ახლოს დასახლებამ ძალიან გამახარა შენთვის და ლევანისათვისაც: ლევანს კარგი მეგობარი დაუახლოვდა და შენ — „ჭეჭილის“ საუკეთესო თანამშრომელი (ეს ვანოს კი არ უთხრა, თუ არა თავს გამოიღებ „საუკეთესო ვაჟო“). ძიძაც გახარებული იქნება, ვინ იცის რამდენჯერმე კიდევ იყო მასთან თავის გასასინჯავად...“!

გ. წერეთლის ოჯახმა დადი როლი ითამაშა მისი შემდგომი აზროვნებისა და შეხედულებების ჩამოყალიბებაში. ამ ოჯახმა შეაყვარა და ჩაუწერა პატარაობიდანვე მას სამშობლოს, მშობლიური ენის, ლიტერატურისა და ისტორიის სიყვარული და პატივისცემა.

ან. თუმანიშვილმა ახალგაზრდა ივ. გომართელს შეამჩნია ნიჭი, ცოდნა, მონდომება, მუყაითობა და ამიტომ იჩინდა განსაკუთრებულ ზრუნვას, ეხმარებოდა, რითაც კი შეეძლო. გაკვირვებასა თუ სასოწარკვეთილებაში მყოფი ივ. გომართელი ანასტასიას უზიარებდა თავის გულის ნაღებს და მისგან ღებულობდა მშობლიურ რჩევა-დარიგებას.

ივ. გომართელი სამწერლო ასპარეზზე მოგვევლინა, როგორც ფრანგულიდან საბავშვო მოთხრობა „გულთმისინა“ მთარგმნელი, რომელიც 1896 წლის ეურნ. „ჭეჭილის“ პირველ ნომერში დაიბეჭდა. აქედან მოყოლებული ის ამ ეურნალის უცვლელი თანამშრომელია, მოსკოვიდან რეგულარულად უგზავნის რედაქციას ორიგინალურ და მთარგმნელ ნაწერებს: ლექსებს, მოთხრობებს, სამეცნიერო-პოპულარულ წერილებს ისტორიის, მედიცინისა და ბუნებისმეტყვე-

1 კ. კეკელიძის სახ. საქართველოს მეცნ. აკად. ზელნაწერთა ინსტიტუტის ან. თუმანიშვილ-წერეთლის ფონდი № 670.

ლების სხვადასხვა საკითხზე, რომლებსაც, თავისი გვარის გარდა-  
აქვეყნებდა „ვანოს“ ფსევდონიმით<sup>1</sup>.

1896 წელსვე ივ. გომართელმა რუსულიდან თარგმნა და ივ.  
როსტომაშვილმა ცალკე წიგნად გამოსცა საბავშვო მოთხრობა  
„ხტუნია-ციყუნია“, რომელსაც ცნობილი ქართველი გრაფიორის  
გ. ტატიშვილის მიერ ამოკრილი 19 სურათი ამშვენებს. ამ თარგ-  
მანმა თავის დროზე დიდი მოწონება დაიმსახურა.

ივ. გომართელი რამდენიმე ათეული ორიგინალური თუ თარგ-  
მნილი საბავშვო ნაწარმოების ავტორია. მან დიდი ამაგი დასდო ქარ-  
თული საბავშვო ლიტერატურის დამკვიდრება-განვითარებას. ივ.  
გომართელმა თავიდანვე სახელი გაითქვა წერის სადა, ყველასათვის  
გასაგები და მიზნიდველი მანერით. მის ნაწერებს დიდი ჯა პატარა  
სიამოვნებით კითხულობდა. როდესაც გიორგი წერეთლის ქალიშვი-  
ლმა ელენე წერეთელმა საფრანგეთში მიიღო 1907 წლის № 4 „ჯე-  
ჯილი“, სადაც ივ. გომართლის მოთხრობაც იყო მოთავსებული.  
გულდასმით წაკითხვის შემდეგ ან. თუმანიშვილ-წერეთელს მოს-  
წერა: „ჩემო საყვარელო ტასო, მივიღე გუშინ „ჯეჯილი“, ძალიან  
პომეწონა, კარგად შედგენილი, კარგი ნომერი არის. ვანოს „ბედნიე-  
რი ქვეყანა“, როგორც ყოველთვის, ცოცხალი და სასიამოვნო ენით  
და ბავშვებისათვის ადვილად გასაგებად არის დაწერილი“<sup>2</sup>.

ივ. გომართელს, როგორც საბავშვო მწერალს, დიდად აფასებდა  
და პატივს სცემდა თვით იაკობ გოგებაშვილი, რომელსაც 1908  
წლის აგვისტოში განსაკუთრებულად წერილობით მიუმართავს ივ.  
გომართლისათვის, რომ დაეწერა რაიმე ბავშვების ჰიგიენისა და მან-  
თი ყოველდღიური ცხოვრების რეჟიმის შესახებ. ეს წერილი უნდა  
ყოფილიყო ჭკუის მასწავლებელი როგორც ბავშვებისათვის, ისე  
მშობლებისათვისაც. წერილი მეცნიერულად გამართული, თანაც პო-  
პულარული და მხატვრული ენით, მიმზიდველი მოთხრობის სახით  
უნდა დაწერილიყო.

ივ. გომართელმა ეს თხოვნა მიიღო და 1908 წლის 12 აგვისტოს  
იაკობ გოგებაშვილს საპასუხოდ წერილსა სწერს:

„ღრმად პატივცემულო ბ-ნო იაკობ!

თქვენს თხოვნას დიდი სიამოვნებით შევასრულებ, მაგრამ ვრ-

<sup>1</sup> იხილეთ ჩვენი წერილი — „ერთი უცნობი ფსევდონიმის გამო“, „ლიტერა-  
ტურული საქართველო“, 1965 წ., № 24, 11 ივნისი.

<sup>2</sup> კ. კეკელიძის სახელობის საქართველოს მეცნ. აკად. ხელნაწერთა ინსტიტუ-  
ტის ან. თუმანიშვილ-წერეთლის ფონდი № 667.

თი გარემოების მეშინია: ვაითუ ჩემი წერილი თქვენთვის გამოუსადეგარი შეიქნეს. თქვენისთანა პედაგოგი ჩვენ კი არა, დღემ რუსეთსაც აღარ მოეპოვება; ამიტომ, ცხადია, ბავშვებისათვის შემის მსგავსს ვერას დავსწერ, რასაც თქვენ დასწერდით, გარდა ამისა თბილისში ახლა ექიმები ძალიან ცოტანი არიან და მთელი ამოდენა ხალხი მე მომაწყდა. სწეულება — ნამეტნავად კუჭისა და ნაწლავებისა — ახლა აქ ძალიან გავრცელებულია და დილის 7 საათიდან საღამოს რვა საათამდე მოცლა არა მაქვს. ამიტომ შესაძლებელია თქვენს მიერ შეკვეთილი წერილი რიგიანი არ გამომივიდეს. ყოველ შემთხვევაში მე დავწერ და გაახლებთ; თუ ივარგოს, ისარგებლეთ, თუ არ ივარგოს და მე ნუ მომერიდებით: ან გადაასწორეთ. ან გადააკეთეთ, ან სულ უყურადღებოდ დასტოვეთ.

თქვენი მარად პატივისმცემელი

ივ. გომართელი“.

მიუხედავად ივ. გომართლის საექიმო პრაქტიკით ასეთი გადატვირთულობისა (დღეში 15—16 საათის განმავლობაში ღებულობდა პაციენტებს), მან მაინც ცხრა დღეში პირნათლად შეასრულა თავისი დაპირება და 1908 წლის 21 აგვისტოს ამცნობს იაკ. გოგებაშვილს:

„ღრმად პატივცემულო ბ-ნო იაკობ!

თქვენს მიერ შეკვეთილი წერილი მე უკვე გავათავე შავად, მაგრამ არ ვიცი: დიდხანს დარჩებით მანჯ თუ არა. თუ მალე ჩამობრძანდებით, მაშინ აქ მოგართმევთ, თუ არა და მანდ გამოგიგზავნით. თუ გამოგადგებათ, ხომ კარგი, თუ რასმე საჭიროდ დაინახავთ, ჩაიმატებთ. მართლწერა, რასაკვირველია, თქვენი იქნება. გადაწერა მეზარება, — ასეც გარკვევით არის დაწერილი. თუ არ ივარგებს, ნუ მომერიდებით: ამისთანა შემთხვევაში მე წყენა არ ვიცი.

თქვენი უმორჩილესი ივ. გომართელი“<sup>1</sup>.

ივ. გომართლის მიერ დაწერილი წერილი იაკ. გოგებაშვილს მოწონებია და თავისი „ბუნების კარის“ ახალ — მეთვრამეტე გამოცემაში, რომელიც 1909 წელს გამოვიდა, შეუტანია შემდეგი სათაურით: „როგორ მოიპოვეს ვახტანგმა და თამრომ სრული ჯანის სამრთელე და შეიძინეს განვითარება გონების და ზნეობისა“<sup>2</sup>, და მთელი 18 გვერდი დაუთმო. ამ წერილს არც ახლა დაუკარგავს თავისი ცხოველმყოფელი ძალა.

ივ. გომართლის, როგორც ქართული საბავშვო ლიტერატურის

<sup>1</sup> იაკობ გოგებაშვილის წერილები მომაწოდა ფილოლოგიის მეცნ. დოქტორმა მ. გოზალიშვილმა, რისთვისაც დიდ მადლობას მოვახსენებ.

<sup>2</sup> „ბუნების კარი“, თბ. 1909 წ., გვ. 391—408.

ერთ-ერთი მესვეურისა და ამაგდარის დამსახურება იმთავითვე ღირსულად შეაფასა პროფ. ალ. ხახანაშვილმა და აკ. წერეთლის, რაფ. გრისთავის, იაკ. გოგებაშვილის, ეკ. გაბაშვილის, ნ. ლომოურის გვერდით მასაც ასახელებს.

ალ. ხახანაშვილმა ივ. გომართელს მიუძღვნა მთელი თავი, სადაც აღნიშნავდა, რომ „იგი ერთ-ერთი უნაყოფიერესი ახალგაზრდა პუბლიცისტი, კრიტიკის სფეროში უტილიტარულ თვალსაზრისზე დგას და უარყოფს წმინდა ხელოვნების მნიშვნელობას“<sup>1</sup>.

ივ. გომართელი მოსკოვის უნივერსიტეტში სამედიცინო ფაკულტეტზე სწავლის პერიოდში ესწრებოდა გამოჩენილ მეცნიერთა ლექციებს ჰუმანიტარულ საგნებში.

იმ დროს მოსკოვის უნივერსიტეტში არსებობდა „ქართველ სტუდენტთა სათვისტომო“, სადაც ეწეოდნენ ცხოველ კულტურულ-საგანმანათლებლო მუშაობას. ამ წრეში კითხულობდნენ მოხსენებებს, რეფერატებს და შემდეგ მსჯელობის საგნად ხდიდნენ. წრეს ხელმძღვანელობას უწევდა პროფ. ალ. ხახანაშვილი.

ივ. გომართელი ამ წრის აქტიური წევრი იყო და წრეში ალ. წულუკიძის მიერ წაკითხულმა რეფერატმა — „ახალი ტიპი ჩვენს ცხოვრებაში“ მისცა სტიმული დაწერა თავისი პირველი ვრცელი კრიტიკული წერილი — „თხზულებანი მამია გურიელისა“, რომელიც შემდეგ „კვალში“ დაიბეჭდა<sup>2</sup>.

ივ. გომართელი თავის მოგონებაში, რომელიც 1936 წლის 3 ნოემბრით არის დათარიღებული, წერს: „საშა წულუკიძე მე გავიცანი მოსკოვში. მესამე კურსის სტუდენტი ვიყავი, როდესაც საშა ჩამოვიდა სწავლის გასაგრძელებლად... საკმაოდ მომზადებული იყო, ნაკითხი. მოსკოვში კიდევ უფრო დაეწაფა თვითგანვითარებას და ქართულ სათვისტომოში მალე დაიკავა საპატიო ადგილი. სათვისტომოში საშამ სიცოცხლე შემოიტანა და თავისი რეფერატებით ყველას გაუღვიძა ინტერესი სოციალური კითხვებისადმი. მაშინ სტუდენტობა გატაცებული იყო პლენხანოვით და სტრუვეთი. პირველის „Манис-

<sup>1</sup> А. Хаханов, Очерки по истории грузинской словесности. Вып. 4. Москва. 1906 г., стр. 445.

<sup>2</sup> 1943 წელს გამოცემულ ალ. წულუკიძის „თხზულებების“ შენიშვნებში (გვ. 289) წერია, რომ „ალ. წულუკიძემ მოსკოვში „ქართველთა სათვისტომოში“ წაკითხა რეფერატი 1898 წლის შემოდგომაზე“. როგორც ივ. გომართლის მოგონებიდან ჩანს, ეს ცნობა არ არის სწორი, რადგან 1898 წლის 9 თებერვალს მას უკვე თავისი რეფერატი გამოუგზავნია „კვალში“ დასაბეჭდად. დაბეჭდვამდე კი სათვისტომოში წაკითხა; მაშასადამე, ა. წულუკიძეს უფრო ადრე წაუკითხავს თავისი რეფერატი, 1897 წლის სექტემბერ-ოქტომბერში.

ტიჩესკიის ვზგლად ნა ისტორიუ» და მეორესი «Критические очерки» ყველაზე საყვარელი წიგნები იყო ახალთაობისათვის. ქართულ სათვისტომოში სკარბობდა ეროვნული და ლიბერალური მიმდინარეობა. საშამ თავისი რეფერატებით შემოიტანა ახალი შუქი და აზრთა შეჭახება. იმხანად „მომამბეში“ დაიბეჭდა ლალიონის მოთხრობა „ფირალი დავლაძე“. საშამ სათვისტომოში წაგვიკითხა მოხსენება ამ მოთხრობის გამო. მისი მხატვრული კრიტიკა დაფუძნებული იყო მარქსისტულ მსოფლმხედველობაზე და ჩემზედ პირადად დიდი შთაბეჭდილება დასტოვა. მისი ზეგავლენით მე დავწერე პირველი კრიტიკული წერილი მამია გურიელის პოეზიის შესახებ (ხაზი ჩვენია. — ვ. წ.). შემდეგ საშამ კრიტიკული წერილი „ფირალი დავლაძის“ შესახებ დაიბეჭდა და, რამდენადაც მახსოვს, ეს იყო პირველი ქართული მარქსისტული სიტყვაკაზმული კრიტიკა<sup>1</sup>.

ივ. გომართელს თავისი რეფერატი მამია გურიელზე სათვისტომოს წრეში წაუკითხავს, მსმენელებში დიდი დავა და აზრთა სხვადასხვაობა შექმნილა. ამ საკითხთან დაკავშირებით საინტერესოა ივ. გომართლის მიერ 1898 წ. 9 თებერვალს მოსკოვიდან ან. თუმანიშვილ-წერეთლისადმი გამოგზავნილი წერილი: „გიგზავნით მამიას გარჩევას „ეკალში“ დასაბეჭდად. თუ არ დაბეჭდოთ, გთხოვთ, ნუ დამიკარგავთ... წარმოიდგინეთ. ჩვენი ცხოვრების შესახებ მე პესიმისტი ვიყავი, ახლა კი ამ რეფერატის წერამ გამოაპტიმისტა და ახლა ველარაფერი ამოშლის ჩემში იმ რწმენას, რომ ჩვენ კი არ ვკვდებით, ვცოცხლდებით. ბევრი მოწინააღმდეგე აღმომიჩნდა. მამია რომ სუსტი მწერალია, ამაში თითქმის ყველა დამეთანხმა, დანარჩენში კი ბევრი სულ სხვა აზრისა იყო: ე. ი. აწმყო სიკვდილს გვიქადის და თვით მეთვრამეტე საუკუნის გასულსაც ჩვენი ცხოვრება უკეთესი იყო, წინმსვლელობისა და ეროვნების გადარჩენის მხრივ, ვიდრე დღესო. მეც ასე ვფიქრობდი აქამდის, მაგრამ აწი კი აღარა“...<sup>2</sup>.

ივ. გომართელი მოსკოვის უნივერსიტეტში სწავლის პერიოდში გაეცნო გ. პლენანოვის ფილოსოფიურ შრომებს, რამაც შემდგომში მისი იდეების ჩამოყალიბებაზე დიდი გავლენა იქონია. საერთოდ გ. პლენანოვი ქართველ მარქსისტთა შორის ძალიან პოპულარული იყო, განსაკუთრებით, როგორც ეს ივ. გომართელმაც აღნიშნა, გულ-

<sup>1</sup> ივ. გომართელი, „საშა წულუკიძე“ (მოგონება), საქართველოს მარქსისტულენინიზმის ინსტიტუტის საქართველოს ფილიალის ფონდი № 12798, საქმე № 273, აღწ. 2.

<sup>2</sup> საქართველოს სახელმწიფო ლიტერატურული მუზეუმის ხელნაწერთა ფონდი, № 16141-ბ.

დასმით კითხულობდნენ და სწავლობდნენ მის „მონისტურ თვალსაზრისის ისტორიას“. 1901 წელს „Jdem“-ის ფსევდონიმით „კვალში“ დაიბეჭდა გ. პლენანოვის წერილი — „როგორც ჰქვხს, ისე არა წვიმს“, ვარ. ჩერქეზოშვილის წერილების წინააღმდეგ<sup>2</sup>.

სამედიცინო დარგზე სწავლა არც თუ ისე იოლი იყო, თუ გავითვალისწინებთ ამ ფაკულტეტის სპეციფიურობას. ივ. გომართელმა ყოველივე სიძნელე გადალახა, ეს გასაოცარი ენერჯისა და ერუდიციის ადამიანი კიდევ ახერხებს იპოვოს დრო და სპეციალური ლიტერატურის გარდა ფხიზლად ადევნოს თვალყური რუსულ და ქართულ ახალ წიგნებს: ლიტერატურაში, ხელოვნებაში, ისტორიაში, ფილოსოფია-ფსიქოლოგიაში და სხვ., თვითონაც წერს სხვადასხვა საჭირბოროტო საკითხზე.

ივ. გომართელი სანამ საექიმო ფაკულტეტს დაამთავრებდა და სახელმძღვანელო ექიმო გახდებოდა, ქართველმა საზოგადოებამ გაიცნო, როგორც ნიჭიერი მწერალი და ლიტერატურული კრიტიკოსი, აგრეთვე როგორც ავტორი ქართულ ენაზე პირველად დაწერილი წიგნისა — „ისტორია აღმოსავლეთისა“ (სადაც წარმოდგენილია ძველი ეგვიპტე, მცირე აზია. ინდოეთი, საქართველო, მიდია, სპარსეთი). რომელიც 1897 წელს თბილისში ცალკე წიგნად გამოიცა.

ივ. გომართელმა სტუდენტობის პერიოდში 40-ზე მეტი ნაშრომი გამოაქვეყნა. აქედან მხოლოდ ერთი წერილი — „ფიზიოლოგიური წერილები“ — ესებოდა მედიცინას. აღსანიშნავია ის ფაქტი, რომ როდესაც 1898 წლიდან „კვალი“ ხდება „მესამედასელების“ ლეგალური ორგანო, სამეცნიერო ფაკულტეტის მეოთხე კურსის სტუდენტმა, 23 წლის ივ. გომართელმა შეცვალა ისეთი სახელგანთქმული მწერალი, როგორიც იყო ხომლელი და ჩაიბარა „კვალის“ კრიტიკის განყოფილება.

„1898 წლიდან ჟურნალ „კვალში“ ჩემი ადგილი დაიკვია ახალგაზრდა კრიტიკოსმა ივ. გომართელმა. რომელიც ჟურნალის მოსპობამდე ნიჭიერად უძღვებოდა კრიტიკის განყოფილებას“<sup>3</sup>. — იგონებს ხომლელი.

მიუხედავად იმისა, რომ ივ. გომართელი მატერიალურ სიღიწროვეს განიცდიდა, იგი მუდამ გულკეთილი, ქველმოქმედი და ყვე-

<sup>1</sup> ევროპაში ცნობილი ანარქისტი და მწერალი (1844—1925), 1900 წლის ვაზ. „ივერიაში“ (№ 229, 247. 258) გ. მარკელის ფსევდონიმით გამოაქვეყნა სტატია „მოგზაურობა ბელგიაში“, რომელშიაც გაილაშქრა მარქსიზმისა და სოციალ-დემოკრატიის წინააღმდეგ.

<sup>2</sup> „კვალი“, 1901 წ., № 26—28.

<sup>3</sup> ხომლელი. რჩეული ნაწერები. თბ., 1963 წ., გვ. 442.

ლას დამხმარე იყო. საზოგადოებრივ საქმეში ხომ არაფერში უკან არ დაიხვედა.

1898 წლის „კვალში“ დაიბეჭდა კორესპონდენცია სათაურით: „საქველმოქმედო საქმე“, სადაც სოფ. ქორეთის სოფლის მასწავლებელი დ. აბღუშელიშვილი იტყობინება:

„ქ-ნო რედაქტორო! უმორჩილესათ გთხოვთ ნება გვიბოძოთ უგულისთადესი მადლობა გამოვუცხადოთ მოსკოვის უნივერსიტეტის სტუდენტს, რომელმაც წარსულ 1897 წ. სექტემბრიდან გამოუწერა ჩემდა რწმუნებულ ქორეთის (საჩხერის რაიონი) სასოფლო სკოლას ეურნალი „ჭეჯილი“. მოწაფენი, მოკლებულნი ამ გვარ საკითხავ ეურნალს, ალტაცებით მიეგებენ „ჭეჯილს“. დიდი მადლობის ღირსია ბ. გომართელი, მით უმეტეს, რომ ასეთ ძვირფას შემოწირულებას პირველათ ლებულობს ქორეთის სოფლის სკოლა თავის თანამედროვე თანამგრძობელ ახალგაზრდისაგან, თავის ოცი წლის არსებობის განმავლობაში“<sup>1</sup>.

ჩაუდგა თუ არა სათავეში „კვალის“ კრიტიკულ განყოფილებას, ივ. გომართელი წერს რეცენზიებს ან. ფურცელაძის „ცისკარას“, ილ. ალხაზაშვილის „ბუნება და ცხოვრებას“ შესახებ, „ივერიაში“ (№ 63) ათავსებს სტატიას სათაურით „ოცნება და ცხოვრება“, სადაც განხილულია დ. კლდიაშვილის მოთხრობა „მრევლში“, 1899 წ. იბეჭდება „ქართული სიტყვაკაზმული მწერლობა 1898 წ.“. „კრიტიკული შენიშვნები. „ამოდის, ნათდება“ და სხვა მოთხრობები ვაჟაფშაველასი“, „შარშანდელი „ჭეჯილის“ კრიტიკოსი“, „ხალხის გულის მესაიდუმლე (თხზულებანი ეგ. ნინოშვილისა)“ და სხვ.

ეგ. ნინოშვილის ნაწარმოებების განხილვა ივ. გომართელს ადრევე ჰქონია განზრახული, მაგრამ სათანადო მასალების უქონლობის გამო დროებით თავს იკავებდა. ამის შესახებ 1899 წლის 6 აპრილს იგი მოსკოვიდან ან. თუმანიშვილ-წერეთელს სწერს: „...დიდი ხანია ნინოშვილის გარჩევა მინდა, მაგრამ ჯერჯერობით თავი დავანებე, რადგანაც ბიოგრაფიას ველი („კვალში“ რომ გამოაცხადეთ). მწერლის ნაწარმოების ასახსნელად კარგი ბიოგრაფია მეტად საჭიროა. ვინც ნინოშვილის ბიოგრაფიას წერს, ძალიან კარგი იქნება, რომ მემკვიდრეობას განსაკუთრებით ყურადღებას მიაქცევდეს. ე. ი. დედამის ზნე-ხასიათს, თუ შესაძლებელია ბაბუა-ბებუისადაც და ძმებსაც, თუ ყავდა. ეს ფრიალ საჭიროა, რადგანაც მემკვიდრეობა მწერლის მოღვაწეობაში ბევრ რამეს ხსნის; ბიოგრაფიაში უნდა იყოს დახასიათებული ნინოშვილი, როგორც ადამიანი. გიორგის (გიორგი წერეთე-

<sup>1</sup> „კვალი“, 1898 წ., № 48. გვ. 80.



ლი. — ვ. წ.) ბიოგრაფია კი მოკლეა. თუ დიდხანს არ დაიგვიანებს თქვენი ბიოგრაფია, ხომ კარგი, თუ არა და, გიორგის ბიოგრაფიით უნდა დავკმაყოფილდე. ამ შემთხვევაში გთხოვთ, დროებით გამო-მიგზავნოთ ნინოშვილის დაუმთავრებელი მოთხრობა, და თუ რამე აქვს დაუბეჭდელი პუბლიცისტური შინაარსის, ისიც. წავიკითხავ და გამოგიგზავნით“<sup>1</sup>...

სამთვენახევარში ივ. გომართელმა დაამთავრა ევ. ნინოშვილის შემოქმედების განხილვა, გამოუგზავნა რედაქტორს და 1899 წლის 18 ივლისს დაიწყო ბეჭდვა „კვალში“ „ხალხის გულის მესაიდუმ-ლეს“ სათაურით<sup>2</sup>.

ივ. გომართელი პირველი კრიტიკოსი იყო, რომელმაც ევ. ნინო-შვილის შემოქმედება ასე ვრცლად და საფუძვლიანად განიხილა. ეს „კვალში“ დაბეჭდილი წერილი შემდეგ მთლიანად წინასიტყვაობად წაემძღვარა ს. თავართქილაძის მიერ 1904 წელს თბილისში გამოცე-მულ ევ. ნინოშვილის თხზულებათა ერთტომეულს და 1920 წელს გამოცემულ ევ. ნინოშვილის თხზულებათა ორტომეულს.

ივ. გომართელმა 1899 წლის შემოდგომაზე დაამთავრა მოსკო-ვის უნივერსიტეტის სამედიცინო ფაკულტეტი. ჯერ გამწესებული არ იყო სამუშაოზე. არ იცოდა, რა ბედი ელოდა; როგორც სტიპენ-დიანტი, ივ. გომართელი ვალდებული იყო ჯანსაზღვრული ხანი ემ-სახურა სახელმწიფო დაწესებულებაში. ამ პერიოდში ერთგვარ სუ-ლიერ დებრესიას განიცდის, თავისი მომავალი „გამოურკვეველ მდგომარეობად“ მიაჩნია, ყველაფერზე გულგაგრილებული ვარო, ამ-ბობს ის, „უბედურ ბედზე დაბადებულად“ თელის თავის თავს. არ იცის, მომავალი რას უქადის. მის ბუნებრივ მისწრაფებას ექიმის დიპლომი არ აკმაყოფილებს, სწავლის გაგრძელება უნდა საზღვარ-გარეთ, მაგრამ ამისათვის არც სახსრები გააჩნია და არც პირობები უწყობს ხელს.

სასოწარკვეთილი ივ. გომართელი 1899 წლის 23 ოქტომბერს მოსკოვიდან ან. თუმანიშვილ-წერეთელს სწერს: „...გავათავე უნი-ვერსიტეტი, ახლა თითქოს თავისუფალი ადამიანი ვარ, შემიძლია თითქოს თავისუფლად დავადგე იმ გზას, რომელიც უფრო შეეთანხმე-ბა ჩემს სურვილს და სულიერ მოთხოვნილებას. მაგრამ რა გზას და-ვადგები, საით წავალ, რა გამოვა ჩემგან, სწორეთ არ ვიცი. საექი-მო მეცნიერება საუკეთესო და სიმპათიური მეცნიერებათაგანია, მაგ-რამ მე ის სრულებით არ მაკმაყოფილებს. შეიძლება, სრულიად

<sup>1</sup> საქართველოს სახელმწიფო ლიტერატურული მუზეუმის ხელნაწერთა ფონ-დი № 16142-ბ.

<sup>2</sup> „კვალი“, 1899 წ., № 29, 30, 32, 33, 36—38, 42, 44, 45, 47, 51.

არაფრის ნიქი მქონდეს, შეიძლება სრულიად უსარგებლო წევრი ვიყო საზოგადოებისათვის, მაგრამ მე არ შემიძლია, მე არ მინდა უმთავრეს საგნად ექიმობა გავიხადო. გარემოება კი ძალას მატანს და ეს არის ერთადერთი ჩემი სატანჯველიც.

ჩემი უახლოესი საწადელი ის იყო, რომ უნივერსიტეტის გათავებისთანავე საზღვარგარეთ წავსულიყავი. მაგრამ ეს საწადელი არ მისრულდება. სახლში არა გამაჩნია რა ორი კვალი მიწის მეტი და ისიც რომ გავაყიდვინო, მოხუცი მშობლები მშიერი და ტიტვლები დაიხრცებიან; რომ ვისმე მივმართო თხოვნით, ერთი რომ არა გამოდნება რა, მერე თხოვნა, როგორც ჰკირი, ისე მძულს: ნადაგ თხოვნა, თხოვნა და თხოვნა ვის არ შეძლდება! მეგონა ვალად ვიშოვიდი საღმრ. მარა არავინ მასესხა; ან კი რა სარგებლობის გულისათვის მალესხებდნენ? ასე მშრალზე დავრჩი ჯერჯერობით. მინდოდა პატარა ხანს ისევ აქ დავრჩენილიყავი. მაგრამ ჯერჯერობით ასეთ ქეიფზედა ვარ, რომ არაფრის გაკეთება არ შემიძლია. თუ პატარა გულს გადამიყარა, ახალწლამდე დავრჩები, თუ არა და ამ მოკლე ხანში წამოვალ და იმედი მაქვს, თბილისში ვნახავთ<sup>1</sup>...

თბილისში ჩამოსვლისთანავე ივ. გომართელმა „კვალში“ დაიწყო მუშაობა. შემდეგ თავის სპეციალობაზე ჯავახეთში, სოფ. ბარალეთის საავადმყოფოს ექიმად დანიშნეს. აქ ის თითქოს უცებ გამოეთიშა სამყაროს, ყველაფერს და ყველას მოწყდა, ოცდაოთხი წლის ახალგაზრდამ. რომელიც რამდენიმე წელი მოსკოვში ცხოვრობდა, საზოგადო საქმეებით და მწერლობით იყო გატაცებული და საზღვარგარეთ წასვლაზე ოცნებობდა, დიდი მორალური ტრავმა განიცადა.

თუ რას წარმოადგენდა მაშინ ჯავახეთი, ეს კარგადა აქვს აწერილი ივ. გომართელს თავის ვრცელ წერილში „ჯავახეთი და ჯავახენი“, რომლის პირველი თავი 1900 წლის 21 მაისს „კვალში“ დაიბეჭდა. „...ჩვენს პატარა საქართველოში ბევრია მივარდნილი, ყრუ კუთხე, მაგრამ ასეთი მივარდნილი ალაგი, როგორც ჯავახეთი, არა თუ საქართველოში, ბევრგან არსად მოიპოვება... როდესაც უცხო კუთხის აღმნიანი პირველად შემოდის ჯავახეთში, ჯერ რაღაც გამოურკვეველი გრძნობა იპყრობს; თბილისიდან ჯავახეთში მეორე დღეს მიხვალთ და ასე კი გგონიათ, თითქოს რამდენსამე წელიწადს გემგზავროთ და რაღაც უცნობ მხარეში მისულიყოთ. გამოურკვეველი გრძნობა თანდათან სევდად იქცევა, სევდა იზრდება, ლოდივით დაგაწეებათ გულზე და მზად ხართ იტიროთ, რომ ცრემლებით მაინც დაიმშვიდოთ გული... ის გრძნობა, რომ თქვენ სხვა პლანეტაზე ცხოვ-

<sup>1</sup> კ. კეკელიძის სახ. საქართველოს მეცნ. აკად. ხელნაწერთა ინსტიტუტის ან. თუმანიშვილ-წერეთლის ფონდი № 375.

რობთ და არა ძველ დედამიწაზე. განუშორებლად თან დაგდევთ, სა-  
ნამ ჭავახეთს არ მოშორდებით... კუთხე მეტისმეტი მივარდნილი და  
ყრუ“<sup>1</sup>...

ჭავახეთში ექიმად მუშაობისას ივ. გომართელს დიდი ჯაფა და-  
ადგა. თუ გავითვალისწინებთ მაშინდელ საგზაო და სატრანსპორტო  
პირობებს. მივხვდებით, რა ძნელი იყო სოფელ-სოფელ სიარული,  
ავადმყოფების ადგილზე გასინჯვა და პირველი დახმარების გაწევა.  
ივ. გომართელი პირველ ხანებში ძნელ პირობებში ადგილზე ქი-  
რურგიულ ოპერაციებსაც აკეთებდა. მიუხედავად დიდი გადატვირ-  
თულობისა, საზოგადოებრივ საქმიანობაშიც ჩაება — აირჩიეს ად-  
გილობრივი კომიტეტის ხაზინადრად. ამასთან 1900—1901 წლებში  
უხვად წერს ლიტერატურულ-კრიტიკულ, პუბლიცისტურ და საბუ-  
ნებისმეტყველო სტატიებს, რომლებსაც აქვეყნებს „კვალში“, „ჭე-  
ჯილში“, „Новое Видозрение“-ში. მართავს მოლაპარაკებას ან. თუმა-  
ნიშვილ-წერეთელთან „კვალის“ შესყიდვაზე.

1900 წლის 9 მარტს ან. თუმანიშვილ-წერეთელს სწერს: „ეს-ეს  
არის მივეჩვიე, როგორც იქნა, ჭავახეთს, ქ-ნო ანასტასია, მაგრამ იმ-  
დენად აქაურობას ვერასოდეს ვერ მივეჩვიევი, რომ წელიწადზე მე-  
ტი გავძლო. მართალია. ახლა საქმე ძალიან ბევრი მაქვს: ავადმყო-  
ფებს გარდა აქაური კომიტეტის ხაზინადრობა მომანდევს და ეს-ეს  
არის. ლამის თავი გამომირეტდეს... სოფლებში ხშირად მიხდება  
ბოლმე სიარული, რის გამოც აქაური ხალხი და მისი ცხოვრება ეს-ეს  
არის გავიციანი. საერთოდ კი ასეთის მოღვაწეობით მე დიდი კმაყო-  
ფილი არა ვარ ახლავე და, პატარა დრო რომ გაივლის, მაშინ ხომ ვე-  
ლარ დამაკმაყოფილებს. მართალია, სარგებლობის მოტანა შემიძლია.  
მაგრამ მარტო ეს არ არის საკმარისი. შენი მოქმედება, მიუხედავად  
იმისა, რომ სხვისთვის სასარგებლოა, შენც უნდა გაკმაყოფილებდეს.  
ჩიტი რომ გადასაფრენად იქნება გამზადებული, ასე ვარ ახლა მე.  
ყოველივე ამას იმიტომ გწერთ, რომ ამ კმაყოფილების მოპოება, სუ-  
ლიერი წყურვილის დაკმაყოფილება როგორც ჩემი, ისე ბევრი სხვი-  
საც, — თქვენზედ არის დამოკიდებული. თქვენგან რომ არ გამეგო-  
ნა, მე გულშიდაც არ გავივლებდი, და არც სხვები, გიორგის გარდაც-  
ვლებისთანავე ჩამომეგდო თქვენთან ბაასი „კვალის“ გაყიდვის შე-  
სახებზე, მაგრამ რადგანაც თქვენ თვითონ განაცხადეთ თქვენი განზ-  
რახვა, ჩვენც ამიტომ შეგატყობინეთ ჩვენი სურვილი, ყველას, ვი-  
საც „კვალთან“ რაიმე კავშირი აქვს, მაგ გაზეთის ყიდვა უნდა. მე

<sup>1</sup> „კვალი“, 1900 წ., № 21, 22, 25, 27, 28 (ეს წერილი საინტერესოა ეთნოგრა-  
ფიული თვალსაზრისითაც. ვ. წ.

აღნიშნავთ თავადაზნაურობის დაღუპვას, ამით სრულებითაც არ შევეგებებით სიხარულით მის ალაგას ბურჟუაზიის გაბატონებას. ერთადერთი საქმე, რისი გაკეთებაც ყოველ მწერალს შეუძლია, ეს არის აღნიშვნა იმისი, რაც ცხოვრებაში ხდება. ჩვენი ცხოვრების მიმდინარეობა კი პირველობას ართმევს თავადაზნაურობას და აღლევს ბურჟუაზიას. თუ პირველნი დაქვეითება არ არის სამწუხარო, სამაგიეროდ არც მეორის გაბატონება არის სასიხარულო, რადგანაც უპირატესობანი, არისტოკრატიის ხელში იქნება თუ ბურჟუაზიის ხელში, ყველგან განსაღვევია. მაგრამ წოდებრივ წყობილებასთან შედარებით, ბურჟუაზიული ხანა უკეთესია თუნდაც იმით, რომ ის ერთი ნაბიჯით ახლოს არის სასურველ წყობილებასთან. მიუხედავად იმისა, რომ ბურჟუაზიაც გასაკიცხ და მკენებელ საფუძველზეა დამყარებული, არისტოკრატისთან შედარებით მაინც პროგრესული ელემენტია. არისტოკრატია დღეს ჩვენი არა თუ ქონებრივად, გონებრივად და ზნეობრივადაც კი გაღატაკდა: ოდესღაც ამაყი, მედიდური, დღეს მოიხარა, მელაქუცაობას და ლაქიობას მოჰკიდა ხელი, რაც მას მეტად ბრძნულ და სასახელო პოლიტიკად მიაჩნია; ცხოვრებისათვის კი ის სრულებით მობერებული და უძლურია. ნეტორცია, გახრწნილი, რომელიც ცოტაოდენად რიგიანი ყნოსვის პატრონს ცხვირზე ხელს წაავლებინებს. სულ სხვაა ბურჟუაზია; არისტოკრატისთან მას ერთი საერთო თვისება აქვს: სხვისი ექსპლოატაცია, სხვისი ოფლით რჩენა, სხვის უბედურებაზე საკუთარი ბედნიერების შენება მისი დამახასიათებელი მხარეა. სამაგიეროდ ის ხელს უწყობს ეროვნული სიმდიდრის დაგროვებას, საწარმოო ძალის განვითარებას და ამიტომ არისტოკრატისთან შედარებით უსათუოდ პროგრესულია. მკითხველი ტყუილად ნუ იფიქრებს, ვითომ ბურჟუაზიას და ბურჟუაზიულ ხანას იდეალურ სამოსში ვხვევდეს: მე მხოლოდ იმის თქმა მინდოდა, რომ დღევანდელ პირობებში ბურჟუაზია არისტოკრატის სჯობია, არისტოკრატია ისპობა და თავის ალაგს უთმობს ბურჟუაზიას. ერთი ბატონის ხელიდან მეორე ბატონის ხელში ჩავარდნა სასიხარულოს არაფერს მოასწავებს, მაგრამ რადგანაც ბურჟუაზიული ხანა უფრო უახლოვდება იმ ხანას, რომელმაც ადამიანს უნდა მიანიჭოს სრული თავისუფლება და თანასწორობა, ამიტომ მხოლოდ უგუნური ან კაცობრიობის მტერი იტყვის: არისტოკრატის ბატონობა სასურველი და აუცილებელიაო.

მგონია, თქვენთვისაც სასურველი უნდა იყოს, რომ თქვენი გაზეთი ისევ ჩვენს ხელში იყოს, ვიდრე სხვის ხელში. კარგად იცით, სხვის ხელში რომ ეგ გაზეთი გადავიდეს, მაგისი მიმართულება სრულებით წაიშლება; ეს ხომ ძირიანად ამოთხრა იქნება იმ ნერვის, რომელსაც თქვენ და გიორგი ამდენი ხნის განმავლობაში თავგამოდებით ზრდიდით. ამიტომ ჩვენზედ მეტიც რომ მოგცეთ ვინმემ, მე მგონია, უპირატესობა მაინც ჩვენ უნდა გვეკუთვნოდეს. თქვენ თვითონ ხშირად გითქვამთ ხოლმე: „კვალი“ ყოველ წლივ მხოლოდ ზარალს იძლევაო, და მეც ვიცი, რომ მხოლოდ ორიოდეჯერ აღემატება შემოსავალი გასავალს. იმავე თანამშრომლების ხელში რომ ერთბაშად მომგვებინი გახდეს „კვალი“, შეუძლებელია: თუ აქამდის ზარალობდით, ჩვენს ხელში რომ იქნება, მოგება არც მაშინ გვექნება, რადგანაც, რისი გაკეთებაც შეგვიძლია, თქვენც იცით, ზარალის მიზეზი უმთავრესად დედააზრია და მიმართულება „კვალის“. ასეთ მიმართულებას ჯერ ჩვენში ცოტა თანამგრძობი ჰყავს და ვინ იცის, როდის გაუმრავლდება. ამიტომ, ცხადია, გვინდა „კვალის“ ყიდვა იმიტომ კი არა, რომ სარგებელს მიედედეთ, არამედ გვინდა, რამდენადაც კი შესაძლებელია, უანგაროდ ვემსახუროთ იმ მიზანს, რომელსაც თქვენ თქვენი ძალღონე შეალიეთ. გიორგიმ მთელი სიცოცხლე, და ამით, შეძლებისდაგვარად, წინ წავსწიოთ ჩვენი საზოგადოებრივი თვითცნობიერება. დაუმატეთ ამას ისიც, რომ ჩვენ ყველა ღარიბი ვართ და თუ ვივალებთ რასმე, თორემ ისე არა გვაბადია რა. ამიტომ თუ რომ „კვალის“ გაყიდვა გადაწყვეტილი გაქვთ. ისე დაგვითმეთ, რომ არც ჩვენთვის იყოს საზარალო და არც თქვენთვის. თქვენი აზრი კი დროზე უნდა შეგვატყობინოთ, რომ ჩვენც დროზე შევუდგეთ საქმეს. იქნება სთქვან, თუ კი თავგამოდებით მუშაობა შეგიძლიათ, რატომ ჩვენთან არ მუშაობთო, მაგრამ დარწმუნებული ბრძანდებოდეთ: რასაც თქვენს ხელში აკეთებდა ვინმე, მეტის გაკეთება არც უთქვენოდ შეუძლია; ხოლო თუ ასეთი სურვილი გვაქვს „კვალის“ ყიდვის. იმიტომ რომ თქვენ გაყიდვა გინდათ და ჩვენ კი იმ მიზნისაკენ სიარული მწერლობაში, რომლისკენაც „კვალი“ მიდიოდა და მიდის<sup>1</sup>.

ქართული მწერლობის ამაგდარბა ზ. ჭიჭინაძემ ივ. გომართელს, როგორც ლიტერატურულ კრიტიკოსს და ფართო გაქანების პუბლიცისტს, სწორედ ამ წლებში მიაქცია ყურადღება და როდესაც „კვალის“ მნიშვნელობასა და თანამშრომლებზე ლაპარაკობს, პირველ რიგში ივ. გომართელს ასახელებს. „...ამ უკანასკნელ წლებში

<sup>1</sup> საქართველოს სახელმწიფო ლიტერატურული მუზეუმის ხელნაწერთა ფონდი № 16143-ბ.

თვალსაჩინო ადგილი დაიჭირა გომართელმა. ამისი წერილები საუკრადლებონი არიან, სანაქებო და მასთან გამოსადეგნიც, მისი წერილი რაფ. ერისთავის და ევდოშვილის შესახებ სანაქებოდ ჩაითვლება. ასეთი წერილები დიდათ განვითარებულ ერის მწერლობასაც დაამშვენებდა. ვის არ გვახსოვს 1860 წლების შემდეგი დროის რუსეთის საუკეთესო ჟურნალ-გაზეთების და ნამეტურ პისარევის კალამი, დობროლიუბოვის და სხვ.

ივ. გომართელის წერილებმა კვლავ მოგვაგონა ეს პირნი და გაგვაცხოველა მათებურად ბრწყინვალეს კალმით. ახ, ჩვენში უნდა ახალგაზრდობა არსებობდეს და მათ შესმენა უნდა ჰქონდეთ, რომ ასეთი პირები თავიანთ ბრწყინვალე კალმით შესამჩნევად დააფასონ, ის იდეალები. რაც ამათ ნაწერებში ბრწყინავენ, სადაც ესენი ლალობენ, ის მათ ნათლად და მკაცრად ჩაინერგონ<sup>1</sup>.

ივ. გომართელმა მტკიცედ გადაწყვიტა ჯავახეთიდან წამოსულიყო, რადაც არ უნდა დაჯდომოდა, თბილისს გადმოსულიყო და სადმე სახელმწიფო სამსახურში შესულიყო. 1901 წლის 4 ივნისს ან. თუმანიშვილ-წერეთელს თავის განზრახვას უზიარებს: „...ჩვენი გადაწყვეტილება ახლა ეს არის, ბ-ნო ტასო: ამ ზაფხულზე, თბილისში რომ ვიქნები, ვეცდები, რაიმე სახელმწიფო ალაგი ვიშოვნო 25—30 მანეთიანი ან სასწავლებელში, ან სხვაგან სადმე. ასეთი ალაგი თუ ვიშოვნე, მაშინ სახელმწიფო სამსახურში ვიქნები და თავს დამანებებენ. თუ ვერავითარი სახელმწიფო ალაგი ვერ ვიშოვნე, მაშინ აქეთ მაინც ვეღარ წამოვალ, ფული მე იმდენი არა მაქვს, რომ თავი გამოვისყიდო, კიდევ რომ შეიძლებოდეს, და უეჭველია, დიპლომს არ მომცემენ და კერძო პრაქტიკას ამიკრძალავენ. მე ეს მიორჩევნია, ვიდრე მთელი ჩემი ცხოვრება დავიმაზინჯო.

ასეთ მდგომარეობაში, როგორშიაც მე ვცხოვრობ, ვერ ვხედავ ვერავითარ მიზანს ჩემის ცხოვრებისას; თუ სხვებრ ვერაფრით გავინთავისუფლე თავი, ერთი გზაა დამრჩენია: დიპლომს თავი დავანებო. საზღვარგარეთ, უეჭველია, არ გამიშვებენ. პირველ ხანებში იქნება რომელიმე რუსულ რედაქციაში ვიშოვნო ისეთი ალაგი, რომ თავი ვირჩინო, და მერე მოვავგარებ რასმე. აქეთ წამოსვლა მე აღარ შემიძლია. თუ ვიშოვნე რამე ალაგი თბილისში ისეთი, რომ მანდ დამტოვეს, ხომ კარგი, თუ არა და იძლებული ვიქნები დიპლომს თავი დავანებო, — აი ჩემი გადაწყვეტილება. თქვენ თვითონ მიბრძანეთ: თუ კი ასეთ ცხოვრებაში მიზანს ვერა ვხედავ, თუ არ მაქმამყოფილებს ასეთი ცხოვრება, მაშ რა უნდა ვქნა? უნდა მაინც ვიცხოვრო

1 ზ. ჰიკინაძე, ისტორია ქართლის გაზეთების და ჟურნალების გამოცემებისა, თბილისი, 1902 წ., გვ. 56—57.

ასე, არა? მე მგონია, ჩემ ალაგს თქვენც ჩემსავით მოიქცეოდით. ამ თვის. თიბათვის, გასულს გადმომიყვანენ მე მანდ. ამ ორ თვეში ვეცდები ვიშოვნო რაიმე სულ მცირე ალაგი. ოღონდ კი სახელმწიფო სამსახურში ვითვლებოდე და სავალდებულო სამსახური თავიდან მოვიშორო. თუ ვერ ვიშოვნე და მაშინ ისე უნდა მოვიქცე, როგორც გწერთ. მეტი აღარ შემიძლიან. ერთი წელიწადი კიდევ რომ ასე უმიზნოდ გავატარო, უეჭველია, ან თავს მოვიკლავ, ან გავგიჟდება.

თქვენი ძალიან დიდი მადლობელი ვარ. რომ ჩემი გულისათვის ასე წუხნდებით ხოლმე. რითი გადაგიხადოთ, არ ვიცი, ღმერთმანი. რაღა ამდენად წუხნდებით ჩემი გულისათვის, ერთი სათხოვარი ამისრულებთ: თუ ვინცობაა იძულებული გავხდი დიპლომზე ხელი ავიღო, „Новое Обозрение“-ში ხომ არ იქნება რაიმე ალაგი 25--30 მანეთიანი? რაც უნდა იყოს, მე ყველაფერს ვიკისრებ რედაქციაში. რადგანაც ეს საქმე, როგორც თქვენ იცით, ყველაზე უფრო მიყვარს. თანამშრომლობაც შემიძლია, რადგანაც საერთოდ ჩემი მიმართულება. მგონი, არ ეწინააღმდეგება მისი რედაქტორების, თქვენი ძმების. მიმართულებას „სხვილ“ პრაქტიკულ კითხვებში და წვრილებში — ხან მე დავუთმობ, ხან ისინი. ერთი სტატია კიდევ გავგზავნე „Новое Обозрение“-ში, ის ჯორჯაძის წერილებმა გამოიწვიეს<sup>1</sup>, არ ვიცი. ბეჭდავენ თუ არა“<sup>2</sup>.

ივ. გომართელი თავს აღწევს ჯავახეთს, 1901 წლის აგვისტოდან თბილისშია, მცირე ხნით მიხეილის საავადმყოფოში მუშაობს, თანამშრომლობს გაზ. „Новое Обозрение“-ში, სადაც ათავსებს ლიტერატურულ-კრატეკულ და პუბლიცისტურ წერილებს: „Еще об Армяно-Грузинских отношениях“. „Кое-что об интеллигенции“. რამდენიმე სტატიას სათაურით: „Критические заметки“, რომელშიც განიხილავს გ. წერეთლის რუსულად თარგმნილ „მამიდა ასმათს“ და მის შემოქმედებას, ირ. ევდოშვილის, გრ. აბაშიძის, შ. არაგვისპირელის და სხვების შემოქმედებას. წერს რეცენზიებს ახლად გამოსულ წიგნებზე.

ამავე დროს „კვალში“ ბეჭდავს საინტერესო წერილებს: „1900 წლის სიტყვაკაზმული მწერლობის მიმოხილვა“, „რ. ერისთავის პოეზია“, „რუსული პოეზიის უმთავრესი მომენტები XIX საუკუნეში“. „ხნეობრივი კითხვები“, „ჩვენი საზოგადოებრივი ცხოვრება გუშინ და დღეს“ და სხვ.

<sup>1</sup> ივ. გომართლის ეს წერილი დაიბეჭდა სათაურით: „Армяно-Грузинские отношения“, გაზ. „Новое Обозрение, 1901 г., № 57724.

<sup>2</sup> საქართველოს სახელმწიფო ლიტერატურული მუზეუმის ხელნაწერთა ფონდი № 16144-ბ.

ჯერ კიდევ 1897 წელს კ. აბაშიძემ „მოამბის“ 7—10 ნომრებში გამოაქვეყნა წერილი „ცხოვრება და ხელოვნება“, სადაც აღნიშნავდა იმდროინდელი ქართული პოეზიისა და ბელეტრისტიკის პესიმისტურ განწყობილებას; აღნიშნავდა, რომ 90-იანი წლების ბელეტრისტიკა დიდად ჩამორჩება 60-იანი წლებისას, მხატვრული სიტუაცია დაქვეითდა, დაეცა. დაკნინდა, ახალი დროის მწერლები გამოხატავენ მხოლოდ უიმედობას: „გაურკვეველობა იდეალისა. ურწმუნოება. გულისგამგვირავი პესიმიზმი, — აი რა იხატება დღევანდელ ჩვენის ლიტერატურის წარმომადგენელთა ნაწარმოებებში“ („მოამბე“. 1897 წ., № 10, გვ. 55).

კ. აბაშიძის ამ წერილს „კვალის“ ფურცლებიდან გამოეხმაურა ალ. წულუკიძე თავისი სტატიით „ახალი ტიპი ჩვენს ცხოვრებაში“ და კ. აბაშიძის სასოწარკვეთილებით გაჟღენთილ წერილს საკმაოდ დამაჯერებელი პასუხი გასცა<sup>1</sup>.

1901 წელს კ. აბაშიძემ გაზ. „ცნობის ფურცელში“ იმავე სათაურით თითქმის იმავე შინაარსის წერილი დაბეჭდა: ჩვენი ლიტერატურა მოკვდა და არც არის იმის იმედი, რომ გამოცოცხლდება და ფეხზე დადგება. მან მოახდინა ამ საკითხის გამო ანკეტა: „საქართველოს წარსულის საუკუნის ლიტერატურა, მისი მოსალოდნელი და სასურველი მომავალი“, ზოგიერთ მწერლის ოპტიმისტურ პასუხს არ დაეთანხმა და ბოლოს დაასკვნა: „ცხოვრება ჩვენ არ ეციცდის და ჩვენ კი საპყარნი ვართ და მისს მსვლელობას ვერ ავყევით. პოლიტიკურად აღარ ვარსებობთ, ეკონომიურად სულს ვლადავთ. ზნეობრივად და ფიზიკურად დავკნინდით, ჩვენი ლიტერატურა კუს ნაბიჯით მიდის, მაშინ როდესაც გარეშე ერთა ლიტერატურა, რომელთანაც ჩვენ მჭიდროდა ვართ დაკავშირებული, გასაოცარის სიწრაფით მიდის და უსწრებს ჩვენს გონების ზრდას ჩვენი ენისა და ლიტერატურის ნიადაგზე... ყოველივე ეს ჰბადებს ჩვენში მწარე უსასოებას“<sup>2</sup>.

კ. აბაშიძის ასეთი თვალსაზრისი მესამე დასისათვის მიუღებელი იყო და „კვალის“ ფურცლებიდან ივ. გომართელი მაშინვე გამოეხმაურა თავის წერილში — „ქართული ლიტერატურა მე-19 საუკუნეში“: „...ჩვენი ლიტერატურის უმთავრეს ტონად წარსულ საუკუნეში ბ. აბაშიძე აღიარებს პესიმიზმს; თუმცა ამით ძალიან ცოტაა ნათქვამი, მაგრამ ჩვენ მაინც არას ვიტყვოდით, რომ ბ. აბაშიძის

<sup>1</sup> „კვალი“, 1898 წ., ოქტომბერ-ნოემბერი. ამავე საკითხს ეხება 1897 წ. 21 ნოემბერს ელ. ჭოჭინაძისადმი მიწერილ კერძო წერილში ა. წულუკიძე (იხ. თხზულებანი, გვ. 280—281).

<sup>2</sup> „ცნობის ფურცელი“, 1901 წ., № 1429.



კერძო მწერლები არ მოეყვანა თავისი აზრის დასამტკიცებლად. ჩვენს დროში ვერ ნახავთ ისეთ მწერალს, რომელსაც ერთი სევდა მაინც არ დაბადებოდეს, ერთი კვნესა მაინც არ აღმოხდენოდეს გულიდან. მაგრამ ამის მიხედვით თუ ყველა პესიმისტად მოვანთლეთ, დიდი სიცრუე იქნება... რა საფუძველი აქვს მათ წუწუნს? არავითარი. ეს ბატონები ისე სჯიან ლიტერატურაზე და მის სასურველ მომავალზე. თითქოს ლიტერატურა ცხოვრების პირმშო შვილი კი არ იყოს, არამედ ზევსის თავიდან იბადებოდეს მინერვასავით და ბ. კიტა აბაშიძის რეცეპტით იზრდებოდეს. თავისთავად ცხადი უნდა იყოს თითქოს შემდეგი ჭეშმარიტება: თუ წარსული საუკუნის განმავლობაში ჩვენი ცხოვრება ვითარდებოდა, ლიტერატურაც უნდა განვითარებულყო; თუ ჩვენი ცხოვრება ვითარდება, ჩვენი ლიტერატურაც განვითარდება მომავალში; მაგრამ წერილების ავტორებმა ამ ჭეშმარიტებას გზა აუხვიეს და ერთი გაიძახის: ვილუპებით. რადგანაც უნიჭოებმა ნიჭიერებს მწერლობის ჰსპარეზი მიგვატოვებინესო. მეორე კი: რაღა დაგვიხსნის, როდესაც ყველა იმ ენით აღარ წერს, როგორითაც ჩვენი მამა-პაპები სწერებო და სხვა...

მესამოცდაათე წლებში ჩვენი ცხოვრების ერთბაშმა პროგრესმა გამოიწვია ლიტერატურის აღფრთოვანება და გაფურჩქვნა, დღეს კი ცხოვრება სხვა გზას დაადგა და ამიტომ ლიტერატურაც სხვა მიმართულებას ღებულობს. ახალ გზაზე ერთბაშად სიარული შეუძლებელია და ამიტომ ჩვენს დღევანდელ ლიტერატურასაც რაღაც გაუგებრობა ეტყობა; ცხოვრება ჯერ მტკიცე კალაპოტში არ ჩამდგარა, ამიტომ ლიტერატურასაც სიმტკიცე აკლია; დროებით ხალხის ყურადღებას უფრო მატერიალური ინტერესები იზიდავენ თავისკენ, რაც ხელს უშლის ლიტერატურის გაფურჩქვნას. მაგრამ ყოველივე ეს ისევ მომასწავებელია ჩვენი ლიტერატურის ევოლუციისა და არა სიკვდილისა<sup>1</sup>.

ივ. გომართელი და მესამედაელები დარწმუნებულნი იყვნენ, რომ ჩვენი ლიტერატურის მოდუნება და წაბოროძიკება დროებითი მოვლენა იყო, რომ ახლო მომავალში ცხოვრების პროგრესთან ერთად ლიტერატურაც მოიკრებს ძალღონეს. გამაგრდება. ბურუსიდან გამოერკვევა, ისევ ხალხის გზის მაჩვენებელი მნათობი გახდება. ამ საკითხზე ნიჭიერმა პუბლიცისტმა არჩილ ჯორჯაძემაც გამოსთქვა თავისი აზრი:

„ცხოვრების საერთო აღორძინებასთან ერთად გაჩნდება ნაწარმოები, რომელიც სიმღერასავით ტკბილი იქნება, სიბრძნესავით ღრმა.

<sup>1</sup> „კვალი“, 1901 წ., №15—18.

ამ ნაწარმოებში ამოვიკითხავთ ჩვენი სულის კვეთებას. იგი აგვად-  
ლელვებს. რადგან შიგ ნაამბობი იქნება ჩვენი დიდი ხნის წყურვი-  
ლი სიცოცხლისა და სიყვარულისა და ჩვენი გაუგებრობა და გაურკ-  
ველობა სიკვდილის წინაშე!<sup>1</sup>

მათი ეს შეხედულება ცხოვრებამ და სინამდვილემ გაამართლა.  
ჩვენი ლიტერატურა მართლაც გაიფურჩქნა, აყვავდა და მძლავრად  
გაიღდა ფესვები; მოკლე ხანში მოგვევლინენ ნიჭიერი პოეტები და  
ბელეტრისტები, რომელთა სახელები საუკუნოდ შემორჩება ისტო-  
რიას და დაამშვენებს მშობლიური ლიტერატურის საგანძურს.

1902 წელს. როდესაც „ქართველთა შორის წერა-კითხვის გა-  
მავრცელებელი საზოგადოების“ გამგეობის თავმჯდომარედ არია  
ილია ქავჭავაძე, ივ. გომართელს ირჩევენ სოც.-დემოკრატების პარ-  
ტიიდან ამ საზოგადოების წევრად, სადაც რამდენიმე წელი დაჰყო.

ივ. გომართელი 1902 წელს მთელ ზაფხულს მუშაობდა ყო-  
ველდღიურ „კვალის“ რედაქციაში ფ. მახარაძესთან, ნიკო ელია-  
ვასთან და ირ. ევდოშვილთან ერთად.

1902 წლის შემოდგომაზე მიიწვიეს ექიმად დიდ ჭიხაიშში. აი  
რა გვიამბო ამ პერიოდის შესახებ საქართველოს დამსახურებულმა  
ექიმმა გიორგი ფილიპეს ძე კაქახიძემ: „გაწვდით იმ მცირე ცნობებს.  
რაც ექიმ გომართლის შესახებ მე სინამდვილით ვიცი...“

1902 წელს მე დავამთავრე სოფ. დიდი ჭიხაიშის 2-კლასიანი  
სკოლა. მამაჩემი ფილიპე ხშირად ავადმყოფობდა და საშუალება არ  
ჰქონდა სასწავლებლად გავეგზავნე სადმე. ამიტომ მე დავიწყე მუ-  
შაობა „ქსენონის“ აფთიაქში, სადაც მალე დავეუფლე წამლებია  
დამზადებას. ამავე დროს ხშირად ვესწრებოდი ავადმყოფების მი-  
ლებასაც.

ექიმო გომართელი ჩვენს ოჯახთან ახლო ურთიერთობაში იყო  
და მე დიდ ყურადღებას მაქცევდა.

როდესაც ის ქუთაისში გადავიდა საცხოვრებლად, მამაჩემს  
უძხრა, გიორგის მე წავიყვან ჩემთან, ვასწავლი და კაცი დადგებო.  
როდესაც 1903 წლის შემოდგომაზე ის ქუთაისში გადავიდა საცხოვ-  
რებლად. მეც თან წამიყვანა.

მე მის ოჯახში ვცხოვრობდი, მან დამიჭირავა პედაგოგები და  
სათანადო მომზადების შემდეგ 1904 წლის სექტემბერში გადავედი  
თბილისში სასწავლებლად...

გომართლის ოჯახთან მუდმივი კავშირი მქონდა და ჩემს სწავ-  
ლაში ის მატერიალურ დახმარებას არ მაკლებდა. ივ. გომართელი

<sup>1</sup> ირ. ჭორჯაძე, წიგნი მესამე. თბ., 1911 წ., გვ. 4.

იყო ძალზე ქველმოქმედი, ეხმარებოდა როგორც ნათესაეებს, აგრეთვე პარტიულ მუშაეებს. კარგ მეგობრულ ურთიერთობაში იყო პეტრე ქავთარაძესთან და მამია ორახელაშვილთან, რომლებიც მე მის ოჯახში ხშირად მინახავს...

1902 წელს დიდ ჭიხაიშში ადგილობრივი გლეხების ხარჯზე გაიხსნა „ქსენონი“. თითოეული გლეხი წელიწადში იხდიდა სამ მანეთს, რის საფასურად მთელი წლის განმავლობაში უფლება ჰქონდა ესარგებლა როგორც საექიმო დახმარებით, აგრეთვე უფასო მედიკამენტებით, ქსენონის გამგე-ექიმად მოწვეული იყო ექიმი ივანე გედეონის ძე გომართელი.

ქსენონის გახსნამდე საექიმო დახმარებისათვის გლეხებს უზღებოდათ ექიმის მოყვანა სამტრედლიდან ან ზონიდან, რისი შესაძლებლობაც გლეხობის უმეტეს ნაწილს არ ჰქონდა.

როდესაც ექიმი გომართელი ჩავიდა სოფ. დიდ ჭიხაიშში და მუშაობა დაიწყო. მცხოვრებთა შორის მაშინვე დიდი ავტორიტეტი დაიმსახურა. ის მკურნალობდა არა მარტო შინაგან დაავადებას. არამედ მას ჰქონდა ქირურგიული და სხვა სპეციალობის კარგი ცოდნა, რასაც დიდი წარმატებით იყენებდა.

ერთხელ მას მოუყვანეს ავადმყოფი ვინმე ბიბილეიშვილი. რომლისათვის აუცილებელი იყო ფეხის მოკვეთა. მე მაშინ ბავშვი ვიყავი და არ ვიცოდი, თუ რა სიძნელეს წარმოადგენდა ასეთი ოპერაციის გაკეთება სოფლის არასათანადოდ მრწყობილ საექიმო დაწესებულებაში, მაგრამ დღეს ჩემთვის, როგორც ექიმისათვის, ნათელია, რომ მას ჰქონდა სათანადო ცოდნა. გამოცდილება, რათა ავადმყოფისათვის ფეხი მოეკვეთა ბარძაყის არეში, რის შემდეგ ავადმყოფი განიკურნა და სიკვდილს გადაარჩა. მეორე შემთხვევა ასეთი იყო: ლეჩხუმის ერთ-ერთი სოფლიდან მოიყვანეს ავადმყოფი, რომელსაც მუცლის ღრუში ჰქონდა წყლული (ასტიტი), მან წყალი ამოაცალა მუცლის ღრუდან და ავადმყოფი, რომელიც ურმიდან ძლივს ჩამოიყვანეს, ექიმის კაბინეტიდან თავისი ფეხით გამოვიდა. კიდევ ბევრ თვალსაჩინო სამკურნალო ღონისძიებებს უტარებდა ავადმყოფებს, რამაც მას სახელი გაუთქვა და მასთან სამკურნალოდ მოდიოდნენ არა მარტო ჭიხაიშის მცხოვრებლები, არამედ მთელი ქუთაისის მაზრიდან. ავადმყოფების მიმართ მას ჰქონდა ძალზე გულისხმიერი მიდგომა, რაც მის ავტორიტეტს და პატივისცემას კიდევ უფრო ზრდიდა მოსახლეობაში. მოგეხსენებათ, რომ დიდი ჭიხაიში თავისი ტერიტორიით და მოსახლეობის რიცხვით ძალზე დიდია და ერთ ექიმს ძალზე უჭირდა მუშაობა, მით უმეტეს, რომ მცხოვრებლები ექიმით, მედიკამენტებით უფასოდ სარგებლობდნენ და საჭირო

იყო თუ არა. ყველა მოდიოდა საექიმო დახმარებისათვის როგორც ქსენონში. აგრეთვე უძახდნენ ბინაზე.

ყოველივე ამან გადატვირთა როგორც ექიმი, აგრეთვე აფთიაქი, რამაც გამოიწვია მედიკამენტების დიდი ხარჯვა და ექიმსაც ბინაზე 10—15—20 გამოძახებაზე წასვლა მაშინდელი ტრანსპორტით (ეტლით. ცხენით) ძალზე უძნელდებოდა, ვერ ასწრებდა. ყოველივე ამან გამოიწვია ის. რომ 1903 წლის შემოდგომაზე ივანე გომართელმა გადაწყვიტა დაეტოვებინა დიდი ჭიხაიში და ქუთაისში გადასულიყო.

სოფლის მცხოვრებლებმა თავისი საყვარელი ექიმი დიდი პატივისცემით გააცილეს და დაულოცეს გზა“...

ივ. გომართელი დიდ ჭიხაიშში მუშაობისას საექიმო პრაქტიკით რომ დიდად იყო გადატვირთული, იქიდანაც სჩანს, რომ იმ პერიოდში „ჭეჯილში“ მოთავსებულ „დედამიწის ისტორიის“ გარდა ახალი არაფერი გამოუქვეყნებია.

„გაათავა თუ არა სავალდებულო სამსახური, ბ-ნი გომართელი დაბინავდა ქუთაისში და მცირე ხნის განმავლობაში დაიმსახურა ხალხის ყურადღება და სიყვარული. მრავალი ხალხი, განსაკუთრებით სოფლებიდან. დადიოდა სამკურნალოდ ბ-ნ გომართელთან, რომელიც უმეტეს შემთხვევაში სასყიდელს არ ართმევდა და ხშირად თითონ ყიდულობდა შეუძლებელ პაციენტებისათვის წამლებს. ასეთმა ქველმოქმედებამ გაუთქვა სახელი ბ-ნ გომართელს და დასავლეთ საქართველოში იშვიათია ისეთი კაცი, რომ მაღლობით არ იხსენიებდეს მის სახელს“<sup>1</sup>.

ასე ახასიათებდა 1906 წელს გაზეთი „შრომა“ ივ. გომართლის საზოგადოებრივ მოღვაწეობას.

ივ. გომართელი, როგორც თვალსაჩინო საზოგადო მოღვაწე, რომელიც სიტყვით თუ საქმით რევოლუციის იდეებს ემსახურებოდა, სადაც კი ხმა მიუწვდებოდა, უკან არსად არაფერში იხევდა, რისთვისაც მეფის ჟანდარმერიას აღრიცხვაზე ჰყავდა აყვანილი.

რუსეთ-იაპონიის 1904—1905 წლების ომმა დაახქარა რუსეთში რევოლუციის მომწიფება. მეფის მთავრობის განზრახვა. რომ ომის საშუალებით ჩაეხშო რევოლუციური მოძრაობა. არ გამართლდა. პირიქით, ომმა ხალხი გააღატაკა და იგი მეფის რუსეთის დამარცხებით დამთავრდა. ხსენებულმა ომმა ყველას დაანახვა, რომ თვითმპყრობელობა სრულიად აღარ შეეფერობოდა რუსეთის ხალხის მდგომარეობას და გახრწნის გზაზე შემდგარიყო. დამარცხებამ ხე-

<sup>1</sup> „შრომა“, 1906 წ., № 46, გვ. 3. „სახელმწიფო სათათბიროს წევრი“.

ლი შეუწყო 1905 წლის გამათავისუფლებელი მოძრაობის გაძლიერებას.

„ქართველი ხალხი, რუსეთის იმპერიის აზარუს ხალხთა მსგავსად, ორმაგ ჩაგვრას განიცდიდა: ეროვნულს — თვითმპყრობელობისა და მისი დამქაშების მხრივ, და სოციალურს — საკუთარი მემამულეებისა და კაპიტალისტების მხრივ“<sup>1</sup>. ამიტომ 1905 წლის მოძრაობამ საქართველოში ხალხის თითქმის ყველა წრე ჩაითრია. სოფლებსა და დაბა-ქალაქებში ხალხმა ძველი მოხელეები გადააყენა და თავის საქმეებს თვითონვე უძღვებოდა. მთავრობის დაწესებულებებს ბოიკოტი ჰქონდა განოცხადებული და აღარავინ ეკარებოდა. სოფლებში მოძრაობას მალე აგრარული ხასიათი მიეცა და მემამულეები იძულებული გახდნენ თავისი კარ-მიდამო მიეტოვებინათ.

სწორედ ამ დროს მეხივით გავარდა ივ. გომართლის სტატია — „მიწის განსაზოგადოებრიობა“. სადაც ის აღნიშნავდა: „დღეს მიწის უმეტესი ნაწილი იმათ ხელშია, ვინც მიწაზე სრულებით არ მუშაობს, მიწის მუშა კი. ესე იგი ის ადამიანი, რომელსაც სრული უფლება აქვს საკმაო მიწით სარგებლობდეს, მიწას მოკლებულია... ამიტომ გზა სიმართლის. სამართლიანობისა და ხსნისაკენ ერთადერთია: უნდა ჩამოერთვას მიწა ყველას და აღიარებულ იქმნეს საზოგადოების საკუთრებად იმ პირობით, რომ ყოველ წევრს საზოგადოებისას, რომელსაც კი ექნება სურვილი და ღონე მიწის მუშაობისა, შეეძლოს ამ მიწით სარგებლობა“<sup>2</sup>.

ივ. გომართელი 1905 წელს „ივერიასა“ და „მოგზაურში“ ლიტერატურულ-კრიტიკულ წერილებს გარდა აქვეყნებს იმ დროისათვის მწვავე პუბლიცისტურ წერილებს. „ივერიის“ მოწინავეში — „აუცილებელი გზა“ ივ. გომართელი მოურიდებლად, საქვეყნოდ აცხადებს: „როდის მოისპობა ქვეყანაზე ადამიანთა ყვლეფა, როდის მოელება სამუდამოდ ბოლო დაბეჩავებას. როდის განთავისუფლდება კაცობრიობის უმრავლესობა მონობისა და მრავალგვარი შევიწროვების უღლიდან, ე. ი. როდის განხორციელდება ქვეყნად ეკონომიური თანასწორობა? ყველა ეს იმგვარი კითხვებია საერთოდ, რომ გადაჭრილი პასუხის მიცემა შეუძლებელია... ეს დღე უსათუოდ უნდა გათენდეს, და ეს კი სრულებით საკმარისია მებრძოლთათვის.

ჩვენში ბიუროკრატიული რეჟიმი უარყოფს თავისუფლად შეკრებას, თავისუფლად ლაპარაკს, თავისუფლად წერას, თავისუფლად გაფიცვას, — ერთი სიტყვით ყოველგვარ თავისუფლებას ყველა

<sup>1</sup> საქართველოს კომუნისტური პარტიის ისტორიის ნარკვევები. თბილისი, 1957 წ., გვ. 129.

<sup>2</sup> გაზ. „ივერია“, 1905 წ., № 136, 5 აკვისტო.

იმგვარ კითხვებში. რომელთა განხორციელებაც ყველა გაყვლეთილ-  
ათვის აუცილებელ საჭიროებას შეადგენს“<sup>1</sup>.

ამავე ხანში ივ. გომართელმა გამოაქვეყნა პიესა „ქოხში“, რომელსაც ქვესათაურად მისცა — „სცენები სოფლის ცხოვრებიდან“. პიესა დაიბეჭდა 1905 წლის „ივერიის ბიბლიოთეკის“ პრემაად (№ 4) და სწორად იდგმებოდა ქართულ სცენაზე.

„...რევოლუციის ხანაში ქართულ სცენაზე ბატონობს: „ექიმი შტოკმანი“, „ჟან და მადლენა“, „ფეიქრები“, „გაია გრაჯი“, „ერნანი“, „ჟილ-ბლაზი“, „ქოხში“, „წამხდარი სისხლი“ ივ. გომართლის, „მეზობლები“ ტრ. რამიშვილის, „მღვიმეში“ შალვა დადიანის, „ძალა აღმართს ხნავს“ ვ. გუნიასი და სხვა. ამ პიესებში პირველ ადგილზე მასების სოციალურ ზრდას და ამოძრავებას ვხედავთ, დაგმობილია ძველი პარაზიტული წოდებები და კრიტიკულს ცეცხლში ტარდება მათი დამცველი ბიუროკრატიული მთავრობები“<sup>2</sup>.

თავისი პიესის გმირს, დომენტის, ივ. გომართელი ასეთ სიტყვებს ათქმევინებს:

„განა ცოტა გლეხი ჯობია თავადიშვილს?.. როცა გლეხი შეიგნებს, რომ ის იმგვარივე ადამიანია, როგორც ის მუქთამჭამელები, რომლებიც მისი ოფლითა რჩებიან, სულ კუდიტ ქვას ასროლიებს. კი არ უნდა გავჩუმდეთ, უნდა ვიყვიროთ, ხმამალა უნდა ვიყვიროთ, რომ ერთმანეთს თვალები ავუხილოთ... უმეტესობა, მამაჩემო, ჩვენისთანა ღარიბები არიან. შენც, მეც. იმასაც, ე. ი. ყველას რომ თვალები ახილული გვქონდეს, მაშინ დავინახავდით, რომ ძალა ჩვენს ხელშია, — ჩვენზე ძლიერი, ჩვენი დამძლევი არავინ არის. საერთო ძალით კი რაც გვინდა, იმას ვიზამდით, მართო შენ რომ იყვირო. ამით კი ვერას გახდები, მდიდრებზე ბევრით მეტი ვართ და ამიტომ ძალაც ბევრით მეტი გვაქ. ცალ-ცალკე ყველას გვეშინია, მარა ჩვენ რომ ეს უბრალო ჭეშმარიტება შევიგნოთ და შევერთდეთ, ვერავინ ვერაფერს დაგვაკლებს, პირიქით, რაც გვინდა, იმას ვიზამთ მაშინ. — ყველა ღარიბებმა და გაჭირვებულებმა თვითონ უნდა იხსნან თავი, სხვა მათ არავინ იხსნის. უნდა გავახილოთ თვალები ახალგაზრდებმაც და მოხუცებმაც, შევიგნოთ ტყუილი და მართალი. ასე ცხოვრება აღარ გვარგია. სულ მუდამ გაჭირვებაში ყოფნას ბარემ ერთხელ გავიჭიროვოთ, ის გვირჩევნია; ჩვენ თუ არაფერი გვეღირსება, ჩვენ შვილებს მაინც მოესწრებათ... დროა შევერთდეთ, შეერთებული ძალით გავანადგუროთ ყველა ხალხის მტერი და ჩვენ, ღარიბებმა, დავაწესოთ

<sup>1</sup> გაზ. „ივერია“, 1905 წ., № 167, 18 სექტემბერი.

<sup>2</sup> ვ. ხუროძე, „მხატვრული ლიტერატურა 1905 წელს“, ქურონ. „რევოლუციის მატეანი“, 1930 წ., № 2(23), გვ. 166.

ახალი ცხოვრება ღარიბი ხალხისათვის!“ — ასეთი სიტყვებით ამთავრებს ივ. გომართელი თავის პიესას — „ქობში“.

1905 წლის „ცნობის ფურცელში“ მოთავსებულია ცნობა, რომ ბათუმში, 20 სექტემბერს, „რკინიგზის თეატრში, აქაურ სცენის მოყვარეთა მიერ წარმოდგენილ იქმნა პირველად ახალი პიესა ივ. გომართლისა „ქობში“. წარმოდგენას აუარებელი ხალხი დაესწრო, თეატრში ტევა არ იყო. პიესას დიდის ყურადღებით ისმენდნენ. სცენის მოყვარენი კარგად მოიქცნენ, რომ ხალხს მოასმენინეს ახალი პიესა და ისიც ისეთი რეალური და მისი ცხოვრებიდან ამოღებული, როგორიც არის ბ-ნ ივ. გომართლის პიესა“<sup>1</sup>.

1906 წლის 12 იანვარს ქართული დრამატული საზოგადოების დასმა ვ. აბაშიძის საბუნებისოვლ დადგა ივ. გომართლის პიესა „ქობში“, რომელშიც მონაწილეობდნენ ჩვენი გამოჩენილი მსახიობები: ტ. აბაშიძე, ნ. გაბუნია-ცაგარლისა, ვ. აბაშიძე, ვ. გუნია, შ. დადიანი, კ. შათირიშვილი, კ. ყიფიანი და სხვ.<sup>2</sup>.

ხელოვნების დამსახურებელი მოღვაწე დავით ჩხეიძე, რომელიც ბავშვობიდანვე ახლოს იცნობდა ივ. გომართელს, აი რას მოგვიყვება:

„მოწაფეობის დროს რეალურ სასწავლებელში ჩამოყალიბებული გეჰქონდა სცენის მოყვარულთა წრე. არადადეგების დროს სასწავლებელში და ახლომახლო დაბებში ვდგამდით რევოლუციური შინაარსის პიესებს. ჭიათურაში დავდგით ივ. გომართლის პიესა „ქობში“. წარმოდგენას დიდძალი მაყურებელი დაესწრო, სპექტაკლი კარგად ჩავატარეთ. ჭიათურაში იყო ბოქაული შავრაზმელი, მეფის ტახტის დიდი ერთგული ვინმე კედია, რომელიც პიესის შინაარსზე აღაშფოთა და სასტიკად გაილაშქრა ჩვენს მიმართ. აფიშაზე წრის ხელმძღვანელად ჩემი გვარი იყო გამოცხადებული, დამიწყო ძებნა თეატრის შენობაში. იმ დროს ჭიათურაში მუშაობდა ცნობილი რეჟისორი და მსახიობი ვალერიან შალიკაშვილი, რომელმაც მოასწრო ჩემი დამალვა. კულისებში იდგა ყუთი. რომელშიაც ჩავჯექი და ზევიდან ტანისამოსი დამაყარა და ასე გადავრჩი დატუსაღებას. იმავე ღამით გამომაპარეს ჭიათურიდან“.

ივ. გომართლის ლიტერატურული. პუბლიცისტური და პოლიტიკური მოღვაწეობა მაშინვე ჭეროვნად შეაფასეს მისმა თანამედროვეებმა. აი რას წერდა „ბათუმის გაზეთი“: „ივანე გომართელი ჩვენი ცნობილი ლიტერატორია... მადლიანი ნიჭის ნაყოფით მას ბევრი

<sup>1</sup> გაზ. „ცნობის ფურცელი“, 1905 წ., № 2918.

<sup>2</sup> გაზ. „ცნობის ფურცელი“. 1906 წ., № 2977.

მშრომელი გაუთვიცნობიყოები. ბევრისათვის აუტოკებია გული უკეთეს მემრისის ბრძოლისათვის. ის იყო სწორი გზის ერთ-ერთი საყვარელი მაჩვენებელთაგანი...“.

ამიტომ არც გასაკვირია, რომ 1905 წლის რევოლუციის დამარცხების შემდეგ, როდესაც თვითმპყრობელობამ სასტიკად იძია შური დამარცხებულ ხალხზე, განსაკუთრებით კი განაპირა კუთხეებზე, და შავი დღე დაუდგა საქართველოსაც, სადაც ჩვენი ქვეყნის ყველა კუთხეს მოედვნენ მთავრობის მიერ გაგზავნილი დამსჯელი რაზმები და აგენტები, ყურადღების გარეშე არ დაუტოვებიათ ივ. გომართელიც. მას სასტიკად სდევნიდა ჟანდარმერია და პოლიცია. ბოლოს იგი იძულებული გახდა ქუთაისის მოშორებოდა და დროებით თავი შეეფარებინა სოფელ თვრინში (ზესტაფონის რაიონი). ჩხეიძის ოჯახში.

„ამ დროს — მოგვითხრობს დავით ჩხეიძე — ჩემი უფროსი ძმა გრიგოლი ქუთაისში საშუალო სასწავლებლის დამთავრების შემდეგ მიემგზავრებოდა გერმანიაში უმაღლესი ცოდნის შესაძენად. მოლაპარაკების შემდეგ გადაწყდა, რომ გომართელი როგორმე გაეპარებინათ საზღვარგარეთ. საკირო იყო დიდი სიფრთხილე ორთავესათვის. თვალი რომ აეხვიათ პოლიციისათვის, გომართელს დაუმზადეს ჩოხა-ახალუხი, თავი ყაბალახით გაუკრეს და ვითომც ხელზე მოსამსახურე, 1906 წლის დასაწყისში გაყვა ჩემს ძმას. ასე დააღწია თავი დაქვრას“.

საქართველოდან ივ. გომართლის წასვლა კავკასიის მუშათა სოც.-დემოკრატ. ორგანიზაციების ყოველდღიურმა ორგანომ მაშინვე აღნიშნა. გაზ. „განთიადის“ ფურცლებზე ახალ ამბებში ვკითხულობთ: „როგორც გადმოგვეცეს, ექიმი ივ. გომართელი, რომელსაც ადმინისტრაცია დასაჭერად დასდევდა, ენევეაში ჩასულა და იქ ცხოვრობს თურმე“<sup>1</sup>.

ამის შემდეგ ივ. გომართელი პეტერბურგში ჩამოდის და აქტიურად ებმება თვითმპყრობელობის წინააღმდეგ ბრძოლაში.

1905 წლის რევოლუციის დამარცხების შედეგად საზოგადოებას გულგრილობა, მოწყენილობა და მოქანცულობა დაეტყო; რუსეთის ინტელიგენციის მნიშვნელოვანმა ნაწილმა ზურგი აქცია რევოლუციას, რუსეთის შწერლობაში კი გამეფდა „პორნოგრაფია, სქესობრივი აღვირაზსნილობა თითქოს აუცილებელ პირობად ხდებოდა პიროვნების ვითომდა განათვისუფლებისათვის. მხატვრულ ნაწარმოებთან ერთად იშვა სპეციალური ხასიათის ფილოსოფია, რომელ-

<sup>1</sup> გაზ. „განთიადი“, 1906 წ., № 5, 10 მაისი.



შიაც რელიგიურ და პატივსაღებ მოტივებთან ერთად იმავე ბილწ ნაკადულს მოჰნახავთ. გაჩნდნენ მქადაგებელნი „თავხელი სიყვარულისა“, „სამსხვერპლო სიყვარულისა“, ბიზანტიური საეკლესიო ტერმინოლოგიით იწყება ლაპარაკი არშიყზე და ტრფიალზე. „წუთების მყლაპველი“ გმირები უღვაწებს იგრეზდნენ ნახევრად გატიტვლებულ ნორჩი ქალების წინაშე, „ხორცის გამარჯვების მეჭლისი“ დღესასწაულობდა თავის გამარჯვებას და ვნების და მრუშის ტლაპოში ჩაეფლნენ თვით „ფილოსოფნიც“. საქმე იმაშია, ამბობდნენ, რომ ადამიანში უნდა დაიხშოს და დაიკარგოს ღროის, სივრცის შეგნება. საჭირთა მომენტის გამონახვა, სადაც წარსული, აწმყო და მომავალი თითქმის ერთმანეთში იშლებიან და იკარგებიან. ამგვარი მომენტი ექსტაზია, სიყვარულის ასლი, ღვთაებრივი ეროსი. სქესობრივი ურთიერთობა ერთი ამ მოვლენათაგანია. აქ ადამიანი ტრანსცენდენტალურ სამეფოში გადადის და უკვდავი ხდება (როზანოვი). გაუმარჯოს უკვდავ წამს, გაუმარჯოს გატიტვლებულ ადამიანს და მის აღმაფრენას უკვდავებისადმი... რევოლუციის მეორე დღეს ამით იკვებებოდა ახალგაზრდობა“ — წერდა არჩილ ჯორჯაძე<sup>1</sup>.

სწორედ ამ პერიოდის შესახებ წერდა მ. გორაკი, რომ „ათი წელი, 1907—1917 წლებამდე, ღირსია იმისა, რომ უაღრესად სამარცხვინო და უაღრესად უნიჭო ათწლეულის სახელი ეწოდოს რუსეთის ინტელიგენციის ისტორიაში, როდესაც 1905 წლის რევოლუციის შემდეგ ინტელიგენციის მნიშვნელოვანმა ნაწილმა ზურგი შეუბრუნა რევოლუციას, დაექანა რეაქციული მისტიკისა და პორნოგრაფიის ქაობში, თავის ღროშად უიღებოდა გამოაცხადა და თავისი რენეგატობა დაუარა „ლამაზი“ ფრაზით: „მე დავწვი ყოველივე, რასაც თავყანს ვცემდი, თავყანი ვეცი მას, რასაც ვწვავდი“.

პეტერბურგიდან დაბრუნდა თუ არა ივ. გომართელი, ქუთაისიდან 1907 წლის აგვისტოში საცხოვრებლად გადავიდა თბილისში და გვერდით შემოიკრიბა ისეთი მწერლები, როგორც იყვნენ მ. ჯავახიშვილი, სვ. ყიფიანი, პ. სურგულაძე, პ. თუმანიშვილი. მათ გადაწყვიტეს გამოეცათ კრებული.

კრებულში მონაწილეობის მისაღებად მოიწვიეს: ვაჟა-ფშაველა, შ. არაგვისპირელი, ია. ეკალაძე, თ. რაზიკაშვილი, კ. მაყაშვილი, ეკ. გაბაშვილი, ან. ერისთავ-ხომტარია, ცახელი, თომაშვილი და სხვ. ჩვენს ხელთ არის ორი წერილი ივ. გომართლის მიერ დ. მეგრელისადმი მიწერილი. 1907 წლის 15 აგვისტოთი დათარიღებულ წერილში ვკითხულობთ:

<sup>1</sup> არჩილ ჯორჯაძე. წიგნი მეორე. 1911 წ. გვ. 196—197

„პატივცემულო ბატონო დიმიტრი! რადგან ამ ბოლო დროს ქართულად სრულებით აღარ გამოდის ხელოვნური ნაწარმოებები, ამიტომ ჩვენ განვიზარახეთ გამოცვლეთ ჭერ-ჭერობით ერთი 300 გვერდიანი კრებული (2000 ცალად). პირადად ჩვენთვის ამ გამოცემისაგან არავითარ სარგებელს არ მოველით. გამოცემა დაჯდება დაახლოებით 600 მან. და სხვა, სტამბის, ქალაღღის და სხვა მასალებს რაც გადარჩება, დარიგდება ჰონორარად. გაცნობებთ, რომ მოგმართავთ თხოვნით ამ მოკლე ხანში შეგვატყობინოთ, თანახმა იქნებით თუ არა მონაწილეობა მიიღოთ ხსენებულ კრებულში და ამასთანავე მოგვაწოდოთ თქვენი ნაწარმოებები. პასუხი, გთხოვთ, ერთი კვირის ვადაში შეგვატყობინოთ. თუ გაქვთ რაიმე დამზადებული, გთხოვთ ახლავე გამოგვიგზავნოთ. თუ არა — 1 იანვრისათვის მოგვაწოდოთ...“<sup>1</sup>

ივ. გომართელს ამ წერილის პასუხი მიუღია და სამაგიეროსაც სწერს:

„დიდად პატივცემულო ბ-ნო დიმიტრი!

თქვენი წერილი მივიღე და პასუხსაც გწერთ. ყურნალი ჩვენში არ არსებობს. ბევრი რამ სიტყვაკაზმული გაზეთებშიაც ვერ მოთავსდება. ამით მწერლობაც ფერხდება. ხალხსაც სულიერი საზარდო აკლდება. ჩვენ რომ რუსეთის კონსტიტუციას ვუყუროთ, მგონია, დიდი ხნის ლოდინი დაგვეკირდება. ამიტომ რამდენიმე კაცმა შეეადგინეთ ამხანაგობა იმ მიზნით, რომ სიტყვაკაზმული კრებული გამოცვლეთ ხოლმე. პირველი იანვრიდან შევუდგებით ბეჭდვას უსათუროდ. კრებულს გამოვცემთ დროდადრო, — შეიძლება თვეში ერთი. შიგ მოთავსებული იქნება მხოლოდ სიტყვაკაზმული ნაწარმოები. სამას გვერდზე ნაკლები არ იქნება, მეტი—კი. გარეგნობით კარგი უნდა იყოს. ხარჯსა ვკისრულობთ ჩვენ. წმინდა შემოსავალი რაც დარჩება, თანამშრომლებს, ზარალი თუ იქნება, ჩვენ — ამხანაგობამ უნდა ვიკისროთ. ჩვენი შავი მუშაობა, რასაკვირველია, უსასყიდლოა. მე დარწმუნებული ვარ, არა თუ ზარალი, მოგებაც დარჩება. წერილი დამზადებული იყო თქვენთან და თქვენს მეუღლესთან. აქამდინ მიიღებდით. ჩვენი ცნობილი მწერლების ნაწერებს ჩვენი მოწონება აღარ ესაჭიროება. იმათ საზოგადოება აფასებს და ჩვენ კი რაც უნდა გამოგზავნოთ თქვენ, თქვენმა მეუღლემ, ვაჟაფშაველამ, ცახელმა, დედაბრიშვილმა და სხვ., უსათუოდ დავბეჭდავთ. პირველ კრებულში უსათუოდ უნდა იყოს თქვენი და თქვენი მეუღლის ნაწერები და სხვა ჩვენი ცნობილი მწერლების. ჩვენ გვინ-

<sup>1</sup> საქართველოს სახელმწიფო ლიტერატურული მუზეუმის ფონდი № 6356-ბ.

და, რომ პირველი კრებულთვე მოვიგოთ საზოგადოების გული. თუ სამსონმა (სამსონ ფირცხალავა.—ვ. წ.) არ მოგვცა, სხვას ველით თქვენგან. თუმცა დარწმუნებული ვართ, რომ ჩვენი კრებული უმალ გამოვა. პირველი იანვირიდან ბექლევას შევეუდგებით. სტამბაც, ქალაქი და პირველი კრებულისათვის საკირო ფული მზადა გვაქვს“<sup>1</sup>.

მართლაც, 1908 წელს ეს კრებული „ნიავის“ სახელწოდებით დაიბეჭდა, მაგრამ მაშინვე აუკრძალავს ცენზურას ივ. გომართლის პიესის „განკითხვის დღის“ მოთავსების გამო. კონფისკაცია უყვეს მთელ ტირაჟს. ასე რომ მკითხველმა წიგნი ვერ იხილა. ამ კრებულის არსებობა და შინაარსი ჩვენთვის უცნობი იქნებოდა, თუ არა პოეტ-აკადემიკოსის იოსებ გრიშაშვილის უანგარო სიყვარული წიგნისადმი. მის მიერ საქართველოს მეცნიერებათა აკადემიისადმი გადაცემული ბიბლიოთეკის ფონდების დამუშავებისას აღმოჩნდა ეს კრებული ი. გრიშაშვილის შემდეგი შენიშვნით: „ეს წიგნი აკრძალული იყო 1908 წ. და სულ არ გამოსულა გასაყიდად. ი. გრიშაშვილმა შეიძინა ცალ-ცალკე ფურცლებად ასოთამწყობ დ. კილაძის შემწეობით და აკინძა“.

აი, ამ კრებულის შინაარსი, რომელიც საინტერესო იქნება ჩვენი ჟურნალისტიკის ისტორიისათვისაც:

ნიავი. (სალიტერატურო კრებული). პ. თუმანიშვილის გამოცემა. თბილისი. 1908. 288 გვ.

შინაარსი

1. ია ეკალაძე — ახალი ბატონები — 1—38 გვ.

2. შ. არაგვისპირელი — მიჯაჭვული ამირანი — 39—42 გვ. (მხოლოდ ერთი კარი პაპა ფოცხვერას ნაამბობიდან).

3. ივ. გომართელი — განკითხვის დღე. პიესა ოთხ მოქმედებად — 43 — 140 გვ.

4. ვაჟა-ფშაველა — ღილა და კვირისა (მწყემსის ნაამბობი) — 141—147 გვ.

5. თ. რაზიკაშვილი — ავადმყოფი — 148—150 გვ.

6. ახალთაობას (ლექსები) — 151—152 გვ.

7. ცახელი — საბრალო ბაბუა (პოემა) — 153—164 გვ.

8. თ. რაზიკაშვილი — ქორის ბახალა (ამბავი) — 165—172 გვ.

9. დუტუ მეგრელი — მალხაზ ბარელი. დრამატ. პოემა 4 სურათად — 173—202 გვ.

<sup>1</sup> საქართველოს სახელმწიფო ლიტერატურული მუზეუმის ხელნაწერთა ფონდი № 6355-ბ.

10. მაყაშვილი—სულის სალარო (ლექსი) —203—204 გვ.

11. დ. თომაშვილი —„ცისკიდურ ლაყვარდ გუმბათზე...“ (ლექსი) — 205—207 გვ.

12. დ. თომაშვილი — სული ობოლი (პოემა) — 208—224 გვ.

13. სვ. ყიფიანი —სოფელში —სცენები სოფლის ცხოვრებიდან. 4 მოქმედებად — 225—288 გვ.

ივ. გომართელმა 1905 წელს დაწერა სამმოქმედებიანი დრამა „ჯაშუში“, რომელიც 1907 წელს ძლივს დაბეჭდა ჟურნალში „ჩვენი გზა“<sup>1</sup>. ამ პიესის დადგმა სასტიკად აკრძალული იყო. 1908 წლის „ნიშადურის“ (№ 39, გვ. 10) ცნობათა რუბრიკაში ასეთ შენიშვნას ვკითხულობთ: „ივ. გომართელის ახალი პიესა „ჯაშუში“ —წარმოსადგენად მთავრობას ნება არ დაურთავს იმ ქეშმარიტ მოსახრებით, რომ უმაგისოთაც ყოველდღიურ ცხოვრებაში თითქმის ყველა ჯაშუშობსო, თავიც კი მოგვაბეზრეს და სცენაზედ იმდენი ინტერესი აღარ იქნებაო...“

ივანე გომართელი ერთი პირველთაგანი იყო საქართველოში, ვინც თავისი სამეცნიერო წერილებით და მხატვრული ნაწარმოებებით 1905 წლიდან მოყოლებული ოცდაათიან წლებამდე სისტემატიურად ილაშქრებდა რელიგიისა და ცრუმორწმუნეობის წინააღმდეგ, რელიგიას უპირისპირებდა მეცნიერებას, ცდილობდა ხალხი გაერკვია რელიგიისა და ათეიზმის მნიშვნელოვან საკითხებში, განმარტავდა და თვალნათლივ ხსნიდა ღმერთის, ქრისტეს და ქრისტიანობის წარმოშობის მიზეზებს. ბიბლიიდან მოტანილი მაგალითებით არჩევდა იქ მოცემულ წინააღმდეგობებს, ააშკარავებდა რელიგიის ყალბ, ანტიმეცნიერულ მტკიცებას, რომ ყველაფერი ამ ქვეყნად ღვთისაგანაა და მისი ნებისაგან გამომდინარეობს. ამას იგი მაშინ ჩადის, როდესაც რეაქციის წლებში რელიგია და იდეალიზმი დიდ სამსახურს უწევს მეფის დამქაშებს მშრომელი მასების დასამონებლად. ამ პერიოდში ივ. გომართელი გვევლინება ნამდვილ მებრძოლ ათეისტად.

ივ. გომართელმა 1907 წელს „ნაკადულის“ ფურცლებზე დაბეჭდა ასტრონომიის სფეროდან წერილი „სამეცნიერო საუბარი“<sup>2</sup>. ამ წერილმა ქუთაისის სასულიერო წოდების ორგანოს „შინაური საქმეების“ გულისწყრომა დაიმსახურა. გაზეთის თანამშრომელი სეფე ველელი უკიყინებს: „აქ რამდენი წინადადებაა, იმდენი შეცდომაა, სიცრუე და სიმრუდე... ივ. გომართელის სულისკვეთე-

<sup>1</sup> „ჩვენი გზა“, 1907 წ., № 21, 23, 25—27, 29—31.

<sup>2</sup> ჟურნ. „ნაკადული“ (საყმაწვი) 1907 წ., № 10

ბას შეადგენს დაამტკიცოს, რომ არ არის და არც საჭიროა იყოს არაერთი ღმერთი, შემოქმედი ცისა და ქვეყნისა“<sup>1</sup>. რაში ყოფილა თურმე ეს „სიცრუე და სიყალბე“ — ამაზე პასუხობს ეურნალ „განათლებას“ რედაქცია: „თურმე ქვეყნიერებაზე ყველაფერი ღვთის ძალით გაჩენილა, აღორძინებულა და რადგანაც ბ-ნი გომართელი ღმერთს, ამ ყოვლად შემოქმედს, ერთის სიტყვითაც არ იხსენიებს თავის სტატიაში, ამიტომ მისი სტატია ყალბი და სიცრუე ყოფილა“<sup>2</sup>.

1908 წელს გაზეთებში „ჩვენი კვალი“, „ჩვენი ქვეყანა“ დაიბეჭდა ივ. გომართლის წერილები ამჟერადაც „სამეცნიერო საუბრების“ სახელწოდებით, რომელიც დედამიწის, ცხოველების და ადამიანის წარმოშობის საკითხებს ეხება. აქ ის, დარვინის ევოლუციური თეორიის საფუძველზე, ცხოველთა სამყაროდან ადამიანის წარმოშობას ამტკიცებს. ამავე წელს ცალკე წიგნად გამოდის მისი „ტვინი და სული“. ყველა ამ შრომაში იგი ილაშქრებს რელიგიის და ცრურწმენის წინააღმდეგ.

ივ. გომართელი განმარტავს: სამღვდლოება რომ ქადაგებდა. ღმერთმა ცალ-ცალკე გააჩინა თევზი, ქვემძრომნი, ცხოველები, ფრინველები, მცენარენი და ადამიანი, დარვინმა გამოაშკარავა სრული სიყალბე ასეთი შეხედულებასა და დაამტკიცა, რომ ერთი მოდგმა განვითარდა მეორისაგან, როგორც მცენარეთა, ისე ცხოველთა სამეფოში და ადამიანიც შედგება ასეთი განვითარებისა უმდაბლესი ცხოველებიდან.

დარვინმა უამრავი საბუთით დაამტკიცა, თუ როგორ ცვლილებას იწვევს ცხოველთა და მცენარეთა რიგებში არსებობისათვის ბრძოლა და ბუნებრივი შერჩევა. ამ რკინის კანონს ბუნებისას ვერც ადამიანი აიცდენდა თავიდან. ადამიანი ძველთაგანვე ისეთი კი არ გაჩნდა, როგორც დღეს არის, არამედ თანდათანობით განვითარდა უმდაბლესი ცხოველიდან. ჩვენი წინაპრები არა ყოფილან ადამი და ევა, არამედ ცხოველები. რომლებიც ოთხზე დადიოდნენ და ენა არ იცოდნენ<sup>3</sup>.

ივ. გომართელი მეცნიერების მიღწევებზე დაყრდნობით განუმარტავს ხალხს, რომ სამყარო ღმერთის მიერ კი არ არის შექმნილი. როგორც ამას რელიგია ქადაგებს, არამედ როგორც მეცნიერება აღიარებს — ობიექტურად არსებული მატერიალური სინამდვილისა-

<sup>1</sup> გაზ. „შინაური საქმეები“, 1908 წ., № 1, გვ. 8 — 11

<sup>2</sup> ეურნ. „განათლება“, 1912 წ., № 4, გვ. 309.

<sup>3</sup> ივ. გომართელი, გლეხის კარაბადინი თბ., სახელგამი, 1928 წ., გვ. 11, 12

გან, მარტივიდან რთულისაკენ კანონზომიერი განვითარებით, დაბალი ფორმიდან მაღალი ფორმისაკენ, რომ ორგანული მატერია არაორგანული მატერიის განვითარების შედეგია.

1908 წ. ახლად გამოსულ ყურნალ „ალიონში“ (№ 1, 2) ივ. გომართელმა დაბეჭდა სტატია — „როგორ გააჩინა ადამიანი ღმერთი“. ეს წერილი ყუმბარასავით გასკდა, დიდი რეაქცია გამოიწვია რელიგიის და ეკლესიის მსახურთა შორის. ივ. გომართელი ილაშქრებს იმ ცრუ შეხედულებების წინააღმდეგ, ვითომ იესო ქრისტე ქალწულ მარიამს ჩაესახა სულიწმინდის ზეგადმოსვლით. ავტორი აღნიშნავს, რომ რელიგია ამართლებს კლასობრივ ჩაგვრას, იცავს მონობას, ასწავლის მშრომელებს შეეგუონ და შეურიგდნენ სილატაკესა და გაჭირვებას:

„დღევანდელი საქრისტიანო სამღვდელოება ქრისტეს მიმდევარი კი არ არის, არამედ ფარისევლების, რომელთა წინააღმდეგ თავიდანვე იყო მიმართული ქრისტეს მოძღვრება... საქრისტიანოს ფარისევლებმა ქრისტეს მოძღვრება თავის გემოვნებაზე გადააკეთეს; საბრალო ხალხი კი დარწმუნებულია: სამღვდელოების პირით თვით ქრისტე ლაპარაკობსო. ქრისტე რომ ეხლა მოველინოს ქვეყანას, ყველაზე უმალ მისი სახელის მატარებელი სამღვდელოება ამხედრდებოდა იმის წინააღმდეგ...“

ქრისტე უარყოფდა მხოლოდ იმ ყალბ, ცრუ და უსამართლო, სისხლში შეღებილ ცხოვრებას, რომლითაც დღესაც სცხოვრობს კაცობრიობა და ჯერ ალბათ კიდევ დიდხანს იცხოვრებს, სანამ ძლიერი მაჯა ოფლის მღვრელისა ძირიანად არ განაახლებს ქვეყნიერებას. ხოლო ქრისტეს ამ ყალბი ცხოვრების ნაცვლად ამ ქვეყანაზე უნდოდა ნამდვილი, ადამიანური ცხოვრების აგება და თუ მის განზრახვას, იმის ქადაგებას სრულებით ამახინჯებენ, — იმიტომ რომ ქრისტეს ავტორიტეტით ხალხი დააბრმავონ; სიბრმავე კი საჭიროა ბატონების კეთილდღეობისათვის...

ისტორიამ არ იცის არც ერთი ხანა, როცა სამღვდელოება სინათლის მომხრე და გაჭირვებული ხალხის ჭირისუფალი ყოფილიყოს<sup>1</sup>.

ივანე გომართელმა საქვეყნოდ ამხილა, რომ რელიგია ქადაგებს მოთმინებას, ამქვეყნად აუტანელი ტანჯვის უყოყმანოდ გადატანას; რომ იგი: სამართლიანად მიიჩნევს ადამიანის ბატონობას ადამიანზე, ამქვეყნიური აუტანელი ტანჯვისათვის მშრომელ მასებს პირდება იმქვეყნად განთავისუფლებასა და ბედნიერებას.

<sup>1</sup> გაზ. „ალიონი“, 1908 წ., № 2.

ამ სტატიისათვის ივ. გომართელი პასუხისგებაში მისცეს, გაზეთიც მაშინვე დახურეს.

1910 წელს ამ სასამართლო პროცესს გამოეხმაურნენ გაზეთი „ფონი“ და ჟურნ. „თეატრი და ცხოვრება“<sup>1</sup>.

ივ. გომართელი 1910 წ. თებერვალში გაასამართლეს და 31 მაისს დააპატიმრეს ერთი წლით

ივ. გომართლის ეს პატიმრობა მოხსენიებული აქვს გ. ლასხიშვილს თავის მემუარებში (270-ე გვ.).

შეტების ციხეში ყოფნა ივ. გომართელმა ტყუილად ჯდომით არ გაატარა. როგორც ჟურნ. „განათლებას“ რედაქცია გვაუწყებს, „ბ-ნი ივ. გომართელი შარშან, როდესაც მთელი წლით დატუსაღებული იყო, შეუდგა ასტრონომიის შესწავლას, რის შესახებ ქართულად არაფერი მოგვეპოვება; მან დასწერა მოკლედ და გარკვევით ვრცელი სტატია ამ საგანზე აწინდელის მეცნიერულის მეთოდისა და საუკეთესო მეცნიერთა შეხედულებების კვალობაზე. ეს ხელნაწერი მასალა მან წარუდგინა „ნაკადული“-ს რედაქციას დასასტამბავად. ყველა სიამოვნებით მიეგება ნიჭიერი ავტორის ამ ახალ ნაშრომს, რომელიც შედარებული და შემოწმებული იქნა საუკეთესო ასტრონომების ნაშრომებთან; ზოგმა ის აზრიც გამოსთქვა, რომ ცალკე წიგნად დაბეჭდილიყო<sup>2</sup> და პრემიად მისცემოდა „ნაკადული“-ს მკითხველებს, რადგანაც ასტრონომიის შესახებ ჩვენ აწინდელი მეცნიერების მოთხოვნების კვალობაზე არაფერი გვაქვს; ბ-ნი გომართლის სტატია ყველასათვის გასაგებად დაწერილი საუკეთესო სახელმძღვანელო იქნებოდა სახალხო სკოლის მასწავლებელთათვის, რომელნიც მოვალენი არიან როგორც მოწაფეებს, ისე ხალხსაც გადასცენ მეცნიერთა შეხედულება ამ საჭირო საგანზე“<sup>3</sup>.

ივ. გომართელი კარგი ორატორი გახლდათ და ხშირად გამოდიოდა ლექციებზე სხვადასხვა საკითხზე, მონაწილეობას იღებდა დისპუტებსა და ლიტერატურულ გასამართლებაში; საყურადღებოა მისი სიტყვები, წარმოთქმული გიორგი სააკაძის<sup>4</sup> და ალ. ყაზბეგის მაყვალას<sup>5</sup> დასაცავად გასამართლების დროს. მის გამოსვლებს აუ-

<sup>1</sup> გაზ. „ფონი“, 1910 წ., № 3, გვ. 7; ჟურნ. „თეატრი და ცხოვრება“, 1910 წ., № 22.

<sup>2</sup> ივ. გომართლის წიგნი „ასტრონომია“ ცალკე წიგნად გამოვიდა თბილისში 1919 წელს. ეს არის მშობლიურ ენაზე პირველად დაწერილი ასტრონომიის სახელმძღვანელო.

<sup>3</sup> ჟურნ. „განათლება“, 1912 წ., № 4, გვ. 309.

<sup>4</sup> იქვე, № 1, „გიორგი სააკაძე“.

<sup>5</sup> გაზ. „ფონი“, 1910 წ., № 4, „მაყვალას გასამართლება“.

დიტორია ხალისით ესწრებოდა და კმაყოფილი რჩებოდა ლექციებ-  
ბით; მაშინდელი გაზეთები ქებით იხსენიებდნენ, აღნიშნავდნენ, რომ  
„ორატორმა თავისი ტკბილი ენით მოხიბლა საზოგადოება“.

ივ. გომართელმა 1909 წელს დაწერა და საჯაროდ წაიკითხა  
ლექცია პოეტ ვახტანგ ორბელიანზე. ამ ლექციის წაკითხვის დღე  
გაზეთებში რამდენიმე დღით ადრე ცხადდებოდა, მაგრამ ტექსტი  
არსად დაბეჭდილა მაშინდელი ცენზურის გამო. ეს ტექსტი დღემდე  
ჩვენთვის უცნობი იყო. ლექციის ტექსტს, ფანქრით დაწერილს, ჩვენ  
მივაკვლიეთ<sup>1</sup>. ავტორს სათაური მიუცია: „სარწმუნოება სამშობ-  
ლოს სიყვარულისა“. ამ ლექციის წინააღმდეგ მაშინვე სასტიკად გა-  
ილაშქრა გაზ. „მერცხლის“ რედაქციამ, მაგრამ, როგორც თვით ივ.  
გომართელი წერს: „ვ. ორბელიანის პოეზიის შესახებ ლექციის წა-  
კითხვის დროს გავბედე და ვსთქვი: სამშობლოს სიყვარული უდი-  
დესი გრძნობაა და ამ გრძნობას ყველა უნდა ვეფერებოდეთ-მეთქი.  
რამდენიც კი შეიძლება შემამკეს ამის გულისათვის“<sup>2</sup>.

როდესაც წ.-კ. გამავრცელებელმა საზოგადოებამ ნება დართო  
ექიმ მიხ. გედევანიშვილს ილ. ჭავჭავაძის თხზულებები გამოეცა,  
კომისიის წევრებად აირჩიეს ივ. გომართელი. კ. აბაშიძე, გრ. ყიფში-  
ძე, იაკ. ფანცხავა; გ. გედევანიშვილის გამოცემულ ილია ჭავჭავაძის  
პირველ ტომს ივ. გომართელმა უძღვნა შესანიშნავი სტატია<sup>3</sup>.

იოსებ იმედაშვილის ჟურნალ „თეატრი და ცხოვრების“ დაარ-  
სების დღიდან (1910 წ.) დახურვამდე (1926 წ.) ივ. გომართელი  
მისი უახლოესი თანამშრომელი იყო.

1917 წელს ი. იმედაშვილის მიერ ახლად დაარსებულ გაზ.  
„ხალხის ერთობის“ (შემდეგ გადაკეთებული „ხალხის თავისუფლე-  
ბა“) ყოველ ნომერში იბეჭდებოდა ივ. გომართლის წერილები.

1919 წლის 9 ნოემბერს პოეტ ვ. რუხაძის ბინაზე შესდგა ქარ-  
თველ მწერალთა ერთი ჯგუფის კრება ვ. რუხაძის თავმჯდომარეო-  
ბით და ამ კრებამ დაადგინა „შევიდეს ქართველ მწერალთა საერთო  
კავშირში, როგორც განსაკუთრებული ჯგუფი“. და ამ ჯგუფმა და-  
იწყო გამოცემა ყოველთვიური სამხატვრო-სალიტერატურო ჟურ-  
ნალისა „ცისარტყელა“, რომლის რედაქოლეგიაში არჩეული იქნენ:  
ივ. გომართელი, ა. აბაშელი, ობოლი მუშა და სხვ. ფაქტიურად ამ

<sup>1</sup> ივ. გომართლის ნათესავის — ქეთევან ციციშვილ-შირიანაშვილის ოჯახში.  
რისთვისაც მადლობას მოვახსენებთ.

<sup>2</sup> გაზ. „თემი“, 1913 წ., № 150. ივ. გომართელი: „რისთვის?“.

<sup>3</sup> გაზ. „ჩვენი დროება“, 1913 წ., № 20. „შობეჭდილებანი“.



ეუზნალის რედაქტორი და კრიტიკის განყოფილების ხელმძღვანელი ივ. გომართელი იყო.

ივ. გომართელი პროგრესულად მოაზროვნე ქართველი ინტელიგენციის იმ ჯგუფს მიეკუთვნებოდა, რომელიც სოციალისტური რევოლუციის შემდეგ მთელი თავისი შუგნებით საბჭოთა საქართველოს აღორძინების ფერხულში ჩაება და თავის უშრეტ ენერგიას, ცოდნას და გამოცდილებას, სიტყვით თუ კალმით, განთავისუფლებულ სამშობლოს კეთილდღეობის საქმეს ახმარდა.

საქართველოში საბჭოთა ხელისუფლების დამყარების შემდეგ მან 11 წიგნი და 150-ზე მეტი სტატია გამოაქვეყნა. მათ შორის აღსანიშნავია რომანი-ქრონიკა „სამი დროება“, „ტვინი და სული“ (მეორე გამოცემა), „გლენის კარაბადინი“, ანტირელიგიური მოთხრობა „ნიგვზიეთის ღვთისმშობელი“. ევროპაში მოგზაურობის შედეგად დაბეჭდილი „შთაბეჭდილებანი“ (მოსკოვი-პერლინი-პარიზი), „მაქსიმ გორკის ცხოვრება და შემოქმედება“ და სხვ. სტატიები: მ. ჯავახიშვილის მოთხრობების პირველი ტომის წინასიტყვაობა, „ჯაყოს ხიზნები და ჩვენი ცხოვრება“, „ილ. ჭავჭავაძე და მისი მხატვრული შემოქმედება“. „ალ. ყაზბეგი და მისი ძიება“, ლიტერატურულ-კრიტიკული და თეატრალური რეცენზიები, წერილები მაშინდელი ახალგაზრდა პროლეტარული პოეტების: ა. მაშაშვილის, ს. ეულის, ი. ვაკელის და სხვ. შემოქმედებაზე. ოციან წლებში ჩვენს ლიტერატურათმცოდნეობაში წამოჭრილ საღისეუსიო საკითაბებზე — ფორმისა და შინაარსის ურთიერთდამოკიდებულებაზე. პროლეტარული ხელოვნების რაობაზე, მედიცინის, პოლიტიკის და სხვა საკითხებზე.

საქართველოში საბჭოთა ხელისუფლების დამყარების პირველ წლებში ივ. გომართელი აქტიური თანამშრომელია გაზ. „მიწის მუშის“, სადაც 1923 წლიდან თითქმის ყოველ ნომერში ათავსებს სტატიებს სხვადასხვა საკითხზე, პოპულარულ-სამეცნიერო წერილებს. განსაკუთრებით გლახობისათვის წერს მედიცინის საკითხებზე, ააშკარავებს ხუცებისა და ეკლესიის მაქინაციებს.

„ჩვენ ყველა უნდა შევებრძოლოთ ყოველგვარ მტერს — შინაურსაც, გარეულსაც, რომელიც კი საბჭოთა წყობილების წინააღმდეგ დააპირებს წამოსვლას, — წერდა ივ. გომართელი, — ჩვენ უნდა დავუმტკიცოთ ხელისუფლებას, რომ მას არა ჰქონდეს მთელი ქართველი ერის ასეთს გადაწყვეტილებასა და განწყობილებაში არავითარი ეჭვი.

ბრმა უნდა იყოს აღამიანი, რომ ვერ დაინახოს, რა დიდი საქმე ეთდება ჩვენში: ელექტრონის სადგურები, აბრეშუმის, ბამბის, მაუდის, გრეხილ-ავეჯეულობის ქარხნები. სამზადისი ქალაღის ქარ-

სნის ააგებად, ქარხლის მოსაყვანად, კაობების ამომზრობა ყოთსა და ქობულეთში, სარწყავი არხების გაყვანა და სხვა.

ყოველივე ეს დიდი ეროვნული საქმეა თუ არა, დანარჩენს რომ თავი დავანებოთ?

როგორც ჰხედავთ, ბოლშევიზმს მარტო სამოქალაქო ომი კი არ შესძლებია, დიდი საქმეების კეთების უნარი და ძალღონეც ჰქონია<sup>1</sup>.

ივ. გომართელი თავის შრომებში ფილოსოფიის ზოგად პრობლემებსაც ეხება და მატერიალიზმის პრინციპებზე დგას, მას დიდი ღვაწლი მიუძღვის იმ იდეოლოგიურ დისკუსიებშიც, ქართველი მარქსისტები რომ აწარმოებდნენ სხვა მიმდინარეობათა წინააღმდეგ.

დაწყებული 1898 წლიდან მეოცე საუკუნის 30-იან წლებამდე, შეიძლება გადაჭრით ითქვას, რომ საქართველოში არ დარჩენილა საზოგადოებრივი ცხოვრების არც ერთი უბანი, სადაც ივ. გომართელს თავისი სიტყვა არ ეთქვას და შესამჩნევი კვალი არ დაემჩნიოს.

ივ. გომართელმა დღიდან საზოგადოებრივ ასპარეზზე გამოავლინა თავის დევიზად გაიხადა სამშობლოა. მშრომელი ხალხის უანგარო სამსახური. მას მუდამ ალღვებდა საქართველოსა და ქართველი ხალხის ბედი.

ივ. გომართელის დამსახურება მეტად დიდია ქართული ლიტერატურული კრიტიკის, ხელოვნების, ესთეტიკის სფეროში, მის წერილებსა და ნაშრომებს ქართველი მკითხველი მუდამ წაიკითხავს.

ივ. გომართელი გარდაიცვალა 1938 წლის 19 აპრილს, ღამის 3 საათზე უეცრად, გულის შეტევით. დააფლავებულია ვაკის სასაფლაოზე.

<sup>1</sup> „სახალი-გზა“, 1927 წ., № 3, გვ. 10:

## ივანე გომართლის ნაწერები

(პრახრული სია)

1896 წ.

1. ხტუნია ციყვეუნია (ცალკე წიგნად), გრ. ტატიშვილის გრავიურებით.
2. გულთმისანი. ნამდვილი ამბავი (თარგმანი), ჟურნ. „ჩეჭილი“, № 1.
3. პეპელას თავგადასავალი. მოთხრობა (თარგმანი), ჟურნ. „ჩეჭილი“, № 3.
4. მესკია. მოთხრობა, ჟურნ. „ჩეჭილი“, № 6.
5. უბრალო ამბავი. მოთხრობა (თარგმანი), ჟურნ. „ჩეჭილი“, № 7.
6. გიგლას ფისუა. ლექსი, ჟურნ. „ჩეჭილი“, № 8.
7. ნათლიამამას ძღვენი. მოთხრობა, ჟურნ. „ჩეჭილი“, № 10.
8. გლეხის ბიჭუნა. ლექსი, ჟურნ. „ჩეჭილი“, № 10.

1897 წ.

9. ისტორია აღმოსავლეთისა (ცალკე წიგნად).
10. წისქვილი. მოთხრობა, ჟურნ. „ჩეჭილი“, № 2.
11. გულკეთილი ლეეანი. მოთხრობა, ჟურნ. „ჩეჭილი“, № 4.
12. მოიბარა. ამბავი (თარგმანი), ჟურნ. „ჩეჭილი“, № 5.
13. პაქუა და მერცხალა (გადმოკეთებული დიმიტრიევის მოთხრობიდან).  
ჟურნ. „ჩეჭილი“, № 6.
14. მერცხლების ბუდე. მოთხრობა (თარგმ. ფრანგულიდან), ჟურნ. „ჩეჭილი“, № № 7, 8.
15. ობოლი. მოთხრობა, ჟურნ. „ჩეჭილი“, № № 7, 8, 9.
16. პაპია გაჯალდა! ამბავი, ჟურნ. „ჩეჭილი“, № 9.
17. გარიბალდის ცხოვრება. ჟურნ. „ჩეჭილი“, № 10.
18. კორესპონდენცია. მოსკოვი. ქართული სალამო. გაზეთი „ცნობის ფურცელი“, № 129.

1898 წ.

19. თხულებანი შამია გურიელისა. გაზეთი „კვალი“, № № 31—37.
20. „ციცქარა“ ან. ფურცელაძისა, გაზეთი „კვალი“, № № 41, 43.

21. „ბუნება და ცხოვრება“ ილ. ალბაზიშვილისა, გაზეთი „კვალი“, № № 51, 52.
22. ოცნება და ცხოვრება („მრევლში“ დ. კლდიაშვილისა), გაზეთი „ივერია“, № 63.
23. კაცის შეფობა. მოთხრობა, ეურნ. „ჩეჩილი“, № 2.
24. ახალი ქვეყანა (ქრისტეფორე კოლუმბი), ეურნ. „ჩეჩილი“, № 2, 3.
25. ერთი დღის დაია. მოთხრობა (თარგმანი), ეურნ. „ჩეჩილი“, № 3.
26. ქალაქელი ძამია. მოთხრობა, ეურნ. „ჩეჩილი“, № № 3, 5.
27. ვისი ბრალი იყო? მოთხრობა, ეურნ. „ჩეჩილი“, № 6.
28. პატარა პუმის თავგადასავალი. მოთხრობა (თარგმანი), ეურნ. „ჩეჩილი“, № № 7—8.
29. ფიზიოლოგიური წერილები, ეურნ. „ჩეჩილი“, № № 2, 3, 11.

#### 1899 წ.

30. ქართული სიტყვაკაზმული მწერლობა 1898 წ., გაზეთი „კვალი“, № № 1, 2, 5—7.
31. შარშანდელი „ჩეჩილის“ კრიტიკოსი, გაზეთი „კვალი“, № № 14, 16, 17.
32. კრიტიკული შენიშვნები: „ამოდის, ნათდება“ და სხვა მოთხრობები ვაჟა-ფშაველასი, გაზეთი „კვალი“, № 28.
33. პასუხის პასუხი (ბოცვაძეს), გაზეთი „კვალი“, № № 34, 35.
34. ხალხის გულის მესაიდუმლე (თხზულებანი ეგ. ნინოშვილისა), გაზეთი „კვალი“, № № 29, 30, 32, 33, 36, 38—42, 44, 45, 47—51.
35. ბ-ნ ხომლეღის. შენიშვნა (ლიტერატურული კრიტიკა და პლაგიატობა), გაზეთი „კვალი“, № 52.
36. იაქშინი — ჩუმი დარაჯი (სერბული მოთხრობა. თარგმანი), ეურნ. „მოამბე“, № 1.
37. პესტალოცი. ეურნ. „ჩეჩილი“, № № 7, 8.

#### 1900 წ.

38. ორმოცდა ათი წელი ქართული თეატრისა, გაზეთი „კვალი“, № № 1, 2.
39. გ. წერეთელი, როგორც ბელეტრისტი, გაზეთი „კვალი“, № 3.
40. ჩვენი სიტყვაკაზმული ლიტერატურა 1899 წ., გაზეთი „კვალი“, № 5, 7, 9.
41. ჭავჭავაძე და ჭავჭავაძე, გაზეთი „კვალი“, № № 21, 22, 25, 27, 28.
42. ახალი გზა („ქაშაშვილის გაპირებება“ დ. კლდიაშვილისა), გაზეთი „კვალი“, № № 29, 30, 32.
43. ხელოვნება და მისი მიზანი, გაზეთი „კვალი“, № № 33, 34, 36, 38, 39, 40, 43.

#### 1901 წ.

44. 1900 წლის სიტყვაკაზმული მწერლობა, გაზეთი „კვალი“, № № 1, 2, 6.
45. რ. ერისთავი, როგორც საერო პოეტი, გაზეთი „კვალი“, № 9.
46. ქართული ლიტერატურა მე-19 საუკ., გაზეთი „კვალი“, № № 15—19.
47. ქართული საერო პოეზია. რაფიელ ერისთავი, გაზეთი „კვალი“, № № 20, 21, 23, 29.

48. რუსული პოეზიის უმთავრესი მომენტები XIX საუკუნეში, გაზეთი „კვალი“, № № 30—35.
49. ჩვენი საზოგადოებრივი ცხოვრება გუშინ და დღეს, გაზეთი „კვალი“, № № 36, 37 (გაგრძელება აღარ მოყვა).
50. ზნეობრივი კითხვები, გაზეთი „კვალი“, № № 39—43.
51. ბაქტერიები ანუ ბაცილები, ეურნ. „ჩეჩილი“, № № 3—8.
52. უწინდელი ცხოველები, ეურნ. „ჩეჩილი“, № № 9, 10.
53. მცენარე და მისი ცხოვრება, ეურნ. „ჩეჩილი“, № № 11, 12.
54. Армяно-Грузинские отношения, газета «Новое Обозрение», № 5724.
55. Еще об Армяно-Грузинских отношениях, газета «Новое Обозрение», № 5747.
56. Кое-что об интеллигенции, газета «Новое Обозрение», № 5767.
57. Критические заметки. «Кавказский Вестник», № V—VI.
58. Критические заметки (Первый том произведений Ш. Арагвиспирели), газета «Новое Обозрение», № 5791.
59. Критические заметки. (Стихотворения И. Евдошвили и Гр. Абашидзе), газета «Новое Обозрение», № 5856, 5859.

#### 1902 წ.

60. სიტყვაკაზმული მწერლობა 1901 წელს, გაზეთი „კვალი“, № № 1—4.
61. თავისუფლება ნებისა თუ აუცილებლობა? გაზეთი „კვალი“, № № 15—19.
62. დაე. კლდიაშვილის მოთხრობანი, გაზეთი „კვალი“, № № 23, 24.
63. ილ. ჰავკავაძე და მისი პოეზია, გაზეთი „კვალი“, № 36.
64. მაქსიმ გორკი (კრიტიკულ-ბიოგრაფიული წერილი, წიგნში: მაქსიმ გორკის მოთხრობები. წიგნი პირველი, თარგმანი ვანო გიუნაშვილისა), გვ. 7—22.
65. შილერის პოეზიის ძირითადი თვისებები, გაზეთი „კვალი“, № № 41—45, 47, 51, 52.
66. ბუნება და მისი ცხოვრება, ეურნ. „ჩეჩილი“, № 1.
67. მზე და მისი მნიშვნელობა დედამიწისათვის, ეურნ. „ჩეჩილი“, № 2.

#### 1903 წ.

68. შილერის პოეზიის ძირითადი თვისებები (დასასრული), გაზეთი „კვალი“, № 1.
69. შილერის პოეზიის ძირითადი თვისებები (ცალკე წიგნად), ქუთაისი, გ. მალრატის გამოცემა.
70. ღია წერილი მან „სიტყვას“, გაზეთი „კვალი“, № 9.
71. დედამიწის ისტორია, ეურნ. „ჩეჩილი“, № 3.

#### 1904 წ.

72. ხალხის გულის მესაიდუმლე (თხზ. ეგ. ნინოშვილისა), (წიგნში: ეგ. ნინო-

შეიღო, თბილისი. 1904 წ., ს. თავართქილაძის გამოცემის წინასიტყვაობა), გვ. 31—107.

73. ჯუზეპე გარიბალდი (ცალკე წიგნად), თბილისი.

74. შილერის პოეზიის ძირითადი თვისებები (ცალკე წიგნად), მეორე გამოცემა, თბილისი.

### 1905 წ.

75. ქოშვი. სცენები სოფლის ცხოვრებიდან, „ივერიის“ ბიბლიოთეკა, პრემია № 4, 1905 წ., გვ. 5—112.

76. წამხდარი სისხლი, კომედია 4 მოქმედებად, „ივერიის“ ბიბლიოთეკა, პრემია № 8, 1905 წ., გვ. 5—106.

77. დღევანდელი სიტყვაკაზმული მწერლობის როლი და მნიშვნელობა, ჟურნალი „მოგზაური“, გვ. 41—43.

78. საუბარი, გაზეთი „ივერია“, № 114.

79. პასუხის მთავარი, გაზეთი „ივერია“, № 118.

80. რა გზას უნდა დაადგეს სამღვდლოება? გაზეთი „ივერია“, № 130.

81. რა არის კრიტიკა, გაზეთი „ივერია“, № № 128, 132.

82. ხელოვნური ნაწარმოების კრიტიკა, გაზეთი „ივერია“, № 133.

83. მიწის განსაზოგადოებრიობა, გაზეთი „ივერია“, № 136.

84. დღევანდელი მოძრაობა და სხვადასხვა კლასთა მისწრაფებანი, გაზეთი „ივერია“, № 140.

85. მუშათა კლასი და ხალხი, გაზეთი „ივერია“, № 145.

86. ერთობა, გაზეთი „ივერია“, № 146.

87. წვრილი მესაკუთრე და სოციალიზმი, გაზეთი „ივერია“, № 152.

88. კიდევ აგრარული საკითხის შესახებ, გაზეთი „ივერია“, № 154.

89. პროლეტარიატი და გლეხობა, გაზეთი „ივერია“, № 157.

90. გლეხობა და საწარმოო იარაღთა განსაზოგადოებრიობა, გაზეთი „ივერია“, № 160.

91. გლეხობა და სოციალ-ეკონომიური იდეალი, გაზეთი „ივერია“, № 161.

92. აუცილებელი გზა, გაზეთი „ივერია“, № 164 (მოწინავე წერილი).

93. აუცილებელი გზა, გაზეთი „ივერია“, № 167.

94. პასუხი დეკანოზ ღამბაშიძეს, გაზეთი „ივერია“, № 167.

95. წერილი რედაქციის მიმართ, გაზეთი „ცნობის ფურცელი“, № 2820.

96. ნ. ბარათაშვილი, გაზეთი „ივერია“, № 184.

97. შილერი. „საქართველოს კალენდარი“, 1905 წ., გვ. 299.

98. წერილები გლეხებისადმი, ჟურნ. „მოგზაური“, № 16, გვ. 253—254.

99. არა თუ ასეთი წერილმანი, ჟურნ. „მოგზაური“, № 28, გვ. 455.

100. წერილი რედაქციის მიმართ, ჟურნ. „მოგზაური“, № 28.

### 1906 წ.

101. ეროვნული საკითხი (ცალკე წიგნად).

102. Государственная Дума (Стенограф. отчет СПб телеграф. агенства). Заседание 15 июня. Гомартели. газета «Тифлисский листок», № 133.

1907 წ.

103. ნაწყვეტი წარსულიდან, გაზეთი „ცისკარი“, № № 1—3, 6, 7, 9, 11.
104. ექიმთან (ვოდვეილი ერთ მოქმედებად), ჟურნ. „ნიშადური“, № № 7—9.
105. ჭაშუში (სამ მოქმედებიან დრამა), გაზეთი „ჩვენი გზა“, № № 21, 23, 25—27, 29—31.
106. წერილი რედაქციის მიმართ, გაზეთი „ჩვენი გზა“, № 31.

1908 წ.

107. ტინი და სული (ცალკე წიგნად).
108. ჩაგრულთა პოეტი. წიგნი: ვ. რუხაძე, „ცისკარი“ (ლექსები), მესამე შესწორებული გამოცემა. ქუთაისი, 1908 წ., გვ. 1—7.
109. ქართული სენა, გაზეთი „ფასკუნჯი“, № 2.
110. უმეტრების რაზმ-რუხი, გაზეთი „ჩვენი კვალი“, № № 1, 2.
111. სამეცნიერო საუბარი, გაზეთი „ჩვენი კვალი“, № № 1, 2.
112. ილ. ჭავჭავაძის პოეზიის ერთი მხარე, გაზეთი „ჩვენი კვალი“, № 15.
113. როგორ გააჩინა ადამიანმა ღმერთი, გაზეთი „ალიონი“, № № 1, 2.
114. სამეცნიერო საუბარი, გაზეთი „ჩვენი ქვეყანა“, № 1.
115. ბლანკის ცხოვრება და მოღვაწეობა, გაზეთი „ჩვენი ქვეყანა“, № № 3, 4 (გაგრძელება აღარ მოყვა).
116. ებისკოფოსის სიზმარი, ჟურნ. „ეშმაკის მათრახი“, № № 21—25, 27.
117. უტოპისტები და მარქსის მოძღვრება, გაზეთი „მნათობი“, № № 1, 2 (გაგრძელება აღარ მოყვა).
118. ლევ ტოლსტოი (მისი იუბილეს გამო), გაზეთი „ეკალი“, № 5.
119. საფრანგეთის სახელმწიფო და საზოგადოებრივი წყობილება, ჟურნ. „ჩვენი“, № № 1—5.
120. სახელმწიფო წყობილება ინგლისში, ჟურნ. „ჩვენი“, № 6.
121. სახელმწიფო წყობილება ჩრდილოეთ ამერიკის შეერთებულ შტატებში, ჟურნ. „ჩვენი“, № № 7—9.
122. საჩინო გენძელაძე, მოთხრობა, ჟურნ. „ჩვენი“, № № 10, 11.
123. აშხანაგები. მოთხრობა, ჟურნ. „ჩვენი“, № 12.
124. განკითხვის დღე. პიესა ოთხ მოქმედებად. სალიტერატურო კრებული „ნი-აფი“, გვ. 43—140.
125. წერილები ფიზიოლოგიიდან, „ნაკადული“, საყმაწ. ჟურნ., № № 1, 3, 4, 6, 7.

1909 წ.

126. როგორ მოიპოვეს ვახტანგმა და თამარმა სრული ჭანის სიმთელე და შეიძინეს განვითარება გონებისა და ზნეობისა. წიგნი: ი. გოგებაშვილი, ბუნების კარი, მეთვრამეტე გამოცემა, 1909 წ., გვ. 391—408, და შემდეგ ყველა გამოცემაში იბეჭდება.
127. სარწმუნოება სამშობლოს სიყვარულისა (წაკითხული ლექცია ვ. ორბელიანზე). იბეჭდება პირველად.
128. სალიტერატურო შენიშვნები, ჟურნ. „სხივი“, № № 1, 2, 3, ხოლო IV თავი დაიბეჭდა ამავე ჟურნალის 1910 წ., № 4.

129. მოწინავე, გაზეთი „ფონი“, № № 10, 11, 12, 14.
130. ცოტა რამ ქალთა ცხოვრებიდან, ალმანახი „ჩვენი გუშაგი“, № 2.
131. სოფლად, ალმანახი „ახალი გუშაგი“, № 1.
132. წერილი მეგობართან, ალმანახი „ახალი გუშაგი“, № 2.
133. ვანოს მურია. ეურნ. „ჭეჭილი“, № 2.
134. სანდრო და ზურა. ეურნ. „ჭეჭილი“, № 3.

#### 1910 წ.

135. ხალხური ანდაზები და გამოცემები (არ დაბეჭდილა. დაცულია საქართველოს სახელმწიფო ლიტერატურულ მუზეუმში, ფონდი № 2431-ბ).
136. ჩაგრულთა პოეტი. წიგნში: ვ. რუხაძე, თაიგული (ლექსები), ბათუმი, 1910 წ., გვ. 1—6.
137. ნ. ბარათაშვილის პიროვნების და პოეზიის დახასიათება. წიგნში: ნ. ბარათაშვილის ლექსები და წერილები, თბ., 1910 წ., გვ. 20—32.
138. მავალას გასამართლება, დამცველის ივ. გომართლის სიტყვა, გაზეთი „ფონი“, № 4.
139. ლ. ანდრეევი, ეურნ. „თეატრი და ცხოვრება“, № 1.
140. დრამატული გამგეობის წევრი (ვოდევილი), ეურნ. „თეატრი და ცხოვრება“, № № 11—13.
141. მუსიკის მნიშვნელობა, ეურნ. „თეატრი და ცხოვრება“, № 19.
142. პატარა ფელეტონი, ეურნ. „თეატრი და ცხოვრება“, № 21.
143. საუბარი მეცნიერებიდან, ეურნ. „ჭეჭილი“, № 2.

#### 1911 წ.

144. ადამიანის ნება და ზნეობა (ცალკე წიგნად).
145. დავ. კლდიაშვილის მოთხრობანი. წიგნში: დ. კლდიაშვილი. მოთხრობები, ტ. 1, ბათუმი, 1911 წ., გვ. 27—71.

#### 1912 წ.

146. გიორგი სააკაძე (სიტყვა, წარმოთქმული სახალხო სახლში გიორგი სააკაძის გასამართლებაზე), ეურნ. „განათლება“, № 1, გვ. 60—66.
147. ოქახის ზნეობრივი მხარე, ეურნ. „განათლება“, № 5, გვ. 353—359.
148. შთაბეჭდილებანი. ბ. ახნაზაროვის ლექსები და სტენები, გაზეთი „თემი“, № 66.

#### 1913 წ.

149. ნაფიქრი. გაზეთი „ხმა კახეთისა“, 1913 წ., № № 21, 22.
150. შხის მგოსანი. წიგნში: ს. აბაშელი, შხის სიცილი, თბ., 1913 წ., გვ. 8—13.
151. ჰალადიდელის პოეზია, წიგნში: თხზულებანი ვ. ქოჩაქიძისა (ჰალადიდელის), ქუთაისი, 1913 წ., გვ. 1—6.
152. ნაფიქრი, გაზეთი „ჩვენი დროება“, № 7.
153. ვ. ი. რცილაძე, მცენარენი და ცხოველნი, გაზეთი „ჩვენი დროება“, № 9.
154. შთაბეჭდილებანი, გაზეთი „ჩვენი დროება“, № 20.
155. ალ. მირიანაშვილი. იგავ-არაკნი, გაზეთი „ჩვენი დროება“, № 20.
156. სქესობრივი საკითხი, ეურნ. „განათლება“, № № 1, 3, 4, 6.



157. სიმართლის აღდგენა, გაზეთი „თემი“, № 149.
158. რისთვის? გაზეთი „თემი“, № 150.
159. ჩემი პასუხი, გაზეთი „თემი“, № 151.
160. თათუშა (სტუდენტის ნაამბობი), გაზეთი „თემი“, № 151.
161. არამზადა (მოთხრობა), გაზეთი „თემი“, № 152.
162. კოტიკი (მოთხრობა), გაზეთი „თემი“, № 153.
163. იმავე საგანზე, გაზეთი „თემი“, № 155.

#### 1914 წ.

164. ასტრონომია (ცალკე წიგნად), თბილისი.
165. თამბაქო და მავარი სასმელები (ცალკე წიგნად), ქუთაისი.
166. სქესობრივი საკითხი და ბავშვი (ცალკე წიგნად), ფოთი.
167. კონსტანტინე დიმიტრის ძე ყიფიანი (მისი სასცენო და სალიტერატურო მოღვაწეობის იუბილეს სახსოვრად 1868—1914 წ.) (ცალკე წიგნად).
168. სევედის მგოანნი. წიგნში: გ. ტაბიძე, ლექსები, ტ. I, ქუთაისი, 1914 წ., გვ. 5—11.
169. ქართველი ქალის დანიშნულება, ეურნ. „განათლება“, № 2.
170. პატარა წერილი, ეურნ. „თეატრი და ცხოვრება“, № 1.
171. დაწყებული დღე (მოთხრობა), ეურნ. „თეატრი და ცხოვრება“, № 2.
172. ჩვენი მწერლობა და მთარგმნელი, ეურნ. „თეატრი და ცხოვრება“, № 4.
173. სადღესიო, ეურნ. „თეატრი და ცხოვრება“, № 5.
174. ნაწყვეტი (მოთხრობა), ეურნ. „თეატრი და ცხოვრება“, № 8.
175. ქართული თეატრის მოკლე ისტორია, ეურნ. „თეატრი და ცხოვრება“, № 12.
176. იასონის ოინები (ვოდვეილი), ეურნ. „თეატრი და ცხოვრება“, № 13—17.
177. პატარა წერილები, ეურნ. „თეატრი და ცხოვრება“, № 32.
178. სიყვარული (მოთხრობა), ეურნ. „თეატრი და ცხოვრება“, № № 33, 34.
179. ნიკორას სიკვდილი, ეურნ. „ჩეჭილი“, № 1.

#### 1915 წ.

180. აკაკი. წიგნში: „ორი სიტყვა“, გვ. 3—13.
181. აკაკის ავადმყოფობის გამო, ეურნ. „თეატრი და ცხოვრება“, № 3.
182. მემკვიდრეობა (მოთხრობა), ეურნ. „თეატრი და ცხოვრება“, № 12.
183. კონსილიუმი (მოთხრობა), ეურნ. „თეატრი და ცხოვრება“, № № 14, 15.
184. აკაკი (გარდაცვალების გამო), ეურნ. „ჩეჭილი“, № 2.
185. შირაქი. ეურნ. „ჩეჭილი“, № № 1—5.
186. ჩვენი მოღვაწე ქალები — ნინო ბეჟანის ასული ყიფიანისა. ეურნ. „განათლება“, № 4.

#### 1916 წ.

187. ზამთარი. ეურნ. „თეატრი და ცხოვრება“, № № 4—6.
188. აკაკი უკვდავია და ქართველთა სიამაყე, ეურნ. „თეატრი და ცხოვრება“, № 5.
189. მოგზაურობა სისხლის წვეთისა, ეურნ. „თეატრი და ცხოვრება“, № 8.

190. ირ. ევდოშვილი, ჟურნ. „თეატრი და ცხოვრება“, № 9.
191. უბრალო საუბარი უბრალო მკითხველთან, ჟურნ. „თეატრი და ცხოვრება“, № № 10, 11, 14, 15, 17, 20, 22, 23.
192. თამარ მეფე და ქართველი ქალი, ჟურნ. „თეატრი და ცხოვრება“, № 18.
193. იროდიონი, ჟურნ. „თეატრი და ცხოვრება“, № 19.
194. ერთობა, ჟურნ. „თეატრი და ცხოვრება“, № 19.
195. ლადო დარჩიაშვილი, ჟურნ. „თეატრი და ცხოვრება“, № 21.
196. ქართველი გრიგორიანები, ჟურნ. „თეატრი და ცხოვრება“, № 30.
197. მარო და ვარლამი, ჟურნ. „თეატრი და ცხოვრება“, № 32.
198. სოფლად, ჟურნ. „თეატრი და ცხოვრება“, № 37.
199. სოფელში, ჟურნ. „თეატრი და ცხოვრება“, № 38.
200. ქართველი ისრაელები, ჟურნ. „თეატრი და ცხოვრება“, № 39.
201. სოფლის დაკვირვებებიდან, ჟურნ. „თეატრი და ცხოვრება“, № 41.
202. ჩვენი ვალიკო, ჟურნ. „თეატრი და ცხოვრება“, № 42.
203. კრება, ჟურნ. „თეატრი და ცხოვრება“, № 43.
204. ვლადიმერ სტაროსელსკი, ჟურნ. „თეატრი და ცხოვრება“, № 44.
205. ნ. ბარათაშვილი, ჟურნ. „თეატრი და ცხოვრება“, № 47.
206. ეროვნული თვალსაზრისი, ჟურნ. „თეატრი და ცხოვრება“, № 49.
207. სადღეისო, ჟურნ. „თეატრი და ცხოვრება“, № 51.
208. თეატრი, ჟურნ. „თეატრი და ცხოვრება“, № 50.
209. ქრისტეს შობა, ჟურნ. „თეატრი და ცხოვრება“, № 52.

#### 1917 წ.

210. ორი მეგობარი, ჟურ. „ჩეჩილი“, № 1.
211. პატარა ქურდი, ჟურნ. „ნაკადული“, № 4.
212. საახალწლო, ჟურნ. „თეატრი და ცხოვრება“, № 1.
213. ს. ფაშალიშვილი, ჟურნ. „თეატრი და ცხოვრება“, № 4.
214. ალექსი ჭიჭინაძე, ჟურნ. „თეატრი და ცხოვრება“, № 6.
215. ჩემი მოგონება (ალ. ჭიჭინაძე), ჟურნ. „თეატრი და ცხოვრება“, № 6.
216. ახალი პოეზია (პოეტი ქალის სალომე ხალიანის შესახებ), ჟურნ. „თეატრი და ცხოვრება“, № 7.
217. პირველი კლასის კუპე, ჟურნ. „თეატრი და ცხოვრება“, № № 9, 10.
218. ქართველ დემოკრატიას, ჟურნ. „თეატრი და ცხოვრება“, № 11.
219. სადღეისო, ჟურნ. „თეატრი და ცხოვრება“, № 11.
220. სადღეისო, ჟურნ. „თეატრი და ცხოვრება“, № 12.
221. ჩვენი რწმენა, ჟურნ. „თეატრი და ცხოვრება“, № 13.
222. უბრალო საუბარი, ჟურნ. „თეატრი და ცხოვრება“, № 13.
223. რვა საათი სამუშაო დღე, ჟურნ. „თეატრი და ცხოვრება“, № 17.
224. ომი და ზავი, ჟურნ. „თეატრი და ცხოვრება“, № 19.
225. სადღეისო, ჟურნ. „თეატრი და ცხოვრება“, № 20.
226. საამდროო საუბარი, ჟურნ. „თეატრი და ცხოვრება“, № 22.
227. სადღეისო საუბარი, ჟურნ. „თეატრი და ცხოვრება“, № 23.

#### 1918 წ.

228. საერთო მდგომარეობა, გაზეთი „ალიონი“, № 21.
229. ომი და ზავი, გაზეთი „ალიონი“, № 18.

230. მწარე სინამდვილე, გაზეთი „ალიონი“, № 25.  
 231. ვიორჯი პლენხოვი, გაზეთი „ალიონი“, № 28.  
 232. ჩვენი მდგომარეობა, გაზეთი „ალიონი“, № № 29, 31, 33.  
 233. სოფელში, გაზეთი „ალიონი“, № 30.

1919 წ.

234. ვ. რუხაძის პოეზია, ეურნ. „ცისარტყელა“, № 1.

1920 წ.

235. ახალი გზა („ქამუშაძის გაქირვება“ დ. კლდიაშვილისა), წიგნში: დ. კლდიაშვილის მოთხრობები, ტ. 1, თბ., 1920 წ., გვ. 27—73.  
 236. სიტყვაკაზმული მწერლობა 1919 წელს, გაზეთი „ერთობა“, № № 1, 2.  
 237. სალიტერატურო შენიშვნები, გაზეთი „ერთობა“, № 62.  
 238. დავით კლდიაშვილის შემოქმედება, გაზეთი „ერთობა“, № № 41, 44.  
 239. წერილები ხელოვნებაზე, ეურნ. „ცისარტყელა“, № 4.  
 240. გ. ქუჩიშვილის პოეზია, ეურნ. „ცისარტყელა“, № 9, გვ. 79—88.  
 241. კ. ნადირაძე, ეურნ. „ცისარტყელა“, № 9, გვ. 89—96.  
 242. ი. გრიშაშვილის „საიათნოვა“, კრებული „ლეილა“, № 2.  
 243. ობოლი მუშის პოეზია. წიგნში: ობოლი მუშა. ლექსები.  
 244. ათი წელი უანგარო მოღვაწეობისა, ეურნ. „თეატრი და ცხოვრება“, № 13.  
 245. ხალხის გულის მესაიდუმლე (თხზულებანი ეგ. ნინოშვილისა), წიგნში ეგ. ნინოშვილი. თხზულებანი, ტ. 2, თბ., 1920 წ., გვ. 5—102.  
 246. ი. ირემაშვილი, წიგნში: ი. ირემაშვილი, რევოლუციის ტალღები. ისტორიული პიესა. თბ., 1920 წ., გვ. 3—5.  
 247. საუბარი სოფლის ხალხთან, გაზეთი „ახალი სხივი“, № 1.

1921 წ.

248. ვასული წლის (1920) სიტყვაკაზმული მწერლობა. ეურნ. „ცისარტყელა“, № 14.

1922 წ.

249. საქართველო და პოეზია, ეურნ. „სომალდი“, № № 4—5.  
 250. ნოე ჩხიკვაძე, წიგნში: ნ. ჩხიკვაძე. ლექსები, თბ., 1922 წ., გვ. 9—12.

1923 წ.

251. პოეზიის გარემო, ეურნ. „თეატრი და ცხოვრება“, № 1.  
 252. მუშა მგოსანი, ეურნ. „თეატრი და ცხოვრება“, № 2.  
 253. იშვიათი დღესასწაული, გაზეთი „ლომისი“, № 1.  
 254. პოეზიის წლისთავი, გაზეთი „პოეზიის დღე“, № 4.  
 255. ტკბილი ყმა (ვ. სარაჯიშვილი), გაზეთი „ლომისი“, № 34.  
 256. „ანთებული ხეივანი“, გაზეთი „ლომისი“, № 31.  
 257. სახალხო დრამატული დასის რეპერტუარი, საიუბილეო კრებულში: „სახალხო თეატრი“, 1893—1932, გვ. 18—25.  
 258. ეგნატე ნინოშვილი, გაზეთი „მიწის მუშა“, № 141.  
 259. ნაძრახი ღელე (მოთხრობა), გაზეთი „მიწის მუშა“, № 190.  
 260. დღეობა (მოთხრობა), გაზეთი „მიწის მუშა“, № 193.

261. ქეთო (მოთხრობა), გაზეთი „მიწის მუშა“, №№ 217.  
 262. წითელი ჯარის ბანაკში (მოთხრობა), გაზეთი „მიწის მუშა“, № 221.  
 263. დათიკოს ბატკანი (მოთხრობა), გაზეთი „მიწის მუშა“, № № 230, 231.  
 264. ტვინი და სული (ქრისტე, სული, საიქიო, ღმერთი), გაზეთი „მიწის მუშა“, № № 232, 238.  
 265. ნიგვზიეთის ღვთისმშობელი (ანტირელიგიური მოთხრობა), გაზეთი „მიწის მუშა“, №№ 244, 247, 249, 251, 258, 260, 264, 267, 269.

1924 წ.

266. ნიგვზიეთის ღვთისმშობელი (ცალკე წიგნად).  
 267. გრამაშვილის პროფილი, კრებული „ლეილა“, № 3.  
 268. მ. ჭავჭავიძე-მ. ადამაშვილი, წიგნში: მ. ჭავჭავიძე-მ. ადამაშვილი, მოთხრობები, თბ., ტ. 1, 1924.  
 269. ალ. ყაზბეგი და მისი ძიება, წიგნში: ალ. ყაზბეგი, რჩეული მოთხრობები, ტ. 1, გვ. 11—20.  
 270. ტასო აბაშიძე, გაზეთი „ქართული სიტყვა“, № 10.  
 271. ვაშა ტასოს! გაზეთი „ქართული სიტყვა“, № 13.  
 272. ჩვენი თეატრის გარშემო, გაზეთი „ქართული სიტყვა“, № 14.  
 273. შორი ნათელი, გაზეთი „ქართული სიტყვა“, № 16.  
 274. ქართული ჟურნალი „აკაკასიონი“, № 1—2, გაზეთი „ქართული სიტყვა“, № 20.  
 275. სახალხო სცენის გოლიათი, გაზეთი „ქართული სიტყვა“, № 20.  
 276. ჟურნ. „აკაკასიონი“, № 3—4 (რეცენზია), გაზეთი „ქართული სიტყვა“, № 27.  
 277. ვიქტორ ზამბახიძე (მოთხრობა), გაზეთი „მიწის მუშა“, № № 311, 312, 315, 316, 319, 320, 323, 325, 506, 508, 510, 512, 514, 516, 518, 520, 523, 525.  
 278. ორი იანვარი და ჩვენი თეატრი, ჟურნ. „თეატრი და ცხოვრება“, № 1.  
 279. პოეზიის ახალ გზაზე, ჟურნ. „თეატრი და ცხოვრება“, № 2.  
 280. კრიტიკული შენიშვნები. ივ. ელიაშვილის „სამშობლო ბუნების სარკე“, ჟურნ. „თეატრი და ცხოვრება“, № 3.  
 281. განვლილი სეზონი ქართული აკადემიური თეატრისა, ჟურნ. „ხელოვნების დროშა“, № 1.  
 282. ეიუნ-შაგრი, „ტყის ზღაპარა“, ჟურნ. „თეატრი და ცხოვრება“, № 4.  
 283. არიმანი, ლურჯი კაბარე, ჟურნ. „თეატრი და ცხოვრება“, № 5.  
 284. იონა ვაკელი, ჟურნ. „თეატრი და ცხოვრება“, № 7.  
 285. ნიკო გოცირიძე (მისი იუბილეს გამო), ჟურნ. „თეატრი და ცხოვრება“, № 8.  
 286. ოვანეს თუმანიანი, ჟურნ. „თეატრი და ცხოვრება“, № 17.  
 287. ქართული რომანის დღესასწაული, ჟურნ. „თეატრი და ცხოვრება“, № 17.  
 288. აღდგომა, გაზეთი „მიწის მუშა“, № 331.  
 289. საიქიო, გაზეთი „მიწის მუშა“, № 333.  
 290. სული, გაზეთი „მიწის მუშა“, № 336.  
 291. ტვინი თუ სული, გაზეთი „მიწის მუშა“, № 342.  
 292. ეგ. ნინოშვილი (გარდაცვ. 30 წლისთავი), გაზეთი „მიწის მუშა“, № 345.  
 293. ორიენტაციის საკითხი, ჟურნ. „ახალი გზა“, № 2.

294. ილ. ჰაკვაძე და მისი მხატვრული შემოქმედება, ჟურნ. „ახალი კავკასიონი“, № 1—2.
295. მუშათა კლასის მწერალი, წიგნში: პ. ირეთელი, დამარცხებულნი. ქრისტინე, თბ., 1925 წ., გვ. 4—7.
296. ჩვენი თეატრი, ჟურნ. „თეატრი და ცხოვრება“, № 1.
297. გ. წერეთელი, ჟურნ. „თეატრი და ცხოვრება“, № 3.
298. სასარგებლო წიგნი, და ლომოური, ციებ-ცხელება ანუ მალარია საქართველოში, ჟურნ. „თეატრი და ცხოვრება“, № 7.
299. წარსულიდან. ძველი რომი. ძმები გრაიხები. ქრისტე, ჟურნ. „ახალი გზა“, № 3.
300. წარსულიდან, ჟურნ. „ახალი გზა“, № 5.
301. ბურჟუაზია და პატარა ერები, ჟურნ. „ახალი გზა“, № 8.
302. რა უნდა იხსოვდეს ყოველ მუშას და გლეხს, ჟურნ. „ახალი გზა“, № 12.
303. იონა ვაკელი, ახალი პოემა „ევეროპა“, ჟურნ. „თეატრი და ცხოვრება“, № 8.
304. ინტელიგენცია და გაერონების საკითხი, ჟურნ. „ახალი გზა“, № 13.
305. ეროვნული საკითხი, ჟურნ. „ახალი გზა“, № 14.
306. ჩვენი სოფელი, ჟურნ. „ახალი გზა“, № 15.
307. „ჩაყოს ხიზნები“ და ჩვენი ცხოვრება, ჟურნ. „ახალი გზა“, №№ 16, 17.
308. სალიტერატურო შენიშვნები (პროლეტარული მწერლობა), ჟურნ. „ახალი გზა“, № 18.
309. პირველი მაისი, ჟურნ. „ახალი გზა“, № 19.
310. მუშათა კომისია და მისი მოღვაწეობა, ჟურნ. „ახალი გზა“, № 37.
311. წითელი ოქტომბერი (მოთხრობა), გაზეთი „ახალი სოფელი“, № 2.
312. საუბარი მიწის მუშასთან, გაზეთი „ახალი სოფელი“, № 2.
313. ბაბუას კითხვა უსწავლია (მოთხრობა), გაზეთი „ახალი სოფელი“, № 3.
314. მარიაში და ირაკლი (მოთხრობა), გაზეთი „ახალი სოფელი“, № 6.
315. თავად მანუჩარის სიზმარი (მოთხრობა), გაზეთი „ახალი სოფელი“, № 7.
316. უწინ და ახლა (მოთხრობა), გაზეთი „ახალი სოფელი“, № № 13, 16.
317. ბესიას სიზმარი (მოთხრობა), გაზეთი „ახალი სოფელი“, № 17.
318. ბოქაული (მოთხრობა), გაზეთი „ახალი სოფელი“, № 22.
319. ლევანას გიორგი (მოთხრობა), გაზეთი „ახალი სოფელი“, № 50.
320. სოსიას შემთხვევა, გაზეთი „ახალი სოფელი“, № 51.
321. ტვინი და სული (ცალკე წიგნად).

## 1926 წ.

322. მუშა მგოსანი. წიგნში: გ. ხეჩუაშვილი, ლექსები, ტ. II, თბ., 1926 წ., გვ. 5—8.
323. „ამლეტი“ ჩვენს სცენაზე, ჟურნ. „თეატრი და ცხოვრება“, № 13.
324. მარო (მოთხრობა), გაზეთი „ახალი სოფელი“, № 72.
325. საიქიო, სამოთხე და ჯოჯოხეთი, გაზეთი „ახალი სოფელი“, № 102.
326. მალარია და მასთან ბრძოლა (ცალკე წიგნად).
327. სიგიჟეს მამაცთა ვუგალობ დიდებას! „დურგუი“, 19-26/1-26 წ., სადღესასწაულო გამოცემა: ჩვენს მასწავლებელს — საპატიო კორპორანტს ქ. მარჯანიშვილს (კრებულო), გვ. 2.

1927 წ.

328. თავის მოვლა (ცალკე წიგნად).  
 329. ახალი ავტონომიის საშუაღისი, ჟურნ. „ახალი გზა“, № 1.  
 330. საუბარი, ჟურნ. „ახალი გზა“, № 3.  
 331. საუბარი, ხელოვნება, ჟურნ. „ახალი გზა“, № 9.  
 332. საუბარი პროლეტარულ ხელოვნებაზე, ჟურნ. „ახალი გზა“, № 10.  
 333. ს. ეული, ჟურნ. „ახალი გზა“, № 14.  
 334. ალ. მაშაშვილი, ჟურნ. „ახალი გზა“, № 17.  
 335. ჩენი მოვალეობა, ჟურნ. „ახალი გზა“, № № 22, 43.  
 336. ფრთხილად საბჭოთა საღარაჯოზე, გაზეთი „ახალი სოფელი“, № 110.  
 337. ქრისტეს აღდგომა ტყუილია, გაზეთი „ახალი სოფელი“, № 111.  
 338. ლამაზი კატო (მოთხრობა), ჟურნ. „შრომელი ქალი“, № № 10, 11.  
 გვ. 23—25.

1928 წ.

339. დაწყებული დღე (მოთხრობა), კრებ. „პატარა ჩანგი“, თბ., 1928 წ., გვ. 83—89.  
 340. ჩვენ ისევე ავსდგებით! სატირული პიესა 3 მოქმ. აპოთეოზით. სანიტ-განათლების კრებ., წ. IV—V, 1928 წ., გვ. 17—22.  
 341. გლეხის კარაბადინი (ცალკე წიგნად).  
 342. შიწის მუშის მტრები, საუბარი სხვადასხვა ავადმყოფობაზე (ცალკე წიგნად).  
 343. მაქსიმ გორკის ცხოვრება და შემოქმედება (ცალკე წიგნად).  
 344. ი. გრიშაშვილის „ძველი თბილისის ლიტერატურული ბოქეა“, ჟურნ. „ახალი გზა“, № 60.  
 345. მაქსიმ გორკი, ჟურნ. „ახალი გზა“, № 63.  
 346. როდიონ ქორქია, ჟურნ. „ახალი გზა“, № 63.  
 347. მგზავრის შთაბეჭდილებანი, გაზეთი „კომუნისტი“, № № 261, 267, 273, 275, 279, 285.

1929 წ.

348. შთაბეჭდილებანი (მოსკოვი-ბერლინი-პარიზი) (ცალკე წიგნად).

1931 წ.

349. სამი დროება. რომანი-ქრონიკა (ცალკე წიგნად).

1935 წ.

350. საუბარი სარწმუნოების საკითხებზე, გაზეთი „მებრძოლი ათეისტი“, № 4, 7, 10, 11, 15, 16, 17, 18.

1936 წ.

351. ბავშვის ნაწლავების მუქთახორები (ცალკე წიგნად).  
 352. საშა წულუკიძე (მოგონება), დაცულია მარქსიზმ-ლენინიზმის საქ. ფილიალის პარტიულ არქივში, ფონდი 12798, საქმე 273, აღწ. 2.

1937 წ.

353. საუბარი ჯანმრთელობის საკითხებზე, ტ. I (ცალკე წიგნად).

1955 წ.

354. კრიტიკული შენიშვნები: „ამოდის, ნათდება“ და სხვა მოთხრობები ვაჟა-ფშაველასი. შესულია ი. ბოცვაძის მიერ შედგენილ ქრესტომატიაში: „ვაჟა-ფშაველა ქართულ ლიტერატურულ კრიტიკაში“, ტ. I, თბ., 1955 წ., გვ. 190—193.

1964 წ.

355. კოტე ყიფიანი, წიგნში: კ. ყიფიანი, მოგონებები, წერილები, თბ., 1964 წ., გვ. 98—108.

## ს ა რ ჩ ე ვ ი

ახალი გზა . . . . .	5
ორმოცდაათი წელი ქართული თეატრისა	22
დავ. კლდიაშვილის მოთხრობანი . . . . .	32
მაქსიმ გორკი (კრიტიკულ-ბიოგრაფიული წერილი)	42
შილერის პოეზიის ძირითადი თვისებანი . . . . .	52
ჩაგრულთა პოეტი . . . . .	90
ქართული სცენა . . . . .	94
ხალხური ანდაზები და გამოცანები	97
მზის მგოსანი . . . . .	100
აღ. მირიანაშვილი. იგავ-არაკნი	105
პატარა წერილი . . . . .	108
ქართველი ქალის დანიშნულება	110
კონსტანტინე დიმიტრის ჭე ყიფიანი . . . . .	115
ჩვენი მოღვაწე ქალები — ნინო ბეჟანის ასული ყიფიანისა	145
თეატრი . . . . .	154
ჩვენი ვალიკო . . . . .	158
ს. ფაშალიშვილი . . . . .	161
სიტყვაკაზმული მწერლობა 1919 წელს	165
დავით კლდიაშვილის შემოქმედება	175
გ. ქუჩიშვილის პოეზია . . . . .	185
ი. გრიშაშვილის „საიათნოვა“	194
ლიტერატურული შენიშვნები	197
ნოე ჩხიკვაძე . . . . .	233
სახალხო დრამატიული დასის რეპერტუარი	237
იშვიათი დღესასწაული . . . . .	246
„ანთებული ხეივანი“ . . . . .	248
ტკბილი ყმა . . . . .	255
ქართული ჟურნალი . . . . .	258
განვლილი სეზონი ქართული აკადემიური თეატრისა	266
მიხეილ ჭავჭავაძის-ადამაშვილი	275
ნიკო გოცირიძე . . . . .	283
სახალხო სცენის გოლიათი . . . . .	265
გრიშაშვილის პროფილი . . . . .	289
ორი იანვარი და ჩვენი თეატრი . . . . .	292
ოვანეს თუმანიანი . . . . .	295
ტასო აბაშიძე . . . . .	298
ვაშა ტასოსი . . . . .	301
ჩვენი თეატრის გარშემო . . . . .	307



იონა ვაკელი	306
ისევ ჩვენი თეატრისათვის	311
„ჩაყოს ხიზნები“ და ჩვენი ცხოვრება	315
იონა ვაკელი. ახალი პოემა „ევროპა“	325
ჩვენი თეატრი	329
მუშათა კლასის მწერალი	331
„პამლეტი“ ჩვენს სცენაზე	336
ალიო მაშაშვილი	340
სანდრო ეული	347
მაქსიმ გორკის ცხოვრება და შემოქმედება	351
როდიონ ქორჭია	387
გრიშაშვილი. „ძველი თბილისის ლიტერატურული ბოქემა“	391
მაქსიმ გორკი	398
საშა წულუკიძე	404
ივანე გომართელი. ცხოვრება და მოღვაწეობა. (ე. წოწ ე ლ ი ა ს ი)	409